

АЗИЗ ҚАЮМОВ

**АБУ РАЙХОН БЕРУНИЙ
АБУ АЛИ ИБН СИНО**

Тошкент
Узбекистон ЛКСМ Марказий Комитети
«Ёш гвардия» нашриёти
1987.

4702570200 59
356 (04) 87 51—87

© Издательство «Ёш гвардия», 1987.



Абу Райҳон Беруний



МЕХРИБОНЛИК

Амударё тўлқинлари қирғоққа куч билан урилади. Улар соҳил тупроқларини ялайдилар, юлғунлар томирини ялангочлайдилар. Сал туриб заминдан ажралган дараҳт сувга ағдарилади. Оқим уни олиб кетади. Тўлқинлар яна ўз ишида давом этади, яна қирғоққа ёпишади, яна янги-янги ниҳоллар, шохлар, томир ёйган ажриқларни ўз қаърига тортади. Бу жараён йиллаб давом этади. Дарё шарққа сурилиб боради. У шаҳарларни ютади, далаларни торайтиради, муттасил ўз йўналишини ўзгартира боради. Дарё тўлқинларининг ҳаракати тарих оқимиdek бетўхтов, шафқатсиз ва қатъий.

Аммо халқ иродаси, унинг яратувчилик қудрати ҳам шунчалар зўр. У қадимий Хоразм тупрогининг ҳар қадамини боғу бўстон, экинзорларга айлантирган, белоён савдо йўллари, муҳташам карвонсаройлар, мустаҳкам қалъалар, обод шаҳарлар бино қилган, илм-фан масканлари яратган, улуғ фарзандлар тарбиялаб етиштирган.

Хоразм давлатининг пойтахти — Кат ана шундай воқеаларга шоҳид. Амударё бу шаҳарга йил сайин ҳамла қиласди, гоҳ унинг дарвозасини олиб кетади, гоҳ соҳил бўйларини ювиб нуратади. Лекин одамлар ўз туғилиб ўсан жойларини ҳеч қачон ташлаб кетмайдилар. Улар дарёга ем ҳам бўлмайдилар. Одамлар шарқ томонга сал силжиб, яна бир янги шаҳар қурадилар. Хоразм меъморлари олдингидан ҳам улуғвор ва кўркамроқ иморатлар бино этадилар. Кат шаҳрининг иқтисодий ва сиёсий салмоғи, унинг фан ва маданият маркази сифатидаги шуҳрати ошса ошадики, камаймайди. Дейдиларки, Кат ўша даврдаги азим ва шариф шаҳар Бухородан катта бўлган, ўзининг донишманд ўқимишли кишилари билан Ироқдаги машҳур марказлардан устун турган. Агарда Кат шаҳрининг ҳаётини эл кўпчилик бўлиб яратган, бузилганида қайта тиклаган бўлса, шу элнинг шуҳратини унинг юксак истеъдодли фарзандла-

ри вужудга келтирдилар, бу шуҳратни дунё ва тарихга ёйдилар.

Ҳасрнинг охирги чораги. Қатда хоразмшоҳларнинг афригийлар сулоласи ҳукмронлик қиласи. Ҳокимиятда Абу Абуллоҳ Мұҳаммад ибн Аҳмад ибн Ироқ барқарор. Подшоҳнинг таянчларидан бири унинг амакивач-часи, ўз замонасининг таниқли олим ва мутафаккирларидан бири Абу Наср ибн Али Ироқ эди. Абу Наср ибн Ироқнинг математика ва астрономияга оид асарлари жаҳон фанида эътироф топган.

Баҳор эртаси, Қат қалъасидаги шоҳона хоналардан бири. Уй ўртасидаги хонтахтага дастурхон тузалган. Унинг атрофида икки улфат шошилмай нонушта қилиб суҳбатлашмоқдалар. Улардан бири 35—40 ёшлар чамаси тўладан келган, нуроний юзли, кўзида улуғ сифатлик ва тафаккур нурлари порлаган бир зот. Бу Абу Наср ибн Ироқ. Абу Наср туни билан осмоний жисмлар, уларнинг ҳаракатларини кузатар, кундузи эса озгина ҳордиқ чиқарип сўнгра кечаси йиққан маълумотларини ишлаб чиқар эди. Унинг нонушта пайти бирдан бир холи фурсат. Олим эрталаб ўзининг яқин бир дўсти билан суҳбат қуришни яхши кўрар эди. Хоразмшоҳга унинг донолиги, ҳушёр ва зукколиги, одоб ва тавозеси ёқар эди. У ниҳоятда камтарин, беғараз, ўзининг баланд даражали дўсти билан яқинлигини ҳеч қаҷон пеш қилмайдиган ботамиз, хоксор бир киши. Дўстларнинг бугунги суҳбатида истеъодод тўғрисида сўз кетди. Суҳбатдошларнинг ўзи пуристеъодод кишилар бўлганидан улар табиий қобилиятни жуда қадрлар эдилар.

— Шоҳ ҳазратлари,— деди меҳмон қўлидаги пиёлани дастурхон четига аста қўйиб,— мен Берунда (шаҳар ташқарисида) бир ўспиринни учратдим. Ҳолати ғоят юпун; аммо табиатида юксак қобилият дурлари пинҳондир. Агар сиз олий зотнинг таважжуҳ шуъласи бу гавҳарни ёритса, ундан фан оламига не-не чароғонлик, жаҳл зулматига не-не азият етмиш бўлур эди.

— Кимдир у фақир?

— Номи Мұҳаммад ибн Аҳмад. Ёши ўн тўрт-ўн бешларда. Отадан сағир қолган. Онаси иккаласи яшашади. Камбағаллик билан кун ўтказишади.

Меҳмон бу гапни шоҳга айтмоқ учун анчадан бери фурсат танлар эди. Истеъодод мавзуидаги бугунги суҳбат шу ниятнинг ижросига қулай имкон берди.

— Болани эртага бў ерга келтирсангиз.

— Бажонидил, ҳазратим.

Меҳмон эртаси куни эрталаб Муҳаммад ибн Аҳмадни Хоразмшоҳ ҳузурига бошлаб келди. Абу Наср келганларни дастурхонга таклиф қилди. Шоҳнинг дўсти ва унинг ёнидаги йигитча одоб билан қўйида тиз чўкдилар.

Мезбон хонтахтанинг юқори томонида юмшоқ парқуга ёнбошлаб ўлтирас эди. У Муҳаммадга чуқур нигоҳ ташлади.

Муҳаммад ибн Аҳмад ғоят оэгин, чеҳраси рангсиз, юзига темратки тошиб кетган эди. Унинг анчадан бери олинмаган соchlари қулоги устига ўсиб тушган, улар устидан эски дўппи бостириб кийилган; эгнида катта ва ювила берганидан ўнгиб ва тўзиб кетган кўйлак осилиб туради. Ялангоёғида катта эски кавуш. У ўлтирган жойида ўқтин-ўқтин хонтахта устидаги таомларга кўз ташлар, қорни оч бўлса-да, улуғ одамлар олдида овқатга қўл чўзишдан андиша қилиб, жим одоб сақлаб ўлтирас эди.

— Ҳусниҳатни машқ қилурмисен,— деб суҳбат орасида сўради Абу Наср Муҳаммаддан.

— Машқ қилурмен,— деди йигитча ва ёнидаги жузвидондан бир қофоз олиб олимга узатди. Бу қофозга араб тилидаги бир тўртлик шеър ўртача ҳусниҳат билан жалий (йирик ҳарфлар билан ёзилган ёзув) усулида кўчириб ёзилган эди.

Абу Наср хатни кўздан кечирав экан, ундаги ҳусниҳат қоидаси бузилган жойларга аҳамият берди. Аммо, умуман йигитнинг ёзувидан мамнун бўлди.

— Араб тилидаги қайси олд ва орт қўшимчаларни билурсен.

— Боу, тоу, кофу, лому, вову, мунзу, муз, ҳало, рубба, ҳошо фи, ало, мин, ан, ало, ҳатто, ило,— деб Муҳаммад бу қўшимчалардангина тузилган байти-қироат билан ўқиди.

Абу Наср йигитчага астрономия, география, ҳикмат, математикага оид саволлар берди. Муҳаммад бу саволларга тез ва тўғри жавоблар қилди.

Абу Наср хурсанд бўлиб кетди. У дўстига қараб суря тилида деди:

— Айтганингиз тўғри эркан. Бу болада оллоҳ баҳш этган улкан истеъод мавжуд. Мен бу йигитчани ўзим парвариш этиб илм таҳсилига йўллаяжакман. Агар у

тіришиб меҳнат қилса, иншооллоҳ, Абу Наср ибн Ироқ-нинг муносиб шогирди бўлғусидир.

Абу Наср сўзларини тугатиб Мұҳаммадга қаради. Мұҳаммаднинг кўзида севинч порлар эди. «Тушунипти гапларимни. Демак, бу бола суря тилини ҳам билар экан», деб ўйлади, Абу Наср ибн Ироқ. У ҳақ эди. Мұҳаммад она тили — хоразмий тилидан ташқари яна араб, юони, суря тиллари билан ҳам таниш эди.

Орадан бир неча вақт ўтди. Мұҳаммад устози Абу Наср ибн Ироқ қўлида математика, астрономия фанларидан чуқур билим олди. Яна у наботот (ботаника), жуғрофия (география), ҳикмат (физика), тарих тишлинослик, адабиёт, вазн илми, фалсафа ва бошқа илмларни ўрганди.

Мұҳаммад ибн Аҳмад илм таҳсилидага кўп ютуқларга эришди. У ўзининг юксак даражали ҳимоячиси ва устози давлатининг соясида унумли ишлаб бир неча йил ўтгач, замонасининг таниқли олимларидан бири бўлиб етишди. Бу ёш олимни энди Абу Райҳон Беруний деб атай бошладилар.

Абу Райҳон сўзи Райҳоннинг отаси демакдир. Ёш олим бу хушбўй ўсимликни жуда ёқтирас ва муттасил қўлида олиб юрар эди. Беруний эса Қат шаҳрининг ташқариси (Берун)га — олимнинг туғилиб ўсган жойга нисбат эди.

ЕР ЯРИМ КУРРАСИННИГ СУВРАТИ

988 йил. Жанубий ёз тунларидан бири. Юлдузлар тўла осмон сирли жимирлайди.

Дала ўртасидаги баландликда расадхона. Унинг икки бурчида Абу Наср ибн Ироқ ва Абу Райҳон Беруний осмон жисмларини кузатиш билан бандлар. Абу Райҳон гоҳо ўз кузатувчи асбобидан узилиб устоз ишлаетган ёқقا келади, ундан бир нарсаларни сўрайди, устознинг айтганларини тез-тез ёзиб олади-да, яна ўз ўрнига қайтиб машгулотини давом эттиради. Абу Райҳон бутун вужуди билан осмон ёритгичларининг ўринларини аниқлаш, уларнинг ҳаракатларидағи қонуниятларини ўрганиш, осмоний жисмлар ҳаёти, моҳиятини билиб, ундан Ер сайёрасининг ҳаёти қонуниятларини ечишга интилади. Абу Райҳон Беруний ҳозир мустақил илмий тадқиқотларга дадил киришган. У тунлари билан осмоний жисмларга оид кузатишлар ўтказади.

Сўнг озгина дам олиб сўнг яна ишга киришади. Кундузи билан у қёш ҳаракати, у орқали ер юзидағи турли ҳолат ва кўринишларни тадқиқот этиш билан банд.

Амударёning гарбий соҳилида Журжония ва Катшаҳарлари орасида бир қишлоқ бор. Унинг номи Бушканз. Бу қишлоқнинг бошқа Хоразм қишлоқларидан фарқи кам. Атрофи боғлар ва экинзорлар билан ўралган. Дарёдан чигир билан чиқариладиган сув уларни суоради.

Кундузи билан қишлоқда ҳар ким ўз иши билан овора. Деҳқонлар далада. Хотинлар йиғлаган болаларини юпатишга ҳаракат қиласидар, уй йиғиширадилар, ўчоққа ўт ёқиб таом ҳозирлайдилар, далага овқат элтиб эрларининг ишига қарашадилар. Қўшга қўшилган ҳўқизлар итоаткорлик билан ҳорғин ер ҳайдайдилар. Турмуш ўзининг бетўхтов оқимида давом этади. 990 йил ёз пайтида шу алфозда ҳаёт кечираётган Бушканз қишлоғига яқин жойдаги тепаликда ўн олти ёшлар чамаси бир йигит пайдо бўлди. У ўзининг турли-туман асбоблари билан бу тепаликда эрталабдан кечгача тинмай ўралашади. У гоҳ қуёшга боқади, гоҳ ердаги сояларни ўлчайди. Унинг асбоблари ичида бир катта доирага ўхшаш нарса бор. Бу доиранинг ўртасида айланадиган жой бўлиб унда тўқсон градусли ўлчов айланмаси жойлашган. Сифр даражада ўша жойнинг горизонтал ҳолатига тўғри келади.¹

Бу ёш тадқиқотчи Абу Райхон Беруний эди.

Уша асбоблар ёрдамида Беруний Хоразмнинг Бушканз қишлоғида Қуёшнинг энг тик пайтидаги ҳолатини ўлчади. Энг кичик сояга асосланиб аниқланган бу ҳолат $79^{\circ}59'45''$ чиқди. Энг катта оғиш $23^{\circ}35'45''$. Шуларга асосланиб Бушканзнинг ўрнашган кенглиги $41^{\circ}36'$ эканлигини Беруний ҳисоблаб чиқди².

Ер юзасидаги ҳар бир шаҳар, қишлоқ, ҳар бир кўл ва дарёning ўрни бор. Шуларни аниқлаб чиқилса, улар ўртасидаги масофани, уни босиб ўтмоқ учун керак бўладиган вақтини белгилаб олиш; маълум жойда бир

¹ Берунийнинг бу ўлчов асбоби ва у орқали қуёш тиклигини ўлчаш усули П. Г. Булгаковнинг «Жизнь и труды Беруни» («Берунийнинг ҳаёти ва асарлари») китобида муфассал баён қилинган (Т. «Фан» 1972, с. 31—32).

² П. Г. Булгаковнинг хабар беришича, бу натижага ҳозир қўлланилмоқда бўлган кўрсаткичлардан фақат $1^{\circ} 33'$ фарқ қиласиди холос (ўша китоб, с. 32).

вақт бўлганда, бошқа жойда қандай вақт бўлишини ҳисоблаб чиқиш мумкин.

Ер курра шаклида. Ундаги ўринларни белгилаб олмоқ учун ана шундай бир курра ясаш керак. Абу Райҳон Беруний бу тўғрида кўп бош қотирди. У шундай бир куррани ясамоқчи бўлди. Аммо унда мўлжалланган жойларнинг ҳаммасини сифдириш ер сиртидан барча мамлакатларга оид маълумотларни жамлаш ғоят мушкул иш эди. Шунинг учун Беруний Хоразм, Кат билан боғлиқ жойларнигина бу куррага туширмоқчи бўлди.

Шу борада Беруний билан устоз Абу Наср ибн Ироқ ўрталарида шундай суҳбат бўлиб ўтди:

— Ер куррасининг сувратини ясамоқча кўмаклашувчи қандай китобларни мутолаа этдингиз,— деб сўради Берунийдан устоз.

— Птоломейнинг «Жуғрофия» китобини, ҳамда Жайҳонийнинг «Йўллар ҳақидаги китоби»ни,— деб жавоб берди Беруний.

— Куррада кўрсатмоқ учун бу умумий маълумотлар етарли бўлмайди. Хоразм тўғрисида аниқ билимлар даркор.

— Айрим жой ва шаҳарлар номини, улар ўртасида масофаларни шу жойларни кезган ва кўрган кишилардан сўраб билганман. Уларнинг айтганларини бир-бирига таққослаб текшириб чиқсанман,— деди Беруний.

У ҳар бир саҳифаси фиж-ғиж жадвал, рақам ва ёзув билан тўла бир неча дафтарларини устозга узатди.

Абу Наср бу дафтарларни олиб диққат билан варақлаб чиқди, сўнг деди:

— Ярим курра ясалса кифоя. Унда шу аниқ маълумотларни акс этириш мумкин. Фақат ясаладиган ярим курранинг ҳажми каттароқ бўлса, жойларни унда белгилаш қулайроқ бўлади.

Шу маслаҳатга биноан Беруний ярим куррани асос узунлиги ўн беш газ қилиб ясади. Унда барча билган жойлари ва улар ўртасидаги масофани белгилаб чиқди. Шундай қилиб инсоният тарихида биринчи бор ҳозир бизда жуда маълум ва машҳур глобус пайдо бўлди. Бу глобусни X асрнинг охирларида, аниги 994—995 йиллари Хоразмда йигирма бир яшар олим Абу Райҳон Беруний ясаган эди.

БИРИНЧИ МУҲОЖИРЛАР

Ҳаёт оқими тўхтосиз, аммо бир текис эмас. У дарё сувларидек гоҳо тинч ва виқор билан оқади, гоҳо тўлқинланиб атроф борлиққа ларза солади. Ана шундай ларза Хоразмда 995 йили содир бўлди.

Хоразмлик икки ҳукмдор Кат подшоҳи Абу Абдулло Мұҳаммад ва Гурганждаги амир Маъмун ибн Муҳаммад урушқоқ қашқирлар сингари бир-бирларига ташландилар. Ўруш Маъмуннинг ғалабаси билан тугалланди. Кат подшоҳи Абу Абдулло қатл этилди. Абу Наср ибн Ироқ ва Ироқнинг шогирди ёш олим Берунийнинг бошларига таҳликали кунлар тушди.

Йигирма икки яшар Абу Райҳон Беруний ўз илмий ишларини тўхтатиб, ҳаётини сақлаб қолиш мақсадида аввал душмандан беркинди, сўнг паноҳ излаб Катдан чиқиб кетди. У Эроннинг Рей шаҳарига бориб истиқомат қила бошлади.

Исфаҳонли бир савдогар таниши Берунийни ўз уйида жойлаштирган эди. Берунийнинг яна бошқа танишлари ака-ука Ҳасан ва Ҳусанлар ҳам ёш мусофири олимга кўмаклашиб турдилар.

Рей шаҳари қадимий шарқнинг танилган илмий марказларидан бири. Ўрта асрнинг улуғ олими — табиб ва файласуф Абу Бакр ар Розий (865—925) ҳам шу шаҳарда яшаб ижод этган.

Дарбадарлик ва сарсонлик қанча оғир бўлмасин, турмушнинг ажойиб яхши ҳадялари ҳам бўлиб туради. Мусофирикда кулфатларини енгиллаштирган ҳалиги дўстларнинг илтифоти устига, тақдир Рейда Берунийга яна бир ёқимли учрашув насиб этди. Бу ёш олимнинг Абу Маҳмуд Хўжандий билан шахсан танишиб мулоқот этиши эди.

Устоз Абу Маҳмуд Хўжандий ҳам Беруний билан учрашганидан мамнун бўлди. У ёш олимга ўзининг расадхонаасини кўрсатди. Бу расадхона Рей шаҳрининг маърифатли ҳокими — Фахруддавла шарафига унинг номи билан аталар эди. Чунки Абу Маҳмуд шу ҳокимнинг ёрдами ва қувватлаши туфайли ўз расадхонаасини бино эта олган.

Абу Маҳмуд Хўжандий меҳмон Берунийга расадхонанинг ҳаммаёни кўрсатди. Ёш олим устоз муҳажжимнинг сўзларини диққат билан тинглар, илмий

кузатишлар учун барча қулайликларга эга бўлган бу даргоҳга ҳавас билан боқар эди.

Абу Маҳмуд Хўжандий ўзи ясаған Фахрий сектанти деган асбобни Берунийга намойиш қилганида меҳмон яна қаттиқ мутаассир бўлди. Бу асбоб воситасида жой ўринларини аниқлаш мумкин. Абу Маҳмуд Хўжандий ўз сектанти ёрдамида Рей шаҳрининг, тўғрироги шу расадхона ўрнашган Таборак тоғининг кенглиги $35^{\circ}34'$ эканини аниқлаб чиққан эди. Бу расадхона, унда эришилган илмий натижалар ўша даврдаги астрономия фанининг ютуғи бўлган. Беруний ёшлигида ўзига чуқур таассурот қолдирган бу илмий даргоҳ тўғрисида кейинчалик алоҳида бир китоб ёзди.

977 йили Беруний Рейдан Катга қайтишга муяссар бўлди.

Она юрт шамоли юзларни ёқимли елпийди, ўз фарзандларининг гариблик аччиқларини кечирган бошлигини меҳр билан силайди. Гарчи Рейдаги дўстлар ва ҳамкасаба олимлар Берунийга кўп меҳрибонликлар кўрсатган бўлсалар-да, ўзга эл, ўзга диёр, она ер тупроғича шодлик бера олармиди.

Беруний анча харобликка юз тутган Кат кўчаларида кезар экан, унинг фикрида шундай хаёллар ҳукмрон эди. Олим Амударё ёқасига етиб тўхтади. Буюк дарёning салмоқли оқими тинмай давом этар, нариги соҳил фира-шира кўзга ташланарди. Олисларда шарпаси бир кўриниб, бир кўринмай бораётган қайиқларнинг тарҳи сезиларди.

Беруний она юрт ҳавосидан тўйиб-тўйиб нафас олди, улуғ наҳр, белоён далалар чексиз осмонга меҳр билан боқди. Унинг кўнгли юрт севгиси, илм иштиёқи, ижодкорлик шуури билан жўшқин дарё сингари тўлиб-тошган эди.

ҲАМКОРЛИК МАҚТУБЛАРИ

Беруний илм йўлидаги ҳамкорликни жуда қадрлар, шунинг учун ҳам ўз даврининг таниқли олимлари билан илмий алоқалар ўрнатган эди. Масофалар миқдори тафаккур шуъласи қаршисида ожиздир. Катдан Беруний ёзган мактублар бошқа турли шаҳарларга йўл олар, у мактубларда баён этилган илмий масалаларга жавоб

ва талқинлар узоқ карвон йўлларини оша Қатга — Берунийга интилар эдилар.

Беруний шундай ҳамкорликни ўз замонасининг машҳур математиги ва мунажжими Абулвафо Муҳаммад Бузжоний билан ҳам ўрнатган эди.

997 йили Ой тутилиши олдидан ҳар иккала мунажжим хат ёзишиб келишиб олишдики, Ой тутилишини Беруний Хоразмда, Бузжоний Бағдодда кузатадилар. Улар Ой тутилишига оид кўринишларни тадқиқ этиб Бағдод ва Қатнинг вақти ўртасидаги фарқни аниқлайдилар. Бу фарқ бир соат бўлиб чиқди (15°). Ҳозирги ҳисобларга кўра эса бир соату беш минутдир¹.

Берунийнинг Абу Али ибн Сино билан ёзишмалари ҳам шу даврга тўғри келади.

Беруний Хоразмда илм-фан билан машгул бўлиб турли билим соҳаларини тадқиқ этаётган бир пайтда Бухорода ўн етти яшар бир тиб олимининг шуҳрати ёйила бошлаган эди. Тезда бу ёш табиб ва файласуфнинг довруғи-Хоразмгача этиб келди. Бу табибнинг номи Абу Али ибн Сино эди. У 980 йили Бухоронинг Пешку навоҳийсидаги Афшона қишлоғида туғилди. Абу Али ибн Сино болалиқданоқ табобат (медицина)га муҳаббат қўйиб уни ўрганди. Ун беш-ўн олти ёшли Абу Али ибн Сино билимдон ва тажрибали табиб бўлиб танилди. Айниқса Бухоро ҳукмдори Нуҳ ибн Мансурнинг даволанмас деб ҳисобланган хасталигини шифолагач, ёш табибнинг эътибори жуда ошиб кетди. Бу хизмат эвазига бериладиган мукофот ўрнига Абу Али ибн Сино амир кутубхонасидаги китобларни ўқишига рухсат сўради.

Шундай рухсатни олган ёш табиб кутубхонада жиддий мутолаага киришди ва кўп янги билимларни касб этди.

Беруний Ибн Синонинг илмий фаолиятини диққат билан кузатиб борар эди. Беруний Ибн Синонинг фан ва тажрибада ўзига муносаб суҳбатдош бўлишига ишонч ҳосил қилди. Шундан кейин у Бухорога Ибн Синога бир қанча илмий масалалар бўйича саволлар ёзиб юборди. Абу Али ибн Сино бу саволларга жавоблар ёзиб Берунийга жўнатиб турди. Бу ёзишмалар икки буюк фан арбобининг ҳам илмий мубоҳасаси, ҳам мусо-

¹ П. Г. Булгаков «Жизнь и труды Беруни», 61-бет.

бақаси эди. Улар 997—998 йиллари амалга оширилган¹.

Беруний Ибн Синога ўн саккизта савол ёзиб юборганинг ҳаммаси Аристотелнинг «Осмон ҳақида» (ўн савол) ва «физика» (саккиз савол) китоблари юзасидандир.

Ибн Синонинг Берунийга қайтарган жавобларини фақиҳ (қонуншунос) Масъудий кўчириб ёзар ва ўзининг Берунийга ёзган хатларига қўшиб Хоразмга жўнатар эди.

Беруний ва Ибн Сино ёзишмалари ўрта аср Шарқининг бу икки буюк олим ва мутафаккирлари ўртасида илмий ҳамкорликдан ёрқин бир намунадир.

ГУРГОН ШАҲРИ

Қаспий денгизининг жанубий соҳилларига ястанган сўлим бир ўлка бор. Ўрта асрларда уни Гургония ёки Журжония деб атаганлар. Бу мамлакатнинг пойтахти Гургон шаҳари шу ном билан аталган дарё қирғоғида жойлашган.

Гургон шаҳари ўша замонда Эрон заминида танилган адабий ва илмий марказлардан бири эди. Гургон подшоҳи Қобус ҳам табъи назмга эга бир шахс бўлиб, шоир ва олимлар билан тез-тез суҳбат қуриб туради.

Гургон подшоҳининг қасри. Истироҳат хоналаридан бирида Қобус баҳмал кўрпачага ёнбошлаб шеър тингламоқда. Шеърни ғоят эҳтиром ва тавозе мавқеида туриб шоир Абу Ҳайён ўқимоқда. Шоирнинг ёқимли овози шеър нағмасига сингиб кетган. Ҳар бир мисрада Қобуснинг баланд мартабаси, урушларда қозонган ва қозонажак ғалабалари, бунинг сабаби шоҳнинг бошига порлоқ тоъле юлдузи нур сочиб тургани, иқбол қуши подшоҳнинг сояси янглиғ унга ҳамроҳ эканлиги куйланади. «Подшоҳнинг давлат ва шукуҳи яна ортсин, бутун Эрон замин, балки борлиқ дунё унинг ҳукмига бўй-

¹ Абу Райхон Беруний ва Абу Али ибн Сино ўртасидаги мактублар араб тилидан ўзбек тилига Абдуфаттоҳ Расулов ва Мадаминжон Абдураҳмановлар томонидан таржима қилинган. Бу таржима 1950, 1973 йилларда Тошкентда Ўзбекистон Фанлар академияси нашриётида нашр этилган. Бу ёзишманинг араб тилидан рус тилига таржимасини Ю. Н. Завадовский амалга оширган. У ҳам 1950, 1973 йиллари Тошкентда ўша нашриёт томонидан босиб чиқарилган.

сунсин, подшоҳ Қобуснинг умри узун, давлати то абад барқарор бўлсин».

Подшоҳ Қобус шеърга жим қулоқ солади. Унинг ҷеҳрасида на ҳаяжон, на бефарқлик кўринмайди.

Шоир шеърни ўқиб тутатгач, яна бир бор қуюқ таъзим қилди ва сал чекиниб пойгакда тиз чўкди.

Подшоҳ ёнидаги надимларидан бирига ишорат қилиди. Надим дарҳол югуриб чиқиб ҳаял ўтмай бир қутича келтирди. Подшоҳнинг яна бир ишораси билан қутичани очиб ундағи зарҳал нақшлар билан безалган қаламдонни шоирга узатди. Қопқоғи қия очиқ қаламдон ичидаги бир неча қамиш қалам ва сиёҳдан бор эди. Шоирнинг мадҳияси учун подшоҳ инъоми шундан иборат. Шоир совғани таъзим билан қабул қилиб подшоҳ ҳузуридан ташқарига чиқди. Шоирнинг бундай қалам ҳақидан норози экани унинг юз ифодаси ва ҳаракатларидан сезилиб турар эди. Аммо шоир агар бу ношукурчилиги бирор йўсинда билиниб қолгудай бўлса, ўз бошининг қамиш қаламнинг боши сингари кесилажагини ҳам яхши билар эди.

Подшоҳ даргоҳидагилар шоирни совға билан табриклидилар. Шоир эшитилар-эшитилмас миннатдорчилик сўзларини ғудуллаб саройдан тезда чиқиб ғойиб бўлди.

Шоирга кўрсатилган илтифотнинг камтарлиги кўпчиликка аён. Сарой дарвозаси олдида салқинда ўлтирган икки амалдор сұхбатига ҳам шу мавзу қўшилди.

— Бечора шоир не-не умидлар билан мадҳ битиб келтирган экан. Нега у олий мукофотдан мундоқ бенасиб қолмишdir,— деди улардан бири.

— Подшоҳ ҳазратларининг феълини кўплар билмаслар,— деди бошқаси,— Шамсул-маолий Қобус ҳазратлари у зотнинг бетларига қараб мақтов шеърлари ўқиши ёқтирумайдилар. Бундай мадҳгўйликни ҳазрат шоҳ ёлғончилик деб биладилар ва мақтов сўзларига бепарво қараб ўзларини беҳуда ғурурдан ҳоли туладилар.

— Абу Ҳайён бир тоғли шоирнинг бемаъни қасидаси учун, гарчи у шеър мадҳиядан кўра ҳажвияга кўпроқ ўхшашиб бўлса-да, подшоҳ ҳазратларидан беҳад катта совғалар олганини айтмишdir. Бу тухфалар у тоғликнинг ўзигина эмас, балки авлод-авлодининг тирикчилигига ҳам етарли бўлар эмиш.

Ҳамсуҳбати ичидаги «подшоҳларнинг феълини тушу-

ниб бўларми эди», деб ўйлаган бўлса-да, сужбатдоши нинг гапига жаеъ бермай сукут сақлади. Чунки, бу замонда бирор сўз, хусусан подшоҳ тўғрисидаги номақ бул сўз бош кесилишига сабаб бўлажагини у яхши билар эди.

Қобус қанчалик шоирона таъб ва назокатли идрок эгаси бўлмасин, жуда бешафқат подшоҳ эди. Унинг бирор жаэо сифатида чиқарадиган ҳукми фақат бир хил: ўлим. Подшоҳнинг фармонига кўра жуда кўп кишиларнинг боши кесилган. Шунинг учун одамлар, айниқса подшоҳ доирасига алоқадор кишилар Қобуснинг сиёсатидан дағ-дағ титрар эдилар. Ҳар кимнинг жони ўзиға азиз. Бирорта шоирга муносиб мукофот бўлдими, бўлмадими деб киши ўзининг энг олий мукофоти — ҳаётидан ажралиб қолишга рози бўлармиди? Иккинчи ҳамсуҳбатнинг фикрида шу мулоҳазалар ҳукмрон эди у сукут қилган пайтда.

Мана бир неча ойдирки, Абу Райхон Беруний шу подшоҳ Қобус даргоҳида. Қобус ҳозирча Берунийга меҳрибон, уни ўз саройида ва доирасида кўришдан мамнун.

Беруний Гургонга биринчи минг йилликнинг охирида келди. Олим иккинчи минг йилликни Гургонда қарши олди.

Демак, 997 йили Рейдан Хоразмга қайтган Беруний кўп ўтмай яна ўз ватанидан чиқиб кетишга мажбур бўлган эди.

Бир мингинчи йили¹ Беруний «Ал-осорул-боқия мин ал қурунул-ҳолия» («Ўтмиш асрлардан қолган ёдгорликлар») асарини ёзиб тугаллаб уни Гургон ҳукмдори Қобус ибн Вушмагирга тақдим этди. Бу 27—28 ёшлардаги етук фикрли олим Берунийнинг катта, мустақил ва ғоят муҳим асари эди. Бу асарнинг номини қисқартириб «Ўтмиш ёдгорликлари» ёки «Хронология» деб юритилади.

ЎТМИШ ЁДГОРЛИҚЛАРИ

Беруний «Ўтмиш ёдгорликлари»ни ёзиб битирганда инсоният жамияти ҳозирги календарь бўйича бир минг йиллик ҳаётни бошдан кечирган эди. Ваҳоланки, бошқа календарлар ҳам бўлган. Улар ҳам инсон ҳаёти, инсо-

¹ П. Г. Булгаковнинг фикрича бир минг биринчи йил.

ният умрини белгилаб берганлар. Умуман, ўтмиш ғоят улуғ ва ибратли. Ўтмишни ўрганмай, унинг тажрибасини ўзлаштирмай туриб бугунги турмуш, айниқса келажакни қуриб бўлмайди.

Беруний ўзининг «Ўтмиш ёдгорликлари» китобида қадимий шарқ халқлари — араблар, суряликлар, яхудийлар, эронийлар, сүфдлар, хоразмликлар ва шу замонда яшаган бошқа халқларнинг турмуш қоидалари, урф-одатлари, йил саноқлари, байрам ва маросимлар, хуллас нимаики халқ ҳаётига оид бўлса, шунинг ҳаммасини илмий асосда тадқиқ этди. Олим бу халқлар турмушига оид маълумотларни ҳақиқат ва соғлом фикр нуқтаи назаридан таҳлил қилди, ҳақиқатга зид кўринишларни қатъийлик билан рад қилди. Умуман Беруний фақат илмий ҳақиқатнигина тан олар эди. Бошқа ёндашув нуқтаси унда бўлмаган. Беруний соҳталиқ, сеҳр ва уйдирмани кескин, муросасиз равишда ер билан яксон қиласкан қиласкан эди.

«Ўтмиш ёдгорликлари» китобини Ўрта Осиё, Эрон, Яқин Шарқ мамлакатларида халқлар этнографияси, тарихи, ижтимоий тафаккури бўйича мукаммал қомус деб атасак хато қилмаймиз.

Бу асарнинг ўзбек тилига қилинган таржимасини 1968 йили Тошкентда «Фан» нашриёти босиб чиқарган (486 саҳифа, таржимон А. Расулов¹. «Ўтмиш ёдгорликлари»нинг рус тилига қилинган таржимаси М. А. Салье томонидан амалга оширилган. Бу таржима Тошкентда ЎзФА нашриёти томонидан 1957 йилда нашр этилган (487 саҳифа). Берунийнинг «Ўтмиш ёдгорликлари» китобининг тексти ва араб тилидан инглиз тилига қилинган таржимаси Захау қаламига мансуб. Бу таржима 1879 йили Лондон шаҳрида босилган (Тексти 1878 йили Лейпцигда нашр этилган эди).

¹ Абдуфаттоҳ Расулов (1893—1977) — таниқли арабшунос олим. Тошкентда туғилган. 1905—1917 йиллари Тошкент мадрасаларидан бирида араб, форс филология ва бошқа билимлардан таҳсил олган. 1944 йилдан то умрининг охиригача Ўзбекистон Фанлар академиясининг Беруний номли шарқшунослик институтига илмий ходим бўйли ишлади. А. Расулов машҳур шарқ олимлари Фаробий, Ибн Сино, Беруний, Табарий асарларини араб ва форс тилиларидан ўзбек тилига таржима қиласкан. А. Расулов — филология фанлари кандидати, Ўзбекистонда хизмат кўрсатган фан арбоби (1969), Беруний номидаги Ўзбекистон ССР Давлат мукофотининг лауреати (1971) эди.

«Ўтмиш ёдгорликлари» китоби тўғрисида С. П. Толстов, В. П. Шеглов, В. Ю. Заҳидов, М. А. Салье, У. И. Каримов, П. Г. Булгаков, А. Ирисов, И. Абдуллаев каби олимлар ўзларининг Беруний ижодига бағишиланган асарларида қимматли фикр ва мулоҳазалар билдирганлар.

Беруний «Ўтмиш ёдгорликлари»да даставвал кеча ва кундуз тўғрисида китобхонда аниқ тасаввур туғдидиради.

Қуёшнинг буржлар фалакида бир маротаба айланиб чиқишидан Қуёш йили календари тузилган. Ана шу айланиш муддатида Ой ҳам ўн икки ярим марта ўша доирани айланиб чиқади. Ўн икки марта осмонда ҳилол (янги ой) пайдо бўлади. Шундан қамарий (ой) календари вужудга келган. Қуёш йили уч юз олтмиш беш кун бўлади. Ортиб қолган чорак кунлар тўрт йилда бир кун ҳосил қилгач, ўша қўшимча кун тўртинчи йилнинг календарига қўшилади. Бу йил кабисали (қўшимчали) йил деб аталади.

«Ўтмиш ёдгорликлари»да эронийлар, сүфдийлар, хоразмийларнинг календарлари тўғрисида берилган хабарлар жуда қизиқарлидир. Уларнинг ҳар бирида ойлар сони ўн иккита. Ҳар бир ой ўзининг алоҳида номига эга.

Эрон календарига оид ойларнинг номлари: фарвардин моҳ, Урдубихишт моҳ, Хурдодмоҳ, Тирмоҳ, Мурдодмоҳ, Шаҳривармоҳ, Меҳрмоҳ, Обонмоҳ, Озармоҳ, Даймоҳ, Баҳманмоҳ, Исфандармазмоҳ.

Ҳар бир ой ўттиз кундан ташкил топади. Ҳар бир куннинг ҳам ўз номи бор. Бир йил уч юз олтмиш беш ва чорак кундан иборат. Шунинг учун бу халқлар бирор ойга беш кун қўшадилар. Бу беш куннинг ҳам ўз номи бор.

Фарб мамлакатларининг халқлари ҳар бир ойни ўттиз кундан иборат ҳисоблаганлар. «Қибла далиллари» китобининг муаллифи Абул-Аббос Омулийнинг ёзганларига асосланиб Беруний бу ўн икки ой номларини келтирган. Улар бундайдир: Моя, Юния, Юлия, Офуст, Сатанбар, Октубар, Нуванбар, Даҳимбар, Янайир, Фабарайир, Марса, Абрар.

Румликлар ҳам йилни ўн икки ой деб ҳисоблаганлар. Бу ойларнинг номи ва миқдори қўйидагича: Январиос (31), Фебрариос (28), Мартиос (31), Афлирюс (30), Майюс (31), Юниюс (30), Юлиус (31), Ағустин (31).

тус (31), Сентамбриюс (30), Тамбрриюс (30), Навомбрриюс (30), Демириюс (31). Кўриниб турибдики, бу ойлардан баъзилари ўттиз бир кун, баъзилари эса ўттиз кундир. Бир йил уч юз олтмиш беш кун, ҳар тўрт йилда йигилган бир кун фебрабриюс ойига қўшилади ва унда фебрабриюс ойи йигирма тўққиз кун бўлади.

Яҳудийларда ҳам ойлар сони ўн иккита. Улар бундай деб аталган: Тишрий (30), Мархешвон (29), Кислев (30), Тебет (29), Шефат (30), Озар (29), Нийсан (30), Ияр (29), Сиван (30), Таммуз (29), Аб (30), Элул (29). Уларнинг йили уч юз эллик тўрт кун бўлиб булар ой йили кунларидир. Ортиқча кунларни йигиф бир ой бўлганда йил ойларига қўшадилар. Ўша қўшимчали (кабисали) йилни «иббур» («Ҳомиладор аёл») деб атайдилар.

Арабларда ҳам ойлар ўн иккита. Уларнинг отлари қўйидагича: Муҳаррам, Сафар, Рабиал — аввал, Рабиал — охир, Жумодул — аъло, Жумодулохира, Ражаб, Шаъбон, Рамазон, Шаввол, Зулқаъда, Зулҳижжа. Араблар ҳар кунга от қўймадилар. Аммо улар ҳар уч кечага бир от бердилар. Масалан, ой аввалгидағи уч кечани ғуар (қашқа) деб атайдилар. Бу кечада ой отнинг пешонасидаги қашқа каби бўлиб кўринади. Кейинги уч кеча нуфал ёки шуҳб (оқ-қора) деб аталган ва ҳ. к.

Араблар ҳафталарни қўллаганлар. Ҳафта кунларига от қўйганлар. Ойнинг боши ҳилол кўринган кундан бошланади.

Турклар ўз қалендарларига ҳайвонлар отларини ишлатганлар. Улар қўйидагилардир: Сичқон, Уд, Барс, Товушқон, Луй, Ийлон, Юнт, Қўй, Пичин, Товуқ, Ит, Тўнғиз.

Беруний ўзи билган календарларнинг ҳаммасини бир жадвалга солган, уларни нисбатлаб фарқларини кўрсатган.

«Ўтмиш ёдгорликлари»да тарихлар моҳияти ва турли халқларда мавжуд бўлган тарих тушунчаси тўғрисида муҳим маълумотлар бор.

Бирор ўтиб кетган йилнинг аввалидан ҳисобга олиниадиган маълум бир муддатга тарих дейилади.

Бу фурсат бирор катта воқеа (бирор удуғ шахснинг чиқиши, ҳароб қилувчи тўфон, зилзила, вабо ёки қаҷатчилик туфайли юз берган фалокат ва ҳ. к.) Эронийларда «Моҳу рўз» («ой ва кун») ҳисоби бўлган. Шу ифода-

ни («Моҳу рўз») арабчалаштириб «муаррах» деганлар. Унинг масдари қилиб «тарҳҳ» чиқарилган.

Ҳар бир халқда тарих тӯғрисидаги тушунчалар хилма хилдир. Уларни қиёслаб тадқиқ этилса, ҳақиқат ва уйдирмаларни фарқ этиш мумкин.

Беруний ўз асарида баён қилган ана шу ихтилофли маълумотларни келтирас экан, ҳар бирининг қандай далилларга асосланганини кўрсатади, бу далилларни таҳлил этади, улардаги ноаниқликларни очади.

«Ўтмиш ёдгорликлари» китобида бир неча маҳсус жадваллар бор. Беруний бу жадвалларда турли халқларнинг эътиқодига кўра одам яшай бошлаган давр тарихи, айрим ҳукмдорларнинг ҳукмронлик йиллари тӯғрисидаги маълумотларни келтиради. Ҳукмдорларнинг лақабларини айтади, уларнинг қилган ишлари тӯғрисида қисқача хабар беради.

Эронликлар эътиқодига кўра биринчи инсон Каюмарс эди. Унинг бир лақаби «Гиршоҳ»—«тоғ подшоҳи» бошқа лақаби «гилшоҳ»—«балчиқ шоҳи»дир. Баъзилар Каюмарснинг маъноси «тирик, сўзловчи, ўлувчи» дейдилар (с. 127).

Эронликлар тарихни Каюмарсдан Искандарнинг Доро устидан ғалаба қозонганингача, ўша даврдан сосонийлар сулоласининг биринчи шоҳи Ардашер Бабак (226—241) давригача, сўнгра у даврдан то Исломгача, жами уч даврга бўладилар.

Беруний Ҳамза Исфаҳонийнинг «Халқларнинг ўтиб ва ўйқ бўлиб кетган улуғларнинг тарихи китоблари» деган асарида Эрон шоҳлари хронологиясини олган. Ҳамза бу хронологияни эронликларнинг қадимий муқаддас китоби «Авесто»дан олганини айтган эди. Уша рўйхатда Каюмарсдан тортиб то Доро ибн Дорогача бўлган барча Эрон ҳукмдорлари кўрсатилган.

Беруний маҳсус жадвалда турли мамлакат ҳукмдорларининг қандай аталғанларини хабар қиласи. Эрон подшоҳлари шаҳаншоҳ ва Кисро деб, Рум подшоҳлари Басили яъни Қайсар, Искандария подшоҳлари Батлимус, деб аталғанлар, ҳазар ва ўғиз турклари ўз подшоҳларини Хонувта деганлар.

Улуғ хоразмлик олим ўз юртининг тарихига оид маълумотларга ҳам аҳамият бериши табиий эди. «Ўтмиш ёдгорликлари»да Хоразм тарихи тӯғрисидаги маълумотни ўқиймиз: «Улар (хоразмликлар — А. Қ.) Хоразмга одам жойлаша бошлаганидан тарих

олар эдилар. Бу Искандардан тўққиз юз саксон йил илгари эди (с. 71).

Беруний Хоразм халқининг қадимий маданияти ислом истилочилари томонидан йўқ қилингани тўғрисида маълумот беради.

Хоразм ислом лашкари томонидан икки мартаба босиб олинди. Иккинчи бор Хоразмни эгаллаган лашкарбоши Қутайба ибн Муслим тарихни мусулмонлар расмига мувофиқ ҳижрий ҳисобига ўтказди. Қутайбанинг Хоразм маданияти ёдгорликлари ва арбобларини қандай ёвузлик билан йўқ қилганлиги тўғрисида Беруний бундай деб ёзади: «Қутайба Хоразм хатини яхши биладиган, уларнинг хабар ва ривоятларини ўрганган ва билимини бошқаларга ўргатадиган кишиларни ҳалок этиб буткул йўқ қилиб юборган эди. Шунинг учун у (хабар ва ривоятлар) ислом давридан кейин ҳақиқатни билиб бўлмайдиган даражада яширин қолди» (с. 72, 84).¹

Беруний айрим тарихий воқеалар тўғрисида сўзлар экан, ибратомуз хulosалар қиласди. Масалан, арабларнинг эронликлардан олдин исломни қабул қилганликлари билан фахрланишлари тўғрисида гапирганда, Беруний чинакам фахру-ифтихор нимадан бўлиши кераклиги тўғрисида бундай деб ёзади: «Фахрланиш ҳақиқатда яхши хулқлар ва олий феълларда олдин кетиш, илму ҳикматни эгаллаш ва имконият борича мавжуд нопокликлардан тозаланиш» (с. 151) да кўриниши керак.

Демак, истило ва таассуб, зўравонлик ва бузғунчилик билан эмас, балки эзгулик, илм, фан, инсоний камолот учун хизмат қилиш билан ифтихор қилиш лозим.

«Ўтмиш ёдгорликлари» китобида Беруний инсон ҳаётига оид хилма-хил маълумотларни келтиради. Шу жумладан олимнинг кишиларнинг жисмоний тузилиши, умрининг узун-қисқалиги тўғрисидаги мулоҳазалари ҳам диққатга сазовордир.

Қадимий одамлар йирик гавдали бўлганлар. Мадиян тоғларида топилган археологик ёдгорликлар шу фикрнинг исботига хизмат қиласди.

Берунийнинг ёзишича, Фарғона ва Яммома (Афғонистондаги бир вилоят) халқлари, химярлар ва бошқа

¹ Берунийнинг Хоразм ҳақидаги фикрлари билан муфассал танишмоқ учун қаранг: Н. К. Норқулов «Беруний ва Хоразм», Т., «Фан», 1973.

яна бир қанча халқлар орасида узоқ умр кўрганлар кўпроқ учрайди. Беруний одамнинг узоқ вақт яшами сабабини биологик ва ирсий омиллар билан боғлайди. Олим бу тўғрисида астрологлар тўқиган уйдирмаларни қатъян рад қиласди.

Абу Абдулло ал-Хусайн ибн Иброҳим ат-Табарий ан-Натилий (Берунийга замондош бўлган олим ва ёзувчи) инсон учун уч камолот бор, деган.

Биринчи камолот — балоатга етиш даври; яъни ўзи каби бировнинг ундан пайдо бўлиши мумкин бўладиган вақт. Бу иккинчи етти йилликнинг бошидир.

Иккинчи камолот — тафаккур қуввати бўлиб, кишининг ақли қувватдан феълга чиқадиган вақти. Бу олтинчи етти йилликнинг бошига тўғри келади.

Учинчи камолот — одам ёлғиз бўлса ўзини, уйланган бўлса оиласини, подшоҳ бўлса фуқаросини кутишга арзидиган вақти.

Шу учала камолот даври бир юз қирқ йилdir, деган ан-Натилий.

Беруний бу уч камолот тўғрисидаги фикрни маъқуллайди, аммо улар учун белгиланган муддатларни қабул қилмайди. «Биз замонамида ан-Натилий камолот белгиси деб кўрсатган аҳволга одамларнинг бошқачароқ муддатларда етаётганликларини учратамиз» (с. 117) деб ёзди Беруний.

«Ўтмиш ёдгорликлари»да катта ижтимоий аҳамиятга молик воқеалар тўғрисидаги маълумотлар кўп учрайди. Булар пайғамбарлик даъво қилган шахслар, уларнинг тарафдорлари, бу ҳаракатнинг оқибатлари, шундай ҳаракат қатнашчиларининг мафкуравий қарашлар тўғрисидаги боблардадир.

Амалда бу маълумотлар Ўрта Осиё, Эрон халқларининг ажнабий истилочиларга қарши кўтарган қўзғолонлари, бу халқлар ичida ислом дорматизмiga қарши юзага келган ижтимоий мафкураларнинг баёнидан иборат.

Ҳукмрон мафкурага қарши кўтарилишларга турли даврларда Будосаф, Заратуштра (Зардуст), Моний, Беҳофарид, Муқанна каби шахслар бошлилар қилдилар.

«Ўтмиш ёдгорликлари»да заростризм эътиқодининг асосчиси Заратуштра ва унинг «Авесто» китоби тўғрисида ғоят муҳим маълумотлар бор. Берунийнинг шарқ тафаккури тарихида ўзига хос ўрин тутган Моний ва

унинг таълимоти тўғрисида айтгандари ҳам диққатга сазовордир.

«Утмиш ёдгорликлари»да яна ал-Халлож ибн Абу Закария, Ибн Абу Азоқир, яҳудийлар кутаётган Маҳдий, Дажжол, уларнинг таълимоти ва тақдири тўғрисида маълумотлар келтирилган. Яна шу «сохта пайғамбарлар»нинг қачон чиққани тўғрисидаги жадвал ҳам берилган.

«Утмиш ёдгорликлари»да Веруний яна эронликлар, хоразмликлар, сұғдлар, румликлар, яҳудийлар, суряликлар, христианлар, насорий христианлар, исломгача бўлган араблар, мусулмонларнинг маросим кунлари, ҳайитларига оид маълумотларни ҳам келтирган.

Булар орасида наврўз тўғрисида айтилган гаплар диққатга сазовордир. Беруний дунёвий ишлар учун мўлжалланган ҳайитлар ва диний (охират учун мўлжалланган) ҳайитларни фарқ қиласи. Наврўз дунёвий ҳайитларнинг биринчисидир.

«Утмиш ёдгорликлари»нинг охирги боби ой манзиллари хусусидадир. Беруний қуёш йили кунларида Ой манзилларининг чиқиш вақтини билдиради. Ой манзилларининг ўзгариши сабабли ўзгарувчи ва қайтарилиши билан такрорланувчи табиий ҳолатлар ўша манзилларни ўрганиш натижасида олдиндан билинади (с. 336).

Шундан кейин ҳиндолар, исломгача бўлган араблар, эронликларнинг ой манзилларини белгилаш тартиблари тўғрисида сўз юритилади.

«Утмиш ёдгорликлари» китобини тугаллар экан, Беруний бундай деб ёзади: «(Бу китобни) ўқинган ўқувчи (қуидаги кайфиятдан) ҳоли бўлмайди: ё у маълумотда менга тенглашади; унда мени мақтаб, бу китобга қилган меҳнатим учун мендан миннатдор бўлади; ёки мартабада мендан ортиқлик қиласи; унда янглишларни ислоҳ этиб юз берган тойилишларда мени маъзур тутади. Учинчи (ҳолатдаги ўқувчи) келганда, у менга бўйсунса, истифода этишига, агар адоват қилса ёкиз қолишига кифоя қиласи асар яратдим» (с. 425).

Дарҳақиқат «Утмиш ёдгорликлари» ёш олимни буюк алломалар сафига киритди, уни жаҳон олимларининг пешволаридан бирига айлантирди. Бу китоб тез шуҳрат ва эътироф топди. Асрлар ўтган сари унинг эътибори тобора ортиб бормоқда.

Беруний Гургонда экан вақтида баракали илмий

фаолият билан машғул бўлди. У Хоразмдаги устози Абу Наср ибн Ироқ билан илмий муносабатларини давом эттирди.

Абу Наср ибн Ироқ Берунийга аatab бир қанча асарлар ёзиб Гургонга юборган.

Беруний яна бир бошқа хоразмлик олим Абу Саҳл ал-Масихий билан шундай илмий ҳамкорлик ўрнатган эди.

Гургонда бўлган пайтида (998—1003 йиллари) Беруний астрономия ва табиатшунослик, тарихга оид ўн бешта асар ёзган. П. Г. Булгаковнинг «Беруний ҳаёти ва асарлари» китобида (рус тилида) кўрсатилишича шу асарлардан учтасининг қўллэзмалари бизгача етиб келган. Улар «Астролябия тузилишига хос усувлар», «Астрономия калитлари» ва бизга яхши маълум бўлган «Ўтмиш ёдгорликлари» китобларидир.

НИЗО

Гургон подшоҳи Қобус ибн Вушмагир Берунийнинг қандай улуғ зот эканини яхши билар эди. Беруний ҳам Қобуснинг қанчалар фозил адаб ва золим подшоҳ эканини тўла англаган эди. Бир куни улар ўртасида бундай суҳбат, тўғрироғи мунозара содир бўлди.

Қобус Берунийни ўз ҳузурига чақирди. Улар фақат икковлари эдилар.

— Сизнинг улуғ истеъдод ва чуқур тафаккурингиз Гургон мамлакатининг безагидир,— деди Қобус Берунийга,— бу мамлакат ҳокимияти шу зукколик ва донолик билан мустаҳкамланса, яъни вазирлик мартабаси Сизга ато этилса, деган хоҳиш кўнглимда уйғонди.

— Бу давлат ва улуғ даражага мен муносиб эрмасмен,— деб жавоб қилди Беруний дарҳол. Унинг ўз фикрини тўппа-тўғри ва ҳеч ҳайиқмай айтиш одати бор эди.— Чунки мен илм даргоҳининг хизматида барқарор бўлиб давлат хизматига фурсат топмасмен ва буюк ишончимни йўқотиш шарафсизлигига мубтало бўлурмэн.

Подшоҳ Қобус ўз сўзининг рад қилинишига одат қилмаган эди. У Берунийнинг жавобидан, бу жавобнинг қатъий ва келишмовчи оҳангидан ранжиди. Қобус Берунийга бирор қуий лавозим таклиф қилаётгани йўқ. У баъзи одамлар бир умр орзу этиб, ҳар кун тушида

кўриб етиша олмаётган ферузбахтликни унга мұяссар қилмоқда.

— Сизнинг ихтиёргизга подшоҳлик ҳокимиятининг бутун қуввати топширилгай. Гургон давлатининг бош таянчи сиз бўлиб қолурсиз. Сиз фақатгина таҳт эгасига бўйсунарсиз. Бошқа ҳамма Сизнинг фармонингизга муте бўлғай,— деди Қобус сал изтироб ва қизғинлик билан,— бунинг неси сизга номақбулдир?

— Мен илм ва тафаккурга фармонбардордирмен. Менинг ягона давлатим турмушдаги эркинлик ва фунун даргоҳидаги бандалигимдир. Шундан жудо этмасалар деб ўтина мен.

Гургон подшоҳи Шамсулмаолий Қобус ибн Вушмагир Берунийнинг бу сўзларига жавоб қилмади. У енгил бош ирғитиб Берунийга сұхбат тугаганини билдири. Беруний подшоҳга таъзим қилиб хонадан ташқарига чиқди. Олимнинг кўнгли ташвишли, хотири ғамнок эди.

Подшоҳ Қобус кейинги пайтларда зулмни ҳаддан оширимоқда. Ўнйиг фармони билан ҳар куни бир неча кишининг боши кесилади. Улардан қай бири гуноҳкор, қай бири бегуноҳ эканини ҳеч ким, шу жумладан подшоҳнинг ўзи ҳам яхши билмас эди. Бу жабрдийдаларнинг кўплари подшоҳ доирасига мансуб бўлганлар.

Шавкат қуёши деб номланган бу подшоҳ кишилар кўнглини ёритиш ўрнига уларнинг жони ва хонумонини куйдириш билан машғул.

Беруний учун ҳам хавотирли кунлар келди. У ҳар доим бир жазо ёки таъқибни кутиб вақти ўтар эди. Кейинчалик Беруний ўзининг ана шу ҳаяжонларини ифодалаб бир байт ёзди:

Хуршиди даврон тилар: қилсам унинг
тобеълигин,
Истагим барбод этиб, қандоқ сабил хуршид экан!

Қобуснинг Берунийга муносабати тобора ёмонлаша борди. Подшоҳ олимнинг тадқиқотларига ҳеч қандай ёрдам кўрсатмай қўйди.

Беруний Журжон яқинидаги Диҳистан билан ғуз — турклар яшайдиган жой ўртасидаги бир ўринда ер масофаларини ўлчамоқчи бўлганида бу иш учун хазинадан ажратиладиган маблағ берилмади. Бора-бора Гургонда подшоҳнинг муттасил норозилиги ва қаҳрига

чида б ишлаш Беруний учун оғир бўла борди. Бошқа ҷора қолмаганидан кейин 1003—1004 йили Беруний Гургонни тарк этиб чиқиб кетди.

ГУРГАНЖ

Бу пайтда Хоразм давлатининг пойтахти Гурганж бўлган (П. Г. Булгаковнинг хабар беришича, бу шаҳар ҳозирги кўхна Урганж ўрнида жойлашган. Кўрсатилган асар, с. 119).

997 йили Хоразм таҳтини уста дипломат ва тадбиркор ҳукмрон Али ибн Маъмун эгаллаган бўлиб, у ўз давлатига маълум мунтазамлик ўрнатган эди. Али ибн Маъмун олим ва шоирларга ҳомийлик қилди. Натижада Хоразмда Ўрта Осиёнинг энг машҳур олим ва фозиллари жам бўлдилар, илм-маданият юксалди.

Беруний Гургондан Гурганжга келиб шу ерда истиқомат қилиб қолди. Берунийдан сўнг унинг устози Абу Наср ибн Ироқ ҳам Катдан Гурганжга келди. Ал-Масихий, Абулхайр ибн ал-Хаммор каби олим ва табиблар шу шаҳарда истиқомат қилмоқда эдилар. Ниҳоят 1005 йили шарқ тиббиётининг ёруғ қуёши Абу Али ибн Сино ҳам Гурганжга келди.

Беруний ва Ибн Сино бир-бирлари билан шу шаҳарда учрашдилар.

Абу Мансур ас-Саолибий «Иатиматуд-даҳр» («Даврнинг ягона гавҳари») китобида хабар қилишича, бу пайтда Хоразмда кўп шоирлар яшаб ижод этганлар. Уларнинг кўплари араб тилида шеърлар ёзганлар (Ўрта Осиёдаги араб тилидаги бадиий адабиёт тўғрисида қўйидаги китобга мурожаат этилсин: Исматулла Абдуллаев, «Иатиматуд-даҳр» (арабчадан ўзбекчага таржимаси, Т., «Фан», 1976 й.)

Беруний Хоразмга қайтгач, ўз илмий ишларини давом эттирди. У минералогия, табиатшунослик бўйича бир қанча асарлар ёзди, астрономик кузатишлар олиб борди. Айниқса Берунийнинг 1004 йили ой тутилишини тадқиқ этиши муҳим хulosалар қилишига сабабчи бўлди.

1009 йилда Хоразмшоҳ, Абу ибн Маъмун вафот этди. Хоразм ҳокимияти марҳум подшоҳнинг укаси Маъмун ибн Маъмун ихтиёрига ўтди.

Беруний ўз ватанининг тақдирига ҳеч қачон бефарқ қараган эмас. Улуғ олимнинг Хоразмда яшаб турган даври унинг жиддий сиёсий фаолияти билан боғлиқ.

Хоразмшоқ Беруний билан маслаҳатлашиб иш тутар эди. Олимнинг донолик билан берган маслаҳатлари мамлакат тақдирида катта аҳамиятга эга бўлган.

Хоразмда Беруний бир тарихий асар ёзган. У «Хоразмнинг машхур зотлари» деб аталади. Аммо бу асарнинг қўллэзма нусхаси бизгача етиб келмаган. Берунийнинг замондоши тарихчи олим Абу Фазл Байҳақий ўзининг «Тарихи Масъудий» китобида Берунийнинг шу асаридан айрим лавҳаларни келтирган.¹

Хоразмшоқ Маъмун иби Маъмун илмли, шавкатли ва фаол шахс эди. Аммо унинг бутун вақти айшу-ишрат, базм ва овда ўтар эди. Хоразм мамлакатида халқнинг аҳволи оғирлашиб борар, хўжалик хароб бўлмоқда, хонавайронлик авж олмоқда, базмдан боши чиқмайдиган подшоҳ эса халқнинг қандай оғир ҳаёт кечираётганига парво қилмас эди.

Ғазна подшоҳи Маҳмуд Фазнавий бу пайтда Туркистон хонлари билан уруш олиб бораётганидан Хоразм билан дўстона алоқалар ўрнатган эди. Аммо Маҳмуднинг кўнглида Хоразмни ўзига тобе қилиш нияти бўлган. Қулай фурсатда у бу ниятни амалга ошириди. Маҳмуд Фазнавий Туркистон хонлари билан сулҳ тузди. 1017 йили эса Хоразм Маҳмуд Фазнавий тасарруфига ўтди.

Хоразм мулки Маҳмуд Фазнавий лашкарининг таланчиларига ем бўлди. Жуда кўп олим ва ҳунармандлар подшоҳнинг буйруғи билан Фазнага ҳайдаб олиб кетилди. Шулар орасида Абу Райҳон Беруний ҳам бор эди.

Беруний яна ўз ватанидан узоқлашди. Энди бу абадий узоқлашув эди. 1017 йили Хоразмдан олиб кетилган Берунийга кейин она юртига қайтиш насиб бўлмади.

ҒАЗНА. ЕР ҮЛЧАШГА ОИД АСАРЛАР («ГЕОДЕЗИЯ»)

Бу даврда Берунийнинг олимлик шуҳрати бутун шарқ мамлакатларига ёйилган эди. Энди унинг мукаммал билимдонлиги, ўткир ақли ва тафаккури Фазнавийлар сулоласига хизматда бўлиши лозим. Маҳмуд Фазнавийнинг нияти шундай. Аммо эркинлик ва ҳур-

¹ «Тарихи Масъудий» китобининг форс тилидан рус тилига таржимасини А. К. Арёндс амалга оширган. Бу таржима 1969 йили Ташкентда ЎзФА нашриёти төмонидан нашр этилган.

Фикрликии ҳар нарсадан устун тутадиган, фан ва маърифатнинг эътиқодли муҳлиси ва заҳматкаш Беруний зулм ва макр тимсоли бўлмиш подшоҳ Маҳмуд Фазнавий билан муроса қила олмайди. Бу аниқ. Шунга қарамай 1017 йилдан ўз ватани Хоразмдан ғазнавийлар давлатининг пойтахти Ғазнага тутқун қилиб келтирилган Беруний то 1030 йилгача, яъни подшоҳ Маҳмуд вафотигача, унга тобе ва қарам бўлиб яшашга мажбур бўлди. Олим учун маънавий азоб-уқубат билан тўла бу аччиқ қисматга чидашдан бошқа чора йўқ.

«Агар тақдир шундай аламли ҳаётда яшашни белгилаб қўйган бўлса, унга рози бўлишдан бошқа нима ҳам қила олиш мумкин», деб фикр қиласар эди. Беруний. Олим бетўхтов илм била машғул бўлибгина ўзини сал овутарди.

Ғазнага келган пайтида Беруний «Геодезия» асарини ёзишга киришган эди. Бу асар учун лозим материаларни у Хоразмда эканида жам қила бошлаган бўлиб, зарур илмий асбоб-ускуналарни ҳам ўша ерда ҳозирлаб қўйган эди. Шуларнинг ҳаммасини олим ўзи билан Ғазнага келтиргани учун илмий ишини бетўхтов давом эттириши мумкин бўлди.

Беруний бу асарини Ғазнада 1018 йилнинг бошларида ёзишга киришди ва 1025 йил 20 октябрда уни ёзид тугаллади. Асарнинг тўла номи бундай: «Аҳоли яшайдиган жойлар орасидаги масофаларни аниқлаш учун (керакли) ўринларнинг чегараларини белгилаш». Буни қисқартириб фанда «Геодезия» дейилган¹.

Китобнинг кириш қисмida, ҳар бир асарида бўлгани каби, Беруний ўз кўнглидаги энг эзгу фикрлари, дарду

¹ «Геодезия»ни араб тилидан рус тилига П. Г. Булгаков таржима қилган. Бу таржимани 1966 йили Тошкентдаги «Фан» нашрияти босиб чиқарган. Бу нашр муфассал сўз боши ва мукаммал илмий аппарат билан таъминланган. Улар ҳам П. Г. Булгаков қаламига мансуб.

Филология фанлари доктори, Беруний номли Ўзбекистон давлат мукофотининг лауреати Павел Георгиевич Булгаков (1927 й. туғилган). Беруний ижодини ўрганиш соҳасида катта хизмат қилган олимлардан бири. У «Жизнь и труды Беруния» («Берунийнинг ҳаёти ва асарлари». Т., «Фан», 1972 й.) асерида Беруний ҳаёти ва илмий фаолиятини, унинг ўрганилиш тарихини муфассал тадқиқ этган. Яна П. Г. Булгаковнинг «Абу Райхон Беруний» (рус тилида) китобчасида (Т. «Фан», 1973) шу масалалар илмий-оммабоп шаклда таърифланган. П. Г. Булгаков Беруний тўғрисидаги иккি сериялий бадний фильм сценарийсининг соавтори ҳамdir.

ҳасратларини баён қиласди. Уларда олимнинг жоҳил, тубан, манфаатпаст, пасткаш кимсаларга чексиз нафрати аён бўлиб туради.

«Замондошларимга назар солганимда шуни кўрдимики,— деб ёзади Беруний,— улар ҳамма жойларда жаҳолат либосини ёпинганлар ва шу билан бир-бирлари қаршисида фахр қиласдилар. Улар фазилат эгаларига қарши душманлик олови билан ловуллаб ёнадилар ва (пешонасига) илм муҳри босилган ҳар бир кишини таъқиб қилиб унга турли-туман озор ва ёмонлик етка-задилар».

Беруний яшаган шароит, уни ўраган мухитда ана шу тоифадаги шахслар кўпчиликни ташкил этар эди. Шундай ёвуз доирада ўралгани ҳолда олим тинмай ижод қилди, илм-фанга ривож берди. Беруний учун илм ҳаётий зарурият эди.

Аммо Беруний атрофидаги бир гуруҳ жоҳиллар илмни тан олмас, илм аҳлига ҳақоратомуз муомалада бўлар эди. Шундай кимсаларга жавобан Беруний илмнинг қадру-қимматини баланд қўйиш кераклигини, инсоннинг чин фазилати илмда эканини ишонч билан уқтирасди.

Илмдан нима фойда бор дегувчи қўпол ва бадмуомала жоҳиллар инсоннинг бошқа ҳайвонотдан устунлиги илм туфайли эканини билмайдиган ва илмсиз инсон ўз мазмунидан маҳрум бўлажагини улар фаҳмламайдилар, деб ёзади Беруний.

Илмни унинг моҳияти учун ўрганадилар. Илм ўзи лаззат бағишлийди. Одамлар илм туфайли эзгуликка эришадилар. Улар илм туфайли ёвузликдан холос топадилар. Шунинг ўзи энг аниқ фойда, энг катта давлат эмасми, ахир!

Буюк олим Берунийнинг илм таърифида айтган бу сўзлари илм-фан қимматини кўкларга кўтариш, яна айни ҳақиқатни лўнда ва ишонарли баён қилишнинг аниқ намунасиdir.

Беруний илм душмани бўлган, ундан нима фойда бор дегувчи жоҳилларни танқид қилиш билан чекланмайди. Балки ўшандай кимсалар фойда деб ҳисоблаган тушунчаларнинг нафратли тубанлик эканини очиб ташлайди. Олим илмнинг турмушнинг ҳар бир соҳасида чин фойда етказажагини қатъий нисбатлар орқали исботлаб кўрсатади.

Шундан сўнг Беруний турли фанларнинг қандай пайдо бўлгани тўғрисида ҳикоя қилади.

Нозик табиатли кишилар музика тинглаб роҳатла-надилар. Тартибга солинган оҳанглар кишига кучлироқ таъсир қилади. Киши тартибни ёқтиради. Тартибли шеърлар диққатни жалб этади. Шеър қаторлари оҳанглар уйғунлиги билан қоришиб кетганида кишига янада мақбулроқ бўлади. Шундан музика илми келиб чиқсан.

Кишилар бир-бирлари билан мулоқот қиладилар, баҳс ва музокаралар. Ана шундай пайтда нутқ «тарозилари» даркор бўлади. Шу тарози мантиқdir.

Илмлар инсон ҳаёти учун зарурий эҳтиёжлар туфайли пайдо бўлди. Беруний бу китобининг шундай мароқли фикрлар билан тўла муқаддимасида инсон ҳаётига оид мулоҳазалардан табиатга боғли муҳокамаларни келтириб чиқаради.

Тоғлар силлиқ, гулдор тошлардан, тошга айланниб кетган тупроқдан ва қумлардан ташкил топган. Харсанглар ва шағаллар эса узилиб тушган тоғ парчалиридирлар. Улардан шамол ва сув таъсирида ажралиб кетган айрим бўлаклар эса қум ва тўзонлардир.

Шағал дарё ўзанларида йиғилди. Сўнгра у сув остида қолиб кетди. Секин-секин улар совуқ таъсирида тошга айланадилар. Тош эса олов (иссиқлик — А. К.) таъсирида парчаланиб кетади. Чунки совуқдан шаклланган нарса иссиқдан бузилади, иссиқдан яралган нарса эса совуқдан маҳв бўлади.

Беруний қуруқликнинг Ер марказига муносабатини алоҳида тадқиқ этиб бундай хulosага келади: Қуруқликнинг Ер марказидан узоқлашуви ўзгариб туради. У кўтарилганда қумлар кўпайиб сув камаяди, ариқ ва булоқлар қурийди, ер сатҳи ёмонлашади, уни ишлаш (деҳқончилик иши — А. К.) мумкин бўлмай қолади. Натижада одамлар — бундай ерларни ташлаб бошқа жойларга кўчиб кетадилар. Шу туфайли илгари денгиз бўлган жойларда қуруқлик, қуруқлик бўлган жойларда денгизлар пайдо бўлади. Масалан, Арабистон саҳроси ўрнида илгари денгиз бўлган. Журжон ва Хоразм оралиғида ҳам катта кўл бўлган. Жайхун дарёси бу ерлардан ўтиб Журжон ва Хазар оралиғидаги денгизга қўйилган.

Беруний Хоразмнинг пайдо бўлиши тўғрисида мусфассал ҳикоя қилади. Жайхун дарёси катта қоялар орасидан ўтиб бу ерда кўл ташкил қилган эди. Жайхун

дарёсининг лойқаси кўп, суви мўл, оқими тез бўлган. Секин-секин дарё мансабида ер пайдо бўла бошлаган. Сўнг у ер бора-бора қуруқликка айланган. Кўл чекиниб бориб охири Хоразм ери сув остидан бутунлай очилган.

Миср ери ҳам худди шундай тарзда Нил дарёси ёйилиб оққан жойда аста-секин юзага чиққан.

Беруний Ой ва Қуёшнинг ердаги ҳаётга таъсири қанчалар кучли эканини исботлаб беради. У Аристотелнинг буғланиш кучайиб бориб охири дengизлар қурийдилар, деган фикрини қатъиян рад қилади.

Берунийнинг тушунтиришича, Ернинг шимолий томони мўътадил ҳавога эга. Шунинг учун у ерда одамлар яшайдилар. Қуёш зенитга келганда бундай ерларда мўътадиллик сақланади.

Ернинг жануб томонида сувлар кўп. Сувлардан илиқ шамол эсиб яшашга қулай шароит яратади. Агар жанубда қуруқ ерлар бўлганида улардан иссиқ шамоллар эсиб яшаш имкониятини бермаган бўлар эди. Жанубида Судан саҳробси бўлгани учун Миср иссиқ, жанубида форс дengизи бўлгани туфайли Шероз салқин.

Беруний Ер бўлаклари ер юзасидан ўз жойларини ўзгартириб турадилар, деган хуносага келади.

Ер бўлакларининг марказгача бўлган масофалари ўзгарган сари бу бўлаклардаги табиат ва иқлим ўзгара боради. Бундай ўзгариш марказга қараб, ёки ичкарига, ёки ташқарига, ёки тўрт томондан бирига томон бўлиши мумкин. Шаҳарлар жойлашган ўринлар (кенгликлар) ҳам ана шу жой алмашиниши туфайли ўзгаради. Ҳатто шаҳарлар ноқулай жойга ўтиб қолиб вайрон бўлишлари ҳам мумкин. Шунинг учун шаҳарлар ўрнашган жойлар, уларнинг кенглиги ва узунлиги миқдорларини ўлчаб туриш керак бўлади.

«Геодезия» китобининг муқаддимасида Беруний Фазна шаҳари тўғрисида бир қанча таъсирили сўзлар айтган. Бу шаҳар Шарқий подшоҳликларнинг (Фазнавийлар давлатини Беруний шундай деб атайди — А. Қ.) марказидир. «Фазна мен учун одамларнинг ҳурматини тиклайдиган... доимий ватаним бўлиб қолди», деб ёzáди олим.

Беруний объектив реал шароитни ҳисобга олиб Фазнанинг ўзига иккинчи ватан бўлганини эътироф қиласади. Чунки у ўз она юрти Хоразмга қайтиш имкониятидан маҳрум бўлганини тушунар эди. Беруний Фаз-

нада ўзининг илмий ишларини давом эттироқчи эканини, хусусан астрономик кузатишлар олиб бормоқчилигини билдиради ҳамда бошқа илмий режаларидан хабар беради.

«Геодезия» Берунийнинг Фазнага келганидан сўнг бошлаган биринчи катта асари эди. Юқоридаги фикрлар олимнинг ўз тутқинлик ҳолатини эътироф этишдан бўлақ чораси қолмаганидан далолат беради.

Беруний «Геодезия» китобида ҳаракатсиз юлдузлар ва Қуёш орқали шаҳарларнинг жойлашган ҷенгликларини аниқлаш усулини муфассал баён қилган. Шунга мисол қилиб олим Бағдодда Мусо ибн Шокирнинг ўғиллари Мұхаммад ва Аҳмад ҳаракатсиз юлдузлар воситасида Бағдод шаҳари ўрнашган қенгликнинг $33^{\circ}25'30''$ эканлигини аниқлаганлари тўғрисида ҳикоя қиласди.

Абу Маҳмуд ал Хўжандий 384 йили (милодий ҳисобида 994) йил Қуёшнинг энг баланд кўтарилиган дараҷасини $77^{\circ}57'40''$ деб аниқлаган. Шундан келиб чиқиб, у Рей шаҳари ўрнашган қенглик $35^{\circ}34'39''$ эканини ҳисоблаб чиққан. Беруний эса Рей шаҳарининг ўрнашган қенглиги $35^{\circ}38'5''$ ҳисоблади. (Бу мисолларнинг ҳаммаси «Геодезия» китобининг П. Г. Булгаков рус тилига қилган таржимасидан келтирилмоқда. С. 122).

Беруний «Геодезия» да Абу Маҳмуд Хўжандийнинг Рей шаҳаридаги қурган расадхонаси тўғрисида ҳам муфассал маълумот берган.

«Геодезия»да Берунийнинг одамлар яшайдиган ерларнинг иқлиmlарга бўлиниши тўғрисидаги маълумотлар ҳам foят муҳим. Бу ерлар сиёsat ва бошқаришга ўнг бўлишини кўзда тутиб етти қиёмага бўлиб чиқилган. Ҳар бир бўлақ доира шаклидадир. Марказда Эронشاҳр жойлашган. У тўртинчи иқлиm.

Иқлиmlарни «кишвар» (мамлакат) деб ҳам аталади.

Берунийнинг фикрича бу бўлиниш ҳеч қандай табиий ёки астрономик асосда эмас, балки одамларнинг қиёфаси, характеристи, тили, дини ёки зўравонлик асосига қурилган.

Юнонлар одамлар яшайдиган ерларни иқлиm ва тун-кун узунлигига қараб етти бўлакка ажратдилар. Улар энг узоқ ёз куни ўн уч ярим соат бўлган жойни ўрта деб ҳисобладилар. Шундан ҳар ярим соат фарқ қилидиган жойни бир иқлиm деб атадилар. Бу ҳисоб ҳундуз ўн олти соат бўлган жойда тўхтайди.

Беруний «Геодезия» асарида Ой тутилиши ва унинг турар-жойларнинг ўринларини аниқлашдаги аҳамиятини кўрсатди.

Китобда Беруний бир қанча шаҳарлар, жумладан Бағдод, Рей, Журжония, Бухоро, Шероз, Балх ва бошқа шаҳарларнинг ўрнашган жойлари, улар ўртасидаги фарқларни маҳсус жадвалларда кўрсатган. Яна Беруний бу соҳада бошқа олимларнинг қилган ишлари тўғрисида ҳам ҳикоя қиласди.

Беруний ҳисоблашлар меридиан узунлиги 110275 км. деб кўрсатади, деб ёзади. П. Г. Булгаковнинг таъкидлашича, бу ҳозирги ҳисобдан фақат 620 км. фарқ қиласди, холос.

Беруний яратган «Геодезия» асари геология, география, геодезия ва Ер ҳақидаги бошқа фанлар тараққиётига муҳим ҳисса бўлади.

Фанларнинг келиб чиқиши тўғрисида Беруний айтган фикрлар унинг соф илмий асосда фикр юритганини, объектив реалликни ҳисобга олиб хulosалар қилганини кўрсатиб туради. Астрономияга оид маълумотларни тадқиқ этар экан, «Беруний соҳта «илм»— астрологияга қақшатқич зарба берган. Геодезия тўғрисида баён этган тушунчаларида ҳам Берунийнинг чуқур илмий асосларгагина суюниб якунлар ясагани аниқ кўзга ташланиб туради.

РАЙХОНА ИЛҲОМИ

1029 йил. Баҳор оқшоми. Беруний айвонда гилам устига тўшалган кўрпачада ўлтириб хонтахтага энгашганича ёзиш билан банд. Кичик хонтахтанинг ёнида яна бир хонтахта бор. Унда қават-қават китоблар тахланган. Уларнинг баъзилари очиқ, баъзиларининг орасида керакли саҳифаларга ўрнатилган қоғозлар чиқиб турипти.

Олимнинг қаламидан чиққан қирт-қирт товуш шамнинг секин-секин чарсиллашига қўшилиб кетади. Бошқа бирор овоз эшитилмайди. Атроф тинликка чўмган.

Майин эсган шаббода баҳор гулларининг хушбўй ҳидларини айвонга келтириб олим димоғини уларнинг атри билан тўлдиради, унинг атрофида гир айланниб парвона бўлади. Шундан кейин ижод тутёнига кўмилиб

кетиб бу ўйноқи шўхликка бепарво бўлган олимдан гина қилгандай секин чиқиб ғойиб бўлади.

Беруний китоблар оламида саир қиласди. У ўқиганларини турмушда кўрганлари билан қиёслайди. Ўнинг кўз ўнгидан турли мамлакатлар, улардаги ям-яшил ўрмонлар, жазира маҳаллалари, серсув дарёлар, бепоён далалар, заҳматкаш деҳқонлар бир-бир қочади. Шоҳона қасрлар, чиркин ва юпун қишлоқлар, нозикбадан раққосалар, оч ва ялангоч етим-есир гўдаклар олимнинг фикр нигоҳидан ўтади. Ҳар бир мамлакатда инсонлар яшайдилар, улар ерни обод ва гўзал этадилар, улар ҳаёт боиси, барча мавжудотнинг энг шарафлиси. Уларнинг баҳтиёрикка ҳаққи бор. Олим тафаккури ва тинимсиз меҳнати шу инсонларга бағишланган, шуларнинг қисматини енгиллаштириш, ҳаётини илм нури билан ёритишга қаратилган. Шунинг учун у илм йўлида толиқмай қадам ташлайди, ўз билимидан эл кўнглига баҳра етишини тилайди. Шу мақсад олимга куч ва ғайрат беради. Инсониятга муҳаббат уни илм шуури билан тўлдиради, кўнглини баҳтиёрик шуъласидан чароғон этади.

Шу вақт айвоннинг эшиги овозсиз очилди. Айвонга оҳиста кириб келган хизматчи ўз хўжасининг машғулотига халал бермаслик мақсадида оёқ уни билан юриб Беруний ишлаб ўлтирган хонтахтага яқинлашди ва унинг устига бир қофозни қўйдию шу он изига қайтиб товуш чиқармай чиқиб кетди.

Беруний гарчи буни сезган бўлса ҳам аҳамият бермади. У ўз ишида давом этди. Орадан ярим соатча фурсат ўтди. Ёзишдан сал толиқсан Беруний қаламини хонтахта устига қўйди-да, у ерда турган пиёлани олиб ундаги шарбатдан бир ҳўплади. Шунда унинг кўзи хонтахта устидаги қофозга тушди. Олим бу қофозни олиб унда ёзилган хатни ўқий бошлади. Ўқиш давомида Берунийнинг юзида қувонч ифодалари орта борди, чеҳрасига шодлик қизиллиги югурди. Беруний бу хатни худди узоқ ва оғир йўл босиб ташна бўлган ва тўсатдан йўлида тоза сувли булоқ чиқиб қолган йўлчилик ҳузур қилиб ўқир эди.

У мактубни ўқиб бўлгач дарҳол яна қайта ўқий бошлади. Бу ном Берунийнинг она тили хоразмий тилида ёзилган эди. Мактубни ёзган Райҳона деган қиз бўлиб, у ўзининг хоразмли, отасининг оти Ҳасан — ал Хоразмий эканини билдиради эди. Мана неча йилдирки

Райҳона Берунийнинг илмий асарларига қизғин мұхаббат қўйган. У Беруний ёзган барча китобларни ўқиган. Отаси турли йўллар билан бу асарларнинг нодир қўлёзмаларини қизига топиб беради. Райҳона Беруний ёзган асарларнинг қанчалар бой ва хилма-хил мазмунда эканини яхши билади. Уни айниқса астрономияга оид китоблар кўпроқ қизиқтиради. Райҳона ўзи ҳам астрономия билан озроқ шуғулланади. Аммо ёлғиз ўзи устоз кўрмай шунчалар мураккаб илмни қандай қилиб эгаллай олсин. Шунинг учун қиз журъат қилиб улуғ олимга мурожаат қилмоқда. Унинг бу беадаблигини муҳтарам устоз кечирадилар деб умид боғлади. Бир неча саволларни Райҳона Берунийга ёзиб юбормоқда. Агар устоз лутф-марҳамат кўрсатиб шуларга жавоб қайтарсалар, шўрлик қизнинг энг эзгу истаклари рўёбга чиққан бўлар эди. Яна устознинг муборак қўлларидан чиққан бу асар не-не бошқа райҳоналар учун ҳам дастгир бўлар, уларни илм ва эзгулик йўлига чорлар.

Беруний Райҳонани танимас, унинг номини биринчи бор эшитиши эди. Аммо ўз ватандоши бир қизнинг унинг асарларини ўқиб илмий ижодига шунчалар ихлос қўйгани олимга ёқиб тушди. У қизнинг сувратини кўз ўнгига келтирди. Қора оҳу кўзлари кўнгилларга ўт со-лувчи нигоҳлар учун яратилган: пайваста қайрилма қошлар ошиқлар бошини кесувчи қиличдек, назокатли қомати қархисида сарв суманлар тобелик билан бўйин эгадилар. Бу ёш хоразм париси оламга ғулгула соловчи ишқ туғёнлари барпо этмоқ учун вужудга келган.

Аммо қизнинг кўзлари ўткир нигоҳ билан йигитларга эмас, осмон юлдузларига боқади, қошлари илмий асарларнинг мағзини чақмоқ учун чимирилади. Нозик қомати боғларда жилва қилмай, хонтахта атрофида тин топган, гўзал боши мутолаа учун эгилган.

Райҳона эса устоз олимни жуда яхши билар, унинг ҳаёт йўли ва ижоди билан тўла таниш эди. Берунийнинг юксак истеъоди, ғоят гўзал руҳий дунёси, эрлик шижоати, олий инсонлик фазилатлари қизнинг қалбини мафтун этган, унинг ёш юрагига ўчмас севги оловини ёққан эди. Бу олов қиз вужудини бетиним ёндирав, руҳига бир нафас осойиш бермас эди. Ҳар доим шу оташ тобида тўлғанмоқда бўлган Райҳона олимнинг асарларини ўқиши, у билан ҳаёлий мусоҳаба қилиш, олим тўғрисида нимаики сўзланса, шуни бетоқатлик билан қайта-қайта энтикиб тинглаш орқали сал бўлса-

да, бу оловқи пасайтирмоққа натижасиз уринар эди. Нихоят қиз Берунийга хат билан мурожаат қилишга қарор қилди, Шу билан Райҳона олимга ўзини танитмоқчи бўлди. Зора олим бир эътибор қилса, зора бечора қизнинг қалбини тўлдирган дарду-аламлар, беҳисоб изтиробларнинг инъикосини сезса...

Беруний Райҳона йўллаган илмий саволларга жавоблар ёёди. Бу савол-жавоблар алоҳида бир китобни ташкил этади. Бу китобнинг номи қисқартиб «Аттафҳим» («Тушунтириш») деб аталади. «Аттафҳим» китобининг тўла номи «Аттафҳиму ли авоили синоат аттанжим»дир. Бунинг таржимаси «Юлдузларнинг ҳисоблаш санъатининг бошланғич қисмларини тушунтириш» бўлади¹. Беруний ўз янги асарини Райҳона Ҳасан — ал Хоразмий қизига бағишилади.

Бу китоб мундарижасини ташкил этган савол ва жавоблар арифметика, алгебра, геометрия, астрономия, география, хронология ва бошқа фанларга оидdir.

Беруний геометрияни жисмдаги фигура ва шакларнинг ўзига хос хусусиятларини ўрганувчи; жисмлар ва уларнинг бир-бирига нисбатан миқдорий муносабатларини белгиловчи фан деб изоҳлайди. Шу бобда яна сонлар ва касрлар, квадрат ва кублар арифметикага оид бошқа омиллар ҳамда алгебранинг асосий қоидлари баён этилган.

Астрономияга оид бўлимда коинот, ёритқичлар ва юлдузлар, горизонт, меридиан, кун ва тун, ёритқичларнинг чиқиши ва ботиши, юлдузларнинг ҳажми, ойманзиллари, апогей ва перигей ва шу каби ҳоллар тўғрисида тушунча берилади.

География қисмida Ернинг ҳажми, денгизларнинг пайдо бўлиши тўғрисида сўз боради. Беруний «Аттафҳим» китобида шарқий ярим шарнинг юмaloқ харитасини келтирган. Яна шу қисмда иқлиmlар, ернинг одамлар яшайдиган бўлаклари ҳақидаги маълумотлар: мамлакатлар, халқлар, шаҳарлар тўғрисида ҳикоялар бор. Шулар орасида Беруний Ҳазар ва Трапезунд денгизи ўрталиғида истиқомат этувчи хазарлар, руслар,

¹ «Аттафҳим»нинг қисқача аннотацияси П. Г. Булгаковнинг «Жизнь и труды Беруни» китобида (Т. «Фан», 1972) келтирилган (с. 148—153). «Аттафҳим»нинг рус тилига қилинган таржимаси 1975 йили Тошкентда «Фан» нашриётида босилган.

печенеглар, бошқирдлар, булғорлар ва суворлар тўғрисида ҳам сўзлайди.

Хронологияга оид масалаларда ҳинд, араб, форс халқларидағи ой ва йўл тушунчалари, ҳайитлар, урфодат ва маросимлар тўғрисида гапирилади.

«Аттағим» Беруний яшаган даврдаги фанларга оид асосий билимларнинг қисқа ва лўнда қилиб тузилган йигиндиси бўлмиш бир асадардир.

Баҳор ҳусндорлиги ҳар куни алоҳида латофат касб этаётган бир пайт. Боғлар гулларга лим тўлган. Үрик, шафтоли, олма, олча, гилослар бирин-кетин гул чиқарип ҳар бири ўзига хос фусункор чирой очади. Асаларилар гулдан-гулга учиб тинмайдилар. Ҳар ёнда баҳор нашъаси ҳукмрон.

Абу Райҳон Беруний Райҳона учун маҳсус ёзган китобини қизга йўллади. Тезда Райҳонадан Беруний номига ёзилган миннатдорлик тўла мактуб ва жуда кўп қумматбаҳо совғалар келди. Булатни келтирган киши қирқ беш-эллик ёшлар чамаси мулойим, ўта андишли, камгап бир одам экан. Берунийнинг одамлари уни ҳурмат билан кутдилар, яхши зиёфат қилдилар. Сўнг Беруний меҳмонни ўз хонасида қабул қилди. Бу ерда икковлон озгина сұхбат қурдилар.

— Мактубдан маълум бўлишича, ул зоти шарифа «Аттағим» китобидан мамнундирлар,— деди Беруний.— Бу хабар менга ғоят хушнудлик баҳш этди. Яхши қабуллари учун миннатдорлигимни еткургайсиз.

— Қуллуқ,— деди меҳмон.

— Мана бу нарсаларни қайтариб олиб кетишингизни сўрайман,— деди Беруний.

У хонтахта остидан икки қутини олиб меҳмонга узатди. Бу Райҳона юборган олтин, жавоҳирлар солинган қутилар эди.

— Олийнасиб мухлис ва шогирдингиз Сизга самимий дилдан атаб юборган эдилар,— деди меҳмон саросимага тушиб,— бу ноқулай вазифадан мени ҳолий этарсиз. Совғаларнинг қайтиши норозилик аломати эмасми?

— Йўқ,— деди Беруний сал қатъий оҳангда,— бундай эмас. Мен учун у зоти муҳтараманинг самимий бағишловлари ўзи катта давлатдир. Тошлар бундай марҳамат қаршисида ҳеч қандай аҳамиятга эга эмас.

Беруний сұхбат тугаганини билдириб таъзим қилди. Меҳмон унга қуллуқ қилиб ўрнидан қўзғалди ва олим

учун ҳеч қандай қадр-қиммати бўлмаган олтин, жаво-хирлар тўла икки қутини қўлтиғига тиққанича хонадан чиқди...

Райҳонанинг элчиси ўз бекасининг боғига кириб келар экан, у қаттиқ хижолатда эди. Совғаларнинг қайтиши гарчи ёқимсиз бўлса-да, яна у ўз бекасининг бошқа бир жавобга мунтазир эканини билар эди. У ҳам бўлмади. Вакиллик шу қадар бемаҳсул бўлиши мумкини?

Беруний ҳузурига юборилган одамининг қайтганини эшитгач Райҳона уни шодлик ва ҳаяжон билан дарров қабул қилди.

Улар Райҳонанинг мўъжазгина кутубхонасида ўлтиридилар. Қиз боши ва устига ҳарир ридо ёпинган бўлса-да, унинг ниҳолдек қомати, жоду кўзлари, бу кўзлар боқишидаги интизорлик яқол кўриниб турар эди. Вакил Берунийнинг жавобини одобли ифодаларда баён қилди ва қизга таъзим қилиб қайтариб келтирган қутиларни хонтахта устига секин қўйди.

— Шундай бўлишини кўнглим сезган эди,— деди қиз. У ўз одамининг кўнглидаги хижолатни тарқатмоқчи бўлиб майнин табассум қилди. Сўнг яна деди:

— Бирор мактуб бермадиларми?

Қизнинг интиқ бўлиб кутгани шу эди. Буни вакил яхши биларди.

— Ўзлари индамадилар. Сўрашга ботинмадим.

— Сиздан ўта миннатдормен. Муҳтарам устознинг мен учун энг қадрли сўзларини келтирдингиз. У зотнинг ҳусни таважжуҳлари биз учун юксак саодатdir.

Суҳбат шу билан якунланди.

Райҳона ўзи ёлғиз қолгач, нақшли деворлар бўйлаб қатор терилган китобларга юз ўғирди ва кўзидан тирқираб чиққан ёшларини дастрўмоли билан аста артди. Унинг қалби изтироб билан тўла эди. Бу севги изтироби кечаю-кундуз унинг вужудини ўт бўлиб куйдирали. Ҳамсуҳбати ва ҳамдарди фақат китоб. Қиз севикли Берунийнинг асарларини қайта-қайта ўқиб ором топади. Энди унинг энг қимматли ва азиз овунчоғи Берунийнинг Райҳонага бағишлаб ёзган китоби. Райҳона токчадан шу қўллэзмани олиб секин варақлади, Берунийнинг қўли билан ёзилган варақларга ёшли кўзлари билан тикилди, унинг кўнгли севги тўлқинларининг тубсиз қаърига кўмилиб кетган эди.

Беруний Райҳонанинг мактубини ўқиган заҳотиёқ

қизнинг кўнглидаги дардларини сезган эди. Шунинг учун ҳам жавобан унга мактуб ёзмади. Аммо Райҳонага бағишлаб бутун бир китоб ёзиб унга йўллади.

Бечора Райҳонанинг муҳаббатига тақдир бундан бошқа мукофот тайёрламаган эди. Севгучи вужудга шу кифоями? Аммо қизнинг самимий севгиси гарчи висол лаззатидан маҳрум бўлса-да, ўзининг покизалиги ва юйсаклиги туфайли мангу ҳаёт касб этди.

Райҳона Абу Райҳон Беруний билан бирга бир минг йиллик масофани босиб ўтиб бизгача етиб келди.

Бокира севгининг бахти қисмати шу эмасми!

ДОНО МАСЛАҲАТ

Фазна Ҳиндистон устидан қозонган ғалабадан мағрур. Мана уч йилдирки, Маҳмуд Фазнавий давлатининг пойтахтига Ҳинд элининг бойликлари баҳор сойларининг тошқинли сувлари каби мўл-кўл оқади.

Не-не хазиҷалар, не-не гўзал чўрилар ва барваста қуллар асир қилинган. Бир ўлканинг хароб бўлиши, бузғунликка юз тутиши ҳисобига бошқасининг бойлигига бойлик қўшилади. Яна энг мудҳиш бебаҳтлик шундаки, ҳарбий ва сиёсий мағлубиятга мубтало бўлган халқнинг шаъни ҳақорат қилинади, уни камситувчи иззат-нафсига тегадиган гаплар гапирилади: унинг тарихи, анъаналари, урф-одатлари, ҳаёт тарзи тўғрисида нолойиқ фикрлар билдиради. Ёлғон-яшиқ хабарлар тўқилади.

Беруний музaffer подшоҳ Маҳмуд Фазнавий қўшинлари билан бирга Ҳиндистоннинг у бошидан кириб бу бошидан чиқди. У Қашмир ўлкаси билан танишди: Мултон, Лоҳур, Жалон, Сийалкот, Пешавар... қанчаканча вилоятларда бўлди.

Қўшинбошлилар талон билан банд бўлган дамда олим Ҳинд мамлакати ва халқининг ҳаётини ўрганиш билан машғул бўлди. Улуғ мутафаккирнинг пок қалби бу буюк мамлакат халқига ҳурмат билан тўлди.

Беруний бағри кенг ва олижаноб ҳинд халқининг ўтмиш маданияти ва тафаккури, ҳозирги турмуш, хилма-хил одат ва қоидалари, тилларини яхшилаб ўрганиди, китобларини ўқиди. У Ҳиндистонга оид бўлган барча билимларни чуқур эгаллади, уларни ўзи яхши билган қадим юонон илми ва маданияти билан таққослаб кўрди. Улар ўртасидаги ўхшашликлар ва фарқлар-

ни аниқлаб чиқди. Беруний ҳинд тафаккурига оид бир қанча қадимий китобларни мутолаа қилиш билан чекләнмай, улардан баъзиларини араб тилига таржима қилди. Бошланиш ва мавжудотга доир «Санкхая», жонни бадан қафасидан қутқариш тўғрисида сўз юритилган «Патанжали» яна ҳиндаларнинг эътиқод асослари баён қилинган «Божупурона», «Вишнупурона», «Гити», «Сангхита» ва бошқа кўп китобларни диққат билан ўқиб чиқди. Улардан ўқиб ўргангандарини ўзининг кўрганлари билан қиёслади. Беруний ҳинд ҳаётига оид ҳар бир тушунча ва амални насторийлар (христианлар), ибрийлар (яхудийлар), мусулмонлар эътиқодига оид кўринишлар билан синчиклаб солишириб чиқди.

Хуллас, олим Ҳиндистондан Фазнага қайтганида унинг ақли ва хотири Ҳиндистон тўғрисидаги мукаммал бир қомусу беҳисоб билимлар хазинасига айланаб кетган эди.

Ана шу пайтда Беруний ва устоз Абу Саҳл Абул Мунъим ибн Али ибн Нұҳ Тифлисийнинг учрашувлари содир бўлди.

Фазна эрта баҳорда ажойиб гул ранг либос кияди. Ҳар бир ҳовли ва боғларда атиргуллар кулиб чехра очадилар. Тонг ёришар пайтида бутун атрофни гунчалар табассумига шайдо бўлиб, уларга севги изҳор қилаётган булбуллар нағмаси қоплади.

Одати бўйича саҳар намозини ўқиб бўлгач, Беруний енгил нонушта қилас, сўнг дарҳол ишга ўтиради. То кун ёйилиб қуёш нурлари оламга олтин ранг безаклар ёпгунгача олим кўп саҳифаларни ўз фикр ва таҳлили билан тўлдиради. У кунбўйи ишлайди. Аммо ижод хусусан тонгдан кун ўртасигача енгил ва серунум бўлади. Кун тиккага келмасдан икки-уч соат бурун эрта тонгдан бошланган тинимсиз меҳнатнинг ҳорғинлиги сал устун кела бошлаганда, Беруний озгина танаффус қилас, Бу истироҳат ё оз фурсатли сайр, ёки жимлик оғушидаги тин, ёки кўнгил ёқтирган бирор киши билан суҳбатдан қборат.

Бугун ана шу озгина ҳордиқ чиқариш фурсати ғоят ёқимли ва мазмунли кечди.

Беруний ёзишдан чарчаб қаламни хонтахта устига қўйди, сўнг муттасил оқ қофоз ва қора хатга тикилмоқдан толиқиб сал ачиша бошлаган кўзларини юмиб, уларга дам берди. Улардаги чарчоқни тарқатиб яна кўзини очди ва ўрнидан турди, увишиб қолаёзган оёқ-

ларига истироҳат бағишлиб у ёки бүёққа юрди-да, сўнг хонадан айвонга чиқди. Айвон қаршисидаги боғ гуллар ва янги барг очган дараҳтлардан оқ, пуштиранг ва яшил ёпингич ёпингандек жозибали эди. Беруний ранго-ранг товланмоқда бўлган боғ ҳуснига боқар экан, кўзи ўнгидан бепоён Ҳиндистоннинг зангори ўрмонлари, чексизликка ёстанган дала, қирлари; уларга доимий ҳаёт бағишлиовчи виқор билан оқувчи серсув дарёлари бирма-бир кечди.

Шу аснода хизматчи келиб Берунийга бир мўйсафид меҳмоннинг ташриф буюрганигини билдириди. Беруний айвондан тушиб боғ сари йўл олди. Боғ эшигидан қўлига асо тутган нуроний чеҳраси оппоқ соқоли сингари пок, кўзлари ва лабларида ярим табассум жилоланмоқда бўлган барваста ва улуғсифат бир қария сиполик билан қадам ташлаб кириб келмоқда эди. Беруний мамнуният билан меҳмон ҳузурига яқинлашиб уни қарши олди ва одоб билан салом бериб сўрашди:

— Ассалому алайкум, муҳтарам устоз, қадамларига ҳасанот.

— Ваалайкум ассалом, — деб жавоб қилди меҳмон.

Улар нафис ва самимий тавозе билан сўрашишди. Беруний меҳмонни айвонга бошлади. Бу киши асли Қавказ томондан бўлиб, Мовароуннаҳр, Хурросон ва Эронзаминда номи чиққан олим Абу Саҳл Абул Мунъим ибн Али ибн Нұҳ Тифлисий эди. Бу кишининг очиқ кўнгил, соф виждонли покиза бир зот, ғоят билими, илм кучига қаттиқ ишонган, бидъат ва хурофотга қарши бешафқат, муносиб инсонларга ғамхўр ва муҳаббатли нодир бир вужуд эканлигини дўстлари ҳам, душманлари ҳам яхши билар эдилар. Берунийнинг устоз Абу Саҳлга ҳурмати баланд эди.

Гарчи Берунийнинг олимлик мавқеи ундан паст бўлмаса-да, Абу Саҳлнинг ёши улуғлиги ва ўзининг чин ҳурмати юзасидан Беруний уни ҳамиша устоз деб шарафлар, бу устознинг суҳбати ва диққат эътиборини қаттиқ қадр қиласар эди.

— Ҳиндистондан қайтганингиз дарагини эшитиб зиёратингизга ошиқдим. Сизсиз ўтган уч йил уч қари (аср) каби туюлиб кетди,— деди Абу Саҳл Берунийга улар айвон сари боришар экан.

— Эътиборингиздан беҳад миннатдормен,— деди Беруний унга жавоб бериб,— Ҳиндистондан шундай би-

лимлар ўрганиб қайтдимки, Заршунос устозлар ила бу бойсда мусоҳаба қурмоққа интизор эдим.

Улар айвонга чиқиб хонтахта атрофига солинган кўрпачаларга ўтиришди. Абу Саҳл фотиҳага қўл очди. Фотиҳадан сўнг суҳбат давом этди. Кўп ўтмай Берунийнинг хизматчиси хонтахтага дастурхон ёзил, унинг устига нон, ширинликлар ва қуруқ мева-чева тортди, чойнақда чой ва алоҳида идишда шарбат қўйди, сўнг ўзи чиқиб кетди.

Ҳар икки олим енгил тановул қилиб гоҳ пиёлага қўйилган чойдан, гоҳ шарбатдан нўш этиб суҳбатни давом эттирилар.

— Ҳиндистон хабарлари сиз орқали етказилганда ғоят дилфиреб ва рост бўлажаги аниқ,— деди устоз Абу Саҳд,— биз бу хабарларингиз нуридан дил уйин ёрутмоққа шошурмиз.

— Бари бир хабар кўз билан кўргандек бўлмайди. Аммо ёлғон аралашмаган ҳар бир хабар мўътабардир. Ҳиндистонда шу қадар кўп нарсаларни кўриш ва ўрганишга тўғри келдики, қай биридан хабар қилишга гоҳо ақл ожиз қолади,— деди Беруний.— Яна ҳиндларнинг кўп ишлари, бошқа халқларники сингари, биздагидан ўзгароқдир. Улардан хабар қилинганда бирор ишониб, бошқа бирор ялғонга чиқариши ҳам мумкин.

— Фақат ростлик билан хабар етказмак шарт,— деди Абу Саҳл.— Бундай хабарнинг бирорига ёқиши ёки ёқмаслиги илм ва тарих қаршисида нописандир.

Устознинг бирор деб подшоҳ Маҳмуд Фазнавийни кўзда туваётгани Берунийга очиқ кундек аён эди.

Босиб олинган мамлакат тўғрисида ҳақиқатни сўйлаб, енгилган ўлка халқининг фазилатларини элга танитиш албатта ғолиб подшоҳга ёқмаяжак.

«Подшоҳлар олдида рост гапни гапиришда уларнинг савлатларидан қўрқманг, улар гавдангизга ҳукмронлик қила оладилар, аммо нафсингизга теголмайдилар. Исо пайғамбарнинг «Инжил»да айтган бу сўзлари одамларни чинакам шижоатга ундумоқдир,— деб сўзида давом этди устоз Абу Саҳл.— Ҳамманинг табиатида адолат бевосита севикли ва ҳамма унинг яхшилигига қизиқади. Ростгўйлик ҳам худди шундайдир.

Абу Саҳл мұтазилалар тўғрисида ёзилган китобда кўп фикрлар иотўғри келтирилганини ва шу йўсинда авом ўртасида мұтазилалар ҳақида ёмон тушунча тўғдириш мақсади бўлганини қоралаб гапирди.

— Ўз мазҳабига рақиб бўлганларга нисбатан бундай йўл тутмовчилар кам бўлади,— деди Беруний.⁽⁴³⁾

— Биздаги турли китобларда ўзга эътиқодлар бўзиб кўрсатиладики, аҳвол ҳақиқатини билмаган киши, агар фазилатли арбоб бўлса, уларни ўқиганда хабардор кишилар қаршисида хижолат чекади; паст табиятли бўлса, ўша ёзилганларга ишониб унга қайсаарлик билан ёпишиб олади. Аҳвол ҳақиқатини биладиган киши у китобларни ишониб ва эътиқод қилиб эмас, балки ўз билимини ошириш ва лаззатланиш учун ўқиди, ҳамда ўқиганларидан ўзи учун керакли нарсаларни чиқариб ола билади.

Шу асосда суҳбат ҳиндларнинг урф-одатлари, эътиқод ва турмуш тарзига кўчди.

Уларнинг кўпчилиги биздаги китобларда ёзилган,— деди Беруний.— Ёзилганларнинг баъзиси баъзисидан кўчирилган, териб олиб аралаشتариб тўпланганду, лекин ҳиндларнинг тушунчасига мослаб кераксизларидан тозаланмаган. Фақат Абул Аббос Эроншаҳрий бор нарсаларни ғишимай ва иккюзламачилик қилмай тўппа-тўғри ҳикоя қиласди. У яҳуд ва насороларнинг динларини, «Таврот» ва «Инжил»нинг мазмунини яхши келтирган: Муовияларнинг китобларида айтилган, аммо ҳозир йўқ бўлиб кетган дин ва халқлар тўғрисидаги хабарларни тўлиқ берган. Фақат ҳиндлар ва шаманийларга келганда Абул Аббоснинг ўқи нишондан четга кетиб охир бориб Зурқон китобига теккан. Ундаги сўзларнинг барчасини китобига кўчириган, кўчирмаганларини гумонимча, ҳиндлар ва шамонийларнинг авом одамларидан эшитиб ёзган.

— Мен сиз айтилган фикрларнинг чин ҳақиқат эканига шоҳидман,— деди Абу Саҳл Тифлисий.— Сиз Ҳиндистонда неники кўрган, ўқиб ўрганган, эшитиб аниқлаган бўлсангиз, шуларнинг ҳаммасини жам этиб бир китоб ёзмоғингиз даркор. Токим бу китоб орқали авлод-авлодларга ҳинд халқи тўғрисидаги рўйирост гаплар бориб еггай.

Абу Саҳл ана шундай катта ишга фақат Беруний сингари улуғ ҳақиқатгўй олимгина қўл уриши мумкин, деган фикрни ҳам айтмоқчи эди, аммо Берунийнинг ўта камтарин бир киши эканлигини билганидан бу мақтov унга малол келишини андиша қилиб айтмади.

Суҳбат давомида Абу Саҳл Тифлисий Берунийни Ҳиндистон ҳақиқидаги китобни тезроқ ёзишга кўп уннади.

Берунийнинг кўнглида ҳам бу мақсад бор эди, аммо уни кейинчалик амалга оширмоқ мумкин бўлар, деб Фикр қилар эди.

Устоз Абу Саҳлнинг қизиқтириб қилган таклиф ва йўтимослари сабабли Беруний шу режани тезда рўёбга чиқармоққа қарор қилди.

Бу китоб баҳс ё тортишиш китоби бўлмайди. Шунинг учун бу китобда душманлар исботи келтирилмайди, ҳақиқатан четга чиққанга ўхшаб кўринганларга қаршилик кўрсатилмайди. Бу фақатгина баён қилиш китоби бўлади. Ҳиндлар сўзи қандай бўлса, шундай ёзилади. Уларнинг юонолар билан яқинликлари борлигини билдириш учун китобга юонларнинг шу хилдаги сўзларидан қўшилади.

Икки олим ёзилажак китоб ана шундай талаблар асосида яратилиши тўғрисида келишиб олишди.

— Барча маълумот қўлингизда ҳозирдир. Иншооллоҳ, тез фурсатда Ҳиндистон ҳақиқати муборак меҳнатингиз интиҳо топур ва илм аҳлига унинг мутолааси мұяссар бўлар,— деди Абу Саҳл табассум билан.

«ХИНДИСТОН»

Беруний ўзининг Ҳиндистон ва ҳинд ҳалқи ҳаёти тўғрисидаги асарини «Китобу фи таҳқиқи мо лил ҳинд мин маъқулатин фал ақли ав марзулатин» деб атади. Бунинг таржимаси бундай бўлади: «Ҳиндлар тўғрисида айтилган (гап)ларнинг ақл қабул қиласиган ё қабул қиласиганларини аниқлашга бағишлиланган китоб». Қўлланишда ўнғайлик учун уни «Ҳиндистон» деб юритилади.¹

«Ҳиндистон» китобининг дастлабки ўн икки боби (биринчи бобдан то ўн иккичи бобга қадар) ҳиндларнинг тангри, дунё ва охират тўғрисидаги тушунчаларига бағишлиланган. Бу бобларда ҳиндларнинг ақлий ва ҳиссий нарсалар, жон ва унинг моддага алоқаси, руҳлар, маҳшар ва жаннат тўғрисидаги тасаввурлари:

¹ «Ҳиндистон» китобини араб тилидан ўзбек тилига А. Расулов, Ю. Ҳакимжонов, F. Жалоловлар таржима қиласиганлар. Таржиманинг масъул муҳаррири А. Ирисов. Бу таржима Беруний асарлари тўпламининг II китоби сифатида 1965 йилда Тошкентда нашр этилган. «Ҳиндистон»нинг араб тилидан рус тилига таржимаси А. Б. Холидов, Ю. Н. Завадовскийлар томонидан амалга оширилган. Масъул муҳаррири В. И. Беляев. Бу таржима 1963 йили Тошкентда босиб чиқарилган.

диний йўл-йўриқлар, санамлар, диний китоблари тўғрисида сўз юритилади.

Ун учинчи боб шеър ва грамматикага бағишиланган.

Ун тўртинчи бобда илмий китоблар тўғрисида сўйланади. Бу тўғрида Беруний бундай деб ёзган: «Илмлар кўпdir. Улар замони иқболли бўлиб, турли фикр ва хотиралар уларга қўшилиб борса, кўпаяди. Одамларнинг илмларга рағбат қилиши, илмларни ва илм аҳларини ҳурматлаши ўша иқболнинг белгисидир. (Айниқса) ҳукмрон кишиларнинг илм аҳlinи ҳурмат қилиши кишиларнинг, дунёнинг (кундалик) зарур ишлари билан овора бўлиб қолган қалбларини турли илмлар (билин шуғулланиш) учун бўшатиб қўяди. Ҳукмроннинг илм аҳlinи кўпроқ мақтаб улардан хурсанд бўлиши ҳам илмларнинг кўпайишига сабаб бўлади. Демак, одамларнинг қалби буни севиш учун, бунинг тескарисига эса нафрат билдириш учун яратилган» (125).

Ана шуидай илм ва илм аҳlinи улуғловчи фикрларини изҳор этиб бўлгач, Беруний ўзи яшаётган давр ва муҳит тўғрисида шикоят билан гапиради. Бу замона айтиб ўтилган сингари эмас, балки аксинчадир.

«Лекин замонамиз,— деб ёзади Беруний,— айтиб ўтилгандай замон эмас, балки унинг тескарисидир. Шундай замон ва шароитда яшаш мажбурий бўлгандан кейин қачон илм юзага чиқади, ёки юзага чиққани қачон ривож топади» (125).

Олим қалбини тўлдирган бундай ҳасратли сатрлардан кейингина бевосита ҳиндларнинг илмлари тўғрисидаги сўз бошланади.

Ҳиндларда астрономия ривож топган. Аммо уни илми нужум (астрология) билан қўшиб юборганлар.

Табобат ҳам астрономия қадар эътиборлидир. Тибга оид китоблар ичida энг мўътабари «Чараки» китобидир.

Беруний ҳинд ҳалқи турмушининг барча томонлари ни ёритишни ўз олдига вазифа қилиб олган эди. Шунинг учун «Ҳиндистон» китобининг айрим бобларида олим ҳиндларнинг ўлчов асбоблари тўғрисида фоят аниқ ва қизиқарли ҳикоя қиласи: сўнг ҳинд ёзуви тўғрисида, ҳалқнинг турли-туман урф-одатлари тўғрисида лўнда маълумот беради (ўн олтинчи боб).

«Тил сўзловчи истагини эшитувчига етказувчи таржимондир,— деб ёзарди Беруний.— Шунинг учун тил

замоннинг бирон турғун қисми билан чекланиб қолади. Агар инсондаги сўзлаш қуввати ҳамма жойга шамол сингари ёйилувчи бўлмаганда эди, замонлардан замонларга нафаслар сингари ўтувчи хат ёзиш санъатини келтириб чиқармагандага эди, ўтмиш замоннинг хабарини, айниқса, узоқ замонлар ўтганда ҳозирги замон тилларига қандай кўчириб бўлар эди» (138).

Беруний ёзув тарихи тўғрисида хабар бериб айтидики, ҳиндларда илгари териларга хат ёзиш одати бўлмаган. Қадим юондан ҳам шундай эди. Суқротдан нима учун асар ёзмаслигини сўраганларида у «Илмни тирик кишиларнинг қалбларидан ўлик қўйларнинг териларига кўчирмайман», деб жавоб қилган.

Исломнинг дастлабки йилларида ошланган териларга хат ёзганлар. Мисрда қамиш мағзи (папирус)дан ёзув учун фойдаланганлар. Чинликларда турли қоғозлар бўлган. VIII асрда асир олинган бир чинлик Самарқандда қоғоз ишлаш санъатини бунёд этган.

Ҳиндистоннинг жанубий районларида яшовчилар узунлиги бир газ, эни уч бармоқ келадиган япроқларга хат ёзадилар. Бу хурмо ва наржил дараҳтларига ўхаш бўйи узун, мевали бир дараҳтнинг япроқлариdir.

Мамлакатнинг шимолий ва ўрта қисмида яшовчи ҳиндлар тўз номли дараҳтнинг пўстлогидан узунлиги бир газ, эни эса бармоқ бўйи қилиб оладилар. Ёғлаб, сайқал берилса, у пишиқ ва силлиқ бўлади. Сўнг шу ишланган пўстлоқларга хат ёзадилар. Сўнг бу пўстлоқларни кийимлик парчасига ўралади, уларга иккита тахтадан муқова қилинади. Бундай китоблар пухте деб аталади.

Энг қадими ҳинд ёзувлари унутилиб кетган. Кейин Въёса ибн Парошара элликта ҳарфдан иборат янги ёзув ижод этган. Бу ёзув мукаммаллаша бориб ҳозирги ҳолга етишган.

Ҳинд ёзуви юонлардаги сингари чапдан ўнгга қараб ёзилади. Бир йўлдаги ҳамма ҳарфларнинг юқори томони тўғри чизиқда текис бўлади, ҳарфнинг ўзи ва унинг шакли ўша тўғри чизиқдан қўйинга туша боради.

Ҳиндларнинг машҳур хатлари сиддҳа матрика деб аталади. Уни Қашмир хати ҳам дейиладар.

Турли районларда ўша ёзувнинг бошқача шакллари ишлатилади. Уларнинг ўз номлари бор.

Сон белгилари (рақамлар) ҳам турлича бўлиб, уларни анка дейилади. Улар жуда чиройли ёзилади.

Ҳиндларнинг баъзи одатлари тўғрисида Беруний анча муфассал ҳикоя қиласди. Ҳиндлар соchlарини қўрмайдилар. Шунда соч бошни иссиқдан сақлайди. Бошяланг юрадилар. Соқолларини бир неча ўрам қилиб ўраб қўядилар. Тирноқларини ўстирадилар. Бўз дастурхонда ёлғиз-ёлғиз овқат ейдилар. Ортиб қолган овқатни емайдилар. Наҳорга узум ичимлиги ичадилар, сўнг овқатланадилар. Чанг созини чўп қурол билан чаладилар. Кийимлари хилма-хил бўлади (оз ва кўпликда). Кўйлакларининг этагини ўнг ва сўл томондан қирқиб, ёриб ажратиб қўядилар. Турли фикр ва ҳодисаларда хотинлари билан маслаҳат қиласди. Бола туғилганда хотинларни эмас, балки эрларини мақтайдилар. Мактаб болаларининг тахталари қора бўлиб энига эмас, бўйига оқ нарса билан ёзадилар. Китоб исмини бошлинишига эмас охирига ёзадилар.

«Ҳиндистон» китобида географияга оид гоят қизиқарли ва муҳим маълумотлар бор (ўн саккизинчи боб).

Даставал олим ерни таърифлайди. Ернинг тўртдан бир бўлагида одамлар яшайдилар. Юонлар ўз ўлкаларининг гарб томонидаги жойни Уқёнус (Океан) деб атаганлар. Океан ернинг бу томони билан нариги томонидан одамлар яшайдиган қуруқликни бир-биридан ажратиб туради. Шимол томондан эса одамлар яшайдиган ерни совуқ ҳаво ажратиб туради.

Беруний жанубдаги муҳим (Ҳинд океани) ва Африка қирғоқлари, унга яқин бўлган оролларни аниқ тасвир этган. Шундан сўнг олим тоғ тизмалари, улардан шарқ ва гарб сари оқсан дарёлар тўғрисида фикр юритади.

«Ҳинд мамлакати,— деб ёzádi Беруний,— шу қуруқликларнинг бир қисми бўлиб уни жанубдан мазкур Ҳинд денгизи, бошқа томонлардан эса ўша баланд тизма тоғ ўраб олган. (Тизма) тоғнинг сувлари ҳинд мамлакатига ёйилади» (текстда «қўйилади» дейилган А. К.) (159).

Шундан кейин Беруний Ҳиндистоннинг асосий районлари, йирик шаҳарлари, улар орасидаги масофа-лар, табиатининг ўзига хос хусусиятлари, ҳайвонот дунёси, иқлими тўғрисида муфассал маълумот беради.

Ҳинд календари тўғрисида сўз борганида, Беруний хабар берадики, ҳиндларда ҳафта кунларининг исмлари етти сайёранинг номларидан олинган. Форслар ҳар кун номига «шанба» қўшиб атаганлари сингари ҳиндлар

унга «бора» қўшадилар. Якшанбани «одитъябора» яъни «қўёш куни», душанбани «сомабора» — «ой куни», се-шанбани «мангалабора»—«миррих куни», чоршанбани «будхабора»—«аторуд куни», пайшанбани «брахостибо-ра»,— «муштарий куни», жумани «шукрибора»—«зуҳра куни», шанбани «шапайтгорибара»—«зуҳал куни» деб атайдилар.

Шундан кейин Беруний ҳиндларнинг осмон, ер, сув тўғрисидаги тасаввурларини баён қиласди: орол ва ден-гизларнинг ҳиндча номларини келтиради, сайёralар, улар орасидаги масофалар, қутб тўғрисида билдирган фикрларини изҳор этади.

Алоҳида бир боб (йигирма бешинчи) ҳинд дарёла-рининг тасвирига бағишиланган.

Кейин Беруний ер тузилиши ва астрономияга оид фикрлар изҳорига ўтади.

Ҳинд астрономларининг осмои ва ер шакли тўғрисидаги тасаввuri бошқачадир. Беруний ўзи мансуб бўлган доирадаги тасаввурга зид бўлган бу ҳолни айтар экан, ислом дунёсидаги баъзи қаллоб ёлғончиларни қаттиқ танқид қиласди. Бундай икки юзлама муттаҳамлар соддадил одамларни лақиллатиш учун макр ва алдов билан машғулдирлар. «Чунки,— деб ёзади Беру-ний,— авом халқнинг қалблари хурофтотга жуда мойил: шунинг натижасида хабар ва ривоятлар қоришиб кетган» (208).

Ҳиндлар тасаввурига кўра осмон ва олам сфера, Ер эса шар шаклидадир.

Ернинг шимол томонининг ярми қуруқлик, жануб томонининг ярми сувга кўмилган. Ер тегирмон тоши сингари айланиб туради. Ер ўртада, оғирликлар унга қараб тортиладилар. Ҳиндлар ернинг юмaloқлигини турли жойларда турлича вақт бўлиши, қўёш кўтарилиши орқали исботлайдилар. Беруний Ернинг шар шаклида эканини тасдиқлади. Аммо бу шарнинг ярми қуруқлик, қолган ярми эса сувдан иборат деган фикрга қўшилмайди. Беруний ернинг шимолий икки чорагидан бири қуруқлик, шу сабабли бу чоракка диаметрал бўлган чоракнинг ҳам қуруқлик бўлишини тахмин қиласди. Сўнг Беруний «Божу пурона» китобига асосланиб ҳинд шаҳарлари ва ўлкалари тўғрисидаги маълумотларни келтиради.

Яна Беруний «Сангҳита» китобида ҳинд ерларининг тўққиз бўлакка тақсимлангани ҳақида ёзилганини маъ-

лум қиласи. Шу бўлаклар ва улардаги шаҳарларни тўла кўрсатади.

Жой номларининг турлича сабабларга кўра ўзгариб туриши мумкинлиги тўғрисида гапириб, Беруний бунга мисол қилиб Тошкент шаҳрининг номини олади. Беруний ёзади: «Айниқса тили бошқа бўлган халқнинг ҳукмронлик қила бошлиши билан номлар тезроқ ўзгарди».

Кўпинча тиллари (бошқа халқ) у сўзларини келишибтириб айта олмай қабул қиласи, (натижада ўша) исмларнинг маънолари ўзгариб шу куйича юононлар сингари ўз тилларига киради. Кўрмайсанми, «тош» сўзи (асли) туркча бўлиб «шош» кўринишини олган.

Тошканд — тошли қишлоқ демакдир. Жуғрофия китобида у Буржал — ҳижора (Тошқалъа) деб номланган.

Беруний «Ҳиндистон» китобида ҳиндларнинг кун бўлаклари, кундуз ва кеч, ойлар ва йилларнинг турлари, ой ва йил бўлаклари тўғрисидаги тушунчаларини анча муфассал баён қиласи.

Ҳиндлар эътиқодида муҳим ўрин тутган ҳикоя — Норояна тўғрисидаги ҳикояга ҳам Беруний ўз китобида анча ўрин берган. (Қирқ олтинчи боб).

Ҳиндларнинг фикрига кўра Норояна олий қувватлардан бири. У бузуқлик ва ёмонликни мумкин қадар йўқотади.

Тарихлар тўғрисида ҳинд халқининг тушунчаларини баён қиласи экан, Беруний ҳиндларнинг эралар, йил ва ойларни ҳисоблаш усуслари, планеталарнинг ўрнини ҳисоблаб аниқлаш усуслари тўғрисида яна ой манзилари ҳақидаги тасаввурларини хабар қиласи.

Эллик еттинчи бобда олим ҳиндларнинг ёритгичлар ҳаракатига боғлиқ, расм-руsumлар тўғрисида сўз юритган.

Сухайл юлдузининг пайдо бўлиши тўғрисидаги Ба-роҳамиҳаранинг айтганларини Беруний тўлиқ таржима қилиб, ўз китобига киритган. Бу ҳикоя тасвирининг ғоят гўзаллиги, мавзунинг аниқ ва ёрқин ифода этилиши билан ажralиб туради.

Беруний ҳиндларнинг Ой ва Қуёш тутилиши тўғрисидаги тушунчалари ҳақида сўзлар экан, Ойнинг тутулирувчиси Ер сояси эканлиги, Қуёшнинг тутилтурувчи-си Ой эканини маълум ҳақиқат сифатида сўзлайди.

Шундан кейин ана шу ҳоллар ва Ой тутилишлари орасидаги муддатлар тўғрисида маълумот беради.

«Ҳиндистон» китобида Беруний ҳинд жамиятининг ички тузилиши тўғрисида ҳам қимматли ахборот жамлаган.

Бу жамият браҳманлар, кшатрийлар, вайшья ва шудралардан иборат.

Браҳманлар қаландар сифатидаги рухонийлардир. Улар устозлардан дарс оладилар ва муқаддас «Веда» китобини ўқишини ўрганадилар, илоҳий илмлар ва шариатни таҳлил қиласидилар. Сўнгра улар браҳманларга ва кшатрийларга шу илмлардан таълим берадилар.

Кшатрий эса «Веда»ни ўрганади, аммо бошқаларни ўргата олмайди. Кшатрий душманларга қарши уруш қилмоқ учун яратилган деб ҳисобланади.

Вайшья деҳқончилик, иморат қуриш, браҳманга хизмат қилиш билан машғул бўлиши керак.

Ҳиндлар деҳқончилик ва чорвачиликдан келадиган даромадларидан олинадиган солиқни, ҳамда ер, ўтлоқ солиқларини волийга тўлайдилар. Солиққа ҳосилнинг олтидан бир қисми берилади (Браҳманлар солиқ тўламайдилар).

Ҳосилнинг тўққиздан бири садақа учун ажратилади. Қолган маҳсулот тўққизга тақсим қилинади. Унинг уч қисми кўнгил тўки учун олиб қўйилади (резерв А. К.). Иккинчи уч бўлаги олди-соттига кетади. Қолган уни садақа учун берилади, икки қисмини оила эҳтиёжига сарф қиласидилар.

Махсус қолдирилган маҳсул (резерв) оиланинг уч йиллик эҳтиёжи учун етарли бўлиши керак.

Ҳиндларда қорамолни сўйиш мутлақо ман этилган. Қўй, эчки, кийик, қўён, каркидон — гандҳо, қўтас, балиқ, қуруқлик ва сув қушлари, чумчук, қумри, тустувуқ, каптар, товус шуларга ўхшаш инсон табиати жирканмайдиган жониворларнинг гўшти истеъмол қилиниши мумкин.

Қўйидаги ҳайвонларнинг гўштини истеъмол этиш тақиқланган: қорамол, от, хачир, эшак, тuya, фил, уй товуғи, қарға, тўти, майна ва бу қушларнинг тухуми.

Ичкилик бошқалар учун ҳаром бўлса-да, шудра учун ҳалолдир.

Беруний қорамол гўштининг истеъмоли ман этилганини кишиларнинг ҳаёт шароити билан боғлиқ равишда изоҳлайди. Ҳиндлар мамлакатининг ҳавоси иссиқ,

кишиларнинг ички баданлари сөвуқ тұғма, табиий ҳа-
роратлары сүст, ҳазм қилиш қуввати заифдир.

Шунинг учун қорамол гүшти истеъмол этилмайди.

Бу ернинг одамлари таомдан кейин танбул дараҳти-
нинг баргини еб фуфал чайнаб овқат сингдириш қув-
ватини оширадилар. Фуфал яна тиш ва милкларни
мустаҳкамлайди.

Яна Беруний таъкидлаб ўтадики, қорамол деҳқон-
чиликда ер ҳайдаш ва хирмон күтаришда ишлатилади:
унинг сути, мойи, тезагидан оиласа фойдаланилади,
нафаси уйни иситади. Шулар ҳам унинг гүштини
ейишга монелик қилувчи омиллардир.

Ҳамма нарса ҳалол ва ҳаромликда баробар. Олим
одам ўз илми туфайли сақланиши лозим бўлган нарса-
ларнинг фарқига бора олади. Чунки ҳалол бўлса, уни
тушунтиришга эҳтиёжи йўқ, ҳаром бўлса унга ўзи рағ-
бат қилмайди. Нодонлар учун эса баъзи нарсалар ҳа-
лол ва баъзи нарсалар ҳаром деб чеклаб қўйиш зарур
бўлган.

Беруний ҳиндлардаги никоҳ, оиласи маросимлар,
меросхўрлик масалаларни ҳам ўз китобида ёритиб ўт-
ган.

Халқлар орасида ҳеч қайсиси никоҳдан ҳоли эмас.
Никоҳ ақлан хунук бўлган сифат ўз урғочисини қизға-
ниш, талашиб каби (ёмон аҳволлардан) сақлайди
(409). Зино (никоҳга хиёнат) қилувчилар ақл-идроксиз
ҳайвонлардан ҳам тубан турадилар. Никоҳ болалик
чоғидаёқ ёшларнинг оталари томонидан амалга оши-
рилади. Эр билан хотинни фақат ўлим ажратиши мум-
кин.

Эркаклар тўрттагача хотин олишга ҳуқуқлари бор.
Агар эри вафот этса, хотин иккинчи эрга тегишига ҳаққи
йўқ. У ё бир умр тул бўлиб ўтади ё ўзини ўтга ёндириб
ҳалок этиши керак.

Бегоналарга уйланиш қариндошларга уйланишдан
афзал ҳисобланади. Болалар отасининг эмас, онасининг
табақасига мансуб бўладилар. Мерос қолдиришда эр-
какларнинг имконияти ортиқ.

Ўтмиш замонларда ўликлар очиқ ҳавога топширил-
ган. Яъни яланғоч ҳолда очиқ далага олиб бориб таш-
ланган. Қасаллар ҳам худди шундай қилинган. Агар
бирор касал тузалгудай бўлса, ўзи қайтиб келган.
Кейинчалик Норояна ўликларни оловда куйдиришни
расм қилган. Нур ва олов йўли билан инсон танасидаги

бор нуқта осмонга кўтарилади, ерда қоладиган қисмлари эса куйиб кетади, деб ишонганлар. Ҳиндлар Буддҳа ўликнинг гавдасини оқар сувга ташлашни буоргаң дейдилар.

Ҳиндларнинг ўзлари эса ўлик жасадини ювиб, кафандаб атр сепиб, мумкин бўлса сандал ёғочи, бўлмаса ўтин билан куйдириб, куйдирилган суюклар кулини Ганга дарёсига ташлайдилар. Ганга дарёси жанинат йўли деб ҳисобланади.

Ҳиндларда рўза ихтиёрийдир, у бир неча фурсат овқат емасликдан иборат.

«Ҳиндистон» китобида Беруний ҳиндларнинг байрамлари, яхши кунлар ва ёмон кунлар тўғрисидаги ақидаларни ҳам келтиради.

Гарчи Беруний астрологияга қарши бўлса-да, ўз китобининг охирги саксонинчи бобида ҳинд астрологиясининг асослари тўғрисида маълумот берган.

Шундан сўнг олим, «узунлиги ва кенглиги билан малол келтирган сўзларни тўхтатайлик», деб «Ҳиндистон» асарини тугаллайди.

Берунийнинг «Ҳиндистон» китоби «узунлиги ва кенглиги билан» ақлни ҳайратда қолдирадиган даражада мукаммал, фоят мароқли, ифода услуби ва чуқур мазмундорлиги туфайли «узунлиги ва кенглиги» асло сезилмайдиган: буюк ҳинд халқи ва мамлакати ҳаётининг барча томонларини тўла ёритган, ҳеч қачон қиймати камаймайдиган бир комус сифатида жаҳон илмфан аҳли орасида эътироф топган.

ПОДШОҲ ВА ОЛИМ

1030 йил. Фазна. Эрта баҳор тонги. Осмон ер курраси устидан эндиғина кўтарилаётган қуёшни муносиб кутмоқ ниятида чеҳрасига ранго-ранг безаклар бермоқда. Тун зулматининг чекиниши ва кун ёришаётганидан мамнун қушлар оҳангдор қўшиқларни авжига чиқарганлар.

Абу Райҳон Беруний ўз хонасида саҳар намозини ўқиб бўлиб юзига фотиҳа тортди ва астагина ўрнидан турди.

Айвондаги хонтахта устида тунги машғулотни тонгда давом эттиromoқ учун ҳамма нарса муҳайё.

Олим айвонга чиқиб хонтахта атрофига тўшалган

юмшоқ кўрпачага ўтириди. У хонтахта устидаги тайёрлаб қўйилган пиёлани олиб ундағи шарбатдан ҳузур билан ҳўплади-да, сўнгра пиёлани жойига қўйиб шу ерда турган қаламни қўлига олди. Берунийнинг иш куни бошланган эди. Нонуштагача навбатдаги асарнинг бирор бобини тугаллаш мумкин. Олимнинг ишлаш фурсати тонг ёришар-ёришмас бошланади ва ярим тунгача давом этади. Унинг доимий ҳамнафаси қалам, давот, қофоз, китоб, илмий асбоблар. Берунийнинг яқинлари унинг қўли қаламдан, нигоҳи доимий кузатувлардан холий бўлганини билмайдилар. Олимнинг қалби ҳамиша фикрга ғарқ. Бугунги тонг ҳам шунинг шоҳидидир.

Беруний хонтахта устидаги қофозларни тартибга келтирди, сўнг айрим варақларни ажратиб олиб уларни кўздан кечиришга киришди. Бу қофозлар эндиғина ёзиб тугалланган «Ҳиндистон» китобининг қўлләзмалари эди.

Беруний ўз асарларини ўша даврнинг илмий тили бўлмиш араб тилида ёзган. У бошқа тиллар қатори араб тилини ҳам жуда мукаммал билган. Бу тилда эркин сўзлаган ва ёзган. Аммо қанчалар бошқа тилни киши яхши билмасин, ўз она тиличалик билмайди. Шунинг учун Беруний ўз қўлләзмаларини кўп таҳрир қиласр эди. Унга гўё у ёки бу жумла араб тили қоидаларига сал хилоф тузилгандай туюлар, уни қайта-қайта тузатар, натижада жумлалар кўпинча мураккаблашиб кетар эди. Ҳар ҳолда Берунийнинг араб тили одатдан кўра пухталиги ва ўзига хослиги билан ажраб турар эди. Уни ўқиган одам араб тили Берунийнинг она тили эмас эканига дарров ишонч пайдо қилиши мумкин.

«Ҳиндистон» китобининг қўлләзмаларини қайта кўздан кечирар экан, Беруний одатдагидек айрим жумлаларни сал-пал таҳрирдан ўтказа борди. У ўз меҳнатининг самараадорлигидан ич-ичидан мамнун эди.

Қўлләзманинг ҳар бир варағида буюк ҳинд тафаккури дурдоналари нур сочар эдилар. Босқинчилар истилосидан ярадор ҳинд қалбининг тепиши варақлар шивирида эшлиларди: боблардан бобларга ўтган сари бу мажруҳ қалбнинг улуғ қудрати тикланётгандай туюлар эди. Бу китобнинг ҳар саҳифасида истибоддинг зўравонлик билан ёяётган ёлғонини тор-мор келтирувчи ҳақиқат нафас олар эди.

Шимолий Ҳиндистон вилоятларини ўттиз йил давомида ўн етти мартаба оёқ ости қилган подшоҳ Маҳмуд

Ғазнавий Панжоб ва Қашмирдаги бойликларни талаш билан чекланмади. У ҳинд халқининг иззат-нафси, шону-шавкати, анъаналари, ғурури ва пок тийнатини ер билан яксон қилмоққа уринди. Чунки Маҳмуд Ғазнавийнинг талончилик юришлари ғазовот деб аталар: ислом байроғи остида жам бўлган ғоратгарлар ўzlарига гозий ва мутааввунлар деб от қўйиб, «ғайридинлар»нинг бор-будини талар, уларни хонавайрон қилар ва ваҳшатангез зулмкорликда ўzlарини ҳақ деб билар эдилар.

Ана шундай бешафқат курашда мазлум Ҳиндистоннинг ғоят қудратли бир ҳимоячиси бўлган. Бу Абу Райҳон Беруний тафаккури эди.

Беруний мустабид ҳукмроннинг разаби, мутаассиб босқинчиларнинг жинниёна ҳайқириқлари, ҳар силкинишида не-не бегуноҳ юракларнинг дарё қилувчи қилич ва тифлар шиддати остидан ҳинд халқининг асрий обидалари, урф-одатлари, билим ва закосини омон олиб чиқди. Уларнинг келгуси авлодларгача етиб келишини таъжинлади.

«Ҳиндистон» китобининг қўлләзмаларини варақлар экан, Беруний хаёлида чуқур бир андиша ҳукмрон эди.

Бу китобни подшоҳ Маҳмуд Ғазнавий қандай қарши олар экан? Қарматийлар тўғрисидаги ҳаққоний асари учун Берунийнинг боши кесилишига сал қолган эмасми эди. Бечора Абдуссамад эса жаҳолат ва таассуб қурбони бўлиб кетди.

Воқеа бундай бўлган эди: Маҳмуд Ғазнавий Хоразмни эгаллаган (1017) йил. Беруний ва унинг ҳамкаси олим Абдуссамад Аввални подшоҳ ўз ҳузурига даъват қилаётганини хабар қилдилар.

Беруний шоҳ қабулхонасига кириб келганида икки қўли кишанланган Абдуссамад подшоҳ қаршисида тиз чўккан, тахт устида ўлтирган подшоҳнинг башарасида ғазаб олови чақнар эди. Подшоҳнинг ёнида одоб ва изтироб билан қўл қовуштириб тик турган вазир Маҳмудхўжа Ҳасанинг чеҳрасида чуқур дард ва ҳаяжон зоҳир эди. Эшик олдида икки жаллод шоҳ фармонига мунтазир.

Берунийни келтирган соқчилар қабулхона ташқарисида қолдилар. Олим қабулхонага кириб лозим қондага биноан подшоҳга таъзим қилди ва бир чеккада тик тўхтади.

Подшоҳ Маҳмуд Ғазнавий Берунийнинг саломига

жавобан бир бөш ирғитган бўлди-да, Абдуссамадни ёроқ қилишда давом этди:

— Мусулмон динининг ашаддий душманлари кофир карматийларни мақтаб, уларнинг худо йўлига зид, шариатга хилоф эътиқодини тарғиб этувчи китобни сен ёзганимисен.

— Мен, тақсир. Аммо карматийларнинг эътиқоди бу китобда тарғиб этилган эмас, фақат баён этилган,— деб жавоб қилди Абдуссамад. Унинг овозида паришонлик ва хавотир сезилиб турар эди.

— Исломга ихтилофли эътиқодни баён этмоқ, уни тарғиб этмоқ демакдир.

— Подшоҳ ҳазратлари, илмларни ўрганмоқ ҳар бир мусулмон ва мусулмон аёлнинг вазифасидир, деғанлар Расулоллоҳ,— одоб ва ёввошлиқ билан жавоб қилди Абдуссамад.— Ўзга эътиқодларни ўрганмоқ ва таҳлил этмоқ шариатга хилоф бўлмас, бу иш илм учун даркордир.

— Қатл этилсин бу кофир!— деб буюрди шоҳ. Вазир Маҳмудхўжа Ҳасан бир ирғиб тушди.

Ранги бўздек оқариб кетган, кутилмаган фармондан эсу-ҳушини йўқотган Абдуссамадни жаллодлар хонадан судрагандай қилиб олиб чиқиб кетдилар.

Подшоҳ Берунийга юзланди ва ундан сўради:

— Карматийлар тўғрисидаги китобга сизнинг ҳам алоқангиз бўлганми?

— Бўлган, подшоҳим. Мен бу китобнинг муаллифларидан биримен.

— Кофир карматийларни ислом динига душманликдан иборат эътиқодини не важҳдан тарғиб этадурсиз?

— Ҳар бир халқ ва жамоа ўз эътиқодига эга бўлиш ҳуқуқига молик. Олимнинг вазифаси уларни чуқур ўрганмоқ, ҳақиқат қай бирига кўпроқ оид эканини аниқламоқдир. Бу вазифанинг ижроси билан эътиқод тарғиби ўртасида фарқ каттадир.

— Сизнинг бундай кажбаҳслигингиз бошингиз кесилишига боис бўлур. Буни англаб етасизми?

— Тақдир бизга шундай қисматни насиб этган бўлса, унга ризо бўлмай не чорамиз бор.

Вазир турган жойида яна бир сесканиб тушди.

— Боши кесилсин!— буюрди подшоҳ қисқагина. Тайёр турган бошқа икки жаллод Берунийни ташқариға етакладилар. Олим инсон умрининг қисқалиги, ростлиги ва истибодд зўравонлиги ўртасидаги зиддият-

ни тафаккур қилгандек жим хаёлга чўмган ҳолда икки жаллод ўртасида ташқарига чиқди.

Хонада подшоҳ билан ёлғиз қолган Маҳмудхўжа Ҳасан шоҳга таъзим қилиб тез-тез сўзлай бошлади:

— Подшоҳ ҳазратлари, бу олимларни қатл этмангиз. Фармон ижросини тўхтатишингизни илтижо қиласмен. Буларнинг илм ва истеъдоди тахту-тоҗингизнинг жилоси бўлажак. Авфу марҳаматингиздан миннатдор бўлиб улар бир умр салтанатга садоқат билан хизмат қилурлар. Икки одамнинг боши кесилгани салтанатга обрў келтирмас, балки икки олим қатли учун мусулмонлар сиздан норози бўлурлар. Лутфу-иноятингиз эл кўнглини мамнун этар, олимлар тафаккури эса давлатингиз эътиборига эътибор қўшар. Утинаман, подшоҳим, уларнинг қонидан кечингиз.

— Қарматийлар ҳимоячиларининг қонидан қандай кечиш мумкин?

— Қарматийлар тўғрисидаги китоб ҳали топилган эмас. Унда нелар ёзилгани аниқ маълум бўлмаган. Бу китоб тўғрисида хабар етказганлар истеъдод ва илмга душманлик, олимларга ҳасад билан туҳмат қилган бўлишлари ҳам мумкин. Йўқ китоб тўғрисида ёлғон-яшиқ гапга ишониб икки улуғ олимни қатл этиш сизнинг адолатпаноҳ подшоҳлик шуҳратингизга доғ солур...— Вазирнинг гапи тугамас, унинг юрак сўзларини етказаётган дардли овози подшоҳ қулоғига қўрғошибек қуолмоқда эди.

Маҳмуд Фазнавий ўз фармонининг шошма-шошарлик билан берилганини тушуниб турар эди. Айниқса Берунийдек олимнинг ҳали салтанатга кўп фойдаси етади. Унинг қатли эса тахтга иснод келтиражаги аниқ.

— Берунийни қайтариб келтирингиз!— деди подшоҳ Маҳмуд Фазнавий.

Вазир ўзи эшик сари чопиб подшоҳ буйруғини ижрочиларга етказди.

Сал ўтмай қўллари кишланланган, чеҳрасига ўлим излари тушган Берунийни икки мулозим етаклаб подшоҳ ҳузурига олиб келдилар.

Подшоҳ Маҳмуд Фазнавий Берунийга деди:

— Сизни гуноҳингиздан ўтдик. Қолган умрингизни ғанимат билиб шоҳлик салтанатига ихлос билан хизмат қилурсиз.

Ўлимга маҳкум инсоннинг юзига сал қон югурди. У ҳали ҳам яна тирик сақланишига ишонмас эди.

— Марҳаматингиздан миннатдормен,— деди Беруний паст овоз билан.

— Подшоҳ ҳазратларининг умрлари узун, тахту давлатлари мудом барқарор ва баравж бўлсин,— деб вазир Маҳмудхўжа Ҳасан дуо қилди. Ҳамма фотиҳа тортдилар.

— Абдуссамад Аввал ҳам мутлақо бегуноҳдир, подшоҳим,— деди Беруний.— Унинг қонидан ҳам кечилса бу ҳам ғоятadolатли қарор бўлур эди.

— Сиз бориб ўз илмингиз билан машғул бўлингиз. Подшоҳлик фармонлари ва унинг ижроси бизнинг машғулотимиздир,— деди подшоҳ. Унинг қатъий овози гап тугаганини билдирап эди.

Маҳмуд Фазнавийдек подшоҳ бирданига ўзининг икки фармонини бекор қила олмас эди.

Уша куни бечора Абдуссамаднинг бегуноҳ танаси унинг билим тўла бошидан жудо қилинди.

Беруний бугун ана шу воқеани эсиға олди. Ҳиндлар тўғрисидаги китоб ҳам подшоҳнинг ғазабини қўзғатиши табиий. Бу эса олимнинг яна золим қаҳрига учрашини англатади. Аммо илм ёлғончилик қаршисида чекиниши шартми? Ахир Беруний ёлғонни рад қилиб ҳақиқатни тасдиқлаш мақсадида бу китобни ёэди-ку. Олим фақат ростлик, илмий ҳақиқат тантанаси учун яшайди ва ижод қиласи эмасми!

Беруний фикрида шундай ҳаяжонли мулоҳазалар ғулғула қилаётган пайтда саройдан хабарчи етиб келди. У келтирган хабар ҳам жуда кутилмаган бир янгилек эди. Хабарчи подшоҳ Маҳмуд Фазнавийнинг вафот этгани хабарини келтирган эди.

Беруний бу ахборотдан анча муттассир бўлди. Ўлим хабари ҳеч қачон ҳеч кимга бетаъсир қолмайди. Ҳокимнинг ҳам, маҳкумнинг ҳам ўлими ҳамиша бу қатъий якуннинг ҳақ эканини эслатади. Кишиларни хушёрликка чорлайди.

Беруний ўлтирган жойида қўлини фотиҳага очди, қуръондан бир сура ўқиб, сўнг Иаминуд давла ва аминул мила (ҳокимиятнинг қўли ва диннинг амини) подшоҳ Маҳмуд Фазнавийнинг жойини худо жаннатдан ато этсин деб фотиҳа ўқиди.

Шундан кейин Беруний ва сарой хабарчиси биргаликда Ўрда сари йўл олдилар.

СИЕСИЙ ҮЗГАРИШЛАР

Беруний Үрдага етиб келганида бу ерда подшоҳ оиласи, олий даргоҳ аҳли шоҳона мотам маросимини ўтамоқда эдилар. Шу билан бирга Үрда аҳлида қандайдир бесаранжомлик, баланд мартабали зотларнинг хатти-ҳаракатларида мотамдан ташқари бошқа бир ташвиш борлиги сезилиб турад эди.

Марҳум подшоҳнинг ўғли шаҳзода Муҳаммад барча тадбирларга бош. Вазир Маҳмуд Абу Али Ҳасан унинг ёнида парвона, у шаҳзода ёнидан бир нафас жилмас, шаҳзоданинг фармойишини ўз атрофида ўралишаётган одамлар орқали дарҳол амалга оширап эди.

Бошқа бир гуруҳ амалдорлар шаҳзода Масъуд теварагида жам бўлганлар, улар Масъуднинг ўз укаси Муҳаммаднинг йўл-йўриқларига халақит бериш мақсадида қилаётган ишларига жону жаҳд билан кўмаклашадилар.

Подшоҳ Маҳмуд Фазнавийнинг вафотига оид мотам маросими бир неча кун давом этди. Фазна аҳли улуғ сиёсатчи ва фотиҳни муносиб ҳурматлар билан абадий дунёга кузатдилар. Фазна тахти эса шаҳзода Муҳаммад ихтиёрига ўтди. Марҳум подшоҳнинг васиятига кўра амалга ошган бу тадбир яна бир тахт даъвогари Масъудга ҳеч ёқмади.

Уша йили кузак пайти Масъуд укаси Муҳаммадни ҳокимиятдан воз кечишга мажбур этди ва Фазна тахтини эгаллади.

Янги подшоҳ Масъуд шунча ҳаракат билан қўлга киритган ҳокимиятни бошқаришга бепарво қарар эди. У кўпроқ вақтини тахтгоҳда эмас, ишратгоҳда ўтказади. У лашкарбошилар ва амалдорлар суҳбатидан кўра дилрабо раққоса ва созандалар базмини хуш кўради, давлат ишлари заҳридан кўра айш шароби унинг кўнглига ёқимлироқ.

Лекин Масъуднинг Берунийга муносабати олдинги подшоҳнинг муомиласидан кўра бутунлай бошқача бўлди.

Хар бир янги ҳукмрон сингари Масъуд олдинги ҳокимият эгасига зид бўлганларни қувватлади ва уларни ўз атрофига тўплашга кириши.

Марҳум подшоҳ Маҳмуд Фазнавийнинг Берунийга салбий муносабати ҳаммага аён эди. Масъуд эса олимга кўп илтифот кўрсатди. Уни ўзига яқин тутди. Ёш

султон Султон Масъуд Берунийнинг билими, ақлу-зако-
сидан баҳраманд бўлмоқни истар, шу сабаб кўп фанлар
бўйича у Берунийдан дарс олар эди.

Уларнинг машғулотлари асосан араб тили ва астрономияга бағишиланарди.

Подшоҳнинг маҳсус таълим хонаси. Заррин нақшлар билан безакланган деворларда турли ранглардаги деб-раза ойналаридан ўтган қуёш нурлари жилваланади. Юмшоқ кўрпача паркуга суюниб ўлтирган Масъуд Берунийнинг астрономияга оид сұхбатини тингламоқда.

Олим шоҳга қуёш ва ой ҳаракатлари, ер айланишининг суръати, тун ва кунларнинг узун ва қисқа бўлиш сабаблари тўғрисида сўзлаб берди.

Беруний таҳлилида энг мураккаб ва мушкул масалалар ҳам ғоят тушунарли, содда ҳамда қизиқарли шаклда баён топар эди. У ўзининг илмга бўлган чексиз муҳаббати туфайли ҳар қандай кўнгилни ҳам фанга мафтун этувчи жозибага эга эди.

Дарс якунида Беруний подшоҳга деди:

— Сиз мәғриб ва машриқни ўз тасарруфига киритган улуғ ҳукмдор бутун ер юзасининг султонлигига муносиб бир шоҳдирсиз. Агар шундай баланд мартабали зот кун ва тун шароити, улардаги ишларнинг бориши обод ерларда, ҳамда саҳро ва инсон яшамайдиган жойларда кун ва тунларнинг қай даражадаги узунлигига оид маълумотларни яхши билса, бу олимлар фақат олий салтанатни мустаҳкамламоққа хизмат қилган бўлур эди.

— Шундай билимларни ўзида жам этган, аммо мутолаа учун қулай ва енгил битилган китоблар даркор.

— Бу сўзларингизни мен учун фармон деб билишга рухсат этгайсиз. Подшоҳим айтган тарздаги китобни битмакка дарҳол киришгумдир.

— Фақат ҳозирги мунажжимларнинг қабул қилган усууллари ва ибораларидан ўзгачароқ бўлса,— деди подшоҳ Масъуд,— чунки буларнинг ёзганлари бемиқдор, услублари мураккаб, ифода ва иборалари ғализ.

— Илм равшанлик ила фазилатлидир. Ҳақиқат эса ғоят содда ва тўппа-тўғри. Мураккаблик ва ғализлик муаллифнинг ўз баёнидаги ҳақиқатга шубҳаси борлигидан нишонадир.

— Тўғри,— деб кулди Масъуд,— китоб ёзган киши бу китобни одамлар ўқийдилар деган умид билан ёзмо-

ғи даркор. Баъзилар эса шундай ёзадиларки, улар бу китобни ҳеч ким ўқимайди деб ўйлаган бўлсалар кеरак, деб кўнгилга келадир:

Шу сұхбатдан бошлаб Беруний ўзининг кўп йиллардан бери ўйлаб юрган ишига киришмоққа қарор қилди. Дастрраб дебоча сифатида бир кичикроқ китоб ёзиб уни султон Масъудга йўллади. Унда тун ва кун узунилигини аниқлаш тамомила янги, мавжуд усувлардан ўзининг соддалиги ва ихчамлиги билан фарқли ҳолда баён этилган эди.

Султон Масъудга бу китоб мақбул бўлди. Подшоҳнинг тақдирлаши олимни ўз қарорида яна қатъйлаштириди.

Берунийнинг анча фурсатдан бери ер ва осмон ҳақидаги билимларнинг мажмуи бўлган катта бир асар яратмоқ режаси бор эди. Аммо подшоҳ Маҳмуд Фазнавий билан Беруний орасидаги нохуш муносабатлар олимнинг кўнглига тинчлик бермас: бундан ташқари кундалик бошқа хил илмий машғулотлар бир яхлит мавзу устида кўмилиб ишлашга йўл қўймай келар эди. Султон Масъуднинг Берунийга ҳурматли муносабати, султоннинг ёш, маърифатли экани, илм-фанга ҳайриҳоҳлиги Берунийни шу катта иш ижросига чорлаган бўлди.

1031 йилдан бошлаб олим ана шу шоҳ асарини яратишга киришди. У олти йилдан ортиқ муддат ишлади. Берунийнинг кечасию кундузи тинмай қилган меҳнати, унинг илм ва меҳнатга муҳаббатининг самараси сифатида улкан бир китоб юзага келди. Беруний ўзининг бутун куч ва қуввати, фурсат ва имкониятини илмга бағишилан, илҳом ва муҳаббат билан фанга хизмат қилувчи бир заҳматкаш эди.

Султон Масъуд олимнинг ана шу интилишига ҳурматли муносабатда бўлди. Олимни ўз шоҳлик қудрати билан эътироф этди. Олимга бошқача илтифот керак эмас. Унга шундай ҳурматли эътироф даркор халос. Шундан миннатдор бўлган Беруний ўзининг янги шоҳ асарини Султон Масъудга бағишлиди ва бу китобни «Қонуни Масъудий» деб атади,

«ҚОНУНИ МАСЪУДИЙ»

Бу асар Беруний яратган жуда кўп илмий асарлар ичига ўзининг ғоят мазмундорлиги, кенг кўламдаги маълумотларни жам этганлиги билан ажралиб туради.

Бу шоҳ асарини яратиш фурсатида Беруний ўзининг ўрганган билимлари, ийққан ҳаёт тажрибаси, сайдал топган услуб ва ифода маҳорати жиҳатидан энг юксак даражага эришган эди.

«Қонуни Масъудий» ўн битта улкан бўлаклардан иборат. Бу бўлакларни олим мақола деб атайди.

Ҳар бир мақола шакл ва мундарижа жиҳатидан айрим фан соҳасига оид алоҳида катта бир китоб қабидир.

«Қонуни Масъудий»ни икки қисмга ажратиш мумкин. Биринчи қисм беш мақоладан иборат бўлиб: уларнинг ҳар бири айрим ва бир илмий соҳанинг тасвир ва таҳлилига бағишиланган.

Иккинчи қисми эса қолган олти мақолани ўз ичига олади. Уларнинг ҳаммаси олимнинг кўнглига энг яқин бўлган соҳа — астрономияга оид.

Биринчи мақолада Беруний оламдаги мавжудотлар, уларнинг умумий шакллари тўғрисида ҳикоя қиласи.

Оlam юмалоқ шаклли бир жисм. Унинг бир бўлаги ҳаракатсиз. Ҳаракатсиз қисмнинг агрофидагилар «ҳақиқий қўйилик»—«Ернинг ҳақиқий маркази» бўйлаб фазода айланма ҳаракат қиласидар. Ана шу барча мавжуд жисмларнинг йифиндиси олам деб аталади.

Шу йифиндининг айланма ҳаракат қилувчи бўлаги «юқори олам», тўғри ҳаракат қилувчи қисм «қўйи олам» дейилади. Тўғри ҳаракат қилувчилар тўрт унсири — тупроқ, сув, ҳаво, олов бирлигидан иборат.

¹ Ҳозир жаҳон кутубхоналарида «Қонуни Масъудий»нинг етти кўлёзма нусхаси бор. Улар Лондон, Париж, Берлин, Истамбул ва Қоҳира шаҳарларида сақланадилар. Немис олими Макс Круза «Қонуни Масъудий»нинг тўрт кўлёзмаси асосида унинг илмий-танқидий текстини тузиб 1954—1956 йиллари Ҳайдарободда (Хиндистон) нашр этган. «Қонуни Масъудий»нинг араб тилидан ўзбек тилига қилинган таржимаси Тошкентда нашр этилган (I китоб, 1973 йили, II китоб 1976 йили, «Фан» нашриёти). Таржимон А. Расулов, маҳсус мұхаррир А. Аҳмедов, масъул мұхаррир С. Х. Сирожиддинов, «Қонуни Масъудий»нинг рус тилига таржимаси Н. Г. Булгаков ва В. А. Розанфельд, А. Аҳмедов, М. М. Рожанская томонидан амалга оширилган. Бу ҳам икки китобдан иборат бўлиб, улар Тошкентда «Фан» нашриёти томонидан 1973-76 йиллари нашр этилган.

Ер шу тўрт навнинг биридир. Бу тўрт унсун олам ўртасида тартиб билан жойлаштирилган. Уларнинг вазн оғирлиги олам марказига интилади, енгили эса марказдан қочади.

Одамлар қай ерда турган бўлмасинлар, фақат осмоннинг ярминигина кўрадилар. У мавжуд гумбаз тарзida кўринади.

Одамларнинг ердаги ҳолатлари ҳамма жойда бир хил бўлмайди. Жойларни аниқламоқ учун кенглик ва узунлик қўлланилади. Шимолдан жанубга томон ҳисоблансанда кенглик бўлади, шарқдан гарбга ҳисоблангани узунлик бўлади.

Эфир етти сайёрага эга. Шунга қараб у етти сферага бўлинади. Улардан юқоридаги саккизинчи сферада турғун юлдузлар жойлашганлар. Сфералар шарққа қараб ҳаракат қиласидилар.

Бу сфераларнинг қуи томондан биринчиси Ой сферасидир. Ой думалоқ шаклли қаттиқ жисм бўлиб, Қуёшдан унга тушаётган нур Ойда аксланади. Шунинг учун у гўё ёруғлик тан манбаи бўлиб кўринади.

Ой сферасидан сўнг Меркурий, сўнгра Зуҳра сфераси келади. Бу икки сферанинг юқорисида Қуёш туради. Қуёшнинг осмондаги жойи худди подшоҳнинг жойи мамлакат марказида бўлган сингариидир. Ҳамма сайёralарнинг аҳвол ва ҳаракатлари қуёшга боғлиқ ва қуёш ҳаракати орқали ўлчанади.

Ер, Меркурий, Зуҳра қуи планеталардир.

Сфералари қуёшдан юқорида бўлган сайёralар ичидаги Қуёшга энг яқини Марс, энг узоғи Сатурн. Уларнинг оралиғида Юпитер жойлашган.

Сайёralарнинг ҳар бири мақсад учун ҳаракат қиласиди, ўз табиатига кўра ҳаракатланади. Уларнинг ҳар бири ўз сферасидагина юради.

Беруний бу маълумотларни Птоломейнинг «Алмажстий» китобидан олиб ўз талқинида баён қилган.

Беруний ернинг думалоқлиги тўғрисида кўп исботлар келтирган. Шу жумладан ой тўтилган пайтда ернинг ойга тушган сояси айланана шаклида эканлиги ҳам айтиб ўтилган.

«Қонуни Масъудий»нинг иккинчи мақоласида турли халқларда ишлатиладиган эралар тўғрисида сўз боради. Беруний бу мақолада эралар ўртасидаги муносабатлар турли халқларнинг урф-одатлари, байрамлари тўғрисида сўзлайди. Бу маълумотлар «Ўтмиш ёдгор-

ликлари» китобидаги маълумотларнинг бошқача йўсиндаги изҳоридан иборат.

Учинчи мақола математикага бағишлиланган. Ўнда сферик астрономия учун зарур бўлган геометрия ва тригонометрияга оид масалалар ёритилган. Бу мақолани ундан кейинги мақолаларда берилган вазифаларни бажармоқ ва кўзда тутилган ҳисобларни амалга ошироноқ учун ишлатиладиган математик аппарат деса бўлади (П. Г. Булгаков фикри).

Тўртинчи мақола ёйлар ва бурчакларнинг миқдорлари, сфера сиртидаги нуқталар ва уларнинг турли ҳолатларини аниқлаш ва шунга ўхшаш бошқа ишларга бағишлиланади.

Бешинчи мақолада аксариси ёритгичлар ҳаракатларини кўрсатиш учун қурол каби қўлланиладиган нарсалар тўғрисида сўз боради.

Бу мақолада Беруний тураржойларнинг ўрнини ой тутилишини кузатиш воситасида аниқлаш усулини баён этади: икки шаҳар ўтасидаги масофалар бўйича уларнинг узунлиқларини аниқлаш узунлиги ва кенглиги маълум икки шаҳар орасидаги масофани аниқлаш кабилар тўғрисида фикр юритади. Шу билан бирга ер айланасини шартли бўлаклар ёрдами билан белгилаш иқлиmlар, уларнинг узунлик ва кенгликлари ҳақидаги маълумотлар ҳам шу мақолада келтирилган.

Бу ҳолатлар «Геодезия» китобида ҳам анча муфасал ёритилган эди.

Бешинчи мақолага катта жадвал илова қилинган. Унда иқлиmlар ва айрим шаҳарларнинг ўрни кўрсатилган.

Масалар, Ҳирот шаҳарининг ўрни $88^{\circ}40'$ узунлик ва $34^{\circ}31'$ кенгликда деб берилган. Унинг хуросон вилоятида эканлиги айтилган. Кат эса $85^{\circ}0'$ узунлик ва $41^{\circ}36'$ кенгликдадир. Бухоро $87^{\circ}30'$ узунлик ва $35^{\circ}20'$ кенгликдадир. Самарқанд $48^{\circ}20'$ узунлик, $40^{\circ}0'$ кенгликда жойлашган. Беруний Самарқандни турк тилида Қуёш шаҳри маъносини англатади, деб изоҳлайди). Бинкат $89^{\circ}10'$ узунлик, $42^{\circ}30'$ кенгликда жойлашган. Бу шаҳар туркчада Тошканд, юонончада Тошқалъа деб аталганини Беруний эслатиб ўтади. Фарғона вилоятининг маркази Ахсикат $92^{\circ}0'$ узунликда ва $42^{\circ}20'$ кенгликда жойлашган. Болосоғун шаҳари $91^{\circ}30'$ узунлик ва $47^{\circ}40'$ кенгликда жойлашган.

Жадвалда бундай маълумотлар анча бор.

Олтинчи мақола қуёш жаракати түркисида ҳикоя қиласы.

Еттинчи мақолада ой ҳаракатлари тұғрисида сүз боради. Саккизинчи мақола қуёш ва ой тутилиши масалаларига бағишенген. Тұққизинчи мақола юлдзулар тұғрисидадир. Үнинчи мақолада Сатурн, Юпитер, Марс, Зухра ва Меркурий сайәраларининг ҳаракатлари тұғрисида ҳикоя қиласы. Үн биринчи мақола осмон сфераларининг диаметрияси, ёритқичларнинг ҳаракатлари, уларнинг ўрнашган жойи, бир-бirlарига нисбатан қиласынан ҳаракатлари каби масалаларга бағишенген.

Беруний «Қонуни Масъудий»да ўзигача бўлган астрономияга оид билимларни танқидий жиҳатдан таҳлил қилди, улардаги янгиликларни аниқлаб тузатди: астрономияга оид кўп масалаларни ҳал қилиб берди.

«Қонуни Масъудий» ўрта асп шарқ илмларининг комусидир.

ШОХОНА ТУҲФА

Беруний «Қонуни Масъудий»ни подшоҳ Масъудга топширди. Подшоҳ бу китобдан мамнун бўлди. Энг улуғ бир илмий қомус ёш подшоҳнинг номини абадийян фан тарихига олиб кирган эди.

Масъуд Берунийнинг бу катта хизмати ва шарафли бағишлови эвазига унга улкан мукофот тайин қилди.

Фазна күчалари. Қатор саф тортган расталар. От-
улов билан турли қишлоқлардан келган деңқонлар бо-
зор майдони сари ошиқдилар. Мисгарлар, тақачилар
дүйкөнләрида жаранг-журунг тақа-тақ болғалар дүкул-
лайди. Савдо расталари салобат билан саф тортган.
Шаҳар ўз кундалик ҳәёти оғушида.

Газна кўчаларидан бир отлиқ түябон икки серҳашам безакли түяни оҳиста етаклаб ўтиб боради. Түяларнинг кажавалариға ортилган кичик-кичик қопчалар тарапнг. Юкнинг оғирлигидан түялар ҳорғинлик билан қадам ташлайдилар.

Тұябон олдида безакли тақынчоқлар билан тұла отта минган зархал либосли бир сувори кетмоқда. Қатта юқ ортилған бу түяни отлиқ икки соқчи құрық-лаб борадилар.

Растадаги дўконлардан бирида ўтирган савдогар ўз сухбатдошига бу кичик карвонни кўрсатиб деди:

— Ушбу түялар ўрда хазинасидан чиққанлар. Улар қимматбаҳо юкларни қайгадир элтмоқдалар.

— Карвон олдиғаги киши ҳам хазина хизматчиси бўлса керак. Либоси шундан далолат беради.

— Шундай.

Ғазна кўчаларидан виқор билан кечмоқда бўлган бу карвон тезда кўпчиликнинг диққатини тортди. Суворийлар ва икки түя тезда шаҳарнинг марказидан ўтиб унинг чеккасидағи боғ кўчалар сари йўл олди-лар.

Беруний эрталабдан бери тинмай илмий машғулот билан банд бўлиб сал толиқди шекилли ишини тўхта-тиб боққа чиқди. У гулзор ёқасида жадал оқаётган ариқчадаги сув овозини тинглаб гуллар жамолига боқиб бир оз ҳордиқ чиқарди. Бу тўхтовсиз оқим олимга ҳаёт фурсатининг тез ўтишини эслатди. Ана шу ариқдаги сув каби гуллар ундириб, маҳсулларга барака бериб яшамоғи лозим ҳар бир одам. Ҳаётнинг чин моҳияти элга, кишиларга баҳра етказмоқдир. Агар шу ариқдаги сув бўлмаса, гулзорлар қақраб қуруқшаб кетгани сингари, ҳар бир киши фаолиятида кўпчиликка баҳра етмаса, эл ҳаёти ҳам камбағаллашади, одамларга наф етказмай яшаган кимса эса сувсиз ариқ каби бефойда ва қуруқдир.

Беруний шундай мулоҳазаларда ғарқ бўлиб боғда сайдар этар экан, хизматчи келиб ўрдадан келган одам Берунийни йўқлаётганини хабар қилди.

Беруний боғ эшигидан кўчага чиқди. Боғ дарвозаси олдида икки катта түя ерга чўйкан ва устидаги оғир юкни ташиш мاشаққатидан холий бўлгани учун шукур қилгандай чуқур нафас олар эди. Дарвоза бошида турган хизматчи отдан тушиб Берунийнинг чақиригини кутмоқда. У олимнинг ўзи эшикдан чиқиб келганини кўриб сал саросимада қолди ва дарҳол от жиловини ёнида турган соқчилардан бирига топшириб ўзи Беруний ҳузурига келди. У олимга таъзим қилиб салом берди. Беруний унга одоб ила алик қайтарди.

Сарой хизматчиси олимга деди:

— Олий ҳазрат шаҳаншоҳ сизга ушбу совғаларни йўлламиштирлар. Қаерга тушурмоқни буюргайсиз.

— Бу не совғалардир?

— Подшоҳ ҳазратларига сизнинг китобингиз ғоят маъқул тушмиш. Олий ҳазрат буюрдиларки, икки түя кўтара оладиган миқдорда кумуш тангаларни сиз тақ-

сиримга совға этиб етказилсин. Ушбу туяларга ортилган қоллардаги тангалар ушал олий мукофотдир.

Хизматчининг сўзини тасдиқлагандай туялар пишиллаб бошларини у ён-бу ёнга чайқар эдилар.

Беруний бундай илтифотни кутмаган эди. У бир оз жим қолди. Сўнг олим сарой хизматчисига деди:

— Мен подшоҳ ҳазратларининг бундай олий дараҗадаги инъомларидан беҳад миннатдормен. Аммо бу қадар катта давлат ва бойликнинг менга зарурати йўқ. Алҳамдулиллоҳ, подшоҳ ҳазратларининг лутфу иноятлари ва олий даргоҳи соясида тирикчилигим учун етарли озуқа ва кийинмоқ учун керакли кийим менда бор. Ундан бошқа нарсанинг эса менга ҳожати йўқ. Шунинг учун бу тангаларни хазинага қайтариб элtingиз. Улар шаҳаншоҳ давлатининг лозим эҳтиёжларига сарф этилар.

Сарой хизматчиси бу юкларни Берунийнинг уйида қолдириш учун кўп уриниб кўрди. Аммо натижа бўлмади. Ниҳоят тангалар ортилган икки түя ўша соқчилар ҳимоясида орқага ўрда сари йўл олди.

Беруний бор орқали ўз уйига қайтди ва яна илҳом билан ижод жараёнига чўмди.

Айтадиларки, Беруний йил давомида фақат икки мартаба — ҳайит кунлари дам олар эди. Ушанда у ўз ўзига лозим озуқа ва кийим тайёрлар эди. Бошқа кунлари эса тинмай илм-фан машғулоти билан банд эди. Олим молу давлат, бойликка нисбатан мутлақо бефарқ бўлиб, кундалик тирикчиликка етарлигини нарсалар билан кифояланар, унинг бутун бойлиги ҳаёт ва инсонларга чексиз муҳаббати, фикрини ҳамиша равшан ва давлатманд этиб турган илм ва тафаккур хазинасидан иборат бўлган. Олим ўзидаги шу билим дурларини самимият билан элу-юрг учун бағишиламоқ илиа баҳтиёр эди.

МИНЕРАЛЛАР ТУФРИСИДАГИ КИТОБ

Ўзининг қимматбаҳо тошлар, уларнинг хоссалари тўғрисида ёзмоқда бўлган асарини Беруний бундай деб атади: «Китобул-жамоҳир фи маърифатул-жавоҳир», буни араб тилидан ўзбек тилига «Қимматбаҳо тошларни танимоқ учун (лозим) маълумотлар

тўплами» деб таржима қилмоқ мүмкин. Фанда уни-
қисқартириб «Минералогия» деб юритадилар¹.

«Минералогия» гарчи қимматбаҳо тошлар ва метал-
лар тўғрисида маълумот беришга мўлжалланган бўлса-
да, у фалсафий, тарбиявий ва адабий материалларга
жуда бой. Шунинг учун у ўқилишга қулай ва ғоят қи-
зиқарли шаклга эга.

Бу китобда турли ҳаётӣ тажрибаларга асосланган
фалсафий-дидактик хуносалар баён этилган. Уларни
олим тарвиҳа деб атайди.

Тарвиҳалардан сўнг турли қимматбаҳо тошлар ва
металлар таърифиға бағишланган боблар келади.

«Минералогия»нинг биринчи қисмида ёқут, лаъл,
олмос, феруза, ақиқ, билур, каҳрабо ва бошқалар тўғ-
рисида сўз боради. Иккинчи қисмида эса олтин, кумуш,
мис, темир, қўрғошин, бронза сингари қимматбаҳо
металлар тўғрисидаги маълумотлар бор.

Ёқут қимматбаҳо тошлар ичидаги энг гўзал ва қим-
матбаҳолисидир. Ёқут, оқ, кўк, сариқ ва қизил бўлади.
Форс тилида ёқутни йакунд дейдилар. Араблар бу сўз-
ни ёқут деб талаффуз қилганлар. Форслар яна уни са-
баж асмур деб ҳам атаганлар. Бунинг маъноси «вабодан
асровчи» демакдир. Узоқ асрлар давомида араблар
ва Урта Осиё ҳалқларида ёқут таққан одам вабодан
омон қолади деган ишонч бўлган.

Ёқутнинг кўп бўладиган жойи Сарондид (Шри Лан-
ка) оролидир. Бу мамлакатнинг Балакаран деган
жойида ёқут кони бор. Унда сариқ ва сурмаранг ёқут
бўлади. Ўша ердан юқорироқда Рўнак деган жойда

¹ Беруний «Минералогия» асарининг уч қўлёзма нусхаси биз-
гача етиб келган. Улардан бири Испанияда Эскуриал кутубхонасида,
қолган иккитаси эса Туркияда сақланади. Немис олимни Ф. Кренков
шу уч нусха асосида бу асарнинг илмий-танқидий текстини тузди
ва бу текст 1936—37 йиллари Ҳайдарободда (Хиндишон) нашр
етилди.

Совет арабшунос олимларидан А. М. Беленицкий «Минерало-
гия»ни шу текст асосида араб тилидан рус тилига таржима қилди.
Бу таржима 1963 йили Москвада СССР Фанлар академияси томо-
нидан босиб чиқарилган. Бу нашрга Абдураҳмон Ал-Хоразмийнинг
«Ҳикмат тарозуси» китобидан Берунийнинг металлар ва қимmat-
баҳо тошларга оид ёзганлари олиниб илова қилинган.

Яна ушбу нашрга А. М. Беленицкийнинг таржима ҳақидаги сўзи,
Беруний ҳаётӣ ва ижодига доир катта илмий тадқиқот ва Г. Г. Лем-
лейнинг «беруний» асаридаги минералогияга оид маълумотлар
асари киритилган.

Барқ тоги бор. Бу тоғ остида қизил ёқут кони мавжуд. Айтадиларки, бу конни чақмоқ пайдо қилган эмиш. Лекин бу чақмоқ шамол йиққин булутлар багрида чақнайдиган яшин эмас, балки тоғ тепасида доим ёниб турадиган оловдир. У баъзан кучли аланга бўлиб порлайди. Тунда денгиздаги кемалар ундан мўлжал оладилар. Кундузлари эса Барқ тоги устида доимо тутунга ўхшаш нарса чиқиб туради.

Беруний ёқутлар тўғрисидаги баъзи қизиқ-қизиқ воқеаларни ҳикоя қиласди.

Амир Йаминуд — давла (подшоҳ Маҳмуд Фазнавий)нинг ихтиёрида бир ёқут бўлган. У узун бўлиб, вазни йигирма мисқол эди. Рай шаҳарлик ака-укалар ал Ҳасан ва ал Ҳусан бу ёқутни йигирма минг динорга баҳолаганлар. Амир шу баҳога рози бўлган. Яна Амир деган: «Паручанонал (ҳинд шоҳи) бу ёқутнинг эгаси эди. Шоҳ уни бир савдогарга тўрт юз минг дирҳамга гаровга берган экан». Беруний изоҳ бериб айтадики, ҳақиқатан бу ёқутнинг вазни бир ярим мисқол ҳам келмас эди.

Чўлот исмли бир ҳинд шоҳи катта бир ёқут ўрнатилган зиначага эга бўлган. Ҳар сафар тўрт киши бу зиначани ушлаб турар ва шоҳ оёғини ёқут устига қўйиб калласи хачирнинг елкасига теккунича кўтарилар, сўнг аравага ўлтирас экан.

Амир Масъуднинг ихтиёрида бир ёқут бор экан. У арслон шаклида бўлган. Уни қўлга олганларида бошмалдоқ ва чинчалоқ ортидан чиқиб турар экан.

Бу ёқутни Сарондидан қандай қилиб олиб чиқилгани тўғрисидаги ҳикоя худди эртакка ўхшайди:

Бир киши сочини қирдирган. Сўнг мисдан қалпоқ ясатиб, у қалпоқни галвирга ўхшатиб кўп тешиклар қилдирган. Бошининг орт томонига ўша ёқут учун махсус жой тайёрлаган. Сўнг узоқ фурсат шу қалпоқни кийиб юрган. Сочлари ўсиб чиқиб қалпоқни бутунлай қоплаб беркитгач, ўша одам қўлига ҳасса тутиб гадойлар сингари йўлга чиққан. Шу йўснинда у чегарарадаги текшириладиган жойлардан шу ёқутни бошида соchlари орасида яшириб олиб ўтган.

Беруний баъзи ҳукмронларнинг қимматбаҳо тошларга ўч бўлганликларини қоралайди. Араб халифаларидан Умавийлар чумоли каби йиққан бойликларини Аббосий халифалари туялари каби хароб қилганлар. Ҳусусан, халифа Ал — Муқтадир жуда истрофгар эди.

У йиртқич босқинчилар сингари пулга ўзини ташлар, бефойда ишларни ёқтиар, беҳуда машғулотларга ишиқибоз эди. Халифа ҳамиша хотинлар билан кайфу-сафо қилас, қимматбаҳо тошларни хотинларга сочар ва уларнинг қўли билан бу бойликларни барбод берар эди.

Аммо, халифа Ал-Муқтадир бу қилмишларни учун вазири Ал — Аббосдан ҳижолатда бўлган. Шунинг учун халифа вазирни ҳам бундай исрофгарчиликка шерик қилишга ва вазирга хиёнат доғини туширмоққа ҳаракат қилган. Шунда вазир халифанинг нолойиқ ишларидан қўз юмишга мажбур бўлар эди.

Халифа вазирга бир катта қимматбаҳо тошни совға қилиб юборади. Аммо вазир бу бойлик халифаликка тегишли ва уни талон-тарож қилиш ярамайди, деб бу совғани қабул қилмайди. Халифа ўз қилмишидан хижолатда қолади.

Али ибн Мусо Маккадан қайтгач, халифа Ал-Муқтадир билан суҳбатда бўлди. У халифадан ибн Дажжолдан ўттиз минг динорга олинган маржон қаерда, деб сўрайди. «Хазинада» деб жавоб берди халифа. Али ибн Мусо ўша маржонни келтиришни сўрайди. Аммо ахтариб уни хазинадан топа олмайдилар. Шунда Али ибн Мусо ёнги остидан ўша маржонни чиқариб халифага кўрсатади ва дейди: «Буни Мисрда мен учун сотиб олиб бердилар. Агар қимматбаҳо тош билан шундай ҳодиса содир бўлган бўлса, бошқа нарсалар билан нималар бўлиша мумкин?»

Бу ўғирликни қилган Ал-Муқтадирнинг яқинларидан бири, сарой хоними Зайдони эди.

Беруний қимматбаҳо тошлардан беҳуда безаклар сифатида фойдаланишга мутлақо қарши бўлган.

Халифа Үмар ибн Абдулазиз ўғли Абдуллоҳнинг бир минг дирҳамга узук учун қимматбаҳо тош сотиб олганини эшитгач, унга хат ёзиб буюрганки, ўғли дарҳол бу узукни сотсин, тушган пулга эса минг оч одам учун озуқа берсин, ўзига мисдан узук ясатиб муҳр қилдирсин.

Халифа Абдуллоҳ ибн Марвон ибн Мұхаммад Нубиядан пиёда қайтиб келаётганида унда латтага ўралган бир минг дирҳам баҳоли қизил тош бор эди. Халифа дердики, оҳ, шунинг ўрнига устига миниш мумкин бўлган бир жонивор бўлганда эди.

Марвонийлардан бири бундай деган: «Қочиб кетаётган пайтимизда беш динордан ортиқ қимматга эга бўл-

маган арzon тошлар кўп фойда келтириди. Чунки уларни чиқариш ва сотиш мумкин эди. Қимматбаҳо тошларни эса чиқаргани қўрқар эдик, уларнинг қиммати биз учун бефойда бўлди».

Шулардан кўриниб турибдики, Беруний қимматбаҳо тошларнинг сифатлари, таърифи ва баҳоси тўғрисида сўзлабгина қолмайди. Беруний фан тарихида биринчи бор минералларнинг солиши тириги тушунчасини яратди, уларни аниқлаб бир тартибга солиб берди. Олим бундай бойликларга қандай муносабатда бўлиши лозимлигини ҳам ўргатади. Кишиларнинг маънавий бойлиги қимматбаҳо тошларга бефарқлигидандир. Улардан (қимматбаҳо тошлардан) шуҳратпастлик, исрофгарчилик мақсадида эмас, балки элу юрт, мамлакат манфаатлари йўлида фойдаланиш керак. Бундай тошларга очкўзлик билан ёпишиш кишилар учун бефойда, ҳатто таҳликали эканини ҳам олим алоҳида уқдириб ўтади.

Олтин тўғрисидаги мақола ҳам ана шу хуносаларни ўз ичига олган.

Беруний ёзадики, олтиннинг кам учраши уни йиғабериш ва хазиналар жамғаришни тақозо этмайди.

Зинж вилоятининг одами кокос ёнғоқларидан олинган шарбатни ичиб роҳат қилган чоғда дунёда ҳеч нарсага аҳамият бермайди, бутун дунёни ўз қўлига олган сингари ҳис қиласди.

Олимнинг кўнгли ҳам ана шу ҳимматли зинжий тарафидадир.

ФОЙДАЛИ МАСЛАҲАТЛАР

Ғазнадаги олтин бозори. Қатор кетган раста дўконлар билан лиц тўла. Дўконлар эса турли-туман олтин, жавоҳир, кумуш, ёқут, зумрад ва бошқа қимматбаҳо тошлар ва маъданлар билан тўлиб тошган. Дўконларда қатор терилган бу тилла буюмларга қараган кишининг кўзи қамашади.

Дўконлардан бирида бир ёш қорасоқол заргар қўлидаги қўлэзма китобни диққат билан варақлайди. Харидор йўқлик пайтида унинг учун китоб мутолааси энг ёқимли машғулот. Аммо бугун унга айниқса муҳим бир китобни топиш мусассар бўлган. Бу Берунийнинг қимматбаҳо тошлар ва маъданларга оид китоби. Заргар китобнинг бевосита заргарликка оид бобларини

кўздан кечирди. У қимматбаҳо тошларнинг хасталаниши, бунинг сабаблари, хасталикни даволаш усуллари тўғрисида ёзилганларни диққат билан ўқиди.

Шундан кейин китобни яна варақлаб кўрди. Олдин унча диққат қилмаган бошланғич боблари — тарвиҳаларни секин ўқий бошлади. Сўнг қизиқиб кетди-да, бoshини китобдан кўтартмаганича узоқ вақт мутолаада банд бўлди. Орадан бирмунча фурсат ўтди. Бир киши дўкон ёнига келиб тўхтади. У дўкондорнинг китоб ўқишга берилиб кетганини озгина вақт кузатиб турдида, сўнг кулимсираб секин салом бериб деди:

— Ассалому алайкум мулла Асфар, бу муқовалар орасидан қандай хазина топмишдирсиз?

Дўкондор бошини кўтариб дўкон ёнида турган кишини кўргач, дик этиб ўтирган ўрнидан туриб дўкондан пастга, кўчага тушди ва келган кишига хурсандлик билан алик қайтариб унга жавоб қилди:

— Воалайкум ассалом, мулла Нодир, хуш келдингиз, қани марҳамат, буёққа ўтсинлар.

Мулла Асфар дарҳол дўконга қайта чиқиб бир чеккада турган кўрпачани дўкон четига солди. Икки ҳамсуҳбат кўрпача устига ўлтириб фотиҳага қўл очдилар. Мулла Нодир дўкондор Асфарнинг ёшида, муртларига ҳали устара тегмаган, бошида мўъжаз оқ салла, foят озода кийинган бир муллабачча эди. У Мулла Асфарнинг яқин дўсти. Мадраса таҳсилига кетаётганда ҳам, қайтаётганида ҳам ўз дўсти билан албатта учрашиб ўтар эди.

Уларнинг суҳбати давом этди.

— Берунийнинг янги китоби қўлимга тушди,— деди мамнуният билан заргар мулла Асфар,— бу бизнинг ҳунарга оиддир. Foят мароқли бир китоб, мутолаага шўнгиф кетиб сизнинг келганингизни ҳам сезмай қолибмен.

— Беруний ҳар йили бир неча китоб ёзиб элни баҳраманд этар. Bu улуғ аллома туфайли Фазна илм-фан нуридан чароғон бўлмоқда,— деди мулла Нодир. У Берунийнинг ёзган кўп китобларини ўқиган. Фазнадаги ҳар бир ёрқин фикрли толиби илм билан ифтихор қиласи эди.

— Аммо,— деб сўзида давом этди мулла Нодир,— мен Берунийнинг олтин ва жавоҳирлар тўғрисида китоб ёзганидан хабарим йўқдир. Чунки бутун Фазна аҳлига Берунийнинг қимматбаҳо тошлар, олтин ва кумушга бефарқ муносабати ёруғ кундек равшан.

У Султон Масъуднинг икки туяга ортилган кумушлардан иборат совғасини Беруний олмай қайтариб юборганига шама қилмоқда эди. Бу воқеа бутун Фазнага машҳур бўлиб кетгани учун мана неча йилки халқнинг хотиридан чиқмас эди.

— Ундай бўлса энди шундай китобдан боҳабар бўлиб хабардорлик хазинангизни янги дуру, гавҳарлар билан бойитгайсиз,— деди ҳазиломуз муяла Асғар ва қўлидаги қўллёzmани меҳмонга узатди.

Мулла Нодир олдин унга тутилган пиёладаги шарбатдан бир ҳўплаб пиёланни қайтариб қўйди-да, сўнг китобни қўлига олди. У қўллёzmани биринчи варағидан бошлаб диққат билан кўздан кечирмоққа киришди. Китоб билан танишиб чиққач, мулла Нодир бармоғини бир варақ устига қўйгани ҳолда:

— Берунийнинг бу китоби сизнинг ҳунарингизга эмас, бизнинг ҳунарга кўпроқ алоқадордир. Муддатдан илгари шодланган кўринасиз,— деди ҳазил билан. У мадрасада фалсафа, мантиқ дарсларини кўпроқ муҳаббат билан ўрганар эди.

— Бу китоб жавоҳир ва олтинлар тўғрисида. Қимматбаҳо тошлар, маъданларнинг таркиби ва ҳолати хусусидадир. Бу сарлавҳасидан ҳам аён-ку,— деди мулла Асғар бўш келмай.

— Бу китоб инсон кўнгли ва ҳаётини ўша жавоҳирлар каби азиз ва пок бўлмоққа чорлар, инсоний фазилатларнинг қимматбаҳо бойлик эканидан таълим берар,— деди мулла Нодир.

Икки дўстнинг ҳазиломуз ва латиф баҳси шу йўсинда бир оз давом этди. Мулла Нодир ўз фикрининг исботи учун китобнинг биринчи бўлагидаги тарвиҳа (истироҳат) деб аталган бобидан баъзи жойларини баланд овоз билан ўқий бошлади.

— Инсон энг олижаноб фазилатлар соҳибидир,— деб ёзган эди Беруний,— яқин дўсти бор киши чинакам баҳтиёр кишидир. У дўст муносиб ҳаёт тарзига эга, ёқимли хусусиятлар соҳиби. Икки дўст бир-бирига қалби билан киришиб кетишган.

Ана шундай чин дўст ҳар бир кишида битта бўлади. Бундан ортиқ бўлмайди.

Шундан сўнг олим киноя билан айтиб ўтадики, бошқача дўстларнинг кўп ё оз бўлиши одамнинг молу давлати ва кишиларни ўзига жалб эта олиш қобилиятига боғлиқ.

Одам ҳамиша бошқаларга яхшилик кўрсатиши керак. Агар яхшилик қилиш имкониятига эга бўлмаса, яхши тилаклар изҳор этсин.

Ана шундай эзгу фикрлар баёнидан сўнг олим кишиларнинг кундалик турмушдаги юриш-туришлари, ўзларини тутиши, шахсий гигиенасига оид маслаҳатлар берган.

Инсоний сифатлардан энг муҳимлари озодалик ва тартибилилиkdir.

Инсоннинг энг яқин нарсаси унинг табиати, руҳидир. Шунинг учун киши табиатига ёқадиган ишларни қилиши керак.

Ундан кейин инсонга энг яқин нарса — кийган кийимиdir. Кийим одам танасига ёпишиб, терисини ёпиб туради. Яна одамга энг яқин нарса яшамоқда бўлган ўй-жойи, ғамхўрлик қилувчи одами, идишлардаги ейдиган, ичадиган озуқаси, ҳамда меҳнат қуролидир.

— Хўш бунга нима дейсиз мулла Асфар,— деди мулла Нодир,— бу ҳам олтин-жавоҳирларга оидми?

— Бу энг қимматбаҳо жавоҳир, бебаҳо олtingа, яъни инсонга оид,— деб кулиб тан берди мулла Асфар.— Барчага аёнки, Беруний учун инсондан шарафлироқ ва қимматлироқ зот йўқ. Шунинг учун қимматбаҳо тошлар ва маъданлар тўғрисида китоб ёзганда, Беруний даставал инсон ҳақида сўзлаяжаги бешак ва шубҳадир. Қани, давомини ҳам тинглайлик.

Мулла Нодир ўқишида давом этди.

Инсоннинг чеҳраси чиройли, қадди-қомати келишган бўлса, унга боқиш ёқимли бўлади. Кишининг исми ҳам жарангдор бўлиши керак. Йилгари элчиликка ташки кўриниши чиройли, номи оҳангдор бўлган кишиларни танлаганлар. Агар исми шундай бўлмаса, бошқача гўзал отлар берганлар.

Кишининг чеҳраси ҳали у онасининг қорнида экан пайтида шаклланади. Шунинг учун уни ўзгартириб бўлмайди. Лекин одам ахлоқий қиёфаси ва турмуштарини ўзгартиromoққа қодир.

Агар киши ўз ҳирсларидан устун тура олса, ўзидағи бор нуқсонларни йўқ қилиб, уларни яхши сифатларга айлантира олади.

Ҳаммадан аввал кишининг кўзи тушадиган жой бу одамнинг териси ва ташки кўринишидир.

Гарчи киши ўз чеҳрасини ўзгартиришдан ожиз бўлса-да, терисини тоза сақлаш унинг ўзига боғлиқ.

Инсоннинг озодалиги сув билан. Сувнинг покизалиги ва хушбўйлигидан шаббодалар ёқимли бўй касб этадилар; сув ҳаётга totli таъм бағишлиайди. Бундай сифат сувга ўхшаш бошқа суюқликларга ҳам хосдир.

Мулла Нодир шу ерда тўхтади ва мулла Асфар деди:

— Қолган жойларини баланд овоз билан ўқиб бўлмас. Уни холида ўзингиз ўқирсиз. Айниқса уйдагилар ўқисинлар.— Ушбу китобни ўша вараққа белги қўйган ҳолда мулла Асфарга узатди. Уларнинг суҳбати бошқа мавзуда узоқ давом этди.

Мулла Нодирни кузатиб қўйгач, мулла Асфар биринки келган харидорлар билан савдо қилди. Заргарларнинг савдоси чаққон эмас. Харидор оз. Кундузги овқатдан сўнг ҳаво исиб, айниқса бозор касод бўлди. Шунинг учун пешиндан кейин дўкондор ўз дўконини ёпди-да, ичкаридаги кичик бир салқин хонага ўтди. У бир оз тамадди қилиб олгач, Берунийнинг ўша «Минералология» китобини қўлига олганича кўрпачага ёнбошлади.

Мулла Асфар белги қўйилган вараққа кўз югуртириб унда ёзилганлар билан танишар экан, у дарҳақиқат буларни баланд овоз билан ўқиши нокулайлигига ишонди .Бу тарвиҳада Беруний кишиларнинг энг назокатли турмуш лавҳалари тўғрисида сўзлар, уларга ғамхўрлик ва меҳрибонлик билан шахсий турмушнинг жуда нозик томонлари бўйича ўғитлар берар эди.

Бу ўғитлар озодалик, эру хотин алоқалари, чирой ва покиза табиатликка оид. Улар айниқса аёллар учун жуда қимматли. Олим кўп меҳрибон ота-оналарнинг ўз қизларига берган маслаҳатлари шаклида эл қизларига тозалик ва оиласда аҳиллик ўрнатиш таълимини бермоқда.

Тозалик боиси сув. Кўп ота-оналарнинг қизларига қилган насиҳатлари оиласвий муносабатлар ҳам сувга оид.

Абдулла ибн Жаъфар қизини эрга бераётганда унга бундай деган: «Рашкдан сақлангил. У талоқнинг калидидир. (Эрингга) тез-тез танбеҳ қилишни сенга таъқи́лайман. Чунки танбеҳ нафрат уйғотади. Ўзингни безаб юргин. Бунинг учун яхши восита сурмадир. Яна хушбўй атирлардан фойдалангин. Уларнинг ичида энг яхшиси сувдир».

Омир ибн аз-Заріб ал-Алвоний қизини эрга бе-

раётган пайтида қизнинг онасига бундай деган: «Қизнингга қаттиқ буюргинки, саҳрода чиқадиган бўлса, сувни ғамлаб олсин. Сув юза томонга жило беради, ички томонни пок қилади. Эрининг хоҳишиларига қаршилик кўрсатмасин, чунки баҳт ўзаро мувофиқликдадир...»

Бир араб тўй кечаси қизига бундай маслаҳат берган экан: «Сен эрингнинг чўриси бўлгин, ўшанда эринг сенинг қулинг бўлади. Сен у билан ҳамиша юмшоқ муомалада бўл, бу нозу карашмадан афзаладир. Яна сувдан кўп фойдалангин. Хушбўй нарсалар ичидаги энг биринчиси сувдир».

Бир она қизига маслаҳат бериб айтган: «...эринг хурсанд эканида хафа, у хафа бўлганида хурсанд бўлиб кўринишдан асранинг. У сендан ҳеч бир хунук нарса тўғрисида хабар эшитмасин. Унга сендан фақат ёқимли хушбўй ҳидларгина бориб етсин. Сен сув ва сурмани ҳамиша ёнингда сақла, ҳамма хушбўй нарсалар ичидаги энг яхшиси сувдир».

Бир она қизига дебди: «Терингга яхши атирлар сепгин, эрингнинг гапига қулоқ ос, энг кўп қўллайдиган хушбўй нарсанг сув бўлсин». Яна бири айтган экан: «Эрингга гап қайтарма, уни толиқтириб қўясан, у билан жанжал қилма, уни ўзингдан совутасан: у билан чин кўнгилдан ростгўйлик билан сўзлашгин, сувни ўзингнинг энг яхши атринг қилиб ол».

Беруний ота-оналарнинг қизларига берган бундай оқилона маслаҳатларини тўласига маъқуллаган. Аслда булар ҳаммаси Берунийнинг маслаҳатлариидир. Шундан кейин у яна ўз номидан айтилган маслаҳатларни ҳам баён этади. Улар ҳамма учун фойдали. Аммо олим кўпроқ аёлларни кўзда тутиб бу маслаҳатларни берган.

Ўз чиройини сақламоқчи бўлган киши терисини, баданинг ҳамма жойларини мўл сув билан узоқ ювиб тозалагандан сўнг, уни турли ранглар билан безамоқча киришса бўлади. Бу ранглар нур туфайли кўзга ташланадилар. Кўп-кўп юваниш ва гул ёки ёғ (крем) суртиш орқали терини оппоқ қиласидилар. Шундай қилишиб, танага безак берилади. Айниқса кишининг терисида табиий ёки тасодифий сарғишилик бўлса, шундай қилинади. Сўнгра тишларни тозалаш ва қиртишлаш керак, қовоқ ва кўзларни тоза сақлаш шарт, уларга сурма суртиш, зарурият бўлса, соchlарини бўяш керак: соchlарини тараш, уларнинг учларини кесиб туриш, баъзи

бир толаларини юлиб ташлаш лозим. Тирноқларни олиш уларни бир хил текисликда тутиш даркор.

Беруний уқдирадики, киши танасини ўраб турган нарсалар ичида одам учун энг муҳими ва биринчиси уст-бошидир. Чунки у танага ёпишиб туради.

Киши уст-бошини тоза сақлаши шарт. Кийимнинг ранги кенг қўлланиладиган, яъни оқ рангда бўлгани яхши. Кийим силлиқ бўлиши керак. Агар у гижим бўлса, чанг ва гард юқади. Кийимнинг ранги йил мавсумларига мос рангда, ёки шу мамлакатдаги кишиларниң урф-одатларига тўғри келадиган бўлиши маъқул.

Умар ибн Хаттобдан мурувват нимададир, деб сўраганларида, кийимнинг тартибли эканидадир, деб жавоб берган. Яна бир киши «мурувват кийимнинг озода эканлигига» деган.

Беруний кийимни озода тутиш қандай аҳамиятга эга эканини шарҳлаб ёзади:

«Кийимнинг озодалигига диққат қилган киши даставвал ўз танасининг озода бўлишига аҳамият беради. Чунки кир бадан кийимни ичидан кирлатиши мумкин. Шундан кейин уйининг, одамлар йигиладиган жойларнинг озода бўлишига эътибор қиласи. Чунки бу жойлар ифлос бўлса, кийимни ташқаридан кир қилиши ёки чанг бостириши мумкин. Шундай қилиб умумий мақсад кийим орқали амалга оширилади.

Кимки, озодалик тўғрисида айтилган гапларга риоя қилмаса, у ўша гапларнинг ҳақ эканини ўз хатти-ҳаракати билан яна бир бор исботлайди, холос.

Абулфатҳ деган бир бадавлат, баланд мартабали кишининг номуносиб ҳолдаги башараси ва кўриниши, унинг ўзи, минган оти, хизматчисининг кир ва ифлослиги унинг баланд даражасига иснод келтиргани бир шеърда айтилган: «Абулфатҳнинг башарасига бадавлатлик ҳам, ислом нурининг ярақлаши ҳам ҳеч ярашмайди. Чунки унинг кийими ҳам ифлос, Салласи, минган оти ҳам ифлос. Афти, бўйни ҳам кир ва хизматчиши ҳам ифлос».

Беруний озодалик, унинг мурувватнинг бир бўлаги эканлиги тўғрисида берган маслаҳатларига хulosса қилиб ёзадики, ташқи ва ички кийимларнинг озода ва тартибли бўлиши инсон қалби ва руҳининг тозалигини билдиради. Кийимнинг тозалиги ҳақида айтилган сўзлар қалб ва ҳаракатнинг покизалигига ҳам алоқадор. Инсоннинг ҳам ташқи кўриниши, ҳам ички дунёси энг

олий даражада тўзал, ақл ва даҳо талабларига муносиб бўлмоғи лозим.

Мулло Асфар мутолаага бериллиб кетиб дўконни очиш пайти келганини ҳам унутаёзган эди. У ўқиганларини тафаккур қилганингача ўрнидан турди ва дўкон сари йўл олди. Берунийнинг китоблари саводли ва ўқимишили кишиларга манзур эди. Фазнагина эмас, Хурросон, Мовароуннаҳр, Эронзамин, Хоразм, Ироқ ва бошқа элларда ҳам Беруний ёзган китоблар одамларнинг қўлидан тушмас, илмий анжуманларда бош мавзу бўлар, кишилар бу китобларни ҳар ерда муҳаббат ва ихлос билан ўқир, улардан таълим олар эдилар.

ОХИРГИ ҚИТОБ

Куз тонгининг баҳор ва ёз тонгидан фарқи кўп. Энг муҳими шундаки, кун қисқарганидан тонг кеч ёришади, ишни фақат кундузга мўлжалланса, унга оз фурсат қолиши табиий.

Абу Райҳон Берунийнинг хонасида тонг ёришмасдан анча олдин шамлар ёқилади. Мўйсафид олим одатини канда қилмай жуда барвақт туради. Эрталабки лозим — омодалар амалга оширилгач, унинг бошини албатта ёзув хонтахтаси устида кўрасиз.

Олим бирмунча фурсат ёзув билан банд бўлгач, навбатдаги саҳифани тугаллаб, уни қуритмоқ учун алоҳида жойга қўйди-да, кўзларини юмди.

У деворга суюнган парқуга сал оғишиб бошини юқори кўтарди ва юмилган кўзларини очмай сал дам олди. Киприкларининг ости, қовоқлари сирқираб оғрир эди. Мана бир неча ойдирки, у турли кўз оғриқлари азобини тортади. Яқиндагина икки ҳафтадан ортиқ азоб берган говмижжанинг излари ҳали кўз атрофида турипти. Хат ё китобга боққанда кўзлари ачишади. Олим бошида тафаккур шуълалари қанча кучлироқ порласа, кўзида қўрқув нурлари шунчалар сўнмоқда эди.

Узоқ кечалар осмон жисмларининг ҳаракатини муттасил кузатишлар, кундузлари қуёш ҳароратини тадқиқ этиш олимнинг кўриш органларига қаттиқ таъсир қилганинг эди. Ҳозир бу таъсир ўзининг кўнгилсиз натижаларини сездирмоқда, унинг устига қулоқ ҳам оғирлашиб бормоқда. Ҳамсұҳбатининг гапларини у аранг эшигади.

Гоҳо эшитиш умуман ёмонлашади, шунда олим айтувчининг сўзларини фақат қила олмай қолади. Фақат бирор нарсага урилгандаги сингари қаттиқ овозгина унга аниқ эшитилади.

Бир умр тинимсиз қилинган меҳнат, турмуш изтироблари, ҳаёт етказган кўп аччиқ-чучук кечинмаларнинг излари эди бу кўринишлар. Ёш ҳам улғайиб қолди. Етти, ўн йиллик воқеалар, меҳнат ва заҳмат билан тўлганича ортда қолди. Аммо ҳолати қандай мураккаб бўлмасин. Беруний бирор кун илмий машғулотини тарк қилмайди.

Олим нонуштагача, одатдаги каби, анча ишлади, ўйланган янги китобнинг муҳим масалаларини алоҳида-алоҳида, қофозларга йирик ёзувлар билан белгилаб чиқди. Муфассал ёзишнинг иложи бўлмай қолган.

Нонушта фурсати яқинлашган эди. Олим ўрнидан турди, хонанинг ўёқ-буёғига юриб жисмига сал истироҳат бахш этган бўлди.

Аммо Беруний учун энг ёқимли, кўнглига ором ва меҳнатига унум бағишлиовчи дамлар ҳали олдинда. Олим мунтазирлик билан эшикка боқди. Унинг қарашини сезгандек эшикдан хизматчи кириб келди ва салом бериб нонуштага таклиф ишорасини қилди. Беруний тоқатсизлик билан унинг таклифини рад қилди. Хизматчи секин қайтиб чиқиб кетди.

Беруний деразадан ташқарига, боққа назар ташлади. Кузнинг охирги кунлари. Бое йўлкалари тозалаб шипирилган. Унда-бунда йиғиб қўйилган хазон уюmlари ишланган ерлар ўртасидаги беҳаёт дўнгликларни эслатади. Дарахтларни яшил лиbosлари аллақачон чириб тўкилган. Яланғоч шохларнинг қорайган танлари кириб келаётган қиши совуқларидан ҳайиқиб титрайдилар. Гоҳо зоғларнинг машъум қаҳқаҳаси эшитилади.

Бу ноҳуш манзарага тикилиб турган Берунийнинг ўйчан нигоҳида тўсатдан бир ёруғлик пайдо бўлди. Олим бир кишининг дераза ёнидан ўтиб уй эшиги сари йўналганини кўрган эди.

Беруний дарҳол уй эшигини очиб айвонга чиқди ва бу ерга кириб келган меҳмонни хурсандлик билан қарши олди. Улар мамнуният ила бир-бирлари билан саломлашдилар. Ҳолу-аҳвол сўрашдилар. Сўнг Беруний меҳмонни нонушта тайёрланган овқатхонага бошлади.

Бу киши Берунийнинг шогирди, ҳамкасабаси ва

дўсти Абу Ҳомид Аҳмад ибн Муҳаммад ан-Нахшаний эди. Абу Ҳомид Нахшаний табиб. У табобат илмини кўп мўътабар билимдонлар таълимида ўрганган, яна тибга оид китобларни диққат билан ўқиб илмини бо йитган. У ҳозир хастаҳонага бошчилик қилади. Шу билан эгаллаган билимларини амалий машғулот орқали мустаҳкамлайди. Абу Ҳомид илм шайдойиси, фан заҳматкаши, у доимо янги ва қадимий китоблар му толааси билан машғул. Агар бирор китобнинг биронта бэби, ёки ундаги ўткир ифодаларни тилга олгудай бўлсангиз, Абу Ҳомид шу гаплар қайси китобнинг нечинчи саҳифасида эканини дарров айтиб бера олади. Абу Ҳомид ёмон ният ва иккюзламаликдан қочиб, ҳамиша эзгу ишларга бел боғлаган олижаноб бир зот эди.

Беруний билан Абу Ҳомид бирга нонушта қилдилар.

Табиб муҳтарам устозининг нотоблигини билар, бу нотобликка илож тополмаганидан азобланар эди. Аммо у Берунийнинг Абу Ҳомид суҳбатини ёқтиришини, улар суҳбат қуришганда устоз ўз дардларини унугандай бўлажагини ҳам билар эди. Шунинг учун Абу Ҳомид деярли ҳар куни хизматдан бўш фурсатида устоз ҳузурига келар, унинг донишмандлик тўла гапларидан баҳра олар, устознинг илмий фаолияти а оид қўлидан келган ҳар бир ишни бажариб унга сидқидил билан кўмаклашар эди.

Беруний ўз умр мезонининг интиҳоси яқинлашаётганини тушунар, шунинг учун ўйлаган илмий режаларини тезроқ амалга оширишга интиларди. Бу эзгу мақсад ижросида Абу Ҳомид олимга энг фойдали ва савимий ёрдамчи эди.

Нонушта сўнггида устоз ва шогирд чой ичиб озгина суҳбат қурдилар. Беруний пиёладаги чойдан бир ҳўплаб сўнг пиёлани дастурхон четига қўйди-да, деди:

— Чой энг яхши ичимлиkdir. У мураккаб дориларнинг ўрнини босади, аммо мураккаб дорилар етказадиган заарарни чой етказмайди, аксинча у фойда келтиради.

Абу Ҳомид Берунийнинг бу сўзларини олдин ҳам эшитган, чойнинг фойдасини ўзи ҳам яхши билар эди. Аммо устознинг чойга муҳаббагини сезганидан унинг сўзларига диққат билан қулоқ солди. Ҳамсуҳбатининг бу қайфиятидан огоҳ бўлгандек Беруний сўради:

— Чой ўсимлигининг қай тарзда аниқлангани тўғрисидаги ҳикояни эшитганмудирсиз?

Абу Ҳомид бу ҳикояни эшитмаган эди.

Беруний шогирдига шу ҳикояни сўзлай бошлади: «Хитой ҳоқони ўз одамларидан бирига қаҳр қилиб уни мамлакатдан чиқариб тоғларга ҳайдаб юборган.

У одам нимжон, касалванд, раңглари ўчган бир киши эди. У тоғларда тентираబ юриб ғоят ҳолдан кетиб қолган вақтида тасодифан бир ўсимликни кўриб қолди ва шуни еб яшай бошлади. Бир қанча вақт ўтгач, бу одам ўзида соғайиш аломатларини сезди, раңг-рўйи очилиб танига қувват келаверди. У ўша ўсимликни емоқни давом эттириди. Натижада соғайиб, қуввати ошиб, чехраси очилиб, аҳволи яхшиланиб кетди.

Шу фурсатда хоннинг кишиларидан бири тоғ йўлидан ўтаётганида ўша қувғиндини учратди, унинг жуда кўримли ва соғлом бўлиб кетганидан ҳайратланди ва ҳоқонга бориб бу хабарани етказди.

Ҳоқон сургундаги одамни тоғдан топиб ўз ҳузурига келтиришни буюрди. Уни олиб келганиларида ҳоқон қанчалик диққат билан қарамасин уни таний олмади. Қувғиндининг қиёфаси шунчалар ўзгариб яхшиланиб кетган эди. Ҳоқон унинг аҳволидаги ўзгаришлар ва соғайишининг сабабини сўради. У ҳоқонга ўзи еб тириклилик қилган ўсимлик тўғрисида сўзлаб берди. Ана шу ўсимлик чой эди.

Чойнинг бундай хусусияти маълум бўлгач, уни тажриба қилиб синаб кўрдилар, бутун фойдалари аниқлангач, дору-дармон сифатида ишлата бошладилар.

— Менинг эшитишимча, чой ичимлиги шароб зарарини ҳам йўқотса керак,— деди Абу Ҳомид.

— Тўғри,— деди Беруний,— шунинг учун уни Таббатга кўп келтирадилар. Чунки Таббатдагилар шаробни кўп истеъмол қилурлар. Шаробнинг зарарини кетказмоқ учун эса чойдан фойдалироқ ҳеч нарса бўлмас.

Суҳбат мавзуи дорилар хусусига кўчди.

Абу Ҳомид Аҳмад ўз табиблик тажрибасидан мисоллар келтириб баъзи дориларнинг хасталарга таъсир қилмаганини айтди. Яна бу дориларни тайёрламоқ учун керакли моддалар топилавермайди. Табибининг фикрича, зарурият бўлмаса, заҳарли дорилардан исти-

фода этмаслик керак. Дори бўладиган озуқа истеъмол этилса, фойдаси кўпроқ тегади.

— Маълумки,— деди Беруний,— инсоннинг ўз ичига ютадиган ҳар бир нарсаси ё озуқа, ё заҳар бўлади. Дорилар ана шуларнинг ўртасида турадилар. Дорилар озуқани парчалайдилар. Заҳарни эса тузатадилар. Уларнинг таъсири тажрибали ва эҳтиёткор табибнинг чоралари орқали кўринади. Хасталарни даволашда, аввало табиб даволовчи озуқалар тайин қилгани дуруст. Бундай овқатларни тайёрлаш ва истеъмол этмоқ foят назокатли равишда амалга оширилиши керак. Агар бу иложлар кор этмаса, ўшандагина дорилардан фойдаланиш керак бўлади.

— Ушанда ҳам,— деб қўшимча қилди. Абу Ҳомид,— даставвал оддий дорилар тавсия қилиниши лозим. Агар улар фойда етказмасалар шундан сўнг мураккаб дориларни қўллаш мумкин. Ушанда ҳам оз таркибли мураккаб дорилар ишлатилса тузук.

— Мутлақо тўғри,— деди Беруний, ўз фикрининг тажрибали ва билимдон табиб томонидан маъқулланганидан мамнун бўлиб.— Агар дори тайёрлаш масаласига келсак, унинг учун барча лозим моддалар топилмаган тақдирда, ўшаларни ишлатмасдан, ёки топилмаган моддаларни бошқа моддалар билан алмаштирган ҳолда дорини тайёрлайвериши керак. У дори сустроқ бўлиб қолса ҳам, бари бир шифо қиласверади. Ахир, фақат бир-икки бармоғигина бутун бўлган одам истаган нарсасини ушлай олади-ку: яна оқсоқ киши соғ одамга нисбатан кўпроқ чарчаса ва секинроқ юрса ҳам юқ кўтариб маълум масофани боса олади-ку!

Абу Ҳомид гапнинг хонаси келиб қолгани учун анчдан бери сўрамоқчи бўлиб юрган саволини устозидан сўради:

— Дорилар тайёрловчи кишини сайдалоний ёки, сайданоний деб аташларини ва бу иборанинг «Сайданоний»— қирқоёқ деган ҳашарот номидан олинганини бир эшишиб эдим. Гўё қирқоёқнинг оёқлари кўп бўлгани сингари дoriшуноснинг ҳам халтача ва идишлири кўп бўлар эмиш. Шунинг учун дoriшуносни сайданоний деб атаган эмишлар. Шу тўғримудир?

Беруний енгил табассум қилиб шогирдига савол берди:

— Уша ҳашаротнинг нечта оёғи бордир.

— Уни қирқ тўрт оёқ, ҳатто етмишоёқ деб атаганинни эшитган эдим, шунча оёғи бўлса керак.

— Мен бирининг оёқларини санаб чиққанман,— деди Беруний.— Бу ҳашаротда икки юз қирқта оёқ бор эди. Доришуноснинг халтача ва идишлари бунча бўлмас.

Шу ҳазиломуз мубоҳасадан сўнг Беруний шогирдига «Сайдана» сўзининг маъносини тушунтириб берди. Бу сўз ҳиндларнинг «чандан» сўзидан келиб чиққан. Ҳиндлар барча хушбўй нарсалар ичида сандални айниқса ёқтирадилар. Ҳамза Исфаҳоний ёзадики, араблар бу сўзни ўз тилларига мослаштириб «Сайдана» («Дорилар билими») деб атаганлар. Шундан сайданний, сайдалоний иборалари пайдо бўлган.

Суҳбат давомида икки дўст ибора, ифодаларнинг юзага келиши, уларни ифода этиш имкониятига қайси тил бойроқ экани тўғрисида ҳам фикр алмашдилар. Беруний араб тилининг бойлиги, илмий тушунчаларни ифодаламоққа қулайлигини таъқидлади. Форс тили эса шеърият учун ўнғай. Олим ўз она тили — хоразмий тилининг камбағаллашиб бораётганидан афсусланниб гапирди. Бу мавзудаги суҳбат шунчалар мароқли бўлдик, Абу Ҳомид шу айтилган гапларни доришунослик тўғрисида Беруний ёзётган китобга муқаддима сифатида киритишни илтимос қилди. Токи, устознинг бу қимматли фикр ва холосалари китоб саҳифаларига жойлашсин ва келгуси авлодларга ҳам етиб борсин. Беруний бу маслаҳатга рози бўлди.

Доришуносликка бағишлиланган «Сайдана» китоби устида Беруний ва Абу Ҳомид биргалашиб ишлар әдилар. Беруний белгилаб қўйган режаларни Абу Ҳомид қўчириб ёзар, баъзи масалаларни Беруний шогирдига азбар қиласига берди.

Беруний дори бўладиган моддаларнинг барча мавжуд таърифларини турли манбалардан йиғиб жамқилди ва «Сайдана» китобига киритди. Беруний бу масалага оид эрон, ҳинд, семит, турк, юнон, лотин, франк ва зинж (шарқий Африка, хусусан, бantu тили оиласига алоқадор) тилларидаги маълумотларни қи-

ёслаб тадқиқ этиб чиқди. У. Каримовнинг¹ хабар беришига кўра, «Сайдана»да тўрт минг беш юздан ортиқ ўсимликлар, ҳайвонлар, минераллар ва улардан олинадиган озуқаларнинг номлари ва изоҳлари келтирилган.

Беруний турли илмий тушунчаларни адабий мисоллар орқали исботлаш ва изоҳлашга кўп аҳамият берар эди. Бундай адабий воситалар ўқишини енгиллаштиради. Ўқилган мазмунни уқишга ёрдамлашади. Иш асносида айrim ўсимликларни ўзи билан олиб келарди. Беруний ва шогирди икковлари бу ўсимликларнинг таърифини ёзиб чиқишаради.

Бир куни улар эрталабдан барвақт биргаликда ишга ўлтиришди. Берунийнинг кўнгли нохушроқ. Ноублик аста-секин лекин муттасил кучайиб бормоқда. Олим буни сезади. Шунинг учун ишга шитоб беради. Унинг «Сайдана» китобини тугаллашга улгуролмаслигидан хавотири бор.

Хонтахта ўстида ва токчаларда китоблар қатор терилган. Олимлар китоблардан керакли жойларини кўздан кечирмоқ учун белгилар қўйишишган. Беруний ва Абу Ҳомид икки хонтахтада ёнма-ён ўлтирадилар.

Беруний шогирдига айтиб турибди, Абу Ҳомид эса айтилганларини тез ёзиб бормоқда.

Шу ўйсинда битта-биттадан ғишт терилиб иморат қад кўтаргани сингари ҳар бир ўсимлик, модда номи, таърифи хусусиятлари ёзилиб-ёзилиб «Сайдана» китоби вужудга келаборди. У шарқ доришунослигининг буюк қомуси сифатида яралмоқда эди.

— Зайтун ва зайд таърифида Ан Нобиганинг ма-на бу байти жуда ўрнига тушади,— деди Беруний Абу

¹ У. И. Каримов (1920 йил туғилган)—Ўзбекистон Фанлар Академиясининг мухбир аъзоси, Беруний номли Ўзбекистон ССР Давлат мукофотининг лауреати, филология фанлари доктори. Шарқ Фан классиклари асарларининг моҳир тадқиқотчиси.

У. И. Каримов Абу Бакр ал Розийнинг «Сирлар сири» асарини топиб уни тадқиқ этган: «Абу Али ибн Сино. «Тиб қонунлари» асарининг рус ва ўзбек тилларига қилинган таржимаси ва таҳририда бош ўрин тутган мутахассислардан бири.

У. И. Каримов Берунийнинг «Сайдана» асарини араб ва форс тилидаги нусхаларини қиёсан тадқиқ этиб, уларнинг айrim ўринларини тўлдириб рус тилига таржима қилган ва бу асар бўйича йирик илмий тадқиқот иши яратган. Бу таржима ва тадқиқот Тошкентда 1973 йили нашр этилди.

Ҳомидга бир куни иш пайтида ва ўша байтни араб тилида ёддан ўқиди. У байтнинг мазмуни бундай эди:

Кечди у равшанланиб ёғли чироғинг нуридек,
Бетугүн порлар эди у қудрат аллоҳдин.

(чироқ ёғи — салит; тутун — нухос. А. К.) Бу шеърдаги нухос сўзи тутунни билдиради,— деб тушунтириди Беруний,— салит эса ёғ, аммо бу ёғ туюнинг ўркачидан олинадиган ёғдир. Одат бўлганики: чироққа қандай ёғ қўйилмасин, у салит дейилаверади.

— Мен ҳам қалқадис (купороснинг бир тури) учун бир шеър танлаб қўйган эдим,— деди Абу Ҳомид ва ён дафтарини чўнтағидан олиб очди, сўнг баланд овоз билан ўқиди:

Эзгу ишда суст, аммо у ёвузлик ичра тез,
Қалқадисдек барқарор доим дилида нақслик.

Беруний бу ўринли ташбеҳларга тўла байтдан завқ олиб кулиб юборди ва Абу Ҳомидга албатта бу байтни қалқадис бобига киритиш кераклигини тайинлади.

— Илмий китобларда шеъриятдан ўринли фойдаланиш жуда зарур,— деди Беруний,— шеърлар мақсадни тушунтириш ва маънони хотирда сақлаб қолишига ёрдам қиласидилар. Қадимий араблар саҳроларда яшаган вақтларида ёзувлари бўлмаган. Бирор нарсани агадийлаштиromoқчи бўлсалар, хотирда сақлашга ва тилдан-тилга ўтказишга уринганлар. Шеърият улар учун билимлар мажмуаси бўлган. Шеър орқали улар кураш кунлари, ота-боболар тарихини ёдда сақлаганлар.

ИНТИҲО

440-нчи ҳижрий (1048 милодий) йил. Газна.

Бир неча кундирки, Беруний қаттиқ нотоб. Унинг аҳволи кундан-кунга оғирлашиб боради.

Етмиш беш яшар мўйсафид олимнинг умр бўйи қилган тинимсиз меҳнати, даврон савдоларининг кулфати энди ўз таъсирини сездирмоқда. Тана ҳаракатсизликка мубтало. Аммо ҳар қачонгидек олимнинг фикри равшан, нутқ ҳам сақланган.

Абу Ҳомид, Берунийнинг бошқа шогирдлари, олим хизматида бўлган кишилар бир дақиқа хастанинг

ёнидан аримайдилар. Улар навбатма-навбат кечасию-кундузи бемордан хабардор бўлиб турадилар. Аммо ҳаммалари ҳам устоз мулоқотига оид ғанимат дамлар тугаб бораётганини сезиб турибдилар.

Беруний гоҳо уйқуга ботади. Бу, уйқу эмас, беҳолик. Гоҳо кўзини очиб қуввати етганича ёнидагилар билан сўзлашади. Унинг ҳар бир сўзи илм-фан мавзудида, ҳатто гоҳо илмий мубоҳаса ҳам қилиб туради.

Бугун эрталаб bemorning ҳолати анча яхшиланди. Олим Абу Ҳомид билан «Сайдана» китобини тугаллаш тўғрисида маслаҳатлашди, қайси бобларини кўчириб ёзиш кераклигини уқдирди.

Гарчи хаста ҳали сал дурустлашган бўлса-да, ҳамма бу охирги жонланиш эканини фаҳмлар эдилар. Ёни тугаган чироғ охирги бор порламоқда эди.

Тушдан кейин bemorning ҳолати ёмонлаша бошлиди. Юрак уриши заифлашди. У оғир нафас олар эди. Атрофдагилар бир-бирларига оғир, мазмунли боқар эдилар. Дилларга чуқур ғамгинлик чўқди.

Шу пайт Берунийдан ҳол сўрамоқ учун қози Валвалижий хастанинг ёнига ўлтириди. Зўрга хириллаб нафас олаётган Беруний секин-секин ҳар бир сўзни узоқ танаффуслардан сўнг айтиб Валвалижийга савол берди:

— Мерос тақсимоти тўғрисидаги қоидаларга янги-ча талқин бергансиз, деб эшигтан эдим. Шуни менга бир тушунтириб берсангиз.

Қози хаста Берунийга қаради. Олимнинг бутун вужуди ўлим тутқаноги билан олишмоқда. Кўзлари мақсадсиз жавдирайди, кўкраги оғир кўтарилади, нафас тоҳ тезлашади, гоҳ тўхтагандай бўлади.

— Шундай аҳволда бу зарурмидир,— деди хастага раҳми келиб Валвалижий,— кейинчалик, соғайиб кетганингиздан сўнг бафуржা бу ҳақда суҳбатлашармиз.

— Эй қози,— деди Беруний сўзларини бирма-бир териб паст овоз билан,— шу масалани билмай бу дунёдан ўтиб кетганимдан кўра ўшани билиб кетганим тузук эмасми?

Қози Валвалижий ноилож мерос тақсимоти қоидасига қилган талқинини айта бошлади. Беруний унинг айтганларини такрорлаб турар, баъзи жойларини қайтаришни сўрар эди. Қози сўзини тугатгач, Беруний бу масала бўйича ўз фикрини изҳор этди. Шундан сўнг

қози Валвалижий олимга шифо тилаб у билан хайрлашди ва ташқарига чиқди.

Валвалижий Берунийнинг уйидан ҳали унча узоқлашганича ҳам йўқ эдикӣ, бирдан уйдан доду фарёд, ийғи овозлари кўтарилиди. Қози дарҳол изига қайтди.

Абу Райҳон Беруний дунёдан ўтган эди.

Берунийнинг ўлмас асарлари асрлар давомида илм аҳлиниң қўлидан тушмаган, улар авлодлардан-авлодларга ўтиб эл кўнглидан янада чуқурроқ жой ола борган. Чунки буюк олим, мутафаккир, халқпарвар ва инсонпарвар олим Беруний ўзининг бутун умрини баркамол ижоди ва ёрқин истеъдодини чин юракдан элу юрт, одамлар, илму маърифат учун бағишилаган эди.

АБУ РАЙҲОН БЕРУНИЙ ҲАЁТИНИНГ СОЛНОМАСИ

- 973 — Абу Райҳон Муҳаммад ибн Аҳмад Беруний Хоразмнинг Кат шаҳарида дунёга келди.
- 988 — Беруний ва устоз Абу Наср Ироқий учрашадилар.
- 990 — Хоразмнинг Бушканз қишилоги яқинида Беруний Қўёшнинг энг тик ҳолатдаги кўринишини ўлчади.
- 994—995 — Беруний Хоразмда глобус ясади, Бу дунёда биринчи бор яратилган глобус эди.
- 996 — Кат ва Гурганж амирлари ўргасида уруши бўлди. Беруний Катдан Эроннинг Рай шаҳарига бориб истиқомат этади. Бу ерда машҳур астроном Абу Маҳмуд Ҳўжандий билан учрашади, унинг расадхонасини кўради.
- 997 — Беруний Райдан Катга қайтади.
- 997 — Беруний Катдан Бағдодли астроном Абулвафо Муҳаммад-Бузжоний билан ёзишима олиб боради. Улар Ой тутилишини кузатадилар.
- 997—998 — Беруний бухоролик олим ва табиб Абу Али ибн Сино билан ёзишималар олиб боради.

- 1000 — Беруний Гургон шаҳарида яшайди. Бўерда ўзининг «Ўтмиш ёдгорликлари» асарини яратади.
- 1003—1004 — Беруний Гургонни тарқ этиб Хоразмга қайтади. Хоразм пойтахти Гурганжда яшай бошлиайди.
- 1005 — Абу Али ибн Сино Гурганжга келади.
- 1009 — Хоразмшоҳ Абу Али ибн Маъмун вафот этди. Ўкаси Маъмун ибн Маъмун ҳокими-ятга ўлтиради.
- 1009—1017 — Беруний ўзининг «Хоразмнинг машҳур зотлари» асарини ёзади. «Геодезия» китоби бўйича материаллар иғтишида давом этади.
- 1012 — Беруний Гурганждан Фазнага олиб кетилади.
- 1018 — Фазнада Беруний «Геодезия» асарини ёзишга киришади.
- 1025 — Беруний «Геодезия»ни ёзиб тугаллади.
- 1029 — «Аттафҳим» китобини ёзиб уни Хоразм гўзали Райхонага бағишилади.
- 1025—1030 — Беруний Ҳиндистонда бўлди. Ҳинд халиқининг ҳаёти ва маданияти билан танишади.
- 1030 — Беруний «Ҳиндистон» асарини ёзиб тугаллади.
- 1030 — Подшоҳ Маҳмуд Фазнавий вафот этди. Кўп ўтмай Фазна ҳукмдорлиги сulton Масъуд ихтиёрига ўтди.
- 1031—1037 — Беруний ўзининг шоҳ асари «Қонуни Масъудий»ни ёзиб тугаллади.
- 1037—1048 — Беруний «Минералогия», «Фармакогно-зия» ва бошқа асарларини яратди.
- 1048 — Фазна шаҳарида устоз Абу Райхон Муҳаммад ибн Аҳмад Беруний дунёдан ўтди.



Абу Али ибн Сино

* * *

Эй кошки, кимлигимни бир билсаме,
Нечун саргаштамен, назар қилсаме,
Соҳиби баҳт эсам, ўйнаб-кулсаме,
Эрмасам, ёш тўкиб, бағрим тилсаме...

Шул бодия ичсаким чунон чопди кўнгил,
Жаҳд этдию қилини қирқ ёриб ташлади ул.
Кўнглимда-ку минг қуёш ёнар эрди ва ле,
Охирда камолга топмади заррача йўл...

Сўз қолмади — парда ичра бир маълум эмас,
Ким қолди чу асрар — дағи мағҳум эмас.
Чун мәърифатингда мен андоқ фикр этдим,
Маълум бўлдики, ҳеч нима маълум эмас...

Куфримни аён айламак осон бўлмас,
Оlamda имоним каби имон бўлмас.
Даҳр ичра ягонамен, манам коғир засам,
Бас, ушбу жаҳонда бир мусулмон бўлмас.

Пир ўлдинг, ишингни он чунон этмассен,
Соч оқи-ла пирлигинг ниҳон этмассен.
Тун зулматида ҳар неки қилдинг-қилдинг,
Тонг равшанида бўлди аён — этмассен.

Ул бир неча нодон, чу фаросат қосир,
Ўйларки, жаҳонаро улар донондири.
Эшак бўла қолким, улар эшаклик этиб,
Эшак агар эрмасанг, санарлар коғир...

Не хушки, жаҳондин кечибон кетгайсен,
Манзилга пушаймонсиз агар етгайсен.
Ҳар нечаки айласанг — бугун айла адо,
Чун зартага нотавон қолиб, нетгайсен...

Шул хоки сиёҳдин — то авжи Зуҳал:
Ҳар нечаки мушкулот эрур, этдим ҳал.
Очдим неча занжир занжирни макру ҳиял,
Ечдим неча бир тутун, магар қолди ажал...*

* Жамол Камол таржималари.

Ушбу асарни Ўрта Осиё ва Қозғистон халқлари маданияти тарихини ёритишида унтилмас хизматлар қылган муҳтарам олим Абдуфаттох Расулов (1888—1977) нинг порлоқ хотираларига бағишлайман.

Бухоро

КУТУБХОНА

Шарофатли шаҳарнинг маҳобатли маркази. Қенг майдоннинг кунчиқар тарафида муҳташам арк юксалади. Унинг кўпни кўрган дарвозаси тоғдек қад кўтарган икки муаззам устунга суюнган. Дарвозадан арк ичига тўғри йўл юргурган. У кўп муҳташам хоналар, нақшин иморатлар ёнидан ўтиб аркнинг тўрига боради. Бу ерда бир кўҳна бино бор. Унинг қалин деворлари бой бир хазинани қўриқладилар. Бу хазинада сақланмоқда бўлган давлатнинг қийматини аниқламоққа сонлар етишмайди. Ундаги дуру гавҳарларнинг баҳоси йўқ. Улар тафаккур дурданалари. Бу жавоҳирлар хат ва қофозлар орасида жилоланадилар. Улар қаршисида қимматбаҳо тошлар, ўша тошпарастлар наздида китоблар қанчалик бекадр бўлса, шунчалар беэътибор. Бу бебаҳо бойликлар жамбўлган хазина Бухоро кутубхонаси. Ўнга фақат амир Нуҳ ибн Мансурнинг руҳсати билангина бирор китобхон кирмоғи мумкин. Шунинг учун бу ерга камдан-кам одам келади. Катта сандиқларга авайлаб терилган китоблар ўз ўқувчисига мунтазир. Кутубхона ичидатинчлик хукмрон.

Эрталаб хизматга келган мўйсафид кутубхоначи бу тинчликни бузмоққа андиша қилгандай оҳиста келиб ўз ўрнини эгаллади. У кўрпачага чордана қуриб ўлтирди ва олдидаги мез устида тахланиб турган китоблардан бирини олиб аста варақлай бошлади. Шупайт эшик секин тиқиллади. Кутубхоначи дик этиб

ўрнидан турди ва бориб эшикни очди. Эшик олдида ҳарбий кийимдаги амир мұлозимларидан бири ва ўн етти — ўн саққиз ёшлар чамасидаги, соқол-мұйлаби энди мурт ура бошлаган бир йигитча турар эдилар. Кутубхоначи саломлашиб уларни ичкарига таклиф қилди. Келганлар алик олишди ва кутубхонанинг хизмат залига киришди. Уччовлари күрпача устига ўлтирилар. Кутубхоначи фотиҳа ўқиди. Ҳаммалари қўлларини юзларига олиб бориб омин дедилар. Шундан сўнг мулозим кутубхоначига қараб деди:

— Амир ҳазратларининг фармони олийларига биноан ушбу кундан эътиборан жаноб табиб Ҳусайн ибн Абдуллоҳ Иби Синога кутубхонада мутолаа этмоққа рухсат бўлди. Бундан буён табиб жанобларига нимаики китоб зарур бўлса, танишмоққа ёрдам кўрсатишингиз вожибdir.

Кекса кутубхоначи йигитчага қаради. Ҳусайннинг қирмизи юзи, текис яноқлари, латиф бурни, ғунчадек оғзи ўспирицдик кўркамлигини намойиш этар, бошидаги кичик оқ симобий шоҳи салла, эгнидаги хушбичим озода авра тўн нозик қоматига ярашиб уни безаб турар эди. Кутубхоначининг кўзи Ҳусайннинг кўзи билан учрашди. Ёш табибининг ўтқир нигоҳида шижоат, қатъият, кўнглининг поклиги акс этар, интилиш нурлари чараклар эди.

Кекса куутбхоначи индамай мулозим ва табибга таъзим қилди. Улар яна фотиҳа қилдилар ва ўрциларидан турдилар. Мулозим хайрлашиб хонадан чиқди.

Кутубхоначи Ҳусайнга яна бир бор диққат билан қаради. Демак машҳур табиб деганлари шу йигитча экан-да. Бу мўйсафид хизматчи барча Бухоро халқи қатори Афшонали бир ёш табибининг Бухоро амири Нуҳ ибн Мансурнинг тузалмайдиган сингари бўлиб қолган қасалини даволашга иштирок этиб эътибор қозонганини, бу табибининг ўз хизматининг мукофоти эвазига амир кутубхонасида мутолаа қилишга рухсат сўраганини эшитган эди. Аммо бу қария машҳур табибининг бу қадар ёш эканици тасаввур қилмаган эди. Бу тенгқур йигитчалар ўн йиллаб Бухоройи шариф мадрасаларининг тупроғини ялайдилар. Сўнгра юзтадан биттаси бирор мударрислик даражасига эришса эришадики, бўлмаса ўйқ. Бу бола эса ҳалитдан саройнинг пешқадам табиблари билан баравар даражага етган, Бухоронинг мўътабар олимлари қаторига кирган.

Худо бераман деса шундай бўлар эканда, деб фикр қилар эди кекса хизматчи.

Йкковлари ёлғиз қолишгач кутубхоначи сал ишонқирамай табибдан сўради:

— Амир олий ҳазратлари ўзлари шахсан рухсат қилдиларми ёки вазир ҳазратларининг фармонлари бўлдими?

— Ҳазрат амир ўзлари менинг илтимосимни қондириб рухсат фармойишин бердилар.

— Бу ерда фақат ҳазрати амирнинг олий мақом наасбларигина мутолаа этмоқлари лозим, деб тайинланган эди,— деди кутубхоначи. У ҳамон бу йигитчанинг машҳур табиб Ҳусайн ибн Абдуллоҳ ибн Сино эканига ва амир кутубхонасида китобхонлик қилиш шарафига эга бўлганига ўзини ишонтира олмас эди. Аммо сарой мулозимининг шарпаси кутубхона хизматчисининг эсига тушгандай бўлдию, у дарҳол ўзини қўлга олди. Хизматчи фармойиш ижросидаги сусткашлиқ қандай оғир оқибатларга мубтало қилажагини яхши билар эди.

— Марҳамат қилингиз, ўғлим,— деди мўйсафид ва Ҳусайнни ичкарига бошлади. У китоблар тўла сандиқларининг қопқоғини очиб, Ҳусайнга китобларнинг жойлашиш тартибини кўрсатди, мутолаа учун жой тайинлади, сўнг қайтиб ўз хонасига чиқди.

Ҳусайн кутубхонада китоблар ичida ёлғиз қолди. Китоб дўсти, ҳамиша мутолаага ташна Ҳусайн атрофдаги қават-қават ажойиб китобларни кўргач, ўзини худди тўсатдан ҳолвахонага кириб қолган ёш боладай ҳис этди. Қатор терилган сандиқларнинг қопқоқлари очиқ. Сандиқлар ичи китоб билан лиқ тўла. Ҳар бир сандиқда бор китобларнинг рўйхати мавжуд. Мана тиббиётга оид китоблар. Қадим юонон табибларидан Буқрот (Гиппократ) асарлари, Кичик Осиёда 1 асрда яшаган табиб Дисқуридус (Педаний Диоскорид), II асрда яшаган Пергамлик табиб Жолинус (Клавдий Гален) асарлари, II асрда яшаган Римлик табиблардан Архиген, Троян魯фус, искандаријалик Бавлус (VII аср) асарлари терилиб турибди. Алоҳида сандиқда араб тилидаги тиббий асарлар. Улар ичida устоз Абу Бакр Мұхаммад бин Закарийяр Розий (865—925), Аббосийлар сулоласининг сарой табиби Ибн Мусовайҳ (875 йилда вафот этган), Димишқли Абул Ҳасан Исо бин Ҳаким ад-Димишқий Масиҳ (IX аср) асарлари бор. Яна хрис-

тиан табибларидан Димишқли Настас ибн Журайҳ (Х аср), Бағдодлик Исо ибн Али (IX аср), Исо бин Яҳේ (IX аср), Жолинус асарларини шарҳ өтган Византийлик табиб Стефан (VII аср), ҳинд табиб Чарак Ҳиндиј (1 аср), Яхудий табибларидан Баэрали Ибн Монаржовайҳ (IX аср) ва бошқа кўп тиб олимларининг асарлари бор.

Алоҳида сандиқда фалсафий китоблар, улар ичидаги Арасту, (Аристотель) асарларининг асл нусхалари, уларнинг араб тилига Ибн ал Батрик томонидан қилинган таржималари (IX аср), юнон файласуфларининг Ҳусайн бин Исҳоқ томонидан араб тилига қилинган таржималари: араб тилида ёзган файласуфлар Абу Юсуф Яъқуб бин Исҳоқ ал-Киндиј (вафоти 870 й.) асарлари, Абу Наср Форобий (вафоти 950 й.) ва бошқа улуғ мутафаккирларнинг асарлари бор. Бошқа сандиқларда ҳам бундай китоблар жуда кўп.

Ҳусайн ўша куни кечгача кутубхонада мутолаа билан банд бўлди. Эртаси куни барвақт кутубхонага етиб келиб мутолаани давом эттириди. Шундай қилиб, у ҳар куни муттасил мутолаа билан машғул бўлди. Ў ҳар бир китобни диққат билан ўқиуди, барча асосий ўринларини катта дафтарига қисқача қилиб ёзиб олади. Бутун кун давомида тинимсиз ишлайди, китобдан бошини кўтармайди. Ҳусайннинг бу қадар берилиб ишлаши мўйсафи кутубхоначига ҳам таъсир қилди. Узоқ йиллар давомида бу кутубхонада хизмат қилган, ўз ишига ихлосманд бу ходим Ҳусайн сингари муҳаббат ва қунт билан ўқийдиган китобхонни учратмаган эди. Кутубхоначининг кўнглидаги дастлабки ишонқирамаслик секинаста ўзининг ягона китобхонига ҳурмат ва муҳаббат билан алмашинди.

Бир куни кутубхоначи Ҳусайнга Арастунинг «Метафизика» китобини бошқа сандиқдан топиб берди.

— Мана бу китобни бир ўқиб чиқинг, ўғлим. Кўп ҳузур қиласиз,— деди у Ҳусайнга.

Ҳусайн миннатдорлик билан кутубхоначига таъзим қилди ва қизиқиб китобни унинг қўлидан олди. Кутубхоначи ўз хонасига қайтди.

Ҳусайн «Метафизика»нинг унвон остидаги бошланиш қисмини ўқиди, сўнг дастлабки варақларини кўздан кечирди. Шундан кейин ўз қўли остидаги китобнинг мутолаасини давом эттириди. Тушгача бу ишни туғаллади. Ҳусайн тушдан сўнг «Метафизика»ни астой-

дил ўқишига киришди. У кечгача бу китобни диққат билан ўқиди. Аммо метафизика қоидалари Ҳусайн учун унчалик тушунарди бўлмади. «Толиқибман» деб ўйлади Ҳусайн. «Эртага эрталаб бўлак бошқатдан ўқимофим даркор». Эртаси куни эрталаб кутубхонага келган заҳотиёқ «Метафизика»ни қўлига олди ва уни диққат билан ўқишига киришди. Ҳусайн бутун кунини шу китобни ўқишига бағишилади. Аммо у асарнинг мағзини ҳеч чаقا олмас эди. Ҳусайн бир неча кун давомида Арас-тунинг «Метафизика»сини мутолаа қилди. Аммо унинг ҳикматли сирларини ечишдан ожиз эди. Ёш табиб бу фалсафий асарни ўзлаштиришга тайёр эмас эканига иқорпор бўлди ва бошқа китобларнинг мутолаасини давом эттириди.

Ҳусайн бу кутубхонада шундай китобларни ўқидики, илгари уларнинг ҳатто борлигини ҳам билмас эди. Тинмай мутолаа қилиш натижасида Ҳусайн ҳар бир олимнинг ўз илмида қандай ўрин тутганлигини аниқлади. Ёш олимнинг кўз ўнгида унга тамоман нотаниш бўлган билимлар қасрининг дарвозалари очилгандай бўлди.

Кунбўйи кутубхонада ишлаган Ҳусайн кечга томон уйига қайтди. У енгил овқатланиб озигина дам олди, сўнгра кечки сайдур учун кўчага чиқди.

Бухоро кўчалари одам билан тўла. Кўчаларнинг икки чеккасида турли-туман дўконлар саф тортганлар. Бозори шаб авжида. Ҳар бир дўконда ёруғ шамлар ёнади. Шунинг учун кўчалар кундуздай равшан. Харидорлар ёки шунчалик сайдурга чиққанлар дўконлар ёнида ғуж-ғуж ўралишадилар.

Ҳусайн ўз одатига кўра сайдур чоғида китоб дўкони олдида тўхтади ва дўкондор билан саломлашгач, дўкондаги китобларни бирма-бир кўриб чиқа бошлади. Дўкондор машҳур табиб билан яхши таниш эди. У Ҳусайнга бир китобни кўрсатиб деди:

— Иним, ушбу китобни олингиз. Фалсафага доир. Сиз учун албатта қизиқарлидир.

Ҳусайн кўпроқ тибга доир китобларга аҳамият берётган эди. Шунинг учун дўкондорнинг сўзига унча парво қилмади.

— Мана бир қаранг,— деди дўкондор астойдил — арzon баҳода сотаман. Сиз учун у ниҳоятда фойдали бўлади.

Ҳусайн дўкондорнинг бу китобни арzon баҳода сотмоқчи эканидан бугунги савдонинг касод бўлганини

фаҳмлади ва дўкондорга ёрдам бўлсин деб ўша китобни сотиб олди. Аммо уни ҳатто очиб ҳам кўрмади. Ҳусайн янги олинган китобни қўлида тутганича яна бир оз сайр қилди. Лаби Ҳавузнинг сирли жимирлаган зилол сувларини севиб томоша қилди, расталар бўйлаб бефарқ кезди. Ниҳоят сайдан сал толиққанича уйига қайтди.

Тун. Ҳусайн ибн Абдуллоҳ хонасидағи шамлар ярақлаб ёниб туриптилар. Атлас кўрпача устида ўлтирган Ҳусайн хонтахтага эгилганча лавҳ устидаги китобни ўқиш билан банд. У уйга қайтгач, бугун кечқурун сотиб олган китобни очиб қараса бу китоб Абу Наср Форобийнинг китоби экан. «Муаллимус-соний» («Иккинчи муаллим») деб ном қозонган файласуф Форобий «Муаллимул-аввал» («Биринчи муаллим») Арастунинг «Метафизика» китобига шарҳ ёзган эди. Бу китоб ўша шарҳ экан. Ҳусайн «Метафизика»ни ўқий бериб ёд қилиб юборган, аммо унинг мағзини чақа олмас эди. Энди бу шарҳ орқали Арасту китобининг сирлари ёш Ҳусайнга аён бўлаберди. Уша туни тонг отгунча Ҳусайннинг уйида шамлар ўчмади. Ёш олим Форобийнинг Арасту китобига ёзган шарҳини бошидан охиригача ўқиб тамомлади. Энди Ҳусайн Арастунинг фикрларини тўлашиб англаштириб олган эди.

УСТОЗЛАР

Ҳар бир ёш олим донишманд устозлар тарбиясида шаклланади ва камол топади. Бу жиҳатдан Ҳусайн ибн Абдуллоҳга омад кулиб боқсан эди.

Ҳусайннинг отаси Абдуллоҳ ибн Сино Бухоро ҳукмронлари бўлмиш Сомонийлар сулоласи хизматида бўлган ва анча юқори лавозимни эгаллаган. Абдуллоҳ Бухоро яқинидаги Афшона шаҳарчасида Ситора деган қизга уйланди ва ундан икки ўғил кўрди. Каттаси Ҳусайн, кичиги Маҳмуд. Абдуллоҳ ибн Сино ўз оиласи билан Афшонадан Бухорога 985 йили кўчиб ўтди. Бу вақтда Ҳусайн беш яшар, Маҳмуд эса атиги бир яшар эди. Абдуллоҳ Ибн Сино ўз болаларини яхши ўқитмоқ имконига эга бўлган ва уларни ўқитмоққа катта аҳамият берган.

Ҳусайн ўн яшарлигига «Қуръон»ни ёд олган, адабиёт, тарих, ҳуснинат, тил, нотиқлик, шеър илмларини ўтган. Сўнг Ҳусайн Маҳмуди Массоҳ қўлида ҳинд ҳи-

собини ўрганган. Бу илм арифметиканинг бир бўлати бўлиб, унда алгебра қоидалари ҳам қўлланилар эди. Бундан кейин Ҳусайн И smoil аз-Зоҳидий раҳбарлигида фикҳ (қонуншунослик) илмидан таълим олди. Шундан сўнг Ҳусайннинг отаси Бухорода таниқли бўлган олимлардан бири Абу Абдуллоҳ Нотилийни Ҳусайн учун уй муаллими қилиб олиб келди. Нотилий ёш Ҳусайнга мантиқ, ҳандаса (геометрия) илми нужум (астрономия), фалсафа илмларини ўқита бошлади. Нотилий тиб илмидан ҳам хабардор эди. Бўлажак буюк табибининг биринчи тиб муаллими ҳам Нотилийдир.

Ўқитувчи ва ўқувчи ёз пайтларида Ҳусайнларининг ҳовлиси ортидаги боғда машғулот ўтказишар эди. 12—13 ёшлар атрофидаги Ҳусайн ҳеч ўқишидан чарчамас, билимларни қуёш қизигидаги қақроқ ер сувни ўзига сингдирганидек тез сингдириб олар эди. Билимлар баҳрасидан боланинг тафаккур гунчалари барқ уриб яшнар, унинг фикр гулзорида ижод гуллари хандон очилар эдилар.

Бир куни дарс олдидан Нотилий бир китобни Ҳусайнга кўргазди. Ҳусайн бу китобни қўлига олиб кўра бошлади.

— «Дориворлар»— деб ўқиди китоб сарлавҳасини Ҳусайн, сўнг давом этди:— Муаллифи Диасқуридус.

Китобнинг ҳар бир вараги араб ва юонон ёзувлари-даги иборалар ва текстлар билан тўла. Шогирд бу зич, аммо аниқ ёзувларда устозининг хатини таниди.

— Бу сиз ёзган китоб экан,— деди Ҳусайн Нотилийга.

— Бу китоб устида бир неча йил муттасил ишладим,— деди Нотилий.— Диасқуридуснинг «Дориворлар» китоби юонон тилидан араб тилига таржима қилинган эди. Аммо бу таржимада қусурлар кўп бўлганидан фойдаланмоқ қийин бўлди. Шунинг учун мен бу таржимани бошдан-оёқ таҳрир этиб чиқдим.

— Таржимон ким эди?

— Бағдодли Истифон ибн Басил. Унинг таржимасини Ҳусайн ибн Исҳоқ таҳрир қилган.

— Сўнг бу таржима ва таҳрир Абу Абдуллоҳ Нотилий томонидан Бухорода қайта таҳрирдан ўтказилди,— деб ҳазиломуз хулоса қилди Ҳусайн. Улар кулишди.

— Шу китобни бир ўқиб чиқингиз,— деди Нотилий Ҳусайнга, яна жиддийлик касб этиб,— агар бирор фикр ёки маслаҳат туғилса айтарсиз.

Ҳусайн унинг сўзини инобатга олганлигини билдириб бош эгди. Аммо жавоб бермади. Ўқитувчи ва шогирд ўртасидаги суҳбатнинг бу сўзсиз давоми ўз мазмунига эга эди.

Бир куни Нотилий «Табиий ҳаётнинг узуунлиги тўғрисида» деган китобини келтириб Ҳусайнга ўқишига берди. Ҳусайн бу китобни ўқиб чиқди ва баъзи масалалар изоҳида ўқитувчисининг фикрига қўшилмаслигини айтди. Нотилий эътиroz қилди. Улар ўртасида қисқагина тортишув бўлиб ўтди. Ниҳоят Нотилий Ҳусайннинг келтирган далилларига тан бермоққа мажбур бўлди. Бу тортишув Нотилийга шогирдининг катта қобилият ва билим эгаси эканини яна бир бор намойиш қилди. Ўзи асл олим бўлганидан Нотилий мағлубияти учун қайғурмади, аксинча шогирдининг муваффақиятидан қувонди. Шундан сўнг Нотилий Ҳусайнга ўзининг «Борлиқ ва унинг шаклларининг изоҳи», «Алкимё рисоласи» китобларини келтириб берди. Ҳусайн уларни диққат билан ўқиди. Гарчи бу қитоблар бўйича ҳам баъзи танқидий фикрлар туғилган бўлса-да, Ҳусайн ўқитувчисига оғир ботмаслиги учун айтишга тортинди. Буни Нотилий сезди, лекин сезганлигини шогирдига билдиrmай қўяқолди. Уларнинг ҳозирги суҳбати яна ўқиладиган китоб бўйича баҳслар туғилиши мумкинлигига ишора эди.

Бир куни Нотилий Ҳусайннинг отасига деди.

— Ўғлингиз Ҳусайннинг илмга диди ғоят ўткир. У фақат илмий машғулот билан банд бўлмоғи лозим. Иншоolloҳ, кичик Ҳусайндан буюк бир олим етишиб чиққай. Унинг мўътабар номи билан бирга келгуси авлод фақир ва нотавон муаллими Нотилийни ҳам эслаб юрурлар.

Ҳусайннинг отаси Абдуллоҳ ибн Сино йирик олим Нотилийнинг бу сўзларидан таъсирланди. У гарчи олдин ҳам Ҳусайннинг ўқишига эътибор бериб келаётган бўлса-да, бундан буён яна кўпроқ диққат қила бошлиди. Ота ўғлининг китобга ташналигини сира чекламас, қандай китоб даркор бўлса, доимо топиб берар ёки топмоққа ёрдамлашар эди.

Ёш олим отаси ва устозининг ғамхўрлигига илм боғида ғамхўр боғбонлар парвариш қилаётган ниҳол сингари тез ва соғлом ўсар эди.

Нотилий Ҳусайннинг тиб илмiga айниқса муҳаббати борлигини сезар, ўзи ҳам тиббиётга алоқадор бўлганидан бу қизиқиши кучайтиришга ҳаракат қилар

эди. Ҳусайн тибга оид билимларни осонликча ўзлашти-
рар, шунинг учун унга тиб осон туюлар эди. У тезда
тибнинг асосий қоидаларини мукаммал ўрганди,
ҳатто баъзи беморларни мустақил даволай бош-
лади. Кўп ўтмай Ҳусайн қобилиятли бир табиб сифа-
тида шаклланди.

Нотилий Ҳусайн ибн Абдуллоҳ билан олиб бораёт-
ган машғулотлари интиҳосига етганини англади. Чунки
шогирднинг илмга интилиши шундай зўр, зеҳни
шу қадар ўткир эди, бундан буён унга бошқа муал-
лим даркор. Ҳусайннинг тиб соҳасидаги ана шундай
муалими Бухоро ва бутун Мовароуннаҳрнинг таниқли
табибларидан Абу Мансур ал Ҳасан ибн Нұҳ ал Қум-
рий бўлди. Бу табиб Бухорода туғилиб ўсган, сомоний-
лар саройида табиблик қилган. Ал Қумрий ёшликтан
тиб илмини ҳавас билан ўрганган эди. Чунки унинг
кўнгли одамларга муҳаббат билан тўлиб тошган эди.
Ёш мутафаккир ал Қумрий тибнинг кишиларга энг аниқ
ёрдам беражаги, кишиларнинг чекаётган изтироблари-
ни енгиллатмоғи касалликлардан даволаши туфаили
кўнгил бериб ўрганди. У тиб китобларини ўқиганда
улардан ўзи учун керакли жойларини кўчириб ёзиб
олар эди. Кейинчалик, бу китоблардан йиғиб олинган
маълумотларни ўз табиблик фаолияти давомида йиқ-
қан билимлари билан тўлдириди. Кейинчалик ана шу
маълумотларнинг ҳаммасини йиғиб «Тўла ва исталган
китоб» («Китобулгина ва муна»), ҳамда «Тиб иборала-
рини тушунтириш китоби» («Китобат-танвир фил ис-
тилоҳат аттиббийя») китобларини ёзди.

Ҳусайн ҳозир кексайиб қолган бу машҳур табибининг
дарсларига қатнай бошлади ва ал Қумрийнинг тибга
оид китобларини диққат билан ўқиб чиқди. Бу китоб-
ларда Буқротдан тортиб то ар Розийгача, яъни энг қа-
димий юнон тиббиётидан X аср шарқ тиб илмигача
барча тиб назарияси ва тажрибасига оид билимлар
жамланган эди.

Ал Қумрийнинг «Тўла ва исталган китоб» асарида
кишининг фарқидан (бошининг тепа қисми) то товони-
гача оёғининг энг остки қисми) бўлган аъзоларидаги
касалликларни бирма-бир санаб чиққан, уларни даво-
лаш усулларини кўрсатиб берган. Иккинчи китоби эса
тиб иборалари луғатидир. Унда уч юз элликка яқин
тиббий ибораларга изоҳ берилган.

Бухорода ал Қумрий билан бир вақтда бошқа маш-

ҳур табиблар ҳам яшаганлар. Уларнинг ичидаги энг эътироф қозонгани Абу Бакр Робий ибн Аҳмад ал Аҳоварийни Бухорийдир. «Тибни ўрганувчилар учун қўлланма» («Ҳидоят ул мутааллимийн фит-тибб») асари шу табиб қаламига мансубдир.

Ҳусайннинг табиблик истеъоди шу муҳитда камол топа борди.

Ҳусайн илмларни ўрганиш билан бирга ҳамиша уларни ўз тажрибасида татбиқ ҳам этар эди.

У ҳар куни эрталаб касалларни кўрар, уларга дори дармон берар эди. Ҳусайн кўрган bemorларнинг кўпчилиги ўз дардига шифо топар эдилар. Шу йўсинда ёш қобилиятили табибининг шуҳрати Бухорога ва унинг атрофида ёйила борди.

Беморларни қабул қилиб бўлгандан сўнг Ҳусайн мутолаа билан шуғулланар эди. Бориб-бориб бу тартиб Ҳусайн учун бир умрли иш тартибига айланиб кетди.

АМИРНИНГ ҚАСАЛИ

Баҳор пайти. Бухоро кўчаларини дараҳтларнинг ёш яшил япроқлари безайдилар. Фир-фир эсган шаббода-лар ҳар ёнга ҳаёт нашъасини ёядилар. Баҳор кўркамлигидан диллар роҳатланади. Инсон танаси тиниқ баҳор ҳавосидан нафас олиб ором топади. Табиат қишлиқ уйқусидан уйғонган ва ҳаётбахш чеҳрасини очган бир фурсат.

Эрталаб Ҳусайн ташқари ҳовлида bemorларни қабул қилиб турган пайтида ҳузурига Бухоро амири Нуҳ ибн Мансурнинг одамлари кириб келдилар. Улар Ҳусайнни амир йўқлаётганини айтдилар. Ҳусайн охирги bemorига дори-дармон қилиб бўлиб уни жўнатди ва ўзи амир одамлари билан арк сари йўл олди.

Ҳусайн Бухоро амири Нуҳ ибн Мансурнинг анча вақтдан бери оғир касал эканини эшитган эди. Ҳусайннинг чақирилиши шу боисдан экани унга дарҳол аён бўлди. Аммо олий насаб ва баланд мартабали bemori даволаш анча мураккаб иш.

Саройга етиб келишгач Ҳусайн даставвал сарой табиблари билан учрашди. Улар Ҳусайннинг моҳир табиблик овозаси саройгача етиб келгани ва уни чақирмоқни амирга маслаҳат берганларини айтишди. Ҳусайн сарой табиблари билан bemorнинг аҳволи тўғрисида

маслаҳатлашди. Табиблар амирни даволаш азойимхон ва дуохонларнинг аралашуви туфайли қийин бўлаётганидан нолидилар. Сўнг ҳаммалари бирга амир ҳузуринга кирдилар. Ҳусайн табиблар билан амир ётган уйга кириб келганда, бу шоҳона безаклар билан безатилган, қимматбаҳо гиламлар, шоҳи кўрпалар билан тўла уйнинг димиққан ҳавосидан нафаси бўғилиб кетди.

Амир уйнинг тўрида қават-қават атлас кўрпалар устида оғир нафас олиб ҳаракатсиз ҳолда ётар эди. Унинг ёнида эса бир азойимхон зўр бериб дам солмоқда. Уй исириқ ҳиди билан тўлган.

Сарой табиблари амирнинг аччиқ феълини билгандаридан бирор қатъий тадбир қилишга журъат эта олмаганлар. Улар билан азойимхон, дуохонлар ўртасидаги тортишув амирнинг аралашуви туфайли азойимхонлар фойдасига ҳал бўлган, шунинг учун кейинги кунларда bemорни фақат инс-жинсларни қувламоқчи, унинг жисмидан ёвуз кучлар таъсирини ҳайдамоқчи бўлган дуохонлар «даволамоқда» эдилар. Дори-дармон қilmай фақат куф-суфдан нари ўтмаганлари учун bemорнинг ҳолати тобора оғирлашмоқда эди.

Ҳусайн bemорнинг томир урушини аниқлади, унинг юз-кўзларига диққат билан боқди. Дард зўридан azob чекаётган амир ҳозир ҳар бир давога рози эди. Табиблар ҳаммалари Ҳусайннинг дуохонларни bemордан четлатиш тўғрисидаги таклифини қувватладилар. Амирнинг розилиги билан дуохонларга жавоб берилиб, жўнатилди. Ҳусайннинг таклифи билан хонани шабадала-тилди. Қия очилган равоқ ва эшиклардан баҳорнинг ёқимли ҳавоси уйга эсиб кирди-да, хонадаги дуд ва димиқиши йўқ қилди. Табиблар бамаслаҳат даволашни давом эттиридилар. Берилётган дори-дармонлардан баъзилари Ҳусайннинг маслаҳати билан тўхтатилди. Янги дорилар тайинланди. Парҳезли таом ва ухлатувчи дориларга кўпроқ ўрин бериладиган бўлди. Саломатликни сақламоқ учун асосий шарт: парҳез ва тартиб, уйқу ва тинчлик, бадантарбия.

Амирни оғир аҳволдан қутқариш тадбирлари бир-мунча фурсат давом этди. Барча табиблар бамаслаҳат иш тутар эдилар, лекин кўпинча Ҳусайннинг айтганлари мақбул топилар эди. Секин-секин bemорнинг ҳолатида ўзгариш содир бўла бошлади. Муттасил муолижга на-тижасида унинг танасидаги оғриқлар тўхтади. Иштаҳа пайдо бўлди. Бу эса саломатлик тикланаётганини бил-

дирар эди. Қадимий табиблар айтганларки, иштаҳали бемор иштаҳасиз соғдан тузук. Чунки у соғлигини тиклай, буниси эса соғлигини йўқота боради.

Ҳусайн сарой табиблари билан биргаликда амирни бир ойча парвариш қилди. Ҳаётдан қўйл ювиб қўйған амир аста-секин ҳаётга қайтди. Унинг барча табиблардан, айниқса Ҳусайндан миннатдорлигига чек йўқ эди. Сарой табиблари эса икки хил кайфиятда эдилар. Уларнинг баъзилари бир ёш табибларнинг саройдаги мўътабар табиблар билан баробар, баъзан эса улардан устун келганига рашқ қилдилар. Аммо ҳаммалари азойимхон ва дуохонларга қарши курашда кучли бир иттифоқчи топилганидан мамнун эдилар. Ҳусайннинг ақл-закоси ва табиблик тажрибасининг ортиқ эканига унинг дўстлари ҳам, душманлари ҳам тан бердилар.

Амир соғайиб ўз вазифаларини ўташга киришгандан сўнг барча табибларга мукофотлар берди. Шу фурсатда Ҳусайн билан Бухоро амири Ҳуҳ ибн Мансур ўрталарида бундай мулоқот бўлиб ўтди:

— Сиз — деди амир,—бизга яхши хизмат қилдингиз. Бунинг эвазига қандай мукофот истарсиз? Агар хоҳласангиз Бухоро шариф яқинидаги қишлоқлардан кўнглингиз тилаганини сизга ато этайлик. Ёки шаҳарда ўзингизга яраша кўркам бир иморат бино этиб берайлик. Агар олтин-кумуш десангиз бўйингизга баробар сочамиз.

Ҳусайн Бухоро амири давлати хазиналарининг узоқ ўйлар давомида бешафқат йиғилган солиқлар ва атроф юртларини талаш ҳисобига тўлиб-тошиб кетганини яхши билар ва амирнинг айтганлари осонликча амалга ошмоғига ишонар эди.

— Амир ҳазратларининг марҳаматларидан бениҳоя миннатдордирмен,— деди ёш табиб.— Сиздан бир ўтиним бор, агар рухсати олий бўлса изҳор этсам.

— Айтингиз.

— Алҳамдуиллоҳ, яшамоққа тайин жойим бор, қилган мәҳнатим эвазига куним ўтиб турипти. Бўй барабар олтин-кумуш менга ортиқчадир. Аммо агар бир хазинангиздан тўла истифода этишга рухсат бўлса бу катта мукофот бўлган бўлар эди.

— Қайси биридан?—қизиқиб сўради амир.

— Кутубхонадан,— деди Ҳусайн.— Бу китоблар хазинасининг бойлиги кўпчиликка аён. Аммо ундан фойдаланмоққа кам одам мушарраф бўлган. Агар кутуб-

хонангизда мутолаа қилмоққа рухсати олий берилса мен учун бу foят олий эҳсон бўлур эди.

Амир рухсат қилди. Шундан сўнг Ҳусайн амирнинг мулозими билан кутубхона сари равона бўлган эди.

ДАСТЛАБҚИ АСАРЛАР

Бухорои шариф жаҳонга донғи тараалган илм марказларидан бири. Ҳусайннинг номи шу шаҳарга обрўва шуҳрат бағишилаган зотлар қаторига қўшила борди. У илмга муҳаббати зўр бўлганидан кеча-кундуз қаттиқ меҳнат қилиб бор фанларни чуқур эгаллади. Ҳусайн тиб илмидан ташқари фалсафа, ҳуқуқ, мантиқ, математика, астрономия, шеър илми ва бошқа билимларни ўрганди. Ёш Ҳусайн ўзининг истеъоди ва меҳнат-севарлиги туфайли бу билимлар соҳасида юксак мала-ка касб этди. Айниқса амир Нуҳ ибн Мансур кутубхонасидаги мутолаалар ёш олимнинг билимлар хазинасини жуда бойитди.

Бир куни амир Нуҳ ибн Мансур Ҳусайнни ўз ҳузурига чорлади. Суҳбат асносида амир Ҳусайнга нафсо-ний қувватлар тўғрисида бир китоб ёзмоқни таклиф қилди. Ҳусайн дарҳол бу ишни бажармоққа киришди. Тез фурсатда китоб ёзилиб битди ва Ҳусайн уни амирига топширди. Бу ўн етти яшар олимнинг биринчи асари эди.¹

Бундан кейинги йилларда ҳам Бухорода яшаган пайтида Ҳусайн яна бир неча асарлар ёзган.

Бир куни эрталаб нонуштадан сўнг Ҳусайн кутубхонага отланиб турган эди, уй эшиги секин тиқиллади. Сўнгра эшикни аста очиб баланд бўйли, чўққисоқол, қошлари ўстган, қорамтири тусли бир киши салом бериб кириб келди. Унинг устида оқ авра тўн, бошида катта салла, кўзлари мулойим табассум билан боқади. У Ҳусайннинг қўшниси Абул Ҳасан ал Арудий эди. Абул Ҳасан китобхонликка берилган бир киши бўлиб унчамунча шеър ҳам ёзар, ўзи хушмуомала, ёқимли табиатли киши эди. Абул Ҳасаннинг ёши ва бўйи Ҳусайндан

¹ А. Ирисовнинг хабар беришларича, бу китобнинг бир нусхаси бизгача етиб келган. У 1950 йили «Ҳадийтур — раис» («Бошшлиқ торттиқ») номи билан Қоҳирада нашр этилган. Қаранг: А. Ирисов «Абу Али ибн Сино», Тошкент, «Фан», 1980, с. 50.

гарчи икки баробар баландроқ бўлса-да, кўпчилик қатори у ҳам машҳур табиб ва олим Ҳусайнга тавозе билан муомала қилас әди. Ҳусайн меҳмоннинг саломига алик қайтарди ва уни мез (хонтахта) атрофидаги кўрпачага ўлтиromoққа таклиф қилди. Улар ўлтиришди. Фотиҳа тортилди. Ҳусайн кутубхонага ошиқаётганлигидан Абул Ҳасан билан бемалол суҳбатлашиб ўлтиromoққа фурсати йўқ әди. Меҳмон ҳам буни сезди шекилли, бир икки оғиз такаллуфли сўзлардан сўнг дарров мақсадга кўчди:

— Иним Мулла Ҳусайн,— деди у секингина йўталиб олгач,— бизнинг шеърга муҳаббатимиз ўзларига аён. Аммо шеър назариясидан каминангиз ожизроқдирлар. Арастунинг «Шеърият» асарини кўп мутолаа қилдим, аммо мағзини чақмоққа муюссар бўла олмадим. Сиздан илтимос, ҳам шеър илми, ҳам бошқа илмларга хос билимларни бизга соддароқ услубда ифодалаб бир китоб ёзиб берсангиз.

— Агар бошқа илмлар ҳам бўладиган бўлса унга риёзат (математика) ҳам кирмоғи даркор,— деди Ҳусайн сал жилмайиб... У Абул Ҳасаннинг риёзатга ҳеч уқуви йўқлигини билар ва шунга киноя қилмоқда әди. Абул Ҳасан бу кинояни тушунди ва аста қулиб:

— Хозирча ундан бўлак илмлар тўғрисида бўлса кифоя. Риёзатдан кейинчалик алоҳида таълим олурмиз,— деди.

— Риёзатдан бошқа илмлар мажмуаси бўлар эканда,— деди Ҳусайн яна ҳазиломиз.

Абул Ҳасан маъқуллаб бош силкиди.

— Сиздек покиза тийнат одамнинг илтимосини адо этмоқ шарафли бир ишдир,— деди жуддий йўсунда Ҳусайн ва Абул Ҳасаннинг таклифини қабул қилди.

Ҳусайн бу китоб устида бир йилча ишлади. Барча билимларнинг асосларини ўзида жамлаган бу асарга «Алмажму» («Тўплам») деб сарлавҳа қўйди ва уни Абул Ҳасан ал Арудийга топширди.

Бу ишдан огоҳ бўлган Ҳусайннинг бошқа бир қўшини ҳам ундан китоб ёзиб бернишни илтимос қилиб қолди. Бу киши асли хоразмлик бўлиб номи Абу Бакр ал Барқий әди. У қонуншунослик (фиқҳ) «Қуръон» изоҳлари (тафсир)дан билимдон эди. Ҳусайн Абу Бакр ал Барқийнинг таклифини қабул қилди. У узун қиш кечалари тинмай ишлади ва ниҳоят катта бир асарни

ёзиб битирди. Бу асар қонуншуносликка оид бўлиб номи «Ҳосил ва маҳсул» эди.

Ал Барқийнинг илтимосига кўра Ҳусайн унга яна ахлоққа оид ҳам бир асар ёзиб берди. Унинг номини «Қитоб ал бирр вал исм» («Саховат ва жиноят китоби») деб атади.

Абу Бакр ал Барқий Ҳусайндан бу китобларни мамнуният билан қабул қилиб олди. Аммо у буларни ҳеч кимга, ҳатто Ҳусайннинг ўзига ҳам бермас эди. У ўзининг қўлида ана шундай китоблар борлигини ҳеч кимга билдирилас, ўз иш тажрибасида эса улардаги маълумотлардан тўлиқ истифода этар эди. Одамлар ишнинг моҳиятидан бехабар ал Барқийнинг билимдонлигига танг қолар эдилар. Ал Барқий ўз қўлидаги бу икки китобдан ҳатто нусха кўчиришга ҳам йўл қўймади. Натижада ёш олим Ҳусайн яратган бу дастлабки китоблар асрлар тўзонида беному-нишон йўқ бўлиб кетди.

Ҳусайннинг олимлик шуҳрати Бухородагина эмас, балки бутун Мовароуннаҳр, Хурсон, Эронга ҳам ёйилди, Хоразмга бориб етди.

Бухорода Маъсумий деган бир фақиҳ (қонуншунос) бор эди. Унинг ҳовлисида кўпинча Хоразм савдогарлари карвонининг бошлиғи Мулло Жаъфар қўнади. Улар бир-бирлари билан жуда қадрдондирлар.

Бир ёз фаслида Мулло Жаъфар кеч шом пайти Маъсумийнинг ҳовлисига кириб келди. Икки дўст ташқари ҳовлидаги супа устида кечки овқатдан сўнг узоқ суҳбат қурдилар.

— Ҳусайн ибн Абдуллоҳнинг тиб ва бошқа илмлардаги ажиб ишлари Хоразм олимларига бориб етган,— деди Мулло Жаъфар суҳбатдаги умумий мавзулар туғагач,— мен бу муҳтарам олимга бир нома келтирганман. Уни эртага сизнинг кўмагингиз билан ҳакимнинг ўз қўлларига топширмоғим даркор.

— Билса бўлурмикин, кимдан у мактуб?

— Албатта бўлур. Бунинг ҳеч қандай маҳфийлиги йўқ. Илмга доир ҳар бир гап ҳамиша очиқ-ойдин бўлади. Аммо мактубни ҳаким ўzlари очиб ўқиганларидан сўнггина унинг мазмунидан огоҳ бўлурмиз. Мактубни йўллаган зот Хоразм ва барча олам фозилларининг сарвари Муҳаммад ибн Аҳмад Абу Райҳон Берунийдирлар.

Эртаси куни эрталаб Мулло Жаъфар ва Маъсумий Ҳусайннинг уйига боришиди. Маъсумийни Ҳусайн яхши

танир эди. Улар Ҳусайннинг уйига кириб келишганда ёш табиб бир беморни кўриб бўлиб унга дори ёзиб бераётган эди. Улар саломлашишди. Сўнг табиб беморни жўнатди ва Маъсумий билан Мулло Жаъфарни меҳмонхонага таклиф қилди. Учловлари ташқари ҳовлининг кунботиш томонидаги мўъжазгина хонага ўтдилар. Хонанинг ўртасида кичик бир мез (хонтахта) қўйилган, деворлар остига кўрпачалар солинган. Улар кўрпачаларга ўлтиришди. Фотиҳа тортилди. Дарҳол табибининг хизматчиси келиб дастурхон ёзди. Дастурхон устига нон, қандқурс қўйди, чой ва шарбат келтириб ўлтирганларга қуайиб бериб ўлтирди.

Маъсумий табибга Мулло Жаъфарни таъриф этиб таништириди. Мулло Жаъфар Ҳусайнга бош эгиб таъзим қилди ва мақсадни баён этди. Шундан сўнг у қўйиндан бир кичик рўмолни олиб уни авайлаб очди. Рўмол ичидан кичик бир ўрам чиқди. Мулло Жаъфар таъзим билан ўрамни Ҳусайнга узатди. Ҳусайн уни ҳурмат билан олди ва уни секин очди. Ўрамнинг бош қисмига «Хоразмлик Абу Райҳон, Муҳаммад ибн Аҳмаднинг Буҳороли шайх Абу Али Ҳусайн ибн Абдуллоҳга саволлари» деб ёзилган эди. Бу ёзувнинг кетидан Ҳусайн «Арастунинг «Осмон ҳақида» китобидаги масалаларга доир» деб ёзилган изоҳни ўқиди.

Ҳусайн ўрам ичидаги оқ қофозларга чиройли хат билан ёзилган мактубга тез кўз юргутириб чиқди ва деди:

— Устоз Абу Райҳон Беруний ўн савол йўллабдирлар. Буларнинг жавобини сиз бирла жўнатилгани маъқул. Қарвонингиз қачон Хоразмга қайтур.

— Иншооллоҳ эрта ўтиб индин тонготарда йўлга тушгаймиз.

— Жавобларни мен шу бугун ёзиб қўямен. Агар Мулла Маъсумий уларни ўзларининг хушхатлари билан кўчириб ёзиб берсалар, уни устоз Берунийга ўзингиз элтасиз.

Мулло Жаъфар ва Маъсумий розилик билдиришди. Ӯша куни кечқурун тонг отгунча Ҳусайн ўлтириб Беруний йўллаган ўн саволнинг ҳар бирига муфассал жавоб ёзди. Улуғ олим ва мунажжим Берунийнинг ёш Ҳусайнга ўз бараваридаги олим сифатида эътироф этиб унга нома йўллагани Ҳусайннинг кўнглини фурур билан тўлдириди. Шунинг учун у чарчаганини сезмай илҳом билан меҳнат қилиб саволларга жавоб ёзди. Беруний билан

Хусайн ибн Абдуллоҳ ўртасидаги ёзишмалар ёш Ҳусайнинг олим ва мутафаккир сифатида қозонган шуҳратидан ёрқин бир белги эди.

Эртаси куни эрталаб Ҳусайн Берунийга ёзилган жавобларни хизматчиси орқали Маъсумийнинг уйига жўнатди. У хизматчисига, мактубни шу бугуноқ кўчириб ёзиб карвонбошига топширмоқ кераклигини тайинлагин деб уқдирди, хизмат ҳақини олдиндан тўламоқ учун унга пул ҳам берди.

Тушдан сўнг Ҳусайн яна хизматчисини Маъсумийнинг уйига юбориб вазифанинг бажарилган ё бажарилмаганидан хабар олдирди, ниҳоят Маъсумийнинг хатларни кўчириб бўлдим, деганини эшитгач, хотиржам бўлиб ўз ишлари билан машгул бўлди.

Орадан бир неча кун ўтди. Ҳусайнинг ҳисобига кўра мактуб Хоразмга Абу Райҳон Берунийга етиб борган бўлмоғи керак. Хоразм карвонининг Бухорога келгани тўғрисидаги хабарни эшишиб Ҳусайн дарҳол хизматчисини Маъсумийнинг уйига жўнатди. У Берунийнинг Ҳусайн ёзган жавобларга қандай муносабатда бўлганини билмоққа ошиқар эди. Аммо хизматчи қуруқ қўл билан қайтди. Утган сафар Маъсумий Ҳусайн ёзган жавобларни кўчириб улгурмаган экан. Эндиги карвон билан уларни Хоразмга жўнатар эмиш. Хижолатда қолган Маъсумийнинг Ҳусайнга кўринмоққа юзи йўқ эди. Ҳусайн ундан қаттиқ ранжиди. Аммо Маъсумийга ҳеч қандай танбех қилмади. Лекин ўзи жавобларнинг кечиккани учун Абу Райҳон Беруний қаршисида хижолат чекди. У жавобларнинг кечикиш сабаби ва ўз узрини Берунийга алоҳида мактуб билан хабар қилди. Хоразм карвони эндиги келувида Абу Райҳон Берунийдан Абу Али Ҳусайн ибн Абдуллоҳга яна бир мактуб келтирди. Бу мактубни карвонбоши Мулло Жаъфар ўзи келтириб Ҳусайнга топширди. Беруний ўз хатида «Осмон ҳақида» китоби бўйича юборган саволларига жавобларни олганидан миннатдорчилик билдирган ва бу жавоблар юзасидан ўз фикрларини изҳор қилган эди. Беруний энди Ҳусайнга Арастунинг «Ҳикмат» («Физика») китобига доир саккиз саволини йўллаган.

Ҳусайн улуғ олим Берунийнинг бу диққат-эътиборидан мамнун бўлди. У шу куниёқ саволларга жавоб тайёрлаб ўзи оқقا кўчириди ва Мулло Жаъфарга жўнатди.

Шундай қилиб шарқ ўрта аср фанининг энг улуғ

алломаси хоразмлик Муҳаммад ибн Аҳмад Абу Райҳон Беруний ва бухоролик ёрқин фикрли, буюк истеъдол эгаси ёш табиб ва ҳаким Абу Али Ҳусайн ибн Абдуллоҳ ўрталарида илмий ёзишмалар вужудга келди. Бу ёзишмалар Арастунинг «Осмон ҳақида» ва «Ҳикмат» китобларида масалаларга оид бўлиб жами ўн саккиз савол-жавоблардан иборат.

ВИДО

Иккинчи минг йилликнинг бошланиши Бухоро тарихida кўп таъсирли воқеалар келтириди. Ўнинчи асрда қурилиб, равнақ топиб сўнг нураб қолган сомонийлар ҳокимииятининг биноси ўн биринчи аср арафасида Туркистон томонидан бостириб келган қораҳонийлар зарбалари остида қулаб тушди ва чилпарчин бўлиб кетди. Гарчи сомонийлар ҳокимиияти корчалонларининг зулми Бухоро меҳнаткашининг бошига кўп мусибат келтирган бўлса-да, босқинчиларнинг горатгарчилиги ўлганнинг устига тепган бўлди. Ҳар қадамда талан, зўравонлик, ўлим.

1002 йили Ҳусайннинг отаси ибн Абдуллоҳ вафот этди. Ҳусайн подшоҳ саройи хизматига ўтиб отасининг ўрнига оиласи таъминлаб турмоққа мажбур бўлди. Мамлакатда юз берган кейинги сиёсий ўзгаришлар бу хизматга ҳам чек қўйди.

Ҳусайн ҳали оила құрмаган. Уйда онаси Ситорабону, укаси Маҳмуд учовлари хизматчилари билан яшайдilar.

Бир куни кечки овқатдан сўнг Ҳусайн одатдагидек китоблар мутолаасига киришиш тадорикида эканида унинг хонасига онаси кириб келди. Ҳусайн дарҳол ўрнидан туриб онаси билан саломлашди. Ситорабону қирқ ёшлар атрофида ҳали чеҳрасида гўзаллик нурлари ўчмаган, юлдузи иссиқ аёл эди. Она ҳар иккала ўғлини ҳам жондан ортиқ севар, айниқса Ҳусайннинг илм соҳасидаги ютуқларидан ифтихор қилас, унинг келаjakda буюк олим ва фозил бир зот бўлиб етишмоғини орзу қиласар эди.

Ҳусайн ҳам онасини қаттиқ ҳурмат қилас, ва она муҳаббатига чин фарзандлик садоқати ва муҳаббати билан жавоб қайтарар эди. Аммо уларнинг ҳар иккаласи ҳам шундай назокатли таъб эгаси бўлган киши-

лар эдиларки, ҳеч қачон бу чуқур түйғулар бирор йў-
синда очиқ изҳор топмас эди.

Отанинг вафотидан сўнг Ҳусайнинг ёш бошига
рўзгорнинг оғир юкини кўтариш ташвиши тушиб қол-
ганидан она изтироб чекарди. Ситорабону яхши тикув-
чи бўлганидан ажойиб зардўзи либос ва ашёлар ти-
киб сотар, бу санъаткорона ҳунари орқали тузуккина
даромад қиласр эди. Шу билан она қўлидан келганича
ўғлининг юкини енгиллатишга интиларди. Гарчи рўз-
гор бешиги бирор йўсингда тебраниб турган бўлса-да,
ҳозирги бошбошдоқлик, талон ва харобгарчилик ша-
роитида ёш олимнинг камол топиши қийин. Бунга
зийрак онанинг ақли етади. Шунинг учун у ўғли Ҳу-
сайн билан унинг келажаги тўғрисида жиддий масла-
ҳатлашмоқчи бўлиб юрар эди. Ситорабону жуда ис-
тиҳолали бўлганидан ва ўғлига муҳаббати баландли-
гидан бу суҳбатни кейинга суреб келди. Аммо ҳозир
шундай шароит вужудга келдики, энди бу суҳбатни
кечиктириб бўлмас эди.

Она ва ўғил кўрпача устида бир-бирига рўбарў
ўтиришар эди. Ўғил тавозе билан она қархисида
буш этган.

— Ўғлим,— деди она гап бошлаб, унинг сал бо-
синқи овозида ҳаяжон ва изтироб түйғулари сезилиб
турар эди.— Сиз келажак ишларингиз ва турмушин-
гиз тўғрисида ўйлаб кўрдингизми?

Ҳусайн жавоб қилмади. У онасининг бу саволга
қандай жавобни ўзи кўрсатажагини кутар эди.

— Сиз,— деди она сўзида давом этиб,— бундан
буён Бухорода қолиб илмий ишларингизни давом эт-
дирмогингиз қийин. Бошқа бир тинчроқ мамлакатга
бориб у ерда бехавотирлик билан илму фанда фазлу
камол қараб этмоғингиз даркор кўринадир.

Ҳусайн ўзи ҳам кўпдан бери шу фикрда эди. Аммо
оиланинг аҳволи қандай бўлишидан хавотирланиб бу
фикрини нари суреб келар эди.

— Унда сизларнинг ҳолингиз не кечур?— деди
Ҳусайн.

— Биздан ташвиш чекмангиз. Мен Маҳмудхон
билан отам ҳузурига Афшонага қайтаман. То замона
тинчигунга қадар ўша ерда бўламан. Ундан сўнг ё
оллоҳ, ё раззоқ! Тақдир нимани насиб этган бўлса,
шуни кўрармиз.

Ҳусайн ўйланиб қолди. Замона нотинч. Оиланинг

келажаги ноаниқ. Ҳозир Бухорода содир бўлаётган воқеалар ҳар қандай илм ва фазлни маҳв этажак. Аммо Ҳусайн бирор бошқа ўлкага кетмоқ тўғрисидаги қарорга келмоққа иккиланар эди. Она ўғлидаги шу иккиланишни сезди ва ўз маслаҳатини қатъий таъкидлаб айтди.

Она ўз ўғлининг қаерда бўлса ҳам тирик ва соғ бўлиши, олим ва фозил бўлиб камол топомгини чин юрагидан тилар ва шу мақсад йўлида ҳар қандай қурбонга тайёр эди.

Ситорабонунинг астойдил айтган гаплари Ҳусайнга қаттиқ таъсир қилди. У она маслаҳатини қабул қилди ва Бухородан Хоразмга кетмоққа қарор қилди.

Бир ҳафтадан сўнг шукуҳли ёз тонгида Ҳусайн онаси Ситорабону ва укаси Маҳмуд билан хайр-маъзур қилишди.

Ташқари ҳовлининг ўртасида Ситорабону бўйи онасидан баланд новраста ўғлининг бир елкасига икки кафтини яқинлаштириб улуғифатлик билан фотиҳа ўқиди. Ҳусайн онаси қархисида бош эгди, она ўғлининг пешонасидан аста ўпди ва унга оқ йўл тилади.

Ўғил томоғига тиқилиб келаётган кўзёшини ичига ютди ва ҳўлланган кўзларини яширмоқ мақсадида от устидаги хуржунни тўғрилагандай ҳаракат қилди, сўнг укаси ва хизматчиilar билан хайрлашди ва шахдам отга минди. У қуёш чиқмасдан бурун Бухоронинг кунботар томонидаги дарвозасига етиб бориши ва у ерда Хоразм карвонига қўшилмоғи керак.

Тонг тинчлигини бузиб от одимлари тарақлади. Ҳусайн йўргалаб бораётган от устида яна бир бор қайрилиб уни кузатувчиларга қўлини кўтариб видо ишорати қилди. Бу олимнинг ўз онаси ва диёри билан абадий видолашуви эди.

Хоразм

ГУРГАНЖ ШАҲРИДА

1005 йил. Хоразм пойтахти — Гурганж. Бухоролик табиб ва ҳаким Абу Али Ҳусайн ибн Абдуллоҳ Ибн Сино хоразмшоҳ Али ибн Маъмун хизматида. Эгнига тайласон ёпинган, бошига тахтаул ханак ўраган қорасоқол, қотма юзли йигирма беш яшар Абу Али Ҳусайн ибн Синони бу ерда шайх деб атайдилар. У ўзининг моҳир табиблиги, билимдон олим, фозил арбоб, одоб ва аҳлоқда баркамол инсонлиги билан кўпчиликнинг ҳурмати, баъзиларнинг эса ҳасадини қозонганд. Хоразмшоҳ Али ибн Маъмун ўз даргоҳида бундай улуғ олимнинг хизматда экани шарафидан мамнун.

995 йили Али Ибн Маъмун Жанубий Хоразм давлатининг пойтахти Катни ўз тасарруфига киритди. Қатда ҳукмронлик қилаётган африйилар сулоласига барҳам берди. Шу билан Бутун Хоразм ўлкаси бир давлатга бирлашди. Бу марказлашган давлатнинг пойтахти Гурганж бўлиб қолди. Али Ибн Маъмун хоразмшоҳ унвонини олди. У ўз саройи ва давлатининг эътиборини кўтармоқ учун Мовароунаҳр, Хуросон, Эронзамин ўлкаларининг машҳур олим ва шоирларини жам қилмоқда эди. Гурганжда Абу Саҳл Масиҳий, Абу Райҳон Беруний, Абу Наср ибн Ироқ, Ибн Мисқавейҳ, Абул-Хайр Ҳаммор, Абу Али Ҳусайн ибн Абдуллоҳ ва бошқа кўп улуғ зотлар шулар жумласидандирлар.

Хоразмшоҳнинг вазири ас-Саҳлий маърифатли одам бўлган. У Хоразмшоҳнинг режаларини усталик билан амалга ошириб Гурганжнинг илм-фандаги эътиборини борган сари оширас эди. У олим ва шоирларга доим ёрдам кўрсатар, олимлар учун керакли ашё ва асбобларнинг ҳозирлаб берилишини кузатиб борар эди. Шундай қилиб XI асрнинг бошларида Хоразмда Али ибн Маъмун ҳукмронлиги даврида катта

бир илмий гуруҳ ташкил топди. У тарихда «Маъмун Академияси» номи билан машҳурдир.

Бу ерда илмнинг турли-туман соҳалари бўйича илмий ишлар яратилди. Физика, математика, астрономия, табобат, қонуншунослик, тарих, фалсафа, шеър илми юксалди. Гурганжнинг илмий шуҳрати атроф мамлакатларга ёйилди.

«Маъмун Академияси»даги кўп олимлар қомусчи олимлар эдилар. Улар ўша даврда маълум бўлган барча илмлардан мукаммал билимдан бўлганлар. Шу билан бирга уларнинг ҳар бири ўзининг маҳсус ихтиносига эга бўлиб, бу соҳада унга баробар келадиган бошқа олим топилмас эди. Абу Райҳон Беруний астрономияда, Абу Хаммор математикада, Абу Али Ҳусайн ибн Абдуллоҳ табобатда, Ибн Мискавейҳ тарихшуносликда донг қозонган эдилар.

Яқинда Бухородан келган табиб ва ҳаким Абу Али ибн Абдуллоҳ ибн Синога Гурганжнинг боғкўча маҳаллаларидан ҳовли берилди. Унинг тирикчилиги ва илмий ишларига оид харажатларни қопладиган миқдорда маош тайин қилинди.

Табиб истиқомат қилмоқда бўлган маҳаллага эрта тонгдан ҳар хил bemorlar йигила бошлайдилар. Та-биб уларнинг ҳар биттасини алоҳида-алоҳида кўриб чиқади, дори-дармон тайин қиласди. Беморларни кўриб бўлгач, одатдагидек илмий асарлар устида ишлайди, ўқийди, ёзади. Тушдан кейин хизмат, олимлар суҳбати, илмий мубоҳасалар, кечқурун яна ижод.

Абу Али Ҳусайн ибн Абдуллоҳ ибн Син, ёки қисқачароқ қилиб айтганда Шайх Абу Али бирор соат фурсатини ижод ва илмдан ташқарида сарф этмайди. Шу йўсинда кунлар, ҳафталар, ойлар ўта боради.

БОЗОР

Хоразмшоҳ Али ибн Маъмун ўз шавкатидан мамнун. Даврнинг барча улуғ уламоси унинг даргоҳида жам бўлганлар. Илмий баҳслар, шеърий суҳбатлар, май базми, дилбар рақслар, жонфизо куйлар шоҳ саройида авжида, улар салтанат аҳлига роҳат ва шон багишлайдилар.

Аммо шаҳар билан қаср ҳаёти ўртасидаги фарқ ер билан осмонча. Лой томлар, кесак деворлар билан тўла шаҳарнинг киндиги бозор. Бозор майдонларида

бир томонда дон-дун тўла қоплар хирмон каби уюланган. Қишлоқлардан келган савдочилар бу буюмлар устида тунайдилар. Матолар тўла дўконлар расталарда саф тортганлар. Бозорнинг бошқа майдонида қул савдоси. Бу ерда ёш қизлар, барваста йигитлар, баркамол жувонлар, болалар мол бозорида қўй, мол, от, эчкилар сингари харид қилинадилар. Баланд тимлар остида харидор ниманики тиласа, ҳаммаси мавжуд. Ҳар томонда одам фиж-фиж. Ҳар қадам-ҳар қадамда қаландарлар, гадолар тентирайдилар. Улар ўтган-кетганга пашшалардек ёпириладилар, тилана-тилана кетидан узоқ борадилар. Деҳқонлар бозорга келтирилган нарсаларини сотиб, тушган пулига ҳеч нарса келмасидан тажанг бўлиб раста оралаб кездилар. Ҳарёнда қуллик, қашшоқлик, йўқчиликнинг оғир ҳавоси нафасни бўғади. Муҳтоҷликдан эсини йўқотган баъзи бирорлар наша, кўкнор, шароб билан ўзларини овутмоқчи бўладилар. Чанг туироқ тўзонида рангруйи бўзарган чиркин либосли бангилар дунё ғамидан қутилгандек чекка-чеккада мункайиб қотган ёки бехуш юмалаб ётадилар.

Бошида унча катта бўлмаган оқ салла, эгнида оддийгина чопонли, соч-соқоли мош-гуруч бўла бошланган бир одам индамай бозор бўйлаб кезади. Унинг ёнида қотмадан келган баланд бўйли, қора соқол-мўйлаби ияги ва юқори лабларининг устини аранг қоплаган оддий, кўзга ташланмайдиган кийимли бир йигит аста қадам ташлайди. Иккала ҳамроҳ ўйчанлик билан йўл босадилар. Улар бирор дўконда савдо қилмайдилар, атрофни тўлдирган дўконларда уюлиб ётган молу матоларга қарашмайди. Бу йўловчиларнинг кўзлари одамларда. Мана бозор майдонларидан бирда майда-чўйда нарсалар билан савдо қилувчиларнинг сафи. Улар ерга ўтириб олганлар. Олдиларида турли-туман лаш-лушлар сочилиб ётипти. Чордана қуриб ўлтирган бир қўлли мўйсафид олдидағи латта устида ётган икки-учта занглаған қулф, бир ҳовуч мих, беш-олтита темир-терсакларни бўлак бошқатдан териб чиқмоқда. Нарироқда кўзи оғриқ, хароб кийимли бир хотиннинг олдида ҳеч ким олмайдиган икки-уч кир халта, тандирга нон ёлғанда кийиладиган енг, икки-уч эски дўппи ёйилиб ётипти. Хотиннинг ёнида учтourt ёшли касалванд бола. Ундан нарида устида жулдур латталар илинган, очликдан шишиб кетган бир

гадо тиланиб ўлтиради. Бозорда майиблар, касаллар, бангилар кўп.

Ҳар иккала йўловчи бу ожиз кимсаларнинг ҳолига ачиниб боқадилар. Уларнинг дардкаш назарида бу майибларнинг ҳолини енгиллаштириш ўйи борлиги қарашларидан аён.

Бозордан чиқиб ҳамроҳлар Гурганжнинг катта кўчасига чиқдилар. Йўл усти улар пештоқлари зарҳал нақшлар билан безалган бир дўконга кирдилар. Дўконда баҳмал тўн ва заррин дўппи кийган семиз дўкондор ва унинг икки хизматчиси харидор йўқлигидан бекор ўтирар эдилар. Кирган кишиларни кўрган заҳотиёқ дўкон эгаси сапчиб ўрнидан туриб уларга салом берди ва ҳар иккалаларини ҳам ҳурмат ва хурсандлик билан қарши олди.

— Ассалому алайкум вазир ҳазратлари, қадамларига ҳасанот, хуш келибдилар, марҳабо, марҳабо. Ассалому алайкум табиб ҳазратлари.

Иккала хизматчи турган жойларида кирганларга эгилиб таъзимда қотган эдилар.

Мош-гуруч соқолли киши Хоразмшоҳнинг вазири Абул Ҳасан Аҳмад ибн Муҳаммад ас Саҳлий, унинг ҳамроҳи эса табиб Абу Али Ҳусайн ибн Абдуллоҳ Ибн Сино эдилар.

Кирганлар дўкондорнинг саломига алик бериши. Дўкондор уларни тахта супага таклиф қилди. Учовлари супа устидаги кўрпачаларга ўлтиришди. Фотиҳадан сўнг хизматчилардан бири дастурхон ёзиб нон, ширинлик, чой ва шарбат келтириди.

Вазир дўкон эгасини яхши танир, у билан унчамунча ошнолиги бор эди. Шунинг учун шаҳар кўчалари ва бозорни айланиб бўлгач, озгина ҳордиқ чиқармоқ учун бу дўконга кирган эди.

Вазир дўкон эгасига деди:

— Биз жаноб табиб билан шаҳар аҳволини ҳеч кимга билдирмай кўриб юрибмиз?

— Таассуротлари қандайдир? — эҳтиёткорлик билан сўради дўкондор. Вазир индамади. Дўкондор ўз саволига ўзи жавоб бериб деди:

— Жаноб подшоҳи олам аъло ҳазратлари ва у улуғ зотнинг муборакпаноҳ вазири одилларининг давлатлари кўланкасида фуқаро ҳар қанча шукроналар қиласа оз. Илоҳо шоҳ ҳазратлари ва уларнинг эллар-

вар аркони давлатларининг умрлари узоқ, давлатлари барқарор ва мустадом бўлсин.

— Бу яхши ниятларнинг амалга ошмоғи учун одамларнинг танлари соғ, руҳлари енгил бўлмоғи ва бундай давлатни сақлай билмоқлари даркор,— деди табиб.

— Бу фикрингиз ниҳоятда мақбул,— деди дўкондор.— Аммо саломатлик ҳифзининг қоидалари айтилган китоблар битилса, уларни ўқиб одамлар ўша қоидаларга риоя қилиб саломатлик ҳушвақтлигини сақлай олар эдилар.

— Одамларни саломатликни сақлашга ўргатувчи китоблар озми-кўпми бор,— деди вазир сұхбатга аралашиб.— Аммо баъзилар улардаги қоидаларга риоя қилмай ўз соғлиқларига путур етказадилар. Путур етгач, не қилмоқ керак, қандай қилиб танага ва руҳга ёпишган иллатлардан қутулса бўлади, нималар қилиб бемор ўз соғлиғини тикламоғи мумкин. Ана шу борада китоб ёзилса мақбул бўлар эди.

Вазирнинг кўз ўнгидан бозор майдонларидағи майблар, касаллар, бангилар бирма-бир ўтди. Аслида инсофли, олим ва фозил бу одам ташвиқот, маърифат ёрдамида касалликлар, қашшоқлик ва очликни йўқотса бўлади, деб ишонар: адолатсиз маҳкама эгалари, қаллоб ва фирибгар судхўрлар, бешафқат хўжайнларнинг зулми бу иллатларни туғдиражагини тушунмас эди. У зулм ва ноҳақликнинг заҳарли дарахтини қуритмоқ истар, аммо унинг томирларини эмас, айrim бутоқларини кесмоқ билан уни ўзгартироққа интилар эди.

— Агар шу билан эл соғлиғи сақланадиган бўлса, шундай китоб ёзилгани бўлсин,— деди табиб.

— Инсон ўз сиҳатини сақламоғи учун,— деди вазир,— ҳаво, ҳаммом, озуқа, сув ва турли ичимликлардан тўғри истифода этмоғи керак. Бу ишларда йўл қўйилган хатолар, яна ҳаракатлар, бўшалишлар ва ўзга ишлардаги қусурларнинг тузатилиш усуллари ўша китобда кўрсатилмоғи даркор.

Табиб бу вазифани ўз уҳдасига олганини билдириб вазирга бош эгди.

— Муҳтарам табиб ҳазратлари,— деди дўкондор,— сиҳатни сақлашдаги хатоларнинг оқибати қанчалар мудҳиш эканлигини бошдан кечириб ўтирибмиз. Менинг опам узоқ йиллардирки, сил касалига мубтало

бўлган. Қилинмаган дори-дармон қолмади. Улар фойда ўрнига фақат зарар етказди. Мана ҳозир ҳаммамиз оллоҳнинг иродасига бўйин эгиб қазога ризо бўлиб ўтирибмиз.

Дўкондорнинг овози сал қалтираб кўзларида ёш айланди.

Абу Али Ҳусайн ибн Абдуллоҳ гарчи ҳар куни не-не мажруҳ ва майибларни кўздан кечирса-да, унинг кўзи ва кўнгли инсон бошига тушган баҳтсизликларга ҳеч кўнилмас, у ҳамиша барча дард ва аламларга қарши кураш кайфияти билан тўла эди. Табиб сил касалидан ўлаётган жувоннинг бўздек оқарган юзи ва эти суюгига бориб ёпишган гавдасини кўз ўнгига келтирди. Бозор майдонларидағи оч-яланғоч, касал ва мажруҳлар аҳволидан туғилган оғир таассуротга бу ҳам қўшилди. Эл баҳтсизлиги зангларини оз бўлса-да, кетказмоқ учун ҳали табиблар қанча меҳнатлар қилмоқлари керак!

— Беморнӣ менга бир кўрсатингиз,— деди табиб дўкондорга.

— Марҳаматлари учун ташаккур,— деди дўкондор, дастрўмоли билан кўзларини артиб,— орзуйимиз шу эди. Жаноб вазир ҳазратларининг бу кулбага ташрифи олийлари туфайли эзгу тилагимизнинг ижобат бўлмоғига шукроналар қилурмиз.

Вазир, табиб ва дўкондорнинг суҳбати яна бир оз давом этди. Сўнг меҳмоёнлар дўкондор билан хайрлашиб кўчага чиқдилар ва сарой сари йўл олдилар.

— Маҳкамама эгалари, девон ҳодимлари, қозилар ҳақиқий аҳволни биздан яширадилар, ёлғон хабарлар етказиб шоҳни ва аркони давлатни алдайдилар,— деди вазир Абул Ҳасан ас-Саҳлий йўлда кетаётиб дўсти табиб Абу Али Ҳусайн ибн Абдуллоҳга.— Шунинг учун тоҳо киши билмас шаҳарга тушмоқ, эл аҳволидан шахсан огоҳ бўлиб турмоқ биз учун вожиб, хизмат учун фойдалидир. Хизмат эса эл сиҳати, улуснинг барқарор ва баркамол бўлмоғига қаратилиши шарт. Бу борада сизнинг ёзадиган китобингиз ҳам катта наф етказажак.

Уша куни кечқурун табиб Абу Али Ҳусайн ибн Абдуллоҳ ибн Сино ўзининг вазир Абул Ҳасан Аҳмад ибн Муҳаммад ас-Саҳлий тоншириғига кўра ўйлаган китобини ёзишга киришди. Бир неча муддат ўтиб бу китоб ёзилиб битди. Унинг номи «Дафъи-мизор ал-

кулийа ан албадан ал инсонийа батадорики ан ва хатоат-тадбир» («Тадбирдаги турли хатоликлар туфайли инсон баданида юз берадиган касалликларни кетказиш») деб аталади.

СИЛНИ ДАВОЛАШ

Кузнинг бошланиши. Дараҳтларнинг барглари сарғая бошлаган, лекин ҳазонрезгилик ҳали бошланганча йўқ. Куз гуллари гарчи латофатини сақлаган бўлса-да, одамлар назари уларга тушмайди.

Одатдагидек барвақт турган Абу Али Ҳусайн ибн Абдуллоҳ нонуштадан кейиноқ дарҳол беморларни кўришга киришган. Бу иш ҳар куни икки соатча вақт олади. Охирги беморни кузатиб бўлгач, табиб ичкари ҳовлидаги иш хонасига ўтди ва хонтахта ёнига ўлтириб унинг устида очиқ қолдирилган китобни қўлига олди ва уни тўхтаган жойидан қараб чиқа бошлади. Табиб бир соатча китоб билан танишгач, сал толиқди шекилли, ўрнидан турди ва хонадан чиқиб ташқари ҳовли сари йўл олди. Ташқари ҳовлига чиққа, хизматчи келиб табибга кимнингдир сўраётганини айтди.

— Айт, кирсинлар,— деди табиб. Кўча эшикдан ўрта бўйли, тўла жуссали, оқ салла ва сарғиш авра тўн кийган бир киши кириб кела бошлади. У яқинроқ келгач, табиб дўкондорни таниди. Улар саломлашишди. Дўкондор табибга нотоб опасини кўрсатмоқ мақсадида келганини билдирид. Табиб ва дўкондор биргалашиб бемор ётган ҳовли томонга йўл олдилар.

Улар бир неча кўчаларни босиб ўтиб ниҳоят бир торкўчага кирдилар. Дўкондор табибни устида болохонаси бор дарвозадан олиб ўтиб каттагина бир ҳовлига олиб кирди. Сўнг ҳовлининг икки чеккасидаги қатор уйлардан бирига бошлади.

Мўъжазгина уйнинг тўрида кўрпа-ёстиқ қилиб бир бемор аёл ётипти. Ёши қирқдан ошган, ранги сап-сариқ, нурсиз кўзлари ичига чўкиб кетган, кўрпа остидаги ингичка қомати пилтакаҷдек чўзилган. Беморнинг чеҳрасига ўлим сояси тушган. У оғир нафас олади. Уйда мотам шарпаси кезади. Беморнинг бошида бир кампир пи chir-pi chir дуо ўқиб ўлтирипти. Кампир тоғо олдидағи чойнакдан бир пиёлага чой қуйиб беморнинг лабларига томизади. Бемор тамшаниб-тамшаниб у қатрани ютади. Уйдагилар бемор-

дан умид узганлар. Улар охирги соатни итоат билан кутмоқдалар.

Ҳусайн ибн Абдуллоҳ бемор билан саломлашиб оҳиста унинг ёнига чўқди. Табиб bemorning чўпдек оғзи билагини қўлига олиб томирини ахтариб топди ва уни бир оз вақт ушлаб турди, сўнгра кўрпани кўтариб кўкрагига назар солди. Беморning чўкиб кетган кўкси сезилар-сезилмас кўтарилар, ҳар бир нафас олиш bemorга қанчалик машаққатли экани сезилиб турарди. Табиб касални диққат билан кўриб бўлгач, унинг укасига деди:

— Нотоблик анча ўтиб кетган экан. Йигирма йилча бўлибди. Нега илгарироқ олдини олмадингиз?

— Бошида билолмай қолдик. Қейин кўрилган чоралар эса кор қилмади. Сиз тўғри айтдингиз, бечора опамиз йигирма уч йилдан бери бу дарди бедавонинг азобини чекадилар.

— Сил касалига йўлиққан кишининг ҳоли айниқса кузда оғирлашади. Ҳозир худди шу мавсум келган. Шунинг учун bemorning ҳоли мураккаблашган. Иншооллоҳ, шифо топармиз.

Сўнгра табиб bemorга юзланиб деди:

— Хавотир бўлмангиз. Шифолаймиз. Соғайиб, ҳеч нарсани кўрмагандай бўлиб кетасиз.

Беморning лабида табассумга ўхшаш бир қимирлаш пайдо бўлди, унинг нигоҳида умид бир порлаб яна ўчди.

Ҳусайн ибн Абдуллоҳ хонадан ҳовлига чиқди. Унинг кетидан bemorning укаси — дўкондор ҳам чиқди. Табиб унга қатъий оҳангда деди:

— Мотам тадорикини тўхтатингиз. Тирик одамга аза тутмоқ мумкин эмас. Узингиздаги, айниқса bemordagi умидсизлик кайфияти ўша мудҳиш муҳлатни яқинлаштиради холос.

Шундан сўнг табиб bemorга қандай таомлар бермоқ ва нималар қилмоқ кераклигини муфассал таъкидлаб айтди. Хушҳидли кўк ўтлар, зираворлар билан аралаштирилган таомлар берилсин. Бемор гулларни кўпроқ ҳидласин, тинч ва беҳаракат ётсин. Ҳафалик келтирувчи хабарлар ва гаплар айтилмасин. Бемор ҳар куни жулажўбин (гулқанд) истеъмол этиб турсин. Уни ҳатто нон билан еса ҳам бўлаберади. Қанча кўнгли кўтарса, шунча еяберсин. Яна эчки ва эшак сути ичкизиш керак. Агар янги фарзанд кўрган хотиннинг

суги берилса яна яхши. Ҳусайн ибн Абдуллоҳ уй эгасига яна бошқа дориларни ҳам айтди ва уларни бориб хизматчисидан олмоқни тайинлади.

Сил хотинни даволаш узоқ давом этди. Беморнинг укаси опасига жуда ғамхўр чиқди. У табибининг айтганларини муттасил амалга ошира борди. Беморга у шунча жуланжўбин (гулқанд) топиб келиб егиздики, эшитганлар ишонмаслиги ҳам мумкин. Табиб вақти вақти билан bemornинг аҳволидан хабар олиб турди. У bemornинг ҳолида ўзгариш содир бўлган сари янги янги дори-дармонлар тайинлай борди. Ҳафталар, ойлар шу зайлда кечди. Аста-секин bemornинг ранги очилиб, чеҳрасига тушган ўлим кўланкаси чекина бошлади, қарашларида илиқлик пайдо бўлди. Фойдали таомлар, дори-дармонларни мунтазам қабул қилиш, режимнинг эҳтиётлилиги, атрофидагиларнинг мотамкашлиги эмас, аксинча шифога умид ва ишончи bemorга яхши таъсир қилди. Унда иштаҳа пайдо бўлди, секин-секин танига эт ўна бошлади. Шу йўсинда бир йилча вақт ўтди. Бемор аёл ажал чангалидан қуттилди, секин-аста семира борди ва бора-бора бутунлай соғайиб кетди.

САФАР

Ез оқшоми. Атрофга гира-шира қоронфилик чўккан. Катта боғ ичидаги фавворалар эркин ўйнайди. Чаманчаман очилган гуллар гулзор устини оқ рангли гилам сингари қоплаган. Фир-ғир эсган шаббодалар гулларнинг хуш бўйларини ҳарёнга ёядилар. Катта, тўрт томони очиқ, шиллари ва устунларига ранг-баранг нақшлар ўйилган равоқ. Унинг ўргасида қандилларда шамлар ёнади. Атрофга солинган кўрпачаларда ўлтириб бир гуруҳ одамлар шавқ билан суҳбат қурмоқдалар. Уларнинг ҳаммаси бой безакли жомалар кийган. Кўпларининг олдида китоблар очиқ, баъзиларнинг қўлида қоғоз ва қалам. Бу Хоразмшоҳ қасридаги олимлар анжумани. Анжуман қатнашчилари фалсафа, мантиқ, астрономия, тиб, фикҳ, математика ва бошқа фанлар бўйича баҳс қилмоқдалар. Ҳаммалари билимдонлиқ, ҳозиржавоблик, баҳсадаги маҳорат шуълаларини сочадилар, бир-бирларининг фикрига одоб билан, нафис жумлаларда, ёқимли овозда қатъий эътиroz билди-

радилар. Бу билим, зукколик, юмшоқлик, аммо ўз фикрида сабитқадамлик намойиши.

Шайх Абу Али Ҳусайн ибн Абдуллоҳнинг бугунги тортишувлардаги иштироки суст. У бир чеккада хомуш ўлтирипти. Нима учундир эрталабдан бери улуф табибининг кўнгли ғаш. Сабабини ўзи билмайди. Аммо бундай кайфият қандайдир яқинлашиб келаётган ноҳушликнинг белгиси эканини сезади.

Суҳбат бир меъёрга етиб олимлар озгина танафус қиласидиган бўлишди. Абу Саҳл Масиҳий Шайх Абу Али ҳузурига келиб уни ташқарига таклиф қилди. Ҳар икки олим боққа фавворалар отилиб турган йўлкага чиқиб секин сайд қила бошлишди. Оқшом тунга ўтиб бормоқда. Қоп-қора осмоннинг кўп сонли кўзлари жимир-жимир милтиллайди. Боғда қушлар жарангি фаввора садоларига қўшилиб янграйди. Дим ҳаво сув зарраларини ҳарёнга элтаётган шаббода таъсирида тебрангандай бўлади.

Абу Саҳл Масиҳий ўз суҳбатдошини боғнинг холроқ чеккасига бошлиди. Улар кўз илғамас бир жойга етишганда Масиҳий деди:

— Шайх, сиз ва мен учун жуда муҳим бир хабар бер.

Шайх Абу Али қизиқсинди:

— Не хабар экан?

— Бугун кундузи вазир ас-Саҳлий мени ўз ҳузурларига йўқладилар. У киши айтдиларки, Фазна подшоҳи Йаминуд-давла Султон Маҳмуд Фазнавий Хоразмшоҳга мактуб йўллаганлар. Бу мактубда Султон Маҳмуд Хоразмдаги олимлар ва табибларни ўз даргоҳида кўрмоқни истаганини ёзган. Шунинг учун яқин кунларда ҳаммамиз Фазнага жўнашимиз керак бўлар. Лекин бу мактубни келтираётган элчи ҳали Хоразмшоҳ ҳузурида бўлганича йўқ. Уни шоҳ эртага қабул этадилар. Менинг шахсан Султон Маҳмуд ҳузурига бормоқ ниятим йўқ. Чунки мусулмон дунёсининг фотиҳ султони билан бир бечора христиан олими ўртасида дўстлик бўлмас. Шунинг учун мен шу тундаёқ Хоразмдан кетмоқчиман. Шу гаплардан сизни огоҳ этмоқ мақсадида бу ерга чорладим.

Шайх Абу Али ўйланиб қолди. У Султон Маҳмуд Фазнавий тўғрисида кўп нарса эшитган. Султоннинг ислом байроғи остида тутган йўли илм ва ҳур фикриликка зид экани унга аён. Айниқса қарматларга

султоннинг ашаддий душман экани маълум. Бир умр шундай мустабид подшоҳга тобе бўлмоқ олим учун қанчалар мушкил бўлажаги аниқ. Бир оз тараддудан сўнг Шайх Абу Али суҳбатдоши ал-Масиҳийга деди:

— Мени Хоразмда боғлаб турган бирор илинжим йўқ. Оила, бола-чақаларим ҳам йўқ. Ёлизман. Шунинг учун Султон Маҳмуд қўлидаги бандаликдан кўра эркин дарбадарлик мен учун афзал. Қаердаки, инсонлар яшаса, табиб уларга керак. Шунинг учун мен ҳам сиз билан бирга кетганим бўлсин.

Икки олим шу кечасиёқ Хоразмдан Журжон сари йўл олмоққа жазм қилдилар.

Боғдан чиқиб Шайх Абу Али ўз ҳовлисига жўнади. У сафар тадорикини кўриши лозим. Ал-Масиҳий эса бу қарордан вазир ас-Саҳлийни огоҳ этиб сўнг Шайх ҳузурига келади. Улар тонготарда йўлга чиқадилар.

Уша кечаси Хоразм осмонида тонг нурлари жило бермасдан бурун уч туядан иборат кичик бир карвон Гурганж шаҳрининг жанубий дарвозасидан чиқиб кетди. Вазир ас-Саҳлий маҳсус тайинлаган йўл бошловчи бу карвонни шаҳардан чиқариб юбориш тўғрисидаги фармонни дарвозабонларга етказган ва йўлчиларни ўзи бошлаб олиб кетмоқда эди. Уч тия Гурганждан анча узоқлашганларида фалакда субҳи козиб ўрнини субҳи содиқ эгаллади. Олдин осмонда суст ёруғлик пайдо бўлди. Сўнг бу ёруғликнинг ўчмас манбаи секин-секин юз кўрсата борди. Сўнг унинг чеҳрасидан таралган ёрқин нурлар Хоразм ўлкасини бошдан-оёқ чулғади. Тонг отди.

Гурганждаги шоҳ қасрида Султон Маҳмуднинг элчиси Хоразмшоҳ Маъмун ибн Маъмунга ўз подшоҳининг Хоразмдаги олимларни Фазнага жўнатмоқ тўғрисидаги номасини топшираётган вақтда Шайх Абу Али ва ал-Масиҳий Қорақум саҳросининг Султон Маҳмуд қўли етмайдиган қаърига чўмиб кетган эдилар. Сафарнинг биринчи куни тинч ўтди. Иккинчи куни ҳам одатдагидек кечмоқда. Қуёш тиккага келган. Атрофда аҳёнда бир ғуж саксувуллар кўриниб қолади. Йўлни кесиб катта калтакесаклар чопадилар. Бешисоб қум ўюмлари туяларнинг оёғи остида уваланади. Қажавалар бир меъёрда тебранадилар. Йўлбошловчи ишонч билан ўз тусинни дадил ҳайдайди. Ҳаво ҳаддан ташқари иссиқ. Осмон очиқ. Ҳар тараф ёп-

ўруғ. Бундай ҳавода карвон йўлдан адашмайди. Туш пайти сафарчилар тўхтаб бир туп катта саксовул соясида озгина овқатланиб олиши ва ҳордиқ чиқаришиди. Туялар ҳам ерга чўкиб озгина дам олгандай бўлдилар. Кун тикдан оғиб гарб томонга ёнбошлай бошлигандан карвон қўзғалди. Агар шундай қулай ҳаво бўлиб турса сафарчилар икки ҳафта орасида кўзлаган манзилларига етиб оладилар.

Кун муҳит сари оға бошласа, ўз қадамини тезлаштиради. Қуёш секин-секин улкан бир кулчага айлана борди ва бу кулча тезда ер курраси ортига чўкиб кетди. Атрофни қоронғилик боса бошлади. Саҳро усти оз фурсатда зим-зиё қора чодир билан қопланди. Осмонда милт этган юлдуз кўринмайди. Ҳаммаёқ тимқора. Худди ер билан осмон қўшилиб кетгандай. Вақт ярим кечага яқинлашиди. Карвон бир саксовулзор яқинида тўхтади. Туялар ерга бағирларини бериб мудрайдилар. Уч ҳамроҳ туялар биқинида солинган кигизларга ёнбошлаганлар. Шу пайт секин эсаётган шамол кучая бориб қаттиқ бўронга айланиб кетди. Бу Қорақум самуми. Саҳродаги ёлғиз йўлчилар учун бундан оғир бебахтлик бўлмайди. Шамол зўридан қумтепалар югура бошладилар. Йўлчилар ўринларидан турдилар. Улар туяларни ҳам турғаздилар. Агар кишилар ҳаракатда бўлмаса, уларни дарҳол қум кўмиб ташлайди. Қарвон йўлга отланди. Атрофда ҳеч нарса кўринмайди. Мўлжал бутунлай йўқ. Ал-Масиҳий кундузи иссиқ тобидан анча бўшашиб қолган эди. Унинг юраги қаттиқ санчар, ўзи беҳол, танасини совуқ тер босиб кетган. Шайх Абу Али ҳамроҳини кечқурун бир оз муолижа қилмоқ нияти бор эди. Аммо тунги самум уларни гангитиб қўйди. Бемор ал-Масиҳий кажава устида зўрға ўлтирав, шамол кажавани иргитиб ташлагудай тебратар эди. Йўлчилар йўлдан адашдилар. Минг азоб-уқубат билан ҳамроҳлар тунни ҳаракатда ўтказдилар. Ниҳоят тонг ёришгандай бўла бошлади, самум секин-аста босилди. Қуёш чиқди. Адашган, туни билан тентираб чиқиб толиққан уч ҳамроҳ Қорақумнинг қоқ ўртасида қай томонга боришини билмай сарсон эди. Ал-Масиҳийнинг ҳоли ёмон эди. У ҳамроҳларини тўхтатмоққа таклиф қилди. Учловлари бир саксовулзор ичидаги тўхтадилар. Кун тиккага келган, ҳаво ғоят қизиган бир пайт. Ҳамроҳлар ал-Масиҳийни саксовулнинг ҷала соясига ётқиздилар. Бемор гоҳо беҳуш,

гоҳо ҳушига келар, кўзи юмуқ эди. Шайх Абу Али унинг лабларига сув томизди. Бемор ҳатто шу сув қатраларини юта ҳам олмас, унинг ёпиқ лабларидан сув четга оқар эди. Шу ҳолда бечора ал-Масиҳий ҳамроҳлари билан видолашиб абадийлик дунёсига ўтди.

Шайх Абу Али ва йўлбошловчи марҳумни шу ерда қум остига кўмдилар. Шайх фотиҳа ўқиди. Бир оз вақт ўтгач, қолган икки сафарчи йўлга равона бўлишди.

Бошқа кунлар тинч ўтди. Гўё саҳро самуми ал-Масиҳийнинг жонини олмоқ учун қўзғалган экан. Йўлдан адашган кичик карvon Журжон қолиб қетиб унинг тескари томонидаги Нисо шаҳаридан чиқди. Шайх Абу Али бу ерда йўлбошловчининг хизмат ҳақини тўлаб, уни ризо қилиб Хоразмга қайтарди.

Нисода бир оз вақт яшагач, бу ерда унчалик иши юришмаган табиб Нисодан Обивардга, ундан Тусга, ундан Шиққон, Саманқон Жожурм деган жойларга кўчиб ўтди. Аммо бу ерларда у ўйлагандек тинликтопилмади, муқим яшай олмади. Шайх, ниҳоят, орзу қилган манзил — Журжонга етиб келди. У Журжон подшоҳи Амир Қобус хизматида бўлмоқни ният қилган эди. Аммо у келган вақтдан сал илгари Журжонда исён бўлиб Қобус исёнчилар томонидан бир қалъага қамаб қўйилган экан, ўша қалъада амир дунёдан ўтди. Табиб Деҳистонга кетди. Ҳаммада ҳам иссиқ жон. Табиб ҳам шулар қатори. Деҳистонда Шайх Абу Али қаттиқ касал бўлиб қолди. Бегона шаҳар. Ҳеч бир яқин одам йўқ. Улуғ олим ғариблиқ, ёлғизлик аламини шунда айниқса чекди. Аҳволи тузук бўлга, Шайх яна Журжонга қайтди. «Ё шаҳри азимда бўл, ё кўхи баландда» («Ё катта шаҳарда, ё баланд тоғ устида яшагин») деганлар. Дарбадарлик, ғариблиқ бу улуғ инсоннинг ҳам кўнглига раҳна солган эди. «Мен улуғ бўлганимда кенг шаҳар ҳам сиғдиролмай қолди, қимматим ошганда харидорсиз қолдим» деб таассуф ва ғамгинлик билан кўнглидан кечирад эди улуғ табиб. Аммо ҳаёт ҳамиша ҳам бешафқат бўла бермайди. Ойнинг ўн беши қоронғи бўлса, ўн беши ойдиндир. Шайх Абу Али учун ҳам ойдин кечалар ва ёруғ кунлар келади. Унинг учун ана шундай кун ва тун хотиржам илм билан шуғулланмоқ, bemorlarning дардига даво қилмоқ, мазлумларнинг бошини силамоқ, шогирдларига илм ўргатмоқ инсониятга холис хизмат қилмоқ

учун керак. Олим ва табибнинг кўнглида шу олий мақсадлардан бўлак интилиш йўқ.

Шайх Абу Али Журжонда бир оз муқим яшади. Бу ерда унга Абу Убайд ал-Жузжоний келиб қўшилди. Илм ташнаси Абу Убайд улуғ табиб ва мутафаккир Шайх Абу Али Ҳусайн ибн Абдуллоҳ ибн Синонинг олимлик ва фозиллик шуҳратини эшитиб унда дарс олмоқни орзу қиласар эди. Олимнинг Журжонда эканини эшитиб Абу Убайд бу шаҳарга етиб келди ва олимга шогирд ва садоқатли дўст бўлиш шарафига эришди. Кейинчалик Абу Убайд Жузжоний улуғ табиб билан ҳамиша ҳамдам ва ҳамнафас бўлди. Уларнинг дўстлиги ва ҳамдамлиги йигирма беш йил, то Шайхнинг вафотига қадар давом этди.

Шайх Абу Алининг таржимаи ҳолини Абу Убайд устозининг ўз тилидан ёзиб олган. Устознинг вафотидан сўнг Абу Убайд Жузжоний бу таржимаи ҳолни (у Журжонга келиш билан тугалланган эди) ўз кўзи билан кўргаҳ ва билган Шайх ҳаётига оид далилларни киритиб тўлдирган.

Улуғ табиб ва мутафаккир Абу Али Ҳусайн ибн Абдуллоҳнинг бутун ҳаёт йўли билан изчилини танишмомиз, унинг ёзган асарлари тўғрисидаги тасаввуримиз устознинг ана шу садоқатли шогирди Абу Убайд Жузжоний яратиб қолдирган «Таржимаи ҳол» туфайлидир. Шунинг учун ҳар иккала улуғ зотнинг номи ҳамиша биргаликда тилга олиниб келади.

Журжон, Жабал, Рай

ЗАРРИН ГИС ВА УНИНГ ДУГОНАЛАРИ

«Заррин гис»нинг маъноси «олтин соч» демакдир. Бу тиллоранг сочли қиз Журжоннинг марҳум ҳукмдори Қобус ибн Вушмагирнинг қизи (Ҳозирги подшоҳ Манучеҳрнинг синглиси). У Қобуснинг бошида ярақлаган юлдузи, фахру ифтихори, севикли фарзанди эди. Шоиртабият подшоҳ Қобуснинг қаҳри қаттиқ, ҳукмлари кескин бўлган. Унинг зулмидан эл инграр эди. Агар бу подшоҳнинг табиатида бирор даража юмшоқлик уруғи бўлса, ана шу қизини кўрганда ўша уруғ кўкарап эди. Бундай пайтда қизига бўлган муҳаббати подшоҳ кўнглидаги зулм чақинларини ўчирад, шоирона руҳини ҳаракатга келтиради. Эҳтимол, шу гўзал ўзи сезмаган ҳолда неча-неча мазлумларга чиқарилиши мумкин бўлган ўлим фармойишларини тўхтатиб қолдиргандир.

Заррин гис ўн тўқиз ёшда. Унинг вужуди газаллардаги маҳбубалар тасвирига монанд. Сарғиши зулфи остида саф тортган қийғос қошлар, сузилган нигоҳ билан боқувчи шаҳло кўзлар, ханжардек саф тортган қора мужгонлар ақлни вайрон қиласидар. Лаълдек қип-қизил ғунча лаблари ортида гавҳартишлар қатори беркинган. Табассум пайтида улар ўринча мўралайдилар. Заррин гиснинг қомати сарв ниҳолини эслатади. У шўх силкиниб қадам ташласа, хиромига маҳлиё бўлиб бирор жон ундан кўз уза олмайди. Қизнинг бутун борлиги кўнгилларни мафтун этувчи фусункор гўзаллик билан чулғонган.

Шайх Абу Али Журжондаги илм ва олимларнинг дўсти ва мухлиси Абу Муҳаммад аш-Шерозий совға қилган ҳовлида яшайди. Абу Алиниң ҳовлиси Абу Муҳаммаднинг ҳовлисига ёнма-ён.

Бу пайтда Журжонда беморлар жуда кўпайиб кетган эди. Табиб ҳар куни эрталаб bemорларни кўриб уларга дори-дармонлар тайинлади. Шайх Абу Али

кўрган беморларнинг кўпи шифо топиб соғайиб кетадилар. Шу туфайли Журжонда ҳам, бошқа шаҳарлардаги каби моҳир табибининг шуҳрати тез ёйилди. Тоза ҳаво бўғиқ муҳитни мусаффо қилганидек мўъжизакор табибининг шифобахш даволари шаҳардан беморлик дудларини ҳайдаб юборар эди.

Журжоннинг ҳозирги подшоҳи Манучеҳрнинг синглиси малика Заррин гиснинг энг яқин бир дугонаси бор эди. Улар бир-бирларидан сира ажралмас, бир-бирлари билан сирдош ва жуда иттифоқ әдилар. Маликанинг дугонаси бир куни ўзини нотоб ҳис қилиди. Унинг ўқтин-ўқтин юраги санчар, ранглари оқариб, нафас олиши оғирлашиб қолар эди. Заррин гис ўртоғига машҳур табиб Шайх Абу Алига кўринмоқни маслаҳат берди.

Ез. Шаҳар эрталаб, ҳали кундузги иссиқ бошланмасдан бурун кун тадорикини кўрмоққа тушган. Дўконлар очиқ. Одатдагидек Шайх Абу Али ҳовлисининг олдида беморлар қатор. Табиб беморларни бирма-бир кўради, Абу Убайд Жузжоний табибининг айтганларини ёзиб боради, дори қофозларини ҳам у ёзиб беради. Шу пайт саройдан келган хабарчи табибни малика Заррин гис йўқлаётгани тўғрисида хабар келтириди. Табиб беморларни кўришни тугаллагач Жузжоний билан бирга сарой сари йўл өлди.

Малиқанинг шоҳона нақшлар билан безалган хонаси. Деворларда заррин безаклар. Хона сатҳига гулдор гиламлар тўшалган.

Табиб ва унинг шогирди хонага кириб келганларида бу ерда Заррин гис ва унинг бемор дугонасидан бўлак ҳеч ким йўқ эди. Абу Али ва Абу Убайд салом берицди. Кизлар уларга одоб билан алиқ қайтардилар. Табиб бемор яқинига келди ва унинг ёнига чўкиб беморнинг қўлини ушлади ва томир тепишини тинглай бошлади. Шогирдӣ зарур нарсаларни тайёрлаб турди. Озгина давом этган тадбирлар вақти тўрттала кўнгилда ҳам хилма-хил ҳаяжонли туйғуларни уйғотган фурсат бўлди.

Уттиз икки-үттиз уч ёшлардаги табиб Шайх Абу Али ўзининг йигитлик шуури, инсоний гўзаллиги, ақл, фаросати, одобдаги камолоти билан ҳар бир аёл кўнглига ғулғула солгудек эди. Ўн тўққиз яшар малика Заррин гиснинг офтоб жамоли, оловли, жилвакор нигоҳлари эса ҳар қандай сипо кўнгилни ҳам ҳашак

сингари куйдириб юборади. Абу Али Заррин гиснинг мафтункор гўзаллигини унга кўзи тушган заҳотиёқ бор вужуди билан ҳис этди ва чин юрагидан унинг асири бўлиб бош эгди. Қиз ҳам табибга қандай таъсир кўрсатганини дарҳол фаҳмлади ва бундан мамнун эди.

Абу Убайд эса маликанинг дугонасига боқар экан, унинг латофатига маҳлиё бўлди. Қизнинг тимқора қош ва киприклари қорарайхон каби соchlарига уйғун, оқ чехраси устидаги бир қора нуқтадек хол эса марварид тишлар кўринганида тикилиб олишни мўлжаллаган ўғридек лаъл лаблар ёнида жойлашган.

— Беморнинг аҳволи оғир эмас, иншооллоҳ, тезда соғайиб кетадилар,— деди табиб Шайх Абу Али bemорни яхшилаб қараб чиққандан сўнг. У Заррин гисга қараб бериладиган дориларни айтди. Абу Убайд бу айтилганларни камоли диққат билан қоғозга ёзди, айтилган дориларни ўз халтасидан олиб бирма-бир ажратди ва малика ҳозиргина чақирган хизматчи аёлга узатди.

— Жаноб табибдан илтимосдирки, то нотоблик барҳам топгунгача келиб боҳабар бўлиб турсалар,— деди Заррин гис.

— Бениҳоя мамнуният билан,— деди Абу Али маликага қараб.— Айтганларингиз лозимидан ортиқ даражада адо этилажак.

Заррин гис Абу Алига қараб ёқимли жилмайди. Бемор қизнинг гўзал чехрасида ҳам табассум пайдо бўлди. У Абу Убайд Жузжонийга ҳам табассум қилди.

Табиб ва унинг шогирди хайрлашиб хонадан чиқдилар. Улар икковлари ҳам бир сўз демай жим кетар эдилар. Шайх Абу Алининг кўз ўнгида Заррин гиснинг порлоқ сиймоси акс этар эди. Абу Убайд Жузжоний эса маликанинг дугонасига кўнгил бериб маҳлиё бўлганди.

Ҳар иккала ғоят нозик фикрли ва серандиша одам бир-бирининг кўнглида нима бўлаётганини сезар эдилар. Аммо бу тўғрида улар бир-бирига ҳам, бошқа ҳеч кимга ҳеч қаҷон бир сўз демаяжаклар.

Табиб ва шогирди эртаси куни ҳам саройга келиб bemордан хабар олдилар. Қизнинг нотоблиги ҳеч қандай жиддий bemорликка ўҳшамас, у одатда ҳар кимда ҳам юз берадиган умумий беҳоллик эди. Бари бир табиб бу ҳолатни тамомийла барҳам этгунча муолижа қилди.

Тўрттала қалбнинг бир-бирига бўлган жозибаси ҳам кундалик қатновни тақозо қиласи эди. Заррин гис сари отланиш фикрининг ўзи Абу Али қалбидан бир шодлик уйғотар: у ана шу фурсатни бетоқатлик билан кутар эди. Абу Убайд ҳам ўша даргоҳ сари ошиқар, муолижа пайтида эса ғоят катта диққат эътибор, ғамхўрлик кўргизарди. Қизлар эса табиб ва шогирдининг кўнглида нелар кечаетганини аллақачон сезган, шу сабабдан бу иштиёқни авж олдирмоқ учун ўзларининг бор фусункорликларини ишга солар эдилар.

Заррин гисга машҳур табиб Шайх Абу Алининг унга нисбатан ҳис-туйғулари ёқиб тушар эди. Айёр қиз имкон борича бу туйғуларни севги йўлига йўлламоққа ҳаракат қиласи эди. Шунинг учун у ҳар сафар табибининг келишига янги хил либос ва безакларда бекиёс чиройига янгича жилолар бериб намоён бўлар, олимнинг кўнглига яқин бўлган илмий мавзуларда суҳбат қурав эди. Ҳар учрашганда бу ёш фитнакор Абу Али кўнглидаги ғулгула ошиб бораётганини сезар ва ўз муваффақиятидан мамнун бўлиб борган сари фаол ва ҳужумкорлик билан иш тутар эди.

Абу Али Заррин гиснинг латофати, гўзаллигига дил боғлади, унинг ёрқин сиймосини ҳамиша кўз ўнгига тутди. Аммо оқил ва фозил олим ўзининг бутун ирода қувватини сафарбар қилиб бу дил боғланнишининг ечилмас ишқ тугунига айланиб кетмаслигига ҳаракат қилди. Чунки мусоғир, дарбадар, кимсасиз табиб ва подшоҳ Қобуснинг севикли қизи, Манучеҳрнинг синглиси ўртасидаги севги илдизи баҳтсизлик замирида ўрнашгани аниқ. Яна табиб малика қизнинг кўнглида не борлигини билмайди. Унинг қалбидаги туйғулар ёшлик ўйноқилиги, бекарор юракнинг мақсадсиз талпинишлари эмасмикин? Ҳарҳолда Абу Али бу гўзал ва покиза вужудга бефарқ эмас, балки унинг фусункорлик домига жуда яқин келган, лекин ҳушёр сайд эди.

Заррин гиснинг дугонасиям ўз нотоблиги чекингани сари ўйчанроқ бўлиб қолди. Чунки у тамом тузалиб кетгач, бу учрашувларга чек етади. Унда машҳур табибининг бу кўркам, юлдузи иссиқ, одобли ва камгап шогирди билан қаерда ва қандай қилиб кўришмоқ мумкин бўлади? Жузжонийнинг олижаноб сиймоси, юмшоқ ва покиза қалби қизни ўзига маҳкам боялаб

олган эди. Йигит эса уни кўрган заҳоти маҳлиё бўлган, қиз буни аллақачон пайқаган эди.

Бемор бутунлай соғайиб кетди. Табиб ва унинг шогирди энди бу икки гўзал ҳузурига қатнамоқ саодатидан маҳрум бўлдилар. Абу Али буни яхшиликка йўйди. Кўздан йироқ, кўнгилдан йироқ. Бу узилиш Абу Али юрагида секин-секин ёна бошлаган ўтнинг устига сув пуркагандай таъсир кўрсатди. Абу Убайдга эса аксинча. Айрилиқ шамоли йигит қалбida тутаб ётган оловни ловиллатиб ёндириб юборди. Бечора ошиқ бу олов тобида тўлғанар, севгилисини соғиниб ёдлар, дардини пинҳон сақлаб тоқатсизланар эди.

Бир куни эрталаб bemорларни кўриш тугагач, устоз ва шогирд илмий машғулотга киришдилар. Жузжоний Батлимус (Птоломей)нинг «Алмажастий» китобини олиб уни ўқишга ҳозирланди. Жузжоний бу астрономияга оид асарни ўқир, устоз унинг муҳим жойларини шарҳлаб берар, шогирд эса ўша шарҳларни алоҳида дафтарга ёзиб борар эди. Жузжоний ўқий бошлади. Сўз жуғрофий узунликлар тўғрисида борар эди. Шайх бу тўғридаги шарҳини айта бошлади:

— Турли узунликларни аниқламоқ учун Ойнинг энг юқори кўтарилиган ўрнини олмоқ керак. Бунинг учун эса кузатилмоқда бўлган жойнинг меридиани асос бўлади. Яъни Ой ана шу ўринда энг юқорига кўтарилиган бўлиши лозим. Сўнгра узунлиги аниқ бўлган жой учун тузилган жадваллар ёрдамида ушбу қидирилмоқда бўлган жой узунлигини ҳисоблаб топса бўлади.

— Пайпаслаб-пайпаслаб топилар экан-да,— Жузжоний ёза туриб ҳазиломуз луқма қилди.

— Фақат илмий асосда пайпасланилади, кўр-кўрона эмас,— деди устоз унга жавобан.

Машғулот бир неча фурсат давом этди. Уни тугатишгандан сўнг Шайх саройдаги олимлар билан учрашмоқча отланди. Жузжоний эса уйда ёлғиз қолиб ёзганларини оққа кўчира бошлади.

КУТИЛМАГАН УЧРАШУВ

Машғулот хонаси холи. Унинг қалин деворлари тинликни маҳкам сақлайдилар. Қуёш ҳовлининг нариги томонига ўтганидан бу хона унчалик ёруғ эмас.

Жузжоний хонтахтани дераза қаршисига кўчирди ва унинг ёнига ўтирганича эгилиб шарҳларни кўчириб ёзмоққа давом этди.

Шу пайт хизматчи кириб бир бемор аёл келганини хабар қилди. Жузжоний ўрнидан туриб беморлар кўриладиган хонага чиқди. Хонанинг кираберишида устига боши орқали ридо (ёпинғич) ёпган нозик ниҳолдек бир аёл турар эди. Йигит хонага киргандан сўнг аёл ёпинган ридосини очиб юзини кўрсатди.

Жузжонийни титроқ босиб кетди. Унинг рўбарўсида маликанинг дугонаси турар эди. Қизнинг оҳу кўзлари айёrona табассумни яширмоққа уринар, лаъл лаблари шўх кулгига мойил, латиф ёноқлари дилрабо майинлик касб этган, қаламқошлари чеҳрасидаги хушвақтликни кузатар эдилар. Қизнинг бутун вужуди учрашувга интиқлик сўнгидан мақсад манзилига етмоқ фараҳи билан тўла эди.

Абу Убайд тушумми ё ўнгимми, деб хаёлидан ўтказди. Чунки у ҳар кечада, ҳар кундуз шу мафтункор сиймонинг сувратини хаёлан томоша қиласар, уни тушида кўрар, у билан кўришмоқ орзусида яшар, аммо бу учрашув насиб бўлар, деб хаёл ҳам суро олмас эди.

Қиз уй эгасининг ўзини йўқотиб қўйганини сезди. У мамнун бўлди. Чунки Жузжонийдаги бу эсанкираш қизнинг барча шубҳаларини йўққа чиқарди. Гарчи қиз, аёлларгагина хос зийраклик билан йигитнинг ўзига мафтун эканини билган бўлса-да, бунинг ҳозиргидек аниқ исботини кўрмаган эди.

Қизнинг ўзи бор вужуди билан бу олим ва фозил йигитга кўнгил берган, табиатан дадил ва тадбиркор бўлганидан буғунги учрашув йўлини ўйлаб топган эди:

У йигитга одоб билан салом берди. Йигит қизга алик қайтарди ва ичкари хонага таклиф қилди. Улар машғулот хонасига киришди. Абу Убайд меҳмонни кўрпачага ўлтиromoққа таклиф қилди. Қиз кўрпачанинг бир чеккасига ўлтирди. Йигит ҳам ўз жойига чўкди. Жузжоний хавотирлик билан қизга боқди ва сўради:

— Нотоблигингиз ўтиб кетмаган эканми? Қайтавлаш белгилари содир бўлдими?

Қиз шўх табассум билан йигитга боқди ва деди:

— Наҳотки, сизлар фақат беморлар билангина мулоқот қилсангиз. Соғлар сухбати сизларга тўғри келмасми?

— Бизнинг мақсадимиз ҳамиша ҳамманинг соғ ва саломат бўлмоғидир,— деди Жузжоний сал кулиб. У ҳамон ўзига келмаган эди. Қиз йигитнинг бундай аҳволини кўриб ташаббусни бутуниsicha ўз қўлига олди.

— Ундаи бўлса бир беморингизга нисбатан бу мақсадингиз мусассар бўлган. Хавотир тортмангиз.

— Собиқ беморимиз энди ҳеч қачон бетоблик юзини кўрмасинлар.

Қиз йигитга миннатдорлик билан боқди. Ўртага сал жимлик чўкди. Аммо бу ноқулай тинлик эмас, балки қалблар орасидаги ундошликни билдирувчи мазмундор сукут эди. Жузжоний туши ўнгга айланганидан баҳтиёр. Қиз биринчи бўлиб бу жимликни бузди ва деди:

— Маликаи муҳтарама Заррин гис Шайхга бир мактуб ёзиб уни бир киши орқали етказмоқни менга топширдилар. Мен бу вазифани ўзим адо этмоққа қарор қилиб бу ерга келдим.

— Шайх ҳозир саройдадирлар,— деди Жузжоний.

— Бу менга маълум,— деди қиз кулимсираб.

У Шайхнинг уйда бўлмайдиган пайтини мўлжаллаб келганини билдиromoқчи бўлди. Жузжоний буни тушунди ва дилида қизга офаринлар ўқиди.

Уларнинг суҳбати яна бир оз вақт давом этди. Қиз мактубни Жузжонийга топшириб жавоб учун эртага қелажагини айтди, сўнг хайрлашиб хонадан чиқди.

Бугунги учрашув Жузжоний учун кутилмаган саодат эди. У баҳтиёрлик билан мактубни бир оз қўлида тутиб турди, сўнг уни Шайхнинг хонтахтаси устидаги лавҳга қўйди.

ЖАВОБ

Эртаси куни қиз яна келди. Шайх уйда эмас эди. Жузжоний мактубнинг шайхга топширилганини қизга айтди. Бу гал уларнинг суҳбати олдингига қараганда эркинроқ ва узоқроқ давом этди. Ҳар иккаласи ҳам дилида Заррин гис юборган мактубга шайхнинг кечроқ жавоб қайтаришни тилар эдилар. Чунки ўшандада буларнинг учрашуви кўпроқ давом этар эди.

Мактубга жавобни баҳона қилиб қиз энди ҳар куни келиб туради. Чунки шайх ҳали мактубда айтилган масалага жавоб қайтарганча йўқ. Жузжоний қизнинг кунда келаётганини устоздан яширмайди.

Аммо андишали устоз ўзининг бу воқеага муносабатини шогирдига билдирамайди. Лекин у ич-ичидан Жузжонийни табриклайди, унга яхшилик билан ҳаваси келади. Жузжонийнинг кўнглида мавж ураётган севги ғулғуласи Абу Алига яхши таниш. Чунки у ўз юрагининг ҳам Заррин гис сари талпинаётганини сезиб турипти. Агар ихтиёр ўзида бўлса, шароит тақозо қиласа Абу Али Заррин гис оёқларига бош қўяр эди. Аммо ҳушёр ва ақлли олим ўз туйғуларини жиловлаб олмоғи керак. Малика Заррин гиснинг тақдиди дарбадар табибининг тақдиди билан ҳеч қачон уланмайди. Буни малика ҳам яхши билса керак. Лекин у барчанинг ўзига бош эгишига ўрганган. Малика бу эгилган бошлар, таслим бўлган юраклар ичидан Шайх Абу Али каби улуг инсон ва олимнинг мағрур бошини ҳам кўрмоқни истайди. Абу Али қаршисида маликанинг юраги ана шу ҳавас билан типирчилайди.

Гўзалликни ҳар бир кўнгил ардоқлайди. Гўзалликни нозик ҳиссэта оладиган бой кўнгил эса уни айниқса эъзозлайди. Абу Али шундай кўнгил соҳиби. Шунинг учун ҳам Заррин гиснинг олтинсимон зулфи домига унинг жон қуши бир оёғи билан илинган. Иккинчи оёғи эса муаллақ. Ақл иккинчи оёқни бу домдан узоқлаштироққа, балки илинган оёқни ҳам домдан халос этмоққа ҳаракатда.

Шайх Абу Али Заррин гис йўллаган мактубни диққат билан ўқиб чиқди. Бу мактубда малика Журジョン шаҳрининг жустрофий узунлигини аниқлаб бермоқни сўраган. Олим ўзи ишлаб чиқсан назария асосида бу вазифани бажармоққа киришди.

Олим Ойнинг энг баланд кўтарилган вақтдаги ҳолати $80^{\circ}6'$ эканни аниқлади. Сўнг Журジョンнинг узунлиги Бағдоддан тахминан 8° қилиб белгилади ва Ойнинг осмоннинг қоқ ўртасидаги чизиқ устида эканлигидан келиб чиқиб Ой ўрнашган кенгликнинг ва оғиш бурчагини ҳисоблади. Натижада Ойнинг энг баланд ўрни Журジョン ўрнашган кенгликда экани маълум бўлди. Бу ўрия $80^{\circ}4'$ эди. Шундан кейин ҳисоб қилақила Ойнинг ўша кенгликда бошқа меридианда, олим аниқлаган баландликда бўлишини топди. Бу ҳолат тахмин қилинган узунликка бир ва ўндан уч градус қўшилганда келиб чиқди.

Шундай қилиб, Бағдод ва Журジョン жойлашган узунлик тахминланган саккиз градусга шу аниқланган

Фарқ қўшилгани натижасида $9^{\circ}20'$ бўлиб чиқди¹. Шайх Абу Алининг Заррин гисга тайёрлаган бу жавоби астрономия соҳасидаги бир янгилик эди. П. Г. Булгаковнинг хабар беришича Абу Али Ҳусайн ибн Абдулоҳ ишлаб чиққан бу астрономик назария ва амалия беш юз йилдан кейин европалик олим Вerner томонидан яна бир бор такрорланган².

Шайх Абу Али бу аниқлаганларини бир рисола қилиб ёзди. У рисолада астрономияга оид ҳисоблар учун ўзи ишлаб чиққан назарияни ҳам баён қилди. Бу рисола Абу Алининг астроном сифатида қилган кашфиёти, назарий хуносаларининг амалий натижалари ни ўз ичига олган асар эди.

Шайх бу рисолани Заррин гисга юбормоқни Жузжонийга топширди. Жузжоний ўз маҳбубаси орқали уни маликага йўллади.

Журжонда экан пайтида Абу Алининг илмий фаолияти сербарака бўлди. Бу ерда табиб ўзининг машҳур «Тиб қонунлари» асарини ёза бошлади. Яна «Нарсаларнинг бошланғичи ва аслига қайтиши» («Китобул мабда ва маод»), «Умумий кузатиш китоби» («Китобул арсад ул-куллия») асарларини ёзib Абу Мұҳаммад Шерозийга топширди. Яна Жузжоний учун «Мантиққа оид қисқартма» («Алмухтасар ул авсат фил мантиқ») асарини ёзib берди.

Батлимуснинг астрономияга оид «Алмажастий» асарининг қисқача баёни ҳам Журжонда ёзилди.

Тезда турмуш тақозосига кўра Шайх Абу Али ва унинг шогирди Абу Убайд Жузжоний Журжонни тарқ этиб Жабал шаҳарига кетдилар ва бир неча вақт у ерда истиқомат қилиб қолдилар.

Устоз ва шогирд кўнглидаги икки малакка боғланган туйғу иплари ҳам шу билан узилди.

ТУРМУШ КУНДАЛИКЛАРИ

Жабалда ҳам узоқ туришга тўғри келмади. Абу Али ва Абу Убайд Жабалдан Райга, сўнг Казвинга ўтишди. Эрон бу вақтда Журжон, Рай, Ҳамадон, Исфаҳон, Хузистон каби майда давлатларга бўлиниб кет-

¹ П. Г. Булгаков. «Значение сведений Беруни для изучения деятельности Ибн Сины», журн. «Общ. науки в Узб.», № 8—9, 1980.

² Уша ерда.

ган эди. Улар қичик-қичик луқмалар каби Ғазнанинг қудратли ҳукмдори Маҳмуд Ғазнавийга ем бўлмоқда эдилар. Подшоҳ Иаминуд-давла Маҳмуд Ғазнавий эса мана икки йилдан бери дарбадарликни саройдаги олтин қафасдан афзal кўрган эрк толиби бўлмиш машҳур табибни овлайди. Шайх Абу Али Ҳусайн ибн Абдуллоҳ ибн Синонинг суврати Султон Маҳмуд томонидан ҳамма майда ва тобе мамлакатларнинг амирларига юборилган. Улар табибни қаерда бўлса, тутиб Ғазнага жўнатмоқлари шарт. Шунинг учун Абу Али у шаҳардан бу шаҳарга кўчиб тентирамоққа мажбур. Табиб қай шаҳарга келмасин ундан шифо топган беморлар дуоси унинг муборак номини элга ёяди, халқ уни севиб ардоқлади, ҳукмдорлар машҳур табибни ўз ҳузурларида сақламоқни тилайдилар. Ҳамма учун энг азиз бойлик саломатликдир. Шайх Абу Али қудратли саломатлик посбони сифатида бу бойликни сақламоққа қодир зўр куч эди.

Табиб учун шоҳу гадо баробар. У қаерда бўлмасин беморларни даволаш билан банд. Унинг қўлидан ўтган беморлар кўпинча шифо топадилар. Моҳир ва билимдон табибнинг шифобахш даволари, енгил қўли энг оғир касалларга ҳам даво топа олиши тўғрисида эл оғзида ҳикоялар ёйила борди. Шайх Абу Али табиб, олим, фозил бир шахс сифатида афсонавий қаҳрамонга айланаб борди.

Қуйида ана шундай ҳикоялардан бирини ўқийсиз.

АДҲАМ ВА ЗУЛФИЯ

Адҳам Зулфияни бир кўришдаёқ севиб қолган эди. Аммо бу севги баҳтсизликка мубтало. Чунки кимсасиз, бирор бор-буди йўқ, девона, яккаш бир йигит бу бадавлат хўжа хонадонига куёв бўлармиди. Буни Адҳам хаёлига ҳам келтириши мумкин эмас, У Зулфия яшаётган кўчада телбанамо тентирайди, севгилисига атаб ёзган шеърларини унга бир йўлини топиб етказди, аммо маҳбубасига етишув умидидан мутлақо узоқ.

Зулфия ҳам Адҳамга кўнгил берди. Севгучи йигитнинг оташин қалбидан чиққан алангали туйғуларнинг тафти Зулфиянинг кўнгил момифига учқун солди ва уни ловуллатиб ёндириб юборди.

Севишганларнинг муҳаббати тўғрисидаги гап ша-

ҳарга ёйилиб кетди. Зулфиянинг отаси қизини ҳеч ёқ-қа чиқармасликка буюрди. Қиз муттасил доялар тафтишида. Унга ўз севгили йигити тўғрисида ўйлаш ҳам тақиқ.

Шу йўсинда ойлар ўтди. Умидсизлик, айрилиқ ис-канжасида тутқинлик Зулфиянинг нафис юрагини тимдалай-тимдалай охир бу юракни тепишдан тўхтатди. Зулфиялар ҳовлисида дод-фарёд кўтарилди. Покизә севгининг маъсума қурбони катта гўристондикдаги улкан мақбарада ўз абадий ўрнига жойлаштирилди.

Бечора Адҳам кўчаларда тентирашни тарк этди. У мақбарада маскан тутди. Бу ерда ошиқ севгилиси-нинг жонсиз жасадига соқчи каби ўлтирас ва тинмай кўзёши тўкар эди.

Шаҳар халқи икки-уч кун ёшларнинг севгиси, унинг бебаҳт қисмати тўғрисида гапириб юрдилар. Сўнгра ҳар ким ўз иши билан овора бўлиб бу гаплар унтутилиб кетди. Зулфиянинг ота-оналари ҳам тақдирга тан беришди. Ҳамма ўз иши, тирикчилиги билан банд.

Фақат Адҳам мақбарадан жилмайди. У ҳамиша ўз ёрининг қошида гирён, унга бағишлиб шеърлар тўқииди, ўзига ўзи бу байтларни ўқииди: кўзига худди Зулфия ўрнидан туриб Адҳамнинг қошига келаётгандай туюлади. Девонанинг фикрига не хаёллар келмайди, дейсиз.

Шаҳар халқи учун эса янги гапларга мавзу то-пилган. Яқинда бу шаҳарда пайдо бўлган ва кўп беморларни даволаб тезда от қозонган ёш табиб — машҳур ҳаким ва файласуф Шайх Абу Али Ҳусайн ибн Абдуллоҳ ибн Сино эмиш. Подшоҳ Маҳмуд Фазнавий табибининг сувратини ҳар бир шаҳарга юбориб, табиби қаерда топсалар дарҳол Фазнага жўнатилсан деб фармон берган эмиш. Одамлар Шайх Абу Алини таниб қолганларидан сўнг у ғойиб бўлган эмиш. Ҳамманинг оғзида энди шу гап.

Адҳам ва Зулфия воқеасидан икки-уч кун ўтгач, бу шаҳарда бир ёш табиб пайдо бўлган эди. У ҳақиқатан ҳам шайх Абу Али эди. Ҳалиги гаплар ёйилгач, табиб ўзини қаерга уришини билмасдан ниҳоят қабристонда беркинди. Чунки ҳокимнинг одамлари ҳар бир хонадондан уни қидира бошлаган эдилар. Қабристон эса чиндан холий жой. Бу ердан табибни

қидириш ҳеч кимнинг хаёлига ҳам келмайди. Абу Али гоҳ бир мақбарада, гоҳ бошқасида беркиниб кун ўтказар эди.

Бир пайт Абу Али Зулфиянинг мақбарасига ўтди ва у ерда Адҳам билан учрашиб қолди. Адҳам мақбаранинг бир четида ёрини ёдлаб кўзёшларини дув оқизиб ўлтирас эди.

Табиб билан ошиқ ўртасида бундай суҳбат бўлиб ўтди:

— Сен кимсен, нега бу ерда макон тутдинг?

— То ўлгунимча менинг манзилгоҳим шу ерда бўлади. Чунки менинг жоним шу ерга кўмилган. Ер сатҳидаги қуруқ жасадим эса ҳамиша жон сари ошиқмоқда,— деди табибга жавоб бериб Адҳам. У худди ўз-ўзи билан суҳбатлашаётгандай гапирав эди.

Шайх Абу Али Адҳамга тикилиб қаради. Адҳамнинг жуллур кийимлари озғин танаси устида аранг илиниб турар, соchlари пахмоқ, юзи ўсиб кетган туклар билан қопланган, аммо порлаб турган нигоҳи қалб дунёсини тўлдирган ўчмас севги ўтларидан нишон берар эди.

Улугъ табиб ва олижаноб инсон шайх Абу Али ўзининг дарбадарлигини унутди. У чин юракдан бу бечора ошиққа кўмаклашмак истади. Аммо ўлим қаршисида табибининг қўлидан нима ҳам келар эди?

Табиб Зулфиянинг қандай касаллик туфайли вазифот этганини билмоқчи бўлди. У мақбаранинг бир чеккасидаги тошларни кўчириб олиб лаҳадни очди ва унинг ичига тушди. Адҳамнинг бу бегона дайди билан иши йўқ эди. Чунки Адҳам озгина пайт ҳушёр бўлса дард изтироби билан яна ҳушини йўқотар ва узоқ фурсат беҳушликда ётар эди. Ҳозир ҳам Адҳамда яна беҳушлик бошланган бўлиб, у мақбаранинг бир чеккасида чўзилиб ётар эди.

Абу Али лаҳад ичига тушгач, олдин ёқиб олган кичик бир машъални чуқурнинг бир бурчига ўрнатди. Сўнг кафанга ўраб қўйилган марҳуманинг ёнига келиб чўнқайди. У кафанин сал очиб ўликнинг қўлини бўшатди ва томир ўрнини топиб бармоқлари билан узоқ ушлаб турди. Бир неча сония ўтди. Бирдан табиб ваҳима билан Зулфиянинг қўлини қўйиб юборди ва сакраб ундан четланди. Сўнгра сал эсини йиғиб олгач, бориб машъални олди ва яна Зулфиянинг ёнига қайтиб келди, унинг юзини очди, сўнг машъални ту-

Сиб қизнинг гўзал чеҳрасига диққат билан боқди. Кейин у яна қизнинг қўлини олиб томир уриши ўрнини пайпаслаб топди ва бармоқлари билан босиб узоқ ушлаб турди. Бир неча фурсат ўтди. Сўнг табиб тезда лаҳаддан мақбарага чиқди. Мақбарада Адҳам ҳамон бехуш чўзилиб ётар эди. Табиб машъални ўчириб бир чеккага қўйди-да, мақбарадан ташқарига чиқди. У энди кўк узра ёйилиб келаётган қуёшнинг заррин нурларидан жимиirlаган кўзларини қўли билан беркитди. То ёруғликка ўргангунча шундай турди. Ниҳоят қўлини кўзидан олди ва қабристоннинг бир чеккасига қараб жадал йўл олди.

Бир оздан кейин Абу Али яна мақбарага қайтди. Адҳам ҳамон бехуш ётар эди. Табиб унга парво қилмайди, чунки унинг ҳолати ўзгариб ўзига келса ҳозир ишга халақит бериши мумкин холос. Табиб машъални ёқиб лаҳад ичига тушди ва машъални бир қулай жойга ўрнатди. У яна Зулфиянинг қўлини ушлади ва узоқ вақт тек турди. Шундан сўнг Абу Али қатъият билан Зулфиянинг жасадини уни ўраган латталардан ажратиб олди. Табибининг ҳаракатлари жиддий ва шошилинч эди. Чунки у Зулфиянинг юраги жуда секин қалтираган янглиғ аҳён-аҳёнда бир тепиб қўяётганини сезган эди. Ҳозир табиб ўзи билан асбоблар, дори-дармонлар ва бир тугун олиб келган эди. У аввал Зулфиядан қон чиқармоқчи бўлиб уриниб кўрди. Сўнгра гул ёғи, сирка, дengiz пиёзи аралаштирилган дори билан унинг танасини ишқай бошлади: бу жараён анча давом этди. Сўнгра табиб Зулфиянинг лабларини бармоқлари билан очиб унга бир неча муддат сув томизиб турди. Шундан кейин бурнига дengиз пиёзини ҳидлатди. Узоқ уринди табиб. У зира, дала ялпизи, асал, дengиз пиёзи аралаштириб тайёрланган дориларни Зулфиянинг бурнига тутди, оғзига томизди: хонтал¹дан қилинган ёғ билан бошини ишқалади, оёқ ва қўлларини узоқ уқалади. Ўлим билан олишмоқда эди табиб. Аммо натижа қандай бўлади? Буни ҳеч ким билмайди. Аҳёнда бир сезилар-сезилмас билинадётган томир тепиши қизда ҳали ҳаёт борлигини билдирап эди. Табибининг муолижаси кўп давом этди. Табиб ўз ҳаракатларининг нима билан тугалланишини аниқ билмаса-да, қатъият билан қизни ўлим чангали-

¹ Хонтал — горчица (ред.).

дан қутқармоққа интилар эди. Унинг узоқ уринишларидан кейин қизнинг томир тёпиши озгина жонланди. Жонланиш жуда секин бўлса-да, сал муттасиллик касб этди.

Абу Али лаҳаддан мақбарага чиқди ва Адҳамнинг ёнига келди. Адҳам ҳамон беҳуш ётар эди. Табиб унга бир дори ҳидлатиб ҳушига келтириди. Сўнг табиб Адҳамга қараб сўз бошлади:

— Сен баҳтили ошиқ экансан. Севгилинг билан бир даргоҳдасан, у билан ёнма-ён турибсан.

Табиб Адҳамга Зулфиянинг аҳволини тушунтира бошлади. Севгилисининг ҳаёт эканини эшишиб Адҳам яна ҳушидан оғди. Табиб яна не машаққат билан уни ҳушига келтириди. Сўнг яна сўзида давом этди. Адҳам ҳамон эшифтганларига ишонмас, у беҳушлик ва ҳушерлик чегарасида эди. Ниҳоят табиб уни бир оз мўътадил ҳолга келтириди ва унга Зулфиянинг ҳали тўласича ҳаётга қайтмагани, уни ҳаётга қайтармоқ учун Адҳамнинг ёрдами керак эканини тушунтириди. Зулфияда юз берган ҳолат ўлим эмас.

— Уни Летаргус дейдилар,— деди табиб,— У мия томирларида шиш пайдо бўлганидан юзага келади. Уни совуқ сарсам ҳам дейдилар. Бу ўлим эмас, касаллик, демак, уни даволаш мумкин. Табиб Адҳамга бу касалликнинг қандай даволанишини қисқача қилиб тушунтириди. Сўнг ҳар иккалалари Зулфиянинг ёнига тушдилар. Муолижа давом этди. Адҳам табибининг айтганларини қиласар, Зулфиянинг бошини баландроқ қўйиб оёқ-қўлларини уқалар, оғзига сув томизар эди. Табиб эса дорилар тайёрлаб уларни Зулфиянинг баданига суртар, яна муолижа билан боғлиқ бошқа тадбирларни амалга оширап эди.

Зулфиянинг томир тениши тўла мўътадиллик касб этгач, улар қизни кўтариб лаҳаддан мақбарага олиб чиқдилар. Бу ерда ҳаким ўзи келтирган тугунни очди ва ундан кийим олди. Адҳам ва табиб Зулфияга эркаклар кийимини кийгиздилар, сўнг уни кўтариб мақбарадан ташқарига олиб чиқиб бир дараҳт остига ётқиздилар. Табиб қизга секин тифурди. Бир оз қон чиқди. Шундан сўнг у Зулфияга бир дори ҳидлатди. Қиз дори ҳидлатилгандан сўнг ётган жойида бир акса урди ва кўзини очди. Адҳам унинг оёғига ўзини ташлаб фарёд кўтарди ва ҳушидан оғди. Табиб уни яна юз машаққат билан ҳушига келтириди.

Зулфияни даволаш яна бир неча кун давом этди. Кундузи улар мақбара ичида беркинار, кечалари эса қизни күтариб очиқ ҳавога олиб чиқар эдилар. Куз фасли бўлганидан ҳаво кундузи қаттиқ қизимас, тунлар эса анча салқин эди. Ниҳоят Зулфия ўзига келди.

Шайх Абу Али Адҳам билан Зулфияга баҳтли турмуш тилади ва улар билан видолашди. Севишиганларнинг баҳтиёргига чек йўқ эди. Улар табибини тоят миннатдорлик билан кузатиб қолдилар. Сўнг севишиганлар бу воқеалардан ҳеч кимнинг хабардор эмаслигидан фойдаланиб шаҳарнинг энг олис, қашшоқ одамлар яшайдиган бир чеккасида жой топиб фақирлик ва дарвешликда, аммо баҳтиёрлик билан ҳаёт кечирмоққа киришдилар.

Ҳамадон

«ОДОБ РИСОЛАСИ»

1016 йил. Энди Шайх Абу Али Ҳусайн ибн Абдуллоҳ ибн Сино ва унинг садоқатли шогирди Абу Убайд Жузжоний Ҳамадонда истиқомат қилишади.

Жабал шаҳарида бир оз яшагач, улар Райга ўтишган эди. Райда табиб шаҳзода Маждуддавлатнинг оғир руҳий касаллигини даволади, ҳам унинг тадбиркор онаси Сайидо хотун қошида эътибор қозонди. Аммо қудратли Фазна подшоҳи Султон Маҳмуднинг Райга яқинлашиб келаётгани туфайли Шайх Райдан Ҳамадонга ўтди. Бу ер Маҳмуд Фазнавийнинг ҳар ерга етадиган узун ва кучли қўлидан холироқ туюлди.

Улуғ олим ва табиб қаерда бўлмасин, қандай шароитда яшамасин, бирор кун қатъий ўрнашган одатини тарк этмайди. Икки машғулот унга ҳамиша ҳамдам. Биринчиси беморларни даволаш, иккинчиси илмий ва ижодий иш. Қайси шаҳарда бўлмасин, ҳамиша эрталаб табиб яшаган уй ёнида турли-туман касалликларга мубтало бўлган хасталар жамланар эдилар. Табиб ҳеч қачон ҳеч кимга рад жавоби қилмас, ҳамма беморларни бирма-бир кўриб уларга дори-дармон қиласар, ҳеч эринмай беморларнинг аҳволини қайта-қайта текширас, то уни соғайтиргунгача муолижани тўхтатмас эди. Беморларни кўриб бўлгач, олим ўз асарларини ёзмоқда давом этар эди. У гоҳо Жузжонийга азбар қиласар, баъзан хусусан кечалари, ўзи ёзар: ёзилгандарни Жузжоний эрталабдан оқقا кўчира бошлар эди.

Шайх Абу Али Ҳусайн ибн Абдуллоҳ ибн Сино фаннинг турли соҳалари бўйича тўрт юз эллик олти асар ёзгани қайд этилган. У. И. Каримов, А. Үрин-

боев, Б. Ваҳобоваларниң хабар қилишларича шулардан икки юз қирққа яқин асарнинг қўлләзмалари бизгача етиб келган¹.

Улуғ табиб Журжонда экан пайтида ўзининг шоҳ асари «Тиб қонунлари»ни ёза бошлаган эди. Бу асарга оид маълумотларни у ўзининг самарали даволаш фаолияти давомида муттасил йиғиб борди. Бу китобда кўрсатиладиган навбатдаги масалаларга кўчиш олдидан табиб кундалик тажрибасида ортирган билим ва тажрибалари билан олдин ёзилган бобларни тўлдириб борар эди. Олим «Тиб қонунлари» билан бир вақтда бошқа асарларини ҳам ёзмоққа вақт топар эди. Шайхнинг иш қобилияти ҳаддан ташқари баланд бўлган. У бир кунда эллик саҳифагача ёзар эди. Ёзганларининг ҳаммаси юксак илмий савиядада, мазмунан чуқур, шаклан мукаммал асарлар эди.

Ҳамадонга кўчиб ўтишган йили куз яхши келди. Гарчи совуқлар бошланиши керак пайт келган бўлсада, дараҳтлар ҳали рангдор тўнларини ечганлари йўқ. Баъзи шоҳлардан ҳазон бўлган япроқлар тўкилган, ёш шоҳчалар эса кўк баргчалар чиқармоқдалар. Қор ўрнига ёмғир ёғади. Ёққанида ҳам этни увиштирувчи, совуқ куз ёмғири эмас, худди баҳордагидек илиқ ёмғир ёғади. Бир кунги ёғиндан сўнг эртасига ярақлаб қуёш чиқади. Ер қуёш тобида қизийди ва унинг намли бағридан ёш майсалар кулиб бош кўтарадилар. Улар жўжалар туки сингари майин ва қисқа, аммо борлиқ атрофга яшил безак бағишлайдилар, Гулзордаги гулларнинг баъзилари кесилган, бошқа бирлари эса гул очиб ётибдилар. Қуёш баҳорги майинлик билан иситади. Табиат ёши сал ўтиб қолган бўлса-да, гўзаллик зебини йўқотмайди, баҳорий либоси билан жилва қиласди.

Ана шундай сафоли куз кунларидан бирида табиб ва шогирди бир беморни муолажа этдилар. Бемор ўрта бўйли, қўнғир сочли, қотмадан келган, қорамтир тусли бир йигит эди. Унда руҳий касаллик белгилари бор. Қўзи бежо, баданида тез-тез титратма юз бериди туради, гапларга асабий кескинлик билан жавоб қиласди. Табиб bemornining ярасига дори сурди, асабни юмшатувчи дорилар берди, bemornining бетоқатлик

¹ Журн. «Общ. науки в Узб.», № 8—9, 1980 й.

билин қилган қилиқларига сиполик билан муюмала қилди.

Жузжоний беморнинг ўзини тутишидан ғижиниб турар эди. Шундай улуғ табиб ҳузурида бу тарбия кўрмаган кимса ўзини беадаблик билан тутмоқда.

Бемор кетгач, Жузжоний ўзини енгил тортди ва қўлини юваётган табибга мурожаат қилиб деди:

— Кимнинг ҳузурида эканини идрок этишга ноқобил тарбиясиз одам экан.

— Кимни айтаётурсиз.

— Ҳозиргина кетган кишини.

— Бемор тўғрисида бундай гап тарбияли одамдан чиқмаслиги керак,— деди жиддий оҳангда табиб қўлини сочиқ билан артар экан,— агар у соғ бўлганида сизда бундай фикр туғилмас эди. У bemor-ку, ахир!

— Бемор бўлса ҳам инсонлигини сақлаши керак эмасми?

— Соғ ва носоғ одамда бир хил кўриниш содир бўлмайди. Аввал носоғ одамни соғломликка эриштиrmак, шундан кейингина ундан соғ одам қиладиган ишни кутмоқ керак.

— Агар соғайгандан кейин ҳам номақбул ишларни қилаберса-чи?

— Бу бутунлай бошқа мавзу.

Табиб қўлини артиб бўлиб сочиқни қозиқча илди ва шогирдининг ёнига келди. Улар кўрпачага ўлтиришди. Табиб мез устидаги пиёланни олиб ундаги шарбатдан бир ҳўплади ва пиёланни қайтариб жойига қўйди. Шундан сўнг Жузжонийнинг саволига жавоб бера бошлади:

— Ҳар бир хайр ва яхшилик асосида тортинмоқ, жасорат, ҳикмат ва адолат ётади. Инсон шуларга одат қилган, уларнинг аксидан сақланган ҳолда киши камолат касб этади.

— Инсоннинг феъли олдиндан белгиланган қисмат туфайли пайдо бўлмайдими?

— Қисматни белгиловчи Оллоҳнинг иродаси ҳамма нарсага бош. Унинг иродасидан ташқари ҳеч нарса мавжуд бўлмайди. Аммо ҳар бир мавжуд нарсага оид кўп сифатлар борки, бу сифатларни инсон ҳар бир вужуд мұхит, тарбия ва турли таъсиrlар орқали касб этади.

— Агар бу касб этилган сифатлар салбий бўлсалар, улардан қутулмоқ йўли қандай?

— Салбий сифатлардан қутулмоқ учун, агар улар тасодифий таъсир туфайли пайдо бўлган бўлсалар, киши ўз иродасини сафарбар этмоғи лозим.

Кўп нарса инсоннинг ўзига боғлиқ. Агар бу сифатлар одатга айланиб қолса кишининг табиатига мослашиб қолади. Демак, яхши сифатларга одатланган одам яхшилик касб этади: ёмон сифатларга одатланган эса ёмонликка ўрганиб қолади. Яхшилик ила саховат ошиқчалик ва етишмовчиликнинг ўртасидир.

Шайх шогирдининг бу сўзларга диққат билан қулоқ солаётганини кўрди. Аммо тингловчининг қарашларидан саховатнинг маъносини уччалик еча олмаётганини сезди. Чунки сұҳбат фалсафий тус олганидан мавҳумлашиб бормоқда. Айтилган фикрларни айrim мисоллар билан аниқламоқ керак. Шунда шогирдлар устоз сўзини яхшироқ уқадилар.

— Мана бир мисол,— деди устоз шогирдига,— агар беморда иссиқлик ортиб кетган бўлса, уни совуқликдан иборат озуқа ва дори билан камайтирамиз. Агар совуқлик ортиб кетган бўлса, уни иссиқлик ёрдамида пасайтиromoқ даркор бўлади. Худди шунинг сингари ўзимизда етишмовчилик сезсан, эзгу сифатларни оширмоқ ҳисобига ўша етишмовчиликни камайтиromoғимиз зарур. Бирор нарса ортиб кетган бўлса, уни камайтириш ҳисобига мўътадилликка эришамиз.

— Барча сифатлар ичида энг асосийси қайсиdir?— деб сўради шогирд.

— Адолат,— жавоб берди усгоз,— адолат ҳиммат ва саховатнинг негизидир. Адолат барча руҳий кучларга алоқадор. Ҳиммат ва саховатга доир барча кучлар адолат билан боғлиқ. Шунинг учун,— деб қўшиб қўйди устоз,— сиз ҳам ўшা беморга нисбатан адолатли муносабатда бўлмоғингиз лозим.

Уларнинг сұҳбати яна бир оз давом этди.

Шу куни кечқурун Жузжоний устознинг барча айтганларини тартиб билан қоғозга туширди. Шундай қилиб Шайх Абу Али Ҳусайн ибн Абдуллоҳнинг «Одоб ҳақида» деган рисоласи пайдо бўлди.

Бу рисолада эзгулик, унинг жузвий томонлари: қарам, ҳикмат сабр, хайр, сир сақлаш, тоқа, сўзамоллик, зийраклик, қатъият, жасорат, самимият вафо, шафқат, номус, тиришқоқлик, камтарлик каби сифатлар таъриф ва талқин қилинган. Бу сифатларга зид бўлган тушунчаларга ҳам изоҳлар берилган.

СУҲБАТ

Бир куни эрталаб беморлар қабули тугаллангач, табиб шогирди томонидан кўчирилган қоғозларни кўриб ўлтирган эди, уйнинг эшиги секин тиқиллади. Табибининг ёнида ўлтирган Жузжоний дик этиб ўрнидан турди-да, бориб хона эшигини очди. Хонага ба-ланд бўйли, қисқа оқ соқолли, нуроний чехра бир киши кириб келди ва табибга салом берди. Шайх Абу Али дарҳол ўрнидан туриб келган киши билан саломлашди ва уни кўрпачага ўлтирмаққа таклиф қилди. Бу меҳмон ҳамадонлик Ашшариф Саъид Абул Ҳусайн Али ибн Абул Ҳасан деган киши бўлиб, унинг фалсафа, мантиқ, ҳандаса билимларига оид асарлари Абу Алига яхши таниш эди. Табиб бу одамга ҳурмат билан муомала қиласар ва унинг суҳбатини қадрлар эди. Абул Ҳусайн-ҳам Шайх Абу Алиниңг қандай юксак даражали олим эканини яхши билар, у билан бўлган ҳурматли муносабатларни қадрлар ва фаҳр билан бу тўғрида сўзлаб юрар эди.

Абул Ҳусайнда юрак сиқилиши дарди бор. Унинг юзи, қовоқлари сал шишинқираб туради, нафас олиши оғир, ўқтин-ўқтин юрагида оғирлик ва оғриқ сезади. Шунинг учун у тез-тез табибга кўриниб турар ва унинг муолижасидан баҳраманд бўлар эди. Табиб Абул Ҳусайннинг одатдагидан кўра ортиқроқ оқарган юзига хавотирлик билан боқди ва сўради:

— Яна юрак қисиши беҳузур қилган кўринади?

— Утган сафар берган дорингиз яхши фойда қилди. Аммо у тугаб қолди. Энди яна лоҳаслик кучая бормоқда.

Табиб оғир жилмайди ва деди:

— Буқрот ҳаким «дори ҳам тозалайди, ҳам заар етказади» деб жуда яхши айтган. Сизга берилган дори ични сурувчи девпечак қайнатмаси эди. Уни кечга ичib ётиб фойда кўргансиз. Чунки у бадандан, айниқса мия ва юрак томонидан заарли ва азият берувчи хилтни сиқиб чиқарган. Аммо у суриш асносида табиатга мос ва ёқимли бўлмаган нарсалар билан бирга унга ёқимли нарсаларни ҳам суриб чиқаради. Бу эса инсон табиатига зўр келади. Чунки табиат хилтларни ўз ўрнига тортиб ва тутиб туради. Сурги эса унинг аксини қилади. Аммо бари бир сурги дори-

нинг руҳни тозалаш орқали юрак қисишида келтирадиган фойдаси кўпроқ.

— Шундай бўлса-да, дориларни камроқ истеъмол қилмоқ керак бўлар экан-да. Аммо дардга ундан ҳолда қай йўсинда дармон топмоқ мумкин?

— Бунинг йўллари кўп — деди табиб бир оз қизғинлик билан.— Даставвал инсоннинг истеъоди борлигини аниқлаб олмоқ керак. Ҳар бир инсон севиниш ва хафа бўлишга қодир. Лекин инсонларнинг баъзиси фақат хурсандлик, баъзилари эса фақат хафалик учун истеъоди бўладилар. Шуларни ҳисобга олиб иш тутмоқ керак. Хурсандликнинг кетма-кет келиши руҳни хурсандликка ҳозирлайди, ғамнинг кетма-кет келиши эса руҳни ғамғинликка тайёр тутади. Сизда,— деб сўзида давом этди табиб,— юрак қисилиши қоннинг қуюқлиги ва қуйқалигидан бўлган. Шунинг учун энди юрак дорисига латифлаштирувчи дори қўшиб бераман. Иншооллоҳ, даво топиб кетасиз.

Табиб беморга долчин ва заъфарон бериб, айтилган дорига қўшиб ичишни маслаҳат берди.

— Лекин,— деди яна табиб,— киши ўз истеъодиди ни билмоғи, шунга яраша хатти-ҳаракат қилиб таом ва шароб тановул этмоғи керак. Шунда дориларга эҳтиёж қолмайди.

— Бу ҳамма айтган гапларингиз фоят муҳим,— деди Абул Ҳусайн сал кулиб,— аммо ҳар бирини эсда сақлаб қолмоқ осон эмас. Яна сизнинг суҳбатингизга мушарраф бўла олмайдиган қанча-қанча одам бор. Шунинг учун юрак дорилари тўғрисида бебаҳо гав-ҳар янглиғ фикрларингизни бир китоб қилиб ёсангиз, уни ўқиб биз беморлар маслаҳатларингизга риоя қилиб юрсак: ҳам келгуси авлодлар бу мўътабар фикрларингиздан истифода этсалар, қандай хушбахтлик бўлган бўлур эди.

Шайх Абу Али бир оз дақиқа жим бўлиб қолди. Орага озгина сукут чўкди. Жузжоний бутун вужуди билан бу маслаҳатга тарафдорлигини намоён этиб устозига тикилди. Бир неча дақиқадан сўнг Шайх енгил жилмайиб Абул Ҳусайнга жавоб қилди:

— Биз табиблар файласуфларга тобедурмиз. Модомики, фалсафа ва мантиқ илмининг устуни бўлмиш Сиздек бир зот маслаҳат берар экан, мен уни фармон сифатида қабул этгумдир.

ЮРАҚ ДОРИЛАРИ

Шу суҳбатдан кейин Шайх Абу Али юрак дорилари тўғрисидаги китобини ёзишга киришиди.

Китоб ҳаёт тўғрисидаги оддий мантиқий мулоҳазалар билан бошланади.

Ҳаётни ҳамма нарса ҳам қабул қила олмайди. Масалан юнг юнг ҳолида бўлиб туриб қилич сувратини касб эта олмайди. Сув сув бўла туриб инсонлик ҳақиқатини қабул қила олмайди. Содда жисмлар ҳаётга эга эмаслар. Чунки уларга бошқа содда жисмлар ва ҳаётга эга бўлган бошқа мураккаб жисмлар қарши турадилар. Бунинг сабаби уларнинг қарамакарши табиятидадир.

Мураккаб жисмлардаги аралашиб қарма-қаршилик асосини синдирган, уларда бир мизож пайдо қиласан. Мизож қарамакаршиликлар ўртасидаги васат (ўрталиқ) демакдир. Ана шу мизож туфайли, яъни зидликка учрамайдиган ўртачалик туфайли мураккаб жисмлар ҳаётни қабул қиласадилар.

Умуман ҳаётнинг яратилиши тангридан. Аммо бу ҳаётни қабул қилишлик ҳар бир жисмнинг хоссаларига алоқадор.

Мижознинг мўътадиллаша бормоги натижасида, ундаги қарамакаршилик йўқола бориб тенгликка юз тутса, нутқий ҳаёт келиб чиқади. Бу қобилият инсон руҳида мавжуд. Руҳ нуроний моддадир. Кирувчи руҳ нур дейилади. Кўз нурни кўрса нафс севинади, қорон-гулика у сиқилади. Чунки ёруғлик нафсни ташувчи (марқаб)га ўхшаш бўлиб, қоронғилик унинг зиддидир.

Хурсандлик, ғам, хавф, ғазаб юракда бўлган руҳнинг маҳсус таъсиrlанишидан пайдо бўлган. Хурсандлик бир турли лаззатдир. Лаззатда истеъдод лаззатланувчининг миқдор ва кайфиятида энг яхши ҳолда бўлишини тақозо қиласади. Модданинг миқдорда ортиқлиги қувватнинг шиддатда ортиқлигини келтириб чиқаради. Бунинг зидди эса аламга бўлган истеъдодни билдиради. Бирор нарсага ҳозир турганга энг кичик туртки ҳам етарли. Масалан, олтингугурт салгина олов билан ёниб кетади. Утин эса унга қараганда икки баравар ортиқ бўлса-да, дарров ёна бермайди. Шунга ўхшаб шодланиш қобилиятига эга бўлган руҳ сал нарсага севинади. Хурсандликнинг кетма-кет ке-

лиши хурсандликка тайёрлайди. Ғамнинг кетма-кет келиши ғамгинликка мослайди. Қувноқ қишига ғамли сабабларнинг энг кучлисигина таъсир қиласиди, шодлантирувчи сабабларнинг кучизи ҳам таъсир қила беради. Бунинг зидди эса ғамгинликка йўллади.

Кўп миқдорли, соф, қуюқ ва суюқлиги мўътадил бўлган қон руҳни шодланишга ҳозирлайди. Чунки ундан ана шундай сифатли руҳ туғилади. Агар қон суюқ, серсув бўлса қалбни занф қиласиди ва қўрқоқликка ҳозирлайди. Чунки бундай қоннинг ҳаракати қийин ва оғир. Фализ, қуйқали ва ҳарорати юқори бўлган қон руҳни ғам ва ғазабга чорлайди. Ғам қуйқа ва хира руҳдан, ғазаб руҳ ҳароратидан бўлган алангаланишдан келиб чиқади.

Шайхурраис ўз китобида дориларнинг сифатлари тўғрисида маълумот берган. Бу сифатлар иссиқлик, совуқлик, ҳўллик, қуруқлик, латифлик, зич тузилганик, қотишлик, ёпишқоқлик, чўзилювчанлик, оқувчанлик, мўртлик кабилардан иборат. Маза ва ҳидлар ҳам шу сифатларга киради. Шундан сўнг улуғ табиб шу хоссаларга эга дорилар ичидаги қайсилари юрак дориси бўла олажагини кўрсатади.

Ана шу маълумотлардан сўнг китобда содда ва мураккаб дориларнинг таърифи келтирилган. Улар ибрисам (ипак)дан тортиб тоғарикун (даражат пўкағи) гача алифбе тартибида териб чиқилган. Қуйида бир-икки мисол келтирамиз:

Ипак юракни кучли хурсанд қиласиган дориларданиди, бунга латифлаштириш хусусияти ёрдам қиласиди. Ипакнинг эсда сақлаб қолиш қобилияти ва жигардаги руҳ учун фойдаси бор.

Байз (тухум) юракни қувватли қиласиди. Хусусан тустовуқ, товуқ, қирғовул, каклик каби яхши гўштилар тухумининг сариги фойдалидир.

Вард (жайдари қизил гул) хушбўй ҳиди билан руҳ жавҳарига ёқади. Гул барча органларга фойдалидир. Гул сувини оз-оз ҳўплаб ичирилади.

Кузбора (кашнич) иссиқ мижозлиларда юракни кучли ва хурсанд қиласиди. Ёқимли ҳиди руҳ жавҳарини мустаҳкамлайди.

Олма (туффоҳ) тўғрисида олим бундай деб ёзади: «Шу биринчи даражада совуқ ва қуруқдир. Юракни қувватли ва хурсанд қилишда катта хусусиятга эга. Хушбўйи ва ширинлиги хусусиятига ёрдам қиласиди.

Олма дори бўлиши билан бир вақтда озиқ ҳамдир. Шунинг учун руҳни озиқлантириш ва мўътадил қилиши орқали ҳам фойда қиласди. Ва уни хосияти билан қувватли қиласди» («Юрак дорилари». Т., 1966, с. 120).

Китобнинг сўнггида мураккаб дорилар тўғрисида сўз боради. Улар орасида улуғ табиб ўзи ихтиро қилган мураккаб дориларнинг таърифини ҳам келтирган.

Шайхурраис Абу Али Ҳусайн ибн Абдуллоҳ ибн Синонинг «Юрак дорилари» китоби улуғ табиб яшаган замондан то XIX асргача шарқ мамлакатларидағи табиблар учун энг қимматли қўлланма бўлиб келган. XI—XIX асрлар давомида тиббий асар ёзган барча табиблар Шайх Абу Алиниң бу асаридан кенг фойдаланганлар¹.

ВАЗИРЛИК

Ҳамадонда улуғ табибнинг ҳаёти дастлаб бир мунча мунтазам кечди. У Ҳамадон подшоҳи Шамсуддавланинг саройида табобат хизматида эди. Ҳар куни пешин намозидан сўнг Шайх Абу Али ибн Абдуллоҳ ибн Сино подшоҳ ҳузурига йўл олади ва саройидаги хизмат юмушлари билан банд бўлади.

Ҳамадон подшоҳи Шамсуддавла ўз ихтиёрида Абу Али Ҳусайн ибн Абдуллоҳ ибн Сино каби улуғ табиб ва мутафаккир борлигидан жуда мамнун. Чунки улуғ табиб, доно олим ва фозил инсон Шайх Абу Али унинг саломатлигини ҳифз этади, оқилона маслаҳатлари билан давлат ишларида кўмаклашади. Султон Маҳмуд Газнавий құдратли подшоҳ тилаб етиша олмаган бир алломанинг Шамсаддавла ҳузурида бўлмоғи Ҳамадон подшоҳининг шавкатини оширади. Шамсаддавла шахсан Шайх Абу Алини ҳамиша ҳурмат қиласди, унинг доимо ўз ёнида бўлмоғини тилайди.

Бир куни подшоҳ Шамсаддавла Шайх Абу Алини ўз ҳузурига чорлади ва унга бир ёруғ топширди.

¹ Бу китобни арабшунос олим Ҳамидулла Ҳикматуллаев араб тилидан ўзбек тилига таржима қиласган. Бу таржима бой илмий аппарат билан таъминланган ҳолда 1966 ийли Тошкентда «ФАН» нашриёти томонидан нашр этилган. Масъул мұхаррири У. И. Каримов.

Шайх ёрлиғни ўқиб чиққач, подшоҳга таъзим билан бош эгди ва деди:

— Бу шарафли даргоҳда фақирни шунчалар юксак эътиборга сазовор тутганлари учун миннатдормен. Аммо менинг иш юритмоғим аркони давлатнинг кўпига ёқмас, баъзиларнинг феълига зид келар натижада подшоҳлик ишларига халал етиб қолмасмикин?

— Ақл ила фаросат ва ҳокимият қуввати ёрдамида барча салбий ҳолатларга барҳам бермоқ мумкин бўулур. Сиз ушбу ёрлиғда айтилган лавозимда дарҳол ишга тушмоғингиз воҳибдир.

Ҳамадон подшоҳи Шайх Абу Алини ўз давлатнинг вазири этиб тайинлаган эди. Подшоҳ фармонига бўйсунмоқдан бошқа илож йўқ.

Вазир Абу Али ўз одатига кўра чин садоқат ва масъулият билан ишга кириши.

Вазир даставвал молия ишларини чуқур тафтиш этди. Бирни ўн қилиб ёзиб, қилинмаган ишларга маблағ олиб уларни ўзлаштириб юборадиган тоеламачиларнинг уйи куя бошлади.

Бир куни вазир сарой мутасаддиси топширган харажатлар рўйхатини кўриб чиққач, уни ўз ҳузурига чорлаб деди:

— Ушбу рўйхатда ўттиз тўрт хил юмуш адо этилгани ва унга тўрт минг уч юз эллик беш дирҳам тўланмоғи ёзилган. Тафтишчилар эса қилинган ишлар ўн тўрт хил экани, бу ишларни энг қиммат баҳолаганда ҳам бир минг бир юз ўн уч дирҳам бўлажагини аниқладилар. Не сабабдан қилинмаган ишлар учун уч минг икки юз қирқ икки дирҳам тўламоқ керак?

Мутасадди жим бўлиб қолди. Илгари мутасаддикатта харажатлар ёзилар, арзимаган қисми амалга оширилгач, иш тўхтатилар, қолган нарсаларни сотиб пулинни мутасадди, вазир ва юмуш ижрочилари ўзаро бўлиб олишар, қолган пулларни ҳам тақсимлашиб ўzlари олишар эди.

Вазир бу сунистъмолларга чек қўйди. Уғри мутасадди ишдан қувилди. Олдинги йилларда ўтказилган ишлар тафтиш қилина борди. Натижада сарой атрофида ўралашган баъзи кимсаларнинг тубан қилмишлари фош бўлди. Улар ўз жиноятларига яраша жазо олдилар. Молия девонининг ишлари тўласича вазир қарамоғига ўтказилди. Ҳар бир сарф қилинадиган дир-

ҳам унинг давлатга қандай фойда келтиражагини олдиндан ҳисоб қилиб сўнг сарф этиладиган бўлди.

Вазирнинг фармойиши билан бозорларда сотила-диган газламаларни ўлчайдиган газлар темирдан қи-линди: қадоқ тошларига давлат муҳрлари босилди: токим, тасдиқланмаган ўлчов асбоблари ишлатилма-син.

Миршаблар тунлари шаҳар тинчлигини сақламоқ-лари керак. Вазир томонидан тайинланган махсус тафтишчилар тун бўйи миршабларнинг ўз ўрнидами-ёки йўқми, уйғоқми ёки ухлаб ётибдиларми, текшира-диган бўлдилар.

Ҳамадонда Исфаҳон, Казвин, Рай шаҳарлари сари борадиган савдо йўлларига соқчилар чиқарилди. Сав-догарлар қароқчилар ҳужумидан қутилдилар. Шаҳар-лар аро савдо-сотиқ ривож топди.

Вазир деҳқонлар ва ҳунармандлардан олинади-ган солиқларнинг миқдорини камайтирди. Агар солиқ-лар озайса, ҳунар ва деҳқончилик билан шуғулланув-чилар кўпаяди, даромад ортади. Охир натижада ха-зинага келадиган тушум ошади.

Вазир айниқса порахўрларга қарши қаттиқ чора-лар кўрди. Бундай пасткаш жиноятга аралашган амалдорлар қилган хизматлари, тажриба ва билим-ларига қарамай хизматдан ҳайдала берди. Подшоҳ-нинг давлат маҳкамаларида таҳсилини яқиндагина тугаллаган ёш хизматчиларнинг сони оша бошлади. Вазир бу ёш хизматчиларни садоқат ва адолат билан иш тутмоққа астойдил ўргатар эди.

Халқ янги вазирнинг қилаётган ишларидан мам-нун. Аммо хизматдан қувланган порахўр амалдорлар, қилинмаган ишларга ёлғон ҳужжат тузиб пул ўғир-лашга ўрганган товламачилар, тарози ва газдан уриб харидорларни талашга одат қилган горатгарлар вазирга қарши кек сақладилар. Уларга жоҳил ва мутаассиб руҳонийлар, ҳар хил фирибгарлар ҳам қў-шилдилар.

Вазир одатдагидек табиблик ишларини ҳам давом этдирад, кўп беморларни даволаб ҳалойиқнинг дуоси-ни олар эди. Бу эса азойимхонлик, дуохонлик, куф-суф, беморни сук ва ёмон кўздан асраш, эзиб ички ва бошқа алдамчилик билан пул топувчи найрангбоз шилдирларни бутунлай синдирган эди. Бундай кимса-лар табиби кофир, худодан қайтган, имонсиз деб

иғво қилдилар. Сарой хизматидан қувилған ҳазина каламушлари бўлмиш собиқ амалдорлар ҳам вазирга қарши фисқу-фасод бўйтонни авж олдирилар. Кунаро шундай кимсалардан кимдир подшоҳ Шамсуддавла ҳузурига кириб, ёки бирор киши орқали Шайх Абу Алини ёмонлар: унинг умрида қилмаган ва қилмайдиган ишларини қилди деб түхмат қилар эди. Аммо подшоҳ Шамсуддавла Шайх Абу Алининг халқ ўртасидаги обрўйини яхши билар, Шайхнинг эл орасидаги эътибори давлатнинг таянчи экани унга маълум эди. Шайх Абу Алининг вазирлик хизматида ўтказган ислоҳотлари туфайли халқ горатгар золимлар зулмидан қутилиб енгил нафас ола бошлаган, шайхнинг халққа муҳаббати элу-юртнинг унга жавобий муҳаббатини уйғотган. Бу эса давлатнинг эътиборини ҳам кўтарган эди.

Шунда Шайх Абу Алининг душманлари ҳал қилувчи кучлар — лашкарбошиларни ишга солдилар.

Илгари қўшинбошилар саройдан харажат учун олинган маблағ бўйича ҳеч қандай ҳисобот бермас эдилар. Вазир юборган тафтишчилар қўшинбошиларнинг харажатини текшириш учун келганларида қўшинбошилар қаттиқ ҳаяжонга тушиб қолдилар. Чунки ажратилган маблағларнинг ярми уларнинг чўнтағига тушар, қўшин эҳтиёжи ва сарбозларнинг ҳақи учун эса аранг қолган ярми етиб келар эди. Қўшинбошилар сарбозларни атроф шаҳарларга ҳужум қилиб уларнинг халқини таламоққа руҳлантирадар эдилар. Ўшанда ўзларининг сарбозларни талаётгандари ёпилиб кетар эди. Ўзга шаҳарларни ҳам талаб қўшинбошилар талай ўлжаларни қўлга киритар эдилар.

Вазирнинг ўюштирган тафтишидан норози бўлган қўшинбошилардан бир гурӯҳи унинг ҳузурига келдилар.

Ўша куни вазир Шайх Абу Али одатдагидек мез ёнида ўлтириб баъзи қоғозларни кўздан кечирмоқда эди. У айрим ҳужжатларга имзо чекар, айримларини тузатар, қайтадан кўчирилиши керакларини ажратиб бошқа томонга қўярди. Алоҳида бир четда тахланган ҳужжатлар подшоҳ хабарига етказилмоғи керак. Қоғозларни кўриб бўлгач, вазир ёрдамчисини чақирди ва унга кўрилган ҳужжатлар бўйича лозим топшириклар бера бошлади. Шу вақт эшик очилиб вазир хонасига тўртта ҳарбий кийимдаги қуролли кишилар ки-

риб келдилар. Улар қўшинбошиларнинг вакиллари эдилар.

Вазир ўрнидан туриб кирганлар билан саломлашди ва ташқарига чиқмоқчи бўлган ёрдамчисига қолмоқ ишорасини қилди ва барча келганларни ўлтиromoққа таклиф қилди. Ҳарбийлар кўрпачага тиз чўкдилар. Ёрдамчи ҳам қўлидаги қофозларини тутганича пойгакда ўлтирди. Фотиҳадан сўнг вазир ҳарбийларга савол аломати билан боқди.

— Бизнинг келмоғимиздан мақсад...— деб сўз бошлади қўшинбоши Абу Мажид Камолиддин Тафтазоний. У унвон бўйича келганларнинг барчасидан юқори, ўзининг қатъияти ва ҳарбий ишдаги малакаси жиҳатидан бошқалардан устун турар эди. Подшоҳ ҳам бу қўпол ва чўрткесар, фикри маҳдуд ҳарбий билан андишли муомала қиласр эди.— Бизнинг келишимиздан мақсад: ҳарбий маҳкамага юборилган тафтишчиларни чақириб олинса. Бу маҳкаманинг ўз тафтишчилари бөр. Хизмат тақозосига кўра ўшалар ўзлари тафтиш олиб боражаклар.

Қўшинбошининг овози кескин, рад қилиб бўлмайдиган оҳангда янгради.

— Давлат тафтиши ҳар бир маҳкама учун бир хил ҳуқуққа эга. Чунки маблағлар бир хазинадан чиқур, уларнинг сарфидан давлатпаноҳ ўз хизматчилари орқали огоҳ бўлиб турмоғлари даркор.

— Давлатнинг таянч устуни ҳарбий маҳкамадир. Бошқалар шу суюнч орқали барқарор турадилар. Шунинг учун бу маҳкамага алоҳида ишонч ва эътибор матлуб.

— Давлатнинг таянч устуни аҳолидир. Мамлақат халқи ўз меҳнати билан давлатни ҳам, унинг маҳкамаларини ҳам барқарор тутади. Ҳарбий маҳкамага шу халқнинг тинчини сақламоқ, ташқи хуружлардан эмин тутмоқ учун тузиб қўйилган.

Қўшинбошилар вазирнинг бундай жавобини эшитгач, бир-бирларига маъноли қараб олдилар. Улар олдинлари вазирга, ҳатто подшоҳга ҳам ўз фикрларини ўтқазиб келар эдилар. Улар ҳеч қачон, ҳеч қайси вазирдан ўз талабларига нисбатан бундай жавоб эшитмаган эдилар.

Вазир суҳбат тугаганилигини билдириб сукут сақлади. Қўшинбошилар буни фаҳмлаб вазир билан

хайрлашдилар ва унинг хизмат хонасидан чиқдилар. Ҳар иккала томон ҳам бир-биридан фоят норози ҳолда ажралишиди.

ТАЛАН

Қўшинбошилар вазирга қарши бориб тўнларини тамомила тескари кийиб олдилар. Улар томонидан иғво ва фитнанинг сассиқ дуди ҳар томонга тарала борди. Вазир ҳарбийларга ёмон кўз билан қарайди, қўшиннинг харажатини камайтириб охири уни тарқатиб юбормоқ ниятида деб гап ёйдилар. Айниқса, подшоҳ ҳузуридаги бир маслаҳат йигинидан сўнг бундай фисқу-фасодлар авжига чиқди.

Маслаҳат мажлисида навбатдаги таланчилик юриши тўғрисида масала кўрилди. Подшоҳ Шамсуддавла ҳарбийларнинг тазиيқи остида бу юришга мойил бўла бошлаган эди.

Вазир Абу Али Ҳусайн ибн Абдуллоҳ бу фикрга қаттиқ қарши чиқди. Қўшиннинг вазифаси қўшни элларни таламоқ эмас, ўз юрти элининг бехавотирилигини таъминламоқдир. Аскар деган очкўз горатгар эмас, мард ҳимоячи бўлмоғи лозим.

Қўшинбошилар ақлли ва қатъий иродали вазирдан чўчиб қолдилар ва уни йўқотмоқ пайига тушдилар.

Абу Мажид Қамолиддин Тафтазоний фитнага бош бўлди. Унинг ёнига барча бурнидан нарини кўролмайдиган беақл галварслар жам бўлдилар.

Вазир Абу Али Ҳусайннинг ҳовлисида одатдаги турмуш тартиби кечётган кунларнинг бири эди. Абу Али беморларни кўриб бўлгач, илмий ишларини ҳам тугатди, пешин намозидан сўнг ўрдага жўнади. Иш хонасида Абу Убайд Жуэжоний кеча кечқурун ва бугун эрталаб ёзилган бобларни оққа кўчирмоқ билан банд. Вақт ҳам намози асрга яқинлашиб қолганди.

Абу Убайд ўз устозининг вазирлик хизматидан норози эди. Чунки Шайхнинг кўп вақти саройда ўтади, илмий ижодга оз вақти қолади. Агар бу хизмат бўлмаганда яна қанча янги асарлар ёзилган бўлар эди. «Шайхнинг бу вазифа билан машғул бўлиши бизга қайfu ва ҳасрат келтирди. Чунки унинг кўп вақти зое кетмоқда», деб кўнглидан ўтқазди Жуэжоний.

Шу пайт бирдан чўри хотиннинг чинқириб додланган овози келди. Унинг орқасидан кимларнинг югур-

ган шарпалари эшитилди. Икки хизматчи чолганлар ирича Жұзжоний ҳузурига кирдилар.

— Тақсиrim, ҳарбийлар ҳовлига хуруж қилиб келмоқдалар.

— Қандай ҳарбийлар, қаерда?

— Улар дарвозани қаттиқ қоқдилар. Очмоққа ултүрмадик, дарвозани ағдариб ташқари ҳовлига кирдилар.

Шу вақт ҳовлида күп одамнинг қораси күринди. Шовқин-сурон. Жұзжоний дик этиб ўрнидан турди ва иш хонасидан ҳовлига чиқди. Ҳовли сарбозлар билан тұла. Улар хоналар әшикларини ланг очиб ичкарига кирмоқда, уйда бор нарсаларни күчага ташимоқда әдилар. Жұзжоний ва икки хизматчи уларға қараб ҳай-ҳайлар, аммо уларға ҳеч ким парво қымас әди. Барча сарбозлар хоналардаги нарсаларни таламоқ билан банд әдилар. Икки чўри аёл ошхонага беркиниб олиб бу даҳшатли манзарани қўрқув билан кузатишар әди. Молу мўлкка қузғунлар сингари ташланган бу ўғрилар, хайрият, бу икки кўхлик аёлларни кўрмадилар, ёки уларға назар солмадилар.

Таланчиларга баланд бўйли, ингичка, чўзиқ башарали, дўрттайган юқори лаби устига мохов зулукдек ёпишган қора мўйлабли бир сарбоз бошчилик қилас әди.

Ҳарбий кийимдаги бу форатгарлар уйдаги гиламлар, кўрпа-ёстиқлар, кийим-бош, идиш-товоқлар, ҳамма-ҳамма нарсачи каламушлар каби ташиб олиб чиқиб кетдилар. Ниҳоят таланчибоши олимнинг иш хонасига икки йигити билан кириб келди. Хона тұла китоблар, олимнинг қўллэзмалари. У барча китоблар ва қўллэзмаларни ҳовлига олиб чиқиб юборишни буюрди.

Бўлаётган расволикларни кўриб зўрга ўзини тутиб турган Жұзжоний бу фармойишни эшитгач, ўзини тутика олмади. У сарбозларнинг олдига тушиб китобларни ўз гавдаси билан тўсди ва ҳайқириб деди:

— Тўхтангиз, ахир булар китоблар-ку, бебаҳо китоблар-ку... Уларда ҳаммангизнинг дардингиз, касалликларингизга дори-дармонлар битилган. Бу гуноҳли жиноятдан сақланингиз, қилмишларингизни оллоҳ кўриб турипти, у сизларни жазолайди.

— Дажжолнинг шогирди, яна оллоҳни тилга олади-я, бу кофир,— деди ҳалиги босқинчи ва Жұзжонийни итариб ташлади. Йигитлар китоблар ва қўллэзмаларни ташлади.

ларни ҳовлига олиб чиқиб ёқа бошладилар. Жузжоний ӯзиға ваҳшатни кўриб ҳушдан оғди.

Жузжоний ӯзиға келиб кўзини очганда вақт шомга яқинлашган эди. Ҳовлида таланнинг чиркин излари қолган. Иккни хизматчи ва икки чўри бўм-бўш бўйиб ҳувиллаб ётган уйлардаги босқинчилардан қолган ахлатларни супурмоқдалар.

Жузжоний секин инқиллаб ўрнидан турди. У ҳовлига чиқиб бир чеккада юз қўйини ювди. Сал ӯзиға келгач, хизматчилардан бирини ўз ёнига чақирди ва ўнга деди:

— Иброҳим, сен мен билан бирга бўласан. Биз Шайхни кўчада кутамиз. Учрашгач у кишини бир холий жойга яширмоғимиз керак. Йўқса бу одамхўрлар яна келиб Шайхга бирор лат етқазмоқлари мумкин.

Жузжоний ва Иброҳим биргалашиб кўчага чиқишиди. Улар ҳовлидан анча нарида катта кўчага қараб муюлишда Шайхни кутишиди. Қош қорая бошлади. Кўчаларда қатнов камайди. Ниҳоят Шайх Абу Алиниг келаётгани узоқда кўринди. Жузжоний ва Иброҳим унинг қаршисидан чиқишиди. Шайхнинг қовоғи солиқ, табъи ноҳуш эди. Жузжоний ва Иброҳим унга салом беришиди, Шайх тўхтаб алик қилди. Ышундан сўнг Жузжоний ётиғи билан бугунги кўнгилсиз воқеаларни айтиб берди. Қитоблар ва қўллэзмаларнинг ёндирилганини сўзлагандага унинг лаблари титраб овози бўғилди, кўзиға ёш келди. Шайх Абу Алиниг қошлари қаттиқ чимирилди, аммо у ҳеч нарса демади.

— Устоз,— деди Жузжоний сал ҳаяжонини босиб,— сиз ҳозирданоқ беркинмагингиз керак. Чунки у жафожўйлар яна келиб ҳамла қилиб сизга озор етказмаклари аниқ. Биз Иброҳим билан бирга лозим нарсаларни олганмиз. Ҳозирданоқ бошқа бир ёққа йўл олайлик.

Шайх Абу Али Иброҳимнинг бўйнидаги ҳуржуни энди сезди. У бир оз ўйлаб тургач, Жузжонийга деди:

— Кўнглим сезган эди бу баҳтсизликларни. Ҳозир Қудуқлик маҳалласига Абу Саид ибн Даҳдуқнинг уйига бора қолайлик.

Учковлари ўша маҳалла сари жўнадилар. Йўлда Шайх Абу Али бугун саройда рўй берган ҳодисаларни айтиб берди.

Амир Шамсуддавланинг ҳузурига қўшинбоши Абу

Мажид Камолиддин Тафтозоний келиб вазирдан шикоят қилган ва уни хизматдан четлатиши талаб қилган. Йўқса не аҳвол содир бўладиган бўлса қўшинбоши жавобгар эмас. Маълум бўладики, Абу Мажид Камолиддин амир ҳузурида эканида унинг одамлари вазир Шайх Абу Алиниңг уйига ҳужум қилганлар, вазирни тополмасдан унинг ҳовлисида талан ва форат уюштирганлар.

Ҳамроҳлар тамомила қоронғу тушган пайтда Абу Сайд ибн Даҳдуқнинг ҳовлисига етиб келдилар. Бир маҳал бу одамнинг қизи оғир касалликка мубтало бўлганида Абу Али уни даволаб тузатган эди. Шундан бери Ҳамадоннинг бадавлат савдогарларидан бўлган бу киши табибга ихлоси жуда баланд, ўзининг унга яқинлиги билан фахр қиласи. Абу Али вазирликка ўтгач, савдо-сотиққа ривож бергани учун Абу Сайд ибн Даҳдуқ унга яна кўпроқ ихлос қўйди ва савдо аҳли орасида Абу Алиниңг мустаҳкам таянчини уюштириди.

Абу Сайднинг ичкари-ташқари катта ҳовлиси бўлиб, унинг орқасида боғи ҳам бор эди. Абу Али ўз одамлари билан Абу Сайднинг ҳовлисига келганида уй эгаси уларни курсандлик билан кутиб олди. Суҳбат чоғида у бўлиб ўтган ишлардан хабар топгач, ҳайратда қолди. Абу Сайд ўз уйи, боғи, бутун мулки билан Шайх хизматига тайёр. У боғ тўридаги меҳмонхонани Шайх ихтиёрига топширди. Маслаҳатга қўра Шайх Абу Али ва Жузжоний ҳозирча шу ерда қоладилар. Иброҳим эса Шайхнинг ҳовлисига қайтади.

Иброҳимнинг кетиши олдидан Абу Али Жузжоний орқали унга бир неча тилло берди. Бу пул ҳовлида беқаров қолган икки хизматчи ва икки чўрига керакли рўзгор буюмлари ва озиқ-овқат сотиб олиш учун етарли эди. Иброҳим пулни олиб улар билан хайрлашди ва чиқиб кетди.

Эртасига эрталаб нонуштадан сўнг Жузжоний имкондан фойдаланиб «Ашишифо» китоби устидаги ишни давом этдиришни таклиф қилди. Шайх бу таклифни қабул қилди. Улар бу ерда яширинча яшайтганларидарни учун беморларни кўриш вақтинча тўхтаган эди. Шайх Абу Али илмий ишларга кўмилиб кетди. У эрталабдан кечгача тинимсиз ёзар, кеча ёзганларини бугун бир қур кўздан кечириб чиққач, Жузжоний улар-

ни оқقا кўчира борар эди. Устоз гоҳо шогирдига азбар (диктовка) қилас, сўнг Жузжоний бу ёзганларини яна бир бор оқча кўчирап эди. Шайх Абу Али ишлатгани пайтида бирор китобга қарамас, ҳамма нарсанни хотирида сақлагани учун барча билганлари ва ўйланларини тинимсиз равишда қофозга тушира борар эди.

Шу йўсинда йигирма кун ўтди. «Ашшифо» китобининг табииёт ва илоҳиётга оид қисмлари ёзиб тугалланди. Энди «Алҳайвон» ва «Аннабот» («Жонлилар» ва «Ўсимликлар») қисмлари ёзилмоғи керак.

Шайх Абу Али Ҳамадондан чиқиб кетиш тараддуғига туша бошлади. Чунки бундай аҳвол ва шароитга ортиқ чидаб бўлмайди. Бир одамнинг уйидага беркиниб яшамоқ мумкин. Ҳаёт ўз зарбасини аёвсиз бермоқда. Олим тоқат қиласи. Фақат меҳнат, том маънодаги ижодий меҳнатгина унга юпанч бағишлийди. Ёзаётган китобларининг ҳар бир боби унинг озурда кўнглига зўр бир таскин. Чунки олимнинг ҳаёти маънавий сархушлик бағишивчи куч шу илҳомли, тинимсиз ва баракали меҳнатdir.

ҚУРНАМАҚЛИК

Улуғ табиб яшаган ҳовли ғоратгарларнинг хуружидан сўнг ҳазон бўлган боғдек ҳувиллаб қолди. Ичкари ташқари ҳовлиларда одам шарпаси эшитилмайди. Ҳамма ёқ бўм-бўш. Ташқари ҳовлида Иброҳим билан бир хизматчи, ичкари ҳовлида эса икки чўри турадилар. Чўрилардан бири Шерозли турк аёли, иккинчиси эса Мовароуннаҳрдан. Жузжоний бу икки ёш аёлни қул бозоридан сотиб олиб келтирган. Уларнинг ваҳшатли ва бадбашара хўжайини бу ёш ва гўзал чўриларга катта баҳо айтди. Жузжоний савдолашиб ўлтирамай дарҳол айтилган ҳақни тўлаб уларни сотиб олди. Бу икки ёш гўзалнинг Абу Али даргоҳида бўлмоғи қўлликдан озод қилиниши билан баробар эди.

Жузжоний уларни бозордан ҳовлига бошлаб келар экан, инсонлик, ёшлиқ, гўзалликнинг тутқунликка мубтало бўлмоғидан таъсиrlаниб қадам ташлар эди. Бу қандай адолатсизликки, бир инсон иккинчиси томонидан мол сифатида савдо қилинса, инсонлик қадрини бундан ортиқ тубанлаштиromoқ мумкинми? Жузжонийга бирдан-бир тасалли берган ҳол иккала ёшни ўша сержаҳл ва бадбашара қулдордан қутултиргани эди. Булар Абу Али хонадонида чўри деб аталсаларда, бекалардай яшайдилар. Ҳар иккала ёш гўзал тезда қандай мўътабар даргоҳга, қандай нодир табиатли хўжа қўлига тушганларини англаб етдилар ва бу кутилмаган баҳтиёрикка шукроналар қилдилар. Улар устоз ва шогирдга сидқидиллик билан хизмат қилар, ҳамма айтилган юмушларни мамнуният билан, тез ва ўрнига қўйиб бажарап эдилар. Уй эгаси уларга қанчалик яхши ва ҳурматли муомалада бўлмасин, бу идрокли ва назокатли аёллар хатту-ҳаракатда ҳеч қачон меъёрдан ўтмас, ўзларининг аҳволлари тақозо этган йўсинда иш тутар, хўжа ва чўри ўртасидаги масофани одоб ва астойдиллик билан сақлар эдилар.

Иброҳим билан турган хизматчи қишлоқдан келган. У етимлика ўсан ёлғиз йигит эди. У Шайх Алига ўз отаси каби қарап, унга чин садоқат ва ҳурмат билан хизмат қилар эди.

Иброҳим эса асли Ҳамадондан. Унинг отаси ўлиб кетиб онаси бошқа кишига эрга берилган. Шунинг учун Иброҳим болаликдан ўз тирикчилигини ўзи ўтказишга мажбур бўлган. Иброҳимнинг мақсади озгина пул жамғариб ўзининг мустақил ишини бошласа. У Шайх даргоҳида бемалол яшар, хўжасининг сахий қўлидан яхши ҳақ ва инъомлар олар, уларни аста-секин йигиб борар ва тезроқ ўйлаган мақсадига эришмоққа интилар эди.

Оқшом. Икки хизматчи ташқари ҳовлидаги супада кечки овқатдан сўнг чой ичиб ўлтиришипти. Таландан сўнг бу ҳовлига ҳеч ким келмайди. Хизматчилар фақат ҳовлини қўриқладилар. Чўрилар уй йингиштирадилар, овқат пиширадилар.

Иброҳим ўз шеригига уларнинг маҳалласидаги бир чаққон йигитнинг қандай қилиб бойиб кетганини ганириб бермоқда эди.

Шу пайт бирдан эшик қаттиқ тақиллади. Иброҳим шеригига имо қилди. Шериги ўрнидан туриб бориб

эшикни очди. Эшикдан икки ҳарбий кийимли сipox кириб келдилар. Иброҳим ўрнидан сакраб туриб келганларга салом берди ва уларни супага ўлтироққа таклиф қилди. Сipoxлар ўлтирмадилар. Улардан бири сўради:

— Табиб ҳазратлари қаердадирлар?

Иброҳим индамади. Шериги жавоб бериб деди:

— Таландан сўнг мана қирқ кундирки, уйга келганлари йўқ. Қаерда эканликлари бизга номаълум.

Талан сўзини эшитган сipox бир ижирғаниб юзини буриштириди. Вазир Шайх Абу Алининг уйига бўлган ҳужум тўғрисидаги овоза бутун шаҳарга ёйилиб кетган эди. Бу ҳодиса ўзининг машъумлиги билан вазирнинг дўстларини ҳам, душманларини ҳам изтиробга солди. Купла-кундуз куни вазирнинг уйини талаган ўғрилар бошқа ҳовлиларга ҳам ҳужум қилишлари мумкин-ку! Булар ҳарбийларми ёки таланчиларми? Таланга бош қўшмаган ҳарбийлар ичидан ҳам бу ишдан норозилар бор эди. Чунки улардан баъзилари ўзлари ёки қариндош-уруглари табибининг мўъжизакор даволаридан шифо топганлар. Умуман кўпчилик Шайх Абу Алининг уйига бўлган ҳужумни беибо шармандалик деб қораладилар. Шунинг учун вазир Шайх Абу Алига қарши чиққан қўшинбошилар ўз қилмишларидан саросимага тушдилар. Улар калта-фаҳмлик билан тутган йўллари бундайин нафрат жарига элтмоғи мумкинлигини ўйламаган эдилар.

Тағин ўчакишгандай амир Шамсуддавланинг қуланж касали яна қўзиб қолди. Ҳеч ким унга даво топа олмайди. Фақат улуғ табиб Абу Алигина бу дардга шифо бағишлови мумкин. Абу Али эса йўқ. Унинг қаерда эканини ҳеч ким билмайди. Амир ўз одамларига қаердан бўлмасин Абу Алини топмоқни буюрган. Сipoxлар шунинг учун унинг ҳовлисига келган эдилар.

Иброҳим гапга қўшилмай ҳамон жим турар эди. Сipoxлар бир оздан сўнг ҳовлидан чиқиб кетишиди. Улар кўчага чиққаёт, Иброҳим шеригига:

— Сен дастурхонни йиғишириб қўйгин. Мен ямоқчига берган этигимни олиб келаман,— деди ва кўчага чиқди.

Сipoxлар кўчада отга миниб йўлга тушган эдилар. Иброҳим уларнинг ортидан бораверди. Сipoxлар на-

риги кўчага бурилишгандин сўнг Иброҳим тез югуриб уларга етиб олди ва деди:

— Жаноблар, агар Шайхни бирор киши топиб берса не мукофот бўлур?

Сипоҳлардан бири индамай чўнтағидан бир халтачадаги олтинни олиб кўрсатди. Кўчада ҳеч ким йўқ эди. Иброҳим икки қўли билан сипоҳнинг узангига ёпишиди.

— Мен айтаман Шайхнинг қаердалигини. У Қудуқлиқ маҳалласидаги Абу Саид ибн Даҳдуқнинг боғида беркиниб яшамоқда.

— Алдамайсанми, ит боласи?

— Худо урсин. Чин сўз бу. Мен ўзим талан куни Шайхни ва унинг шогирдини ўша ерга кузатиб борганман.

— Сўзинг ёлғон бўлса, олтиндан ҳам, бошингдан ҳам жудо бўласан, ҳаромизода!

Иброҳим қайта-қайта қасам ичиб ўз сўзини тасдиқлади.

Уша кечаси Иброҳим миршабхонада тунади. Чунки, айтганлари рост чиққунча уни қўлда тутдилар. Эрталаб бу кўрнамак ўзидан мамнун бўлиб хўжайнининг ҳовлисига қайтди. Унинг қўйнида олтин тўла халтacha ётарди. Хўжайнининг ҳар бир ҳаракатидан хабар етказиб туриш тўғрисида берган тилхати эса миршабхонада қолган эди.

ХИЗМАТ ВА ТУРМУШ

Уша куниёқ сипоҳлар табибни беркинган жойидан топиб амир Шамсуддавла ҳузурига келтирдилар. Оғир нотобликка учраган бемор амир юз берган кўнгилсиз ҳодисалар учун Шайхдан узр сўради, ундан ўз вазирлик вазифасини адо этмоқни давом этдиришни сўради. Табибининг биринчи вазифаси беморни даволаш. Шайх Абу Алиниг мўъжизали шифолари туфайли тезда амир қуланж касалининг қийноқларидан қутулади. Унинг кўзига бўлак бошқатдан ёруғ дунё кўринди. У табибдан жуда миннатдор, ўтган нохуш ҳодисаларнинг изларини Шайхнинг кўнглидан чиқариб юбормоқ учун кўп ҳаракат қиласи.

Шундай қилиб Шайх Абу Али яна саройда, вазирлик вазифасини адо эта бошлади. У амирнинг ҳара-

катларини сезади. Аммо олим яхши тушунадики, гап бир кишида эмас. У хоҳ амир бўлсин, хоҳ қўшинбоши, бир кишининг қўлидан кўп нарса келмайди. Гап ўрнашиб қолган одатлар, муносабатларда: улар туфайли вужудга келган шароитда. Вазир ана шуларни ўзгартиromoққа интилади. Шайх Абу Али ўзи учун амир даргоҳидан ҳеч нарса талаб қилмайди. Ўзининг табиблик орқали топган даромади ва олаётган хизмат маоши унинг тирикчилиги учун етарли. Бу даромад ҳовлисини бир меъёрда тутмоқда, ўзи ва хизматчила-рининг иш ҳақи ва таомини қоплашга бемалол етиб ортади. Абу Алиниг оила, хотин, бола-чақаси йўқ. Меросхўрлари ҳам йўқ. У бутун ҳалқни ўзи оила аъзо-лари, фарзандлари сингари кўради. Шу ҳалққа ғам-хўрлик, нотобларини даволаш, соғларини ҳимоя қи-лиш, мамлакатни ободонликда, ҳалқ ҳаётини фаровон-ликда асраш учунгина интилади, тинмай ишлайди бу олим, табиб, вазир. Сарой атрофидаги турли тасо-дифий кимсалар, хазина ўғрилари, фисқу-фужур аҳли Шайх Абу Алини ёмон кўрадилар: кўршапалак ёруғ-ликка чидай олмагани сингари улар Шайхнинг қалби, олий интилишлари нури остида типирчилайдилар, унга қарши қора душманлик дудини ҳар ён тарқата-дилар. Элу-юрт манфаатини кўзловчи тоза юрак одам бу ҳаромхўрларнинг кўзига мудҳиш кўринади, улар адолат, инсоф тўғрилик шуълаларига сира чидай олмайдилар.

Атрофида қандай ёвуз муҳит мавжуд бўлмасин Шайх Абу Али ўз хизматида ҳалқпарварлик йўлидан қатъий борар эди, у ҳамиша мазлумлар додига етар, бева-бечораларга кўмаклашар, золимлар ва ўғриларга қарши кескин курашар эди.

Абу Али вазирлик хизмати билан қанча банд бўл-масин, у ҳамиша беморлар муолижаси, илмий маш-ғулот, дарс ўқимоқ: олимлар, шоирлар, созандалар суҳбати учун ҳам вақт топар эди.

Бугун Шайх Абу Али саройдан ҳовлисига кеч қайтиди. Бу ерда иш хонасида уни Жузённий ва бир қанча бошқа шогирдлар кутмоқда эдилар. Шайх уйга кириши биланоқ ҳамма гурр этиб ўринларидан туриб салом бердилар. Устоз очиқ чехра билан саломлашди, ҳар бирининг ҳолу аҳволини сўраб чиқди. Сўнг ичкари уйга ўтди ва бир оз фурсатдан кейин ичкаридан ювинган, уй кийими кийган ҳолда чиқди. Барча-

лари овқатхонага ўтдилар ва дастурхон атрофиға ўлтирилар. Шайх Абу Алининг уйи ҳамма яқинлари учун азиз ва очиқ даргоҳ. Ҳар куни бу уй дастурхони атрофида ўн беш-йигирма одам жам бўлади. Бирор мартаба Абу Али ва Жузжоний иккаласи ёлғиз ўлтириб овқатланган эмаслар. Ҳозир ҳам шундай. Дастурхон устида турли латиф таомлар муҳайё. Шероз ва Мовароуннаҳр гўзаллари бўлмиш олим уйидаги аёллар ғоят пазанда эдилар. Улар қайси овқатларни қай вақтда ва қандай пишиromoқни улуғ табиб ёзган китоблардан ўқиб ўрганадилар.

Безакли дастурхон устида батартиб тортилган маъзали таомлар иштаҳани очади. Жамиятнинг кайфияти хуш. Озгина, ўз меъерида тортилган шароб бу кайфиятни яна кўтариб юборди. Табиб аҳён-аҳёнда овқат маҳалида озгина ичилган шароб фойдали дер эди. Умуман шароб заҳардир. Лекин ҳар бир заҳар каби оз-оз ишлатилса, у дори бўлади. Чунки ичилган шароб томирлардаги тиқилмаларни юритиб юборади, шубилан қон ҳаракати яхшиланади: овқат ҳазмига ёрдамлашади: суҳбатни қовуштиради. Шароб ичган киши мусиқа тингламоққа мойил бўлади. Аммо шароб ичмоқ ҳеч қачон мўътадилликдан нарига ўтмаслиги, ҳар бири кишининг ўзигагина хос бўлган меъёрдан ошмаслиги шарт.

Шароблар тортилғач, таомлар тановули бошланди, кишиларнинг кайфи яна чоғроқ бўлди, суҳбат, кулги қизиди. Бир йигит шеър ўқиди.

Унга бошқа бир йигит Шайхнинг шароб тўғрисида ёзган шеърини ўқиб жавоб қилди.

Шеърхонликдан сўнг созандалар чолғи асбоблари ни қўлларига олдилар. Дијрабо оҳанглар янгради. Ҳамманинг кайфи хуш, дили сархуш эди. Бу хурсандчилик узоқ кечгача давом этди. Сўнг одамлар тарқалишди.

Абу Али ўз хонасига ўтди. Мовароуннаҳрли гўзал кўрпа-ёстиқларни, тоза чойшабларни тўшаб тайёр қилиб қўйган эди. Ўзи ҳам ҳарир ипак кийимларда. У сузилган жоду кўзларини уй эгасидан узмас, унинг барваста қомати, кучли билаклари, қувватли бағрига суқлиқ билан боқар эди. Бу аёл чин кўнглидан Абу Алини севиб қолган. Ўзи нозикбадан, уятчан ва тортичноқ бўлса-да, Абу Али билан ёлғиз қолганида битмас-туғанмас эҳтирос касб этар, севгилисининг қўйни-

да типирчилаб ўт бўлиб ёнар, айниқса, уни шерозли дугонасидан қизғонганида янада кучлироқ оловланар эди...

Эрта тонг. Ёш гўзал барвақт уйғонди. У тезда ўрнидан турди, ювинди, сўнг ҳаммомни тайёрлаб қўйди-да, нонушта тайёрламоққа киришди. Шерозли дугонаси гўё ҳеч нарсадан хабари йўқдек унга қарашар эди. Ҳар иккала гўзал Шайхга муносабат масаласида чиқишолмасалар-да, бошқа ҳамма нарсада бир фикрли эдилар ва бир-бирларига жуда суюнишар эди. Ўз юрти, ота-она, оиласи, яқинларидан жудо бўлган бу икки ёш қалб бир-бирининг ҳамоҳанглиги билан барқарор. Дилларида бу мўътабар даргоҳга тушганла-рининг шукронаси. Лекин иккаласи ҳам олийжаноб инсон, баркамол ва мард эркак Абу Алига кўнгил боғлаганлар: унга хизмат қилиш, унинг кўнглини олиши ни энг ёқимли, миннатдорлик билан адо этувчи хизматлари сифатида қабул қиласар ва шу билан шод эдилар.

Нонушта тайёр бўлгач, ошхонага Иброҳим кириб келди. У хўжайинига нонуштани ўзи олиб кирадиган бўлган. Иброҳим кейинги вақтларда имкон борича Шайх ҳузурида кўпроқ бўлишга, унинг сўзларини тинглаш ва кузатишга ҳаракат қиласар эди. У шумпашша каби Шайх атрофида ўралишар, шу қилиғи билан ҳатто Жўзжонийнинг жигига тега бошлаган эди. Аммо Шайх бунга заррача парво қилмас эди.

Иброҳим ҳатто табиб беморларни кўраётган вақтида ҳам унинг ёнида бўлишга, кўмаклашувни баҳона қилиб уни кузатувга, айтганларини ёдда сақловга ҳаракат қиласар эди. Чунки у ё ҳар куни, ё кунаро миришабхонага шайх тўғрисида гап етказиб туриши керак. Шайхга нисбатан ёмон фикр туғдирувчи гап топиб борса Иброҳимнинг ўша кунги даромади анча барақали бўлади. Жўзжоний китобларни кўчириб ёзиш билан кўпроқ банд бўлгани сабабли Иброҳим Шайх атрофида муттасил ўралашадиган бўлди, ҳатто у дори-дармонлар тайёрлашга ҳам аралашар, баъзи енгилоқ дориларни қилишни ўрганиб ҳам олган эди. Ҳар қандай одамда яхши томонларгагина аҳамият берувчи олим Иброҳимнинг серҳаракатлигини кўриб беморларни даволашга унинг хизматидан кўпроқ фойдаланар, иш устида даволашга оид баъзи ишларни ўргатар эди. Йишонч қозониб олган Иброҳим секин-секин

ўз мақсадини амалга оширишга ҳозирлик кўра борди. Кундуз кунлари ҳовлида одам кам бўлар, аёллар ичкари ҳовлидан чиқишишас, бошқа хизматчи йигит эса кўп заҳматкаш, меҳнатга қойим, аммо жуда содда ва тўғри бўлганидан чумоли каби тинимсиз иш билан банд бўлар ва Иброҳимнинг қилғиликлари билан ҳеч иши йўқ эди. Кундузлари Жузжоний бирор иш билан бир ёққа кетганда Иброҳим уйдаги қимматли буюмлардан битта-битта ўғирлаб олиб чиқиб кетар эди. У қўшни маҳалладаги бир бева хотин билан алоқада бўлиб унга уйланмакка ваъда қилган, ўғирланган нарсаларини ўша ерга олиб бориб яширади.

Кунлар шу зайлда ўтиб борди. Шайх Абу Али Хусайн ибн Абдуллоҳ ибн Сино одатдагидек табиблик ва вазирлик вазифаларини адо этар, орада илмий китоблар ёзиши давом этдиради. Вақт ғилдираги ўз йўналишида аста-секин, лекин тўхтовсиз ҳаракатда.

1021 йили Ҳамадон подшоҳи Шамсуддавла вафот этди. Тахтни унинг кичик ўғли Самоуддавла эгаллади. Бу ёш амир даргоҳида хизмат килмоқ оғир бўлажаги Шайхга аён. Чунки ёш амир иш билмайди. Атрофини эса ёмон ниятли одамлар ўраган. Амир уларнинг измидан чиқмайди. Шунинг учун Шайх Абу Али вазирлики давом этдириш тўғрисидаги амирнинг таклифини рад қилди ва вазирлик хизматидан воз кечди. Бу лавозимни, унга интилиб эси кетиб юрган Тожулмулк эгаллади.

Кунлардан бир кун Шайх Жузжонийга деди:

— Биз сарой хизматидан воз кечдик. Бундан буён бир мунча фурсат сарой аҳлиниңг кўзига кўринмай турган мақбулдир. Шунинг учун биз Абу Голиб ал Атторнинг уйига бориб ўша ерда яшайлик ва китоблар таълифи билан машғул бўлайлик. Ҳовлида Маҳмуд қолсин.

Шайх Абу Алиниңг укаси Маҳмуд бир неча фурсат бурун Бухородан Ҳамадонга келган ва акаси билан бирга яшай бошлаган эди.

Абу Голиб ибн Аттор дориворчи бўлиб, у табиби билан ҳамкорлик қилас ва улуғ табибга ҳурмати балянд эди. Унинг Ҳамадонда бир неча ҳовлиси бўлиб шулардан бири бўш ётган боғли ҳовлисими табибга таклиф қилган эди.

Ўша куни эртасига Абу Али, Жузжоний ва Мова-

роунаҳрли гўзал ўша ҳовлига кўчиб ўтдилар. Уларга Иброҳим қарашиб турди.

Бу ерда эртаси куни эрталабданоқ Шайх Абу Али ва Жузжоний илмий ишларини давом эттирдилар. Шайх «Ашифо» китоби устида ишлар эди. У фоят тез суръат билан ёзади. Бир кунда ҳатто эллик саҳифа ёзган вақтлари ҳам бўлди. Жузжоний аранг қофоз тайёрлаб улгуар эди. Шайх олдин бир-икки кун давомида бўлажак китобнинг мундарижасини тайёрлайди, сўнг ўшанга қараб-қараб ҳар бир бобни ёзишга киришади. Шу йўсинда бу шоҳ асарнинг айрим бўлаклари тайёр бўла борди.

Математикага оид асар эса олдин ёзилган эди. Олим буни «Ашифо»га алоҳида бир бўлак қилиб киритди.

Шундай қилиб, Ҳамадонда Шайх Абу Алиниң «Ашифо» асарининг уч бўллаги ёзилди.

Кейинчалик олим Исфаҳонда бу китобнинг ҳайвонотга ва ўсимликларга оид бўлакларини ёзиб чиқди. Улар «Алҳайон» ва «Аннаботот» деб аталади. Ҳайвонотга оид бўлакни Аристотель асарларига қиёс қилиб керакли жойларини тўлдирди. Шу йўсинда «Ашифо» китоби юзага келди. Бу шоҳ асарни ёзиб тугатганида Шайх Абу Али Ҳусайн ибн Абдуллоҳ ибн Синонинг ёши қирқда эди¹.

«АШИФО»НИНГ МАЗМУНИ

Бу китоб Шайх Абу Али Ҳусайн ибн Абдуллоҳ ибн Сино яшаган даврдаги, яъни ўнинчи аср мусулмон шарқидаги барча билимларни қамраб олган қомусий асардир.

«Ашифо» («Даволов») нинг биринчи бўллаги табиийётга оид асарлардан иборат. Бунда олим Арасту (Аристотель)нинг «Физика» китобида айтилган масалалар бўйича фикр юритади: табиийётнинг асослари ни баён этади: ҳаракатлар, жисмлар, улар парчалангандага юз берадиган ҳодисалар, моддаларнинг табиий ҳолатлари, уларнинг ўзаро муносабатлари, жинслар

¹ «Ашифо» тўғрисида қаранг: А. Ирисов, «Абу Али ибн Сино» Тошкент, «Фан», 1980, с. 121—142; Абу Убайд Жузжоний, «Абу Алига мойил бўлгим келарди», Журн. «Гулистон» (Тошкент), № 8, 1980 й. А. Ирисов таржимаси.

ва навлар, улар орқали содир бўладиган ҳодисаларни баён қилади. «Ашифо»нинг табиийёт бўлимида осмон ва ерга оид ҳодисалар, турли моддалар ва элементларнинг ўзига хос хусусиятлари, иссиқлик ва совуқлик, мижоз, осмон жисмлари: ер юзасидан кўришилар — буғланиш, чашмалар, ер қимирлаши, тоғлар, водийлар, саҳролар, денгизлар, сувли ва камсув ерлар тўғрисида турли маълумотлар келтирилади.

Табиийёт бўлимининг маҳсус боблари ўсимликларга, ҳамда ҳайвонларга бағишланган.

Табиийёт бўлимидан сўнг риёзиёт (математика), илохиёт ва аҳлоқ бўлиmlари келади.

Риёзиёт (математика) бўлимида ҳандаса (геометрия), ҳисоб (арифметика), мусиқа, илми нужум (астрономия) тўғрисида билимлар жамланган.

«Ашифо»да Шайх Абу Али ўзидан олдин ўтган олимларнинг шу илмий соҳаларда яратган асарларига хуносалар ясаган, баъзан эса уларга ўз қўшимчалирини киритган. Масалан, Жузжонийнинг хабар бериниша кўра «Ашифо»нинг математика бўлимида, шайх Абу Али Уқлидус (Евклид) геометриясига параллакс (ҳеч қачон кесишибидиган ёнма-ён) ҳақидаги ўзи ишлаб чиқсан ўнта теоремани қўшган. Шу бўлимининг астрономияга оид бобида астрономияга оид Птоломейнинг машҳур «Алмажастий» асарига тамомийла янги фикрларни киритган.

«Ашифо»даги «физика» бўлимининг олтинчи боғи — «Китоби нафс»дир (Муаллиф бобларни «фан»— «билим» деб атаган).

«Китоби нафс»да олим танадаги барча аъзоларнинг ҳаракати нафс туфайли амалга ошади, демак барча ҳаракатларни юзага келтирувчи нарса нафс деб аталади, деб ёзган. Шундан сўнг қадими олимларнинг нафс тўғрисида айтганлари келтирилган. Баъзилар танани ҳаракатга келтирувчи куч нафсдир деганлар. Ўзи доимо ҳаракатда бўлгани учун у ўлмайди деб ҳисоблаганлар. Баъзилар эса нафс бошланғичдир, деганлар. Яъни уни олов, ҳаво, ер, сув, деб билганлар. Баъзилар нафс қондир, чунки қон тўхтаса ҳаёт тўхтайди, деганлар. Баъзилари нафс худодир ва у ҳам табиат, ҳам ақл, ҳам жон сифатида мавжуд деган фикрни билдирганлар.

Шайхурраис бу фикрларни асосли равишда бирмабир рад этиб чиқади. Сўнгра нафс, унинг ҳаракатла-

ри, кўринишлари, кучлари тўғрисидаги ўз тасаввурини баён қиласди. Нафс жисм эмас. Материя бир алоҳида қоришмада мавжуд. Бу қоришмада нафс бўлади. Шунинг учун ҳам материя мавжуд. Нафс материяни шу қоришмада барпо этади. Нафс ўсимлик ва ҳайвонотнинг мавжудлигига сабабдир. Нафс яралиш ва ўсишнинг бошланувидир.

Ўсимликларда ўсимлик нафси бўлади. Аммо ўсимликлар ва ҳайвонот нафсини бирлаштирувчи омил ўсимликларни ҳам, ҳайвонотда ҳам мавжуд. Ўсдирувчи куч ўз танлавига кўра органни янада тугал бўлмоққа ҳозирлайди. Бу тугаллик эса бошқа бир нафсга оид кучдир. Ана шу нафсни ҳайвонот нафси деймиз.

Шайхурраиснинг ёзишича, умуман нафс бир бутун. У барча органларни бир-бирига боғлайди, уларни йиғиб бир бутун жисм ҳолатига келтиради ва уни мунтазамликда сақлайди.

Шундан сўнг олим нафс кучлари ва уларнинг ҳаракатлари тўғрисидаги фикрларини изҳор эта бошлайди.

Ўсимлик нафсида уч куч бор: озиқлантириш кучи — бу жисмни ўзгартиради. Ўсув кучи — бу жисмни катталаштиради. Кўпайтириш кучи — бу өшқа ўхшаш жисмлар ёрдамида жисмнинг бир бўлагидан янги бир жисм юзага келтиради.

Ҳайвонот нафсида ҳаракатлантирувчи ва қабул қилувчи кучлар бор. Ҳаракатлантирувчи қўзғатади, интилтиради ё рад қилдиради. Қабул қилувчи куч эса ташқаридан, ёки ичкаридан қабул қиласди.

Ташқаридан қабул қилинувчи қуйидаги сезгилардир: кўрув, эшитув, ҳидлов, таъм, сезув.

Ичкаридан қабул қилинувчилар: хаёл, фикрлов, фарз, сақлов ва хотира.

Барча кучлар устидан ақл бошчилик қиласди.

Шундан сўнг Шайхурраис ўсимлик ва ҳайвонот нафсига алоқадор сезгилар тўғрисида сўз юритади (Бу ерда ўсимлик ва ҳайвонот фалсафий, кенг маънода — ўсувчи ва жонли мавжудот маъносига ишлатилмоқда. А. Қ.).

«Китоби нафс»нинг бешинчи бўлими инсон нафсига оид мулоҳазаларни ўз ичига олган.

Инсонга хос хусусиятлардан бири ажойиб нарса-

ларни қабул қилишдан келиб чиқадиган рефлекс¹дир. У ҳайрат кетидан кулги қўзғатади. Заарарли нарсалар рефлекси эса қўрқув ва йиги келтиради.

Инсон жамиятдан ўз фойдаси учун амалга ошириладиган ёки қилинмаслиги лозим бўлган ҳаракатларга аҳамият беради. Уни болаликдан шунга ўргатадилар. Ниҳоят улар эътиқодга айланади. Улар яхши ва ёмон ишлардир.

Инсон фақат жамият ичидаги яшай олади. Агар бир одам ёлғиз ўзи бўлганда у аллақачон йўқ бўлиб кетган бўлар эди. Инсоннинг яшамоги учун зарур нарсаларни кишилар бир-бирларига тайёrlаб берадилар. Уларнинг ўзаро муомалалари учун энг қуладай восита — овоз.

Шу мулоҳазалардан сўнг Шайхурраис инсоннинг ҳис ва туйғулари, уларнинг келиб чиқиши, нафснинг ҳалок бўлмаслиги, кўчмаслиги тўғрисида сўзлайди, ақл ва нафс муносабатлари тўғрисида фикр юритади.

«Китоби нафс»нинг охириги қисми нафс органлари га бағишлиган. Шайхурраис айтадики, нафс дастлаб юрак билан алоқа боғлайди. Юрак орқали вужудга тириклик бағишиланади. Юрак билан алоқа қилиш орқали бошқа органлар фаолият касб этадилар. Мияда руҳ қоришимаси якунланади. Бу қоришка таъсирида барча органлар ҳаракатга қобил бўладилар. Масалан, жигар овқатга нисбатан ҳаракатда бўлади. Аммо биринчи ҳаракат манбаи юракдир. Жигар ҳам ўз фаолиятини юрак ҳаракати таъсирида амалга оширади.

Шундан кейин олим мия, жигар ва бошқа органларнинг фаолияти тўғрисида фалсафий умумлашмаларни изҳор этади ва «Китоби нафс»ни тугаллайди.

Шайх Абу Алининг «Ашшифо» китоби ҳозирги тилларга тўласичча таржима қилинмаган. Бу китоб ўзининг жонкуяр янги тадқиқотчиларини кутмоқда.

ХИЕНАТ ВА ИФВО

Ҳамадонда ал-Атторнинг кўркам ва шинам боғ ҳовлисидаги турмуш илмий жиҳатдан унумли бўлди. «Ашшифо»нинг кўп қисмлари қўлдан чиқди. Сарой-

¹ Рефлекс — баданинг бирор таъсир билан ҳаракатга келиши; акс этиш; кўнгикма (ред.).

даги фитна ва фужурлардан узоқлашгани туфайли олим кўнгли анча ором топди.

Аммо яширинча яшамоқ қанча давом этмоғи мумкин. Муттасил беркиниб яшаш мумкин эмас-ку.

Шайх Абу Али энди Ҳамадонда ортиқ қолиб бўлмаслигини фаҳмлаб етди. Яна тақдирнинг синов фурсати келганига ўхшайди. Шайх укаси Маҳмудни бир мактуб билан Исфаҳонга жўнатди. Бу мактубда Шайх Абу Али Ҳусайн ибн Абдуллоҳ Исфаҳон амири Алоуддавлага ўз ҳурматини изҳор қилган ва амир Алоуддавла хизматида бўлмоқ ихтиёри борлигини ёзган эди.

Маҳмуд хизматчи йигит билан Исфаҳонга йўл олди. Энди Шайхнинг ҳовлиси бутунлай бўшаб ҳувиллаб қолди. Иброҳим учун эса жуда қулай имкон туғилди. У таландан сўнг бўлак бошқатдан тикланган уй рўзгор анжомларини ўзи олиб келиб жойлаган. Шунинг учун нима нарсанинг қаерда эканлигини жуда яхши билади. Иброҳим ҳовли пойлаб ёлғиз қолганидан фойдаланиб уларни каламуш сингари бирмабир ташимоқда давом этди. Олтин-кумуш буюмлар, гиламлар, қимматбаҳо нарсаларнинг кўпи қўшни маҳалладаги беванинг уйига ўтди. Иброҳим ҳозирча бирор мустақил иш очиш мақсадига ҳам шошмайди. Чунки улуғ табиб рўзғорига канадек ёпишиб олгани сабаб иши ўнгидан келиб турмоқда. Бу ердан ўғирлаб олиб кетган нарсалари унинг бир умрлик тириклигига етгудай. Яна миршабхонага етказиб турган хабарлари учун ҳам мўмайгина ҳақ олади. Чақимчилик ва гап ташиш ҳам туппа-тузук даромад манбай экан.

Фақат буйруққа кўра у миршабхонага чақирмасалар ўзи бормаслиги керак. Мана шайхнинг беркинганига йигирма кунча бўлди. Иброҳимни ҳеч ким чақирмайди. Бу хабардан оладиган пул ҳали унмай келяпти.

Бугун кечқурун ниҳоят миршабхонадан одам келиб Иброҳимни чақириб кетди. У кечқурун миршабхонага етиб борди. Миршабхона эшигидан кирар-кирмас Иброҳимни етаклаб иккинчи қаватга олиб чиқдилар. Тўрт томони ёпиқ бир хонада шамлар ёруғ ёна дилар. Хона тўрида атлас кўрпачада мўйлабларини шоп қилган бир сарбоз ўлтирипти. У Иброҳимнинг иш буюрувчиси. Бу одам Иброҳим келтирган хабарларни вазирга етказиб яна кўпроқ пул ишлайди, я

да юқорироқ мартабага эришади. Чунки янги вазир Тожимулк олдинги вазир Шайх Абу Алини доим пойлаб кузатиб туради.

Сарбоз Иброҳимнинг саломига аранг бош қимирилатиб жавоб берди-да, ўлтирип, деган ишора қилди. Иброҳим пойгага тиз чўқди.

— Шайх ҳозир беркинган. Унинг қачон ва қаерда беркинганини биласанми?

— Биламан, тақсирим,— деди Иброҳим ҳозиржавоблик билан.— Шайхнинг беркинган жойи Ҳамадоннинг шарқ — шимолидаги маҳаллада, Абу Ғолиб ибн ал-Атторнинг ҳовлисида. Мана йигирма кундирки, Шайх, Жузжоний ва Мовароуннаҳрли чўри ўша ҳовлида истиқомат қилмоқдалар.

Сарбоз мўйлабларини бураб мамнунлик билан тиржайди. Бундай хабарчилар билан иш ўнгидан келаберади.

— Яна бир муҳим гап бор,— деди Иброҳим ўлтирган ўрнидан сал олдинга силжиб, овозини пастроқ қилиб,— Шайх амир Самоуддавлага хиёнат қилиб Исфаҳон амири Алоуддавла хизматига ўтмоқчи. Мана иккинчи кундирки, укаси Маҳмуд Шайхнинг бу тўғридаги мактубини олиб Исфаҳонга жўнаган.

Сарбознинг кўзи олайиб кетди. Бу хабарни вазир Тожулмулкка етказганида қандай мукофот олажагини у дарҳол тасаввур этди.

— Яна нима гаплар бор?

— Нимаики, бўлса дарров хабарни етказамен, тақсирим!— деди Иброҳим сарбознинг қўлига оч мушукдек термулиб.

— Бўнти. Агар зарурат туғилгудек бўлса ўзим чақирираман. Сен бу ерга вақти-бемаҳал ўралашиб сирни ошкор этиб қўйма. Аммо шайх даргоҳидан ва унинг ёнидан бир қадам нари жилма!

— Хўб, бўлади, тақсирим.

Сарбоз қўйнидан бир халтачада тиллони олиб Иброҳимга отди. Иброҳим бир ҳафтадан бери оч юрган ит бир парча ғажилган суюкка қандай ташланса, шундай талпиниб халтачага икки қўллаб ёпишди ва уни олиб дарҳол қўлтиғига тиқди. Сўнг сарбознинг «кетабер» деган ишорасига кўра таъзим қила-қила хонадан чиқди.

Сарбоз вазир Тожулмулкдан Шайх Абу Алининг қаерда яширингани, қандай режалари борлигини бил-

моқ тўғрисида шу бугун топшириқ олган эди. У Ибронимни жўнатгач, ўша ондаёқ отланиб вазир ҳузурига етиб борди ва унга топган гапларини етказди. Ўша куни кечасиёқ вазир Тожулмулк билан Ҳамадоннинг ёш амири Самоуддавла ўртасида бундай суҳбат бўлиб ўтди:

— Амир ҳазратлари,— деди Тожулмулк — Абу Али сизга хиёнат қилиб Исфаҳон амири душманингиз Алоуддавла билан алоқа ўрнатган. Алоуддавла неча муддатдан бери Ҳамадонни қўлга киритмоқ қасдида экани аён. Собиқ вазир Абу Али ана шу ҳамлага ҳозир пайт келган, деб Алоуддавлани ҳужумга унданоқда кўринади. Укаси Маҳмудни шу мақсадда Исфаҳонга жўнатибди. Алоуддавла собиқ вазир ва унинг одамларининг хиёнатларига ишониб сизнинг давлатингизга раҳна солмоғи аниқ кўринади.

— Бунинг чораси недур?— деб сўради ранги ўчиб ёш амир.

— Бунинг чораси Абу Алини ҳибс этмоқдир. Шунда Исфаҳон амири Алоуддавла сирнинг очилганидан огоҳ бўлиб Ҳамадонга ҳужум қилмоққа журъят этолмайди.

— Шундай қилингиз.

Тожулмулк енгил нафас олди. Энди ҳеч қачон Абу Али вазирликка чақирилмаяжак. Тожулмулк орзусига эришади, хавфли рақибидан қутилади. Минг машиққат билан қайта эгаллаган лавозимиға яна маҳкамроқ ўрнашади. Унинг учун бундан юқорироқ мақсаддийк.

Ўша кеча тонг отар пайти вазир Тожулмулк юборган сарбозлар Абу Голиб ибн ал-Атторнинг боғ ҳовлисини ўрадилар. Улар эндигина саҳар намозини ўқиб бўлиб илмий ишларини ёзмоққа бошлаган олим Шайх Абу Алини банди қилиб Ҳамадондан олиб чиқиб кетдилар.

ФАРАЖОН ҚАЛЪАСИ

Ҳамадон шаҳаридан ўн беш фарсах нарида катта бир қалъя бор. У йўлдан анча четда, ағдарилган катта қозон сингари дўлпайган дўнглик тепасига қурилган. Қалъанинг тўрт томонида мустаҳкам тош деворлар осмон сари бўй чўзганлар. Унинг улкан темир дарвозалари фақат бу ерга келганларни ўзининг сир-

ли қаърига олмоқ учунгина очилади. Қалъа дарвозасидан эса фақат оқ матога ўралиб нафассиз чўзилиб ётганларгина чиқадилар.

Ез кунларидан бирида эрталаб Ҳамадондан келганинг бир ёпиқ арава ва бир неча отлиқлар Фаражон қалъасининг дарвозалари олдига келиб тўхтадилар. Бир отлиқ дарвозани қамчисининг дастаси билан қаттиқ қоқди. Озгина фурсат ўтар-ўтмас дарвозабоннинг шарпаси эшитилди. У тешикдан қараб келганларнинг сарой аҳлидан эканликларини кўргач, тарақ-турук қилиб дарвоза қулфига калит солди. Сўнг дарвозалар ғижиллаб очилдилар. Арава ва отлиқлар қалъа ичига кирдилар. Отлиқлар отдан тушдилар. Улардан бири араванинг эшигини очди. Аравадан кўриниши қирқлардан ошиб қолган бир киши тушди. Қалъабон дарров машҳур табиб ва собиқ вазирни таниб унга салом берди:

— Асалому, алайкум, Шайх ҳазратлари. Марҳабо, нечук худо ярлақаб Сиздек зот бизга ташриф этибдирлар?

— Шайх ҳазратларига бу ер тинчроқдир. Шаҳар анча бесаранжом. Шунинг учун вазир Тожулмулк Шайх бехавотир жойда бўлсинлар, деб бу ерда тутмоқни буюрдилар,— леди отлиқлардан бири ва қўйнидан бир қофоз олиб қалъабонга узатди. Унда Абу Али Ҳусайн ибн Абдуллоҳ ибн Сино то бирор бошқа фармойиш бўлгунга қадар Фаражон қалъасида бўлмоғи кераклиги ёзилган эди. Қалъабон фалакнинг кажрафторлигига яна бир бор истиғфор айтиб Шайх Абу Алини қабул қилиб олди. Келганлар эса табибни бу ерда қолдириб, ўзлари Ҳамадонга қайтдилар.

Ижод шундай бир кучки, у ижодкорни ҳамиша банди қиласиди. Киши ўз ихтиёри билан унинг фараҳли тутқунлигига бўлади, шундан ўзига ором ва таскин топади.

Фаражон қалъасида маҳбусликда турган Шайх Абу Али шу ерда ўтқазгани тўрт ой мобайнида бир кун ҳам ижоддан тўхтамади. Ана шу вақтларда Шайхурранс «Алҳидоя» («Бағишлов») «Ҳай ибн Якзон» («Ўйғоқнинг ўғли Тирик»), «Китобул қуланж» (Қуланж тўғрисида китоб») асарларини ёзиб тамомлади.

Аммо қалъадаги маҳбуслик олимнинг фикрини турли андишалр билан чулғар, келажакнинг ноаниқлиги унга оғир маънавий мاشаққат етказар эди. Бу ҳибс-

дан қутулиб чиқадими, ёки ўзидан олдингилар каби шу ерда абадий кўз юмадими.

Ана шундай ҳаяжонларини ифодалаб Шайх бир байт битди:

Кўрдингиз бу қалъага кирдим жадал,
Лек бундан чиқмоғим амримаҳол.

Бу изтироб овози қалъанинг баланд деворлари орасида йўқ бўлиб кетади.

Фаражон қалъаси азалдан бор. Унинг қачон бино бўлгани кўпчиликка маълум эмас. Баландлик устида бу қалъа худди подшоҳ бошидаги тож сингари кеккайиб туради. Тўрт тарафини ўраган деворларнинг юқори гажжаклари пастдан унчалик катта кўринмаса-да, аслда одам бўйи келадилар.

Деворлар тоғ тошларидан ишланган. Улар терак бўйи баландликда қўққайганлар. Деворлар бўйлаб қалъанинг тўрт томонини ўраб турган ўраларнинг чуқурлиги уч-тўрт газ, эни эса ўн газ чамаси келади. Фақат бир дарвоза ва унинг қаршисида ўр устидан бир кўприк бор. Бу кўприк фақат лозим бўлганда темир занжирлар билан туширилади ва ўр устидан қалъа билан атрофдаги ерларни боғлайди. У кўтарилганда қалъа атрофдан бутунлай узилади. Бу кўприк кўпинча юқори кўтарилган бўлиб қалъа дарвозасига қора тамғадек ёпишиб туради.

Қалъанинг ичи кенг. Ҳовлисида муҳташам дарахтлар ҳайбат билан қад кўтарғанлар. Қалъада бир-бира га йўлаклар орқали уланган тош деворли бинолар кўп. Бинолар ҳам, йўлаклар ҳам доимо ғира-шира қоронғу.

Қалъанинг ҳовлисидаги бир уйда қалъабон оиласи билан яшайди. Бутун қалъада Абу Алидан бўлак маҳбус йўқ. Бу ҳибс ўзича алоҳида хусусиятга эга. Олмининг ўз жойи бор. У кишин ва кундаларга солинмаган. Овқат-озуғи етарди. У яқинларидан, одамлардан, жонли ҳаётдан узилган. Унинг ҳоли кенг ва катта қафасга солиб қўйилган қушнинг ҳолатига ўхшайди. Қафас қанча кенг бўлмасин учар қуш учун осмон ўрнига ўтармиди? Қафас ичидаги қуш ҳатто қанотларини ҳам эркин ёяолмайди-ку! Ҳамиша одамлар билан бўлиб, уларга шифо бағишлаб, элу юртнинг оғирини енгил қилиб келган одам учун бу бандилик қанчалар мушкил эканини тасаввур қилиш қийин эмас.

Исфаҳон

ИСФАҲОН САФАРИ

Шайх Абу Али Фаражон қалъасида тўрт ойча қолиб кетди. Бу орада Исфаҳон амири Алоуддавла Ҳамадонга қарши уруш очди. Уруш Алоуддавланинг ғалабаси билан тугади. Голиб амир Ҳамадон ҳукмронлигини унга тобеъ бўлган амир Самоуддавланинг ўзида қолдирди. Шайх Абу Али бу ғалаба туфайли маҳбусликдан озод бўлди. Унга яна Ҳамадон мамлакатининг вазирлигини таклиф қилдилар. Шайх бу таклифи қатъиян рад қилди. У бир неча муҳлат Ҳамадонда Шайх ал-Алавий деган кишининг уйида истиқомат қилди. Одати бўйича Шайх Абу Али қаерда бўлмасин бир кун ҳам илмий машғулотини тарк этмас эди. У Шайх ал-Алавий уйида яшाटган пайтида «Ашифо» китобининг «Мантиқ» боби устида иш олиб борди.

Аммо турмушининг номунтазамлиги, келажакнинг ноаниқлиги олим кўнглига бесаранжомлик зиравасини санчган эди. Унинг аҳволи мураккаб, хотири паришон. Шайх Абу Али бўлажак воқеаларни кўриб турипти. Ҳозир Ҳамадонда яна ғур Самоуддавланинг ҳокимияти барқарор. Вазирлик тизгини Тожумулк қўлида. Шайх вазирликни рад қилгач, яна Тожулмулк шу вазифада қолдирилган эди. Аммо Шайх Абу Али Ҳамадонда экан, Тожулмулкнинг кўнглида тинчлик бўлмайди. Ҳаммаёқни вазирнинг қузғунлари босган. Улар барибир Абу Алига кун бермаяжаклар.

Шайх Ҳамадонда ортиқ қололмас эди.

Бир куни тоғи отар чоғи Ҳамадон дарвозалари илк очилган пайтда тўрт дарвеш шаҳар дарвозаларидан чиқдилар. Улар минган эшаклар шахдам қадам ташлайдилар. Ҳар эшакда биттадан хуржун. Биринчилардан бўлиб шаҳардан чиққан бу йўлчиларга дарвоза-

бонлар аҳамият бермадилар. Бундай дайдилар, эҳе, қанча. Худо йўлида тоат-ибодат билан, меҳнат қилмай тирикчилик қилувчи дарвешлар сон мингта. Буларга илашишдан худо сақласин. Агар дарвишларни тергайдиган бўлсанг, бошингга фақат ғалза орттиросан.

Кун тиккага келганда йўл боса-боса шаҳардан хийла узоқлашган дарвешлар ҳам, эшаклар ҳам анча ҳориган эдилар. Улар бир булоқ бўйида тўхтадилар. Озгина тамадди қилиб, сўнг дам олган бўлдилар-да, яна йўлга тушдилар. Ҳаво иссиқ. Йўл чанг. Кийимлар оғир. Йўлчилар терга пишиб кетган. Йўл босмоқ мashaққатли. Аммо бу тўрт йўлчининг бошчиси ҳамроҳларига тўхтамоққа рухсат қилмас, ўзи эса остидаги эшакни жадал ҳайдар эди. Йўл азобини чека-чека, дуч келган жойда озгина тўхтаб яна йўл босиб ниҳоят икки кун ўтгач, кун тиккадан ўтиб қуйига оға бошлиган пайтда бу кичик карвон узоқдан Исфаҳон деворларини кўрди. Оқшом яқинлашгандан дарвешлар Исфаҳонга яқин Табарон деган манзилга етиб келдилар. Бу ер кўркам, тўрт томони оқар сувлар билан ўралган хушҳаво бир жой эди.

Холдан толган дарвишлар эшаклардан тушиб уловларни бир чеккага дарахтларга боғладилар. Дарвешларнинг ҳар бири усти боши чанг бўлиб кетган, ўзлари фарқ терга ботган, ҳаддан ташқари толиқкан эди.

Шу пайт Табароннинг ўртасидаги катта иморатдан бир неча киши чиқиб жадал дарвишлар сари кела бошлидилар. Уларнинг кўплари ҳарбий кийимда, олдинда эса оқ кийимли, симобий саллали, қорасоқол: хушрўй бир киши қадам ташлар эди. Бу киши дарвешларнинг бошчиси олдига келиб эгилиб салом берди ва деди:

— Ассалому алайкум, Шайхурраис ҳазратлари. Кечадан бери биз жанобингизнинг ташрифингизга мунтазирдирмиз.

Дарвешлар тўдасининг бошлиғи Шайх Абу Али Ҳусайн ибн Абдуллоҳ ибн Сино эди. Унинг ёнидаги ҳамроҳлари эса Абу Убайд Жузжоний ва икки хизматчи. Улардан бири эса хизматчи, бири эса бир важ билан Шайх хизматидан кетган ва Ҳамадонда қолган Иброҳимнинг ўрнига олинган йигит эди. Улар Ҳамадондан дарвешлар либосида Исфаҳон сари йўл олган эдилар. Булардан бир ҳафта олдин Маҳмуд икки

чўри билан Исфаҳонга етиб келган ва акаси Шайхнинг Исфаҳонга келмоғини амир Алоуддавлага хабар қилган эди.

Шайх Абу Алини кутиб олмоқ учун амир Алоуддавла ўз одамларини Табаронга юборган эди. Улар ўзлари билан отлар, кийим-бошлар келтирган ва икки кундан бери Шайх ва унинг ҳамроҳларини кутмоқда әдилар.

Уша куни йўлчилар ҳаммом қилиб ювениб, кийимларини алмаштириб, овқатланиб Табаронда тунадилар. Эртаси эрталаб эса ҳордиқ чиқариб анча ўзига келган Шайх, Жузжоний ва уларнинг хизматчилари кузатувчилар ҳамроҳлигидаги отларга миниб Табарондан Исфаҳонга йўл олдилар.

Амир Алоуддавланинг фармойишига кўра Шайх Абу Али Исфаҳоннинг Кунигаробоз маҳалласидаги бир ҳовлига жойлашди. Бу Абдуллоҳ бин Бобий деган кишига қарашли бўлиб, Бобийнинг ҳовлилари кўп ва уларни ижарага берар эди.

Бу ҳовли Шайхга мақбул тушди. У ичкари-ташқаридан иборат бўлиб, кўп хоналари бор. Ҳар бир хона гиламлар, палослар, керакли рўзгор буюмлари билан жиҳозланган.

Келган куниёқ Шайх Абу Али амир Алоуддавланинг суҳбатида бўлди. Амир кўпдан бери кутгая улугъ табиб ва мутафаккирнинг ўз ҳузурида бўлмоғидан мамнун эди. Шайхурраис Абу Али каби бир зотнинг амир Алоуддавла даргоҳида бўлмоғи Исфаҳон давлатининг шону шавкатини оширади, унинг барқарорлигидан дарак беради.

Бу ерда Шайх Абу Али учун ҳам тинч ижодий меҳнат имконияти вужудга келган эди.

Амир Алоуддавла атрофида бошқа олимлар, ҳакимлар ҳам бўлганлар. Амир ўз суҳбатларида, ҳатто ҳарбий юришларида ҳам шу олимлар билан бирга бўлар эди.

Амир қасридаги суҳбатхоналардан бирида ўн-ўн беш ҷоғли меҳмонлар атлас кўрпачаларда ўлтириб, юмшоқ парқуларга ёнбошлаганча суҳбат қурмоқдалар. Гулчеҳра соқийлар май тутадилар. Уртадаги мез (столча)лар нозу-неъматларга тўла. Алоуддавланинг ўнг томонида Шайх Абу Али ўтирибди. Амирнинг сўл ёнида сарой мунаҗжими, унинг ёнида шоир, унинг ёнида бошқа мўътабар олимлар. Булар ичида машҳур

тилшунос, сарф-наҳв илмининг билимдони Абу Мансур ал-Жаббон ҳам бор.

Абу Али суҳбатда унчалик фаол эмас. У ўйчаник билан бўлаётган баҳсларга қулоқ осади, аҳён-аҳёнда бир луқма ташлаб қўяди. Олимнинг фикри қандайдир бошқа хаёллар билан банд.

Суҳбат мавзуи сарф-наҳв, луғатшунослик масалаларига кўчди. Абу Мансур ал-Жаббон араб сарф-наҳвининг муқаммаллиги, унинг бирор қоидаси ҳам ишланмай қолмаганлиги тўғрисида сўзлади. Дунёда бирор тилнинг луғати бунчалар бой ва муқаммал эмас. Нутқдаги жаранг, қоидаларнинг пухталиги, ифоданинг гўзаллиги, услубнинг ранг-баранглигида араб тилига бас келадиган бирор бошқа тил йўқ.

Шайх Абу Али бу гапларни эшифтгач, бир луқма ташлади.

— Ҳар бир тил ўзига хос гўзаллик ва қудратга эга. Форсий, туркий, ҳинд, фаранг ва бошқа тилларнинг гўзаллиги, мазмундор фикрлар ифодасидаги мунтазамлиги араб тилидан қолишмайди.Faқат уларни ўрганиб билиш ва истифода эта олиш керак.

Абу Мансур ал-Жаббон салгина фурсат мулзам бўлиб қолди. Аммо у тездан ўзини тутиб олди-да, бу луқмага қандай жавоб бўлишини кутаётган мажлис аҳлига қараб деди:

— Шайхурраис мутлақо ҳақ гап айтдилар. Аввало ўрганмоқ, биямоқ сўнгра истифода этмоқ керак. Жаноб Шайхнинг тиб соҳасидаги иқтидорлари таҳсин ва эътирофга сазовор. Аммо араб тили, сарфи, наҳви, луғати бу кишининг ихтисосларидан узоқ. Шунинг учун,— деб сўзида давом қилди у сурбетлик билан ва Шайх Абу Али томонига юз ўғирди,— «Сиз жаноблари, аввало адабиётни ўрганиб билмоғингиз, шундан кейингина бундай баҳсларга қўшилмоғингиз мумкин бўлар».

Абу Мансур ал-Жаббоннинг бундай беандиша гаплари ўлтирганларни хижолатда қолдирди. Шайх Абу Али бир сўз демади. Аммо машшоқларга имо қилди. Улар дарҳол созларини қўлга олиб дилкаш оҳанглардан бирини бошлаб юбордилар. Мусиқининг майин ва латиф садолари тор фикрли суҳбатдошнинг бетамизлиги туфайли ёйилган нохушлик буғларини ҳайдаб суҳбат ҳавосини мусаффо этгандай бўлди. Сўнг яна бирмунча хуш гаплар айтилди, шеърлар

ўқилди. Тун ярмига яқин мажлис аҳли тарқалдилар.

Шайх Абу Али тиљшунос мутакаббринг гапларидан қаттиқ ранжиган бўлса-да, буни ҳеч кимга билдирамади. Ўзига бино қўйиб, ўзгаларни камситувчи, фақат ўзинигина ҳамма нарсани биладиган, деб ҳисобловчи ва буни пеш қилувчи кимсани олим деб бўладими? Ахир очиқ айтилган-ку, «Мен қола ана олимун, ҳуваҳу жоҳилун» («Ким мен олимман деса, ўшанинг ўзи жоҳилдир»). Шайх ана шундай фикрлар ўровида хаёл суреборар экан, бу гердайган тиљшуносга жавоб бермоқ шарт, деган қарорга келди. Аммо бу жавоб Шайх Абу Али даражасидаги олийжаноб ва узилкесил жавоб бўлмоғи керак.

Орадан уч йил ўтди. Абу Мансур ал-Жаббоннинг бетга чопарлик билан айтган гапларини эшигланлардан кўплари уларни унугиб юбордилар. Абу Мансур ҳам ўз ғалабасини озгини тантана қилгач, бошқаларнинг кўнглига ниш урмоқ билан машғул бўлиб кетди. Уша суҳбатда бўлганлардан баъзилари дунёдан ўтиб ҳам кетдилар. Фақат Шайх Абу Али дилига санчилган тикан ҳали олиб ташлангани йўқ.

Бир куни Шайх билан Алоуддавла иккаласи холи қолишган пайтда Шайх амирга бир китобни кўрсатди. Бу китобнинг қалин чарм муқоваси анча титилган, эскирган, аммо варақлари яхши сақланган, хати аниқ ва равшан эди.

Шайх амирга деди:

— Ушбу китобни Мансур ал-Жаббонга кўрсатсангиз ва ундан, бу китобни овга чиққанда даладан тоғиб олдик, шуни ўқиб бизга нима тўғрисида ёзилган эканлигини тушунтириб берсангиз, деб сўрасангиз.

Амир китобни қўлига олиб варақлаб кўрди, уёқ буёғига кўз югуртириб чиқди, аммо ўқиганларини ҳеч тушуна олмади.

— Не мақсадда Абу Мансур ал-Жаббонни бундай имтиҳонга тутмоқчисиз?— деб сўради амир кулиб.

Шайх Абу мақсадни амирга тушунтириб берди. Амир Абу Алининг илтимосини қондирмоққа рози бўлди.

Навбатдаги бир суҳбат чоғида амир Алоуддавла сарф, наҳв, лугат илмининг билимдони, арабшунос олим Абу Мансур ал-Жаббонга ўша китобни кўрсатди ва унинг қандай китоб эканини аниқлаб беришни сўради.

— Биз,— деди амир,— буни ўқиб бир сўзини ҳам тушуна олмадик.

Абу Мансур ал-Жаббон китобни таъзим билан амирнинг қўлидан олди. Унинг бармоқлари китоб саҳифаларини авайлаб очдилар ва сатрлар устидан югурдилар. Абу Мансур китоб саҳифаларини пицирлаб ўқир: пешонасини тириштириб ўйлар, саҳифаларнинг бошқа томонларига кўз югуртирас, аммо ўлтирганларга ҳеч нарса демас эди. Суҳбатдаги барча одам Абу Мансурга қараб ундан жавоб кутар эдилар. Абу Мансурни тер босиб кетди. У берилган китобдаги барча сўзларни ўқиган бўлса-да, ҳеч маъносини еча олмас, кўп сўзлар эса унга мутлақо нотаниш эди.

— Амир ҳазратлари,— деди Абу Мансур ўртага чўмган ноқулай тинчликни ўзининг ёқимсиз овози билан бузиб,— бу китоб қадими манбаълардан кўчириб ёзилган луғатларни ўз ичидаги тутади. Бундаги кўп сўзлар ҳозирги луғатларда йўқ. Шу туфайли уларнинг маъносини ечмоқ мушкулдир. У эски луғат китоблари ҳозирда мавжуд эмаслар. Шунинг учун бундаги айrim сўзларнинг маъноси тамомийла унугилик деб ҳисобланса ҳам бўлади,— деди.

— Амир ҳазратлари,— деди Шайх Али тилшунос жим бўлгач,— гарчи эски луғатлар йўқолиб кетган бўлсалар-да, улар асосида яратилган бошқа луғатлар мавжуддир ва уларда бу китобдаги айrim сўзларнинг маънолари тушунтириб ўтилган.

Шундан кейин Шайх Али шу луғатларни номма-ном санаб чиқди, ушбу китобдаги қайси сўзларга қандай изоҳлар берилганидан ўлтирганларни хабардор қилди, ўз сўзини исботламоқ учун кўп мисоллар келтирди.

Мажлисда ўлтирганларнинг кўплари бундан бир неча йил муқаддам бошланган, олдин овоза бўлиб кетган ва кейин унугилиб юборилган илмий баҳснинг энди якунланаётганлигини тушундилар.

Абу Мансур уч йил муқаддам қилган ўз бетамизона қилмишидан хижолатда қолди ва ўша пайтдаги ножӯя гаплари, қилиқлари учун амирдан, Шайхдан ва ўлтирганлардан узр сўради.

Зотан айтилган-ку, мақтанчоқ бўлманг, хижолат чекмайсиз. Шайх Али ўша бўлиб ўтган баҳсдан сўнг уч йил давомида араб тили, сарфи наҳви ва луғатларига оид барча китобларни бўлак бошқатдан

ўқиб чиққан, Исфаҳонда йўқларини Хуросон, Мовароунаҳр, Бағдоддан олдириб келган, уларни ҳам яхшилаб ўқиган ва натижада арабиётни олдин билганидан ҳам ортиқроқ эгаллаган эди. Шундан кейин у арабиёт бўйича жуда мураккаб услубда уч китоб ёзди. Уларга худди шундай услуб ва ифодаларда ёзган уч қасидасини киритди. Шуларнинг ҳаммасини бир китобга жамлади. Бу китобга муқова қилди. Сўнгра муқовасини титкиллаб уни эски китоб ҳолига келтириб амир Алоуддавлага кўрсатган эди.

Арабшунос Абу Мансур ал-Жаброн ўқиб тушуна олмаган китоб Шайх Абу Али томонидан ёзилган ана шу арабиёт китоби эди.

Кейинчалик арабиёт бўйича барча билганларини Шайхурраис бир асада жамлади. Үнга «Лисонул-араб» деб от қўйди. Афсуски, бу қўллэзмадан нусха кўчирилмай қолди. Асл нусхаси эса бизгача етиб келмади.

ЕЗИШМА

Исфаҳон кечалари жуда кўркам. Ёзниг тандирдан чиққан олов тафтидай қизгинлиги кечга томон сал босилади. Шомдан бошлаб салқин туша бошлайди. Хуфтон пайти осмон Исфаҳон бозоридаги марваридлар сингари ярақлаган юлдузларга тўлади, ҳаво ҳам мўътадиллик касб этади.

Ана шундай ёз оқшомларидан бири. Ташқари ҳовлида гуллар ва райҳонлар қоплаган гулзор ёнидаги супада Шайх Абу Али, унинг укаси Маҳмуд, шогирди Абу Убайд Жузжоний кечки овқатдан сўнг чой ва шарбат ичиб сухбатлашиб ўлтирибдилар. Шу маҳал хизматчи келиб уларга меҳмон келганининг хабарини етказди. Маҳмуд ва Жузжоний иргиб ўринларидан турдилар ва кўча дарвозаси томонига кетдилар. Бир оздан сўнг улар баланд бўйли, қотмадан келган, чувак юзли, қорасоқол, қорақош ва қора кўз, юзи офтоб тобида қорайган бир киши билан бирга қайтишди.

Меҳмон Шайхга одоб билан таъзим қилди ва Шайхнинг таклифи билан супадаги кўрпачага ўлтириди. Фотиҳа тортилди. Жузжоний меҳмонга пиёлага шарбат қўйиб узатди. Меҳмон шарбат солинган пиёлани қўлига олиб бир ҳўпладию, дастурхон четига қўйди ва Шайхнинг маъноли боқишига жавобан сўз бошлади:

— Шайх ҳазратлари, менинг отим Абулқосим Қирмоний. Шероз қозиси Сизга бир мактуб йўллаган. Шуни сизга келтирган эдим.

Абулқосим чўнтағидан бир қоғоз олиб Шайх Абу Алига узатди. Шайх қоғозни олиб очди ва унинг ичидаги алоҳида қоғозга ёзилган хатга тез кўз югуртириб чиқди. Бу мактуб Шайх Абу Алиниң «Қитобул-Алойи» номли асари тўғрисида эди. Шерозда бир гуруҳ китобхонлар Абу Алиниң мантиқа доир бу китобини кўп қизиқиб ўқиганлар. Аммо ҳеч уни тушуна олмаганлар. Сўнгра улар саводхонроқ деб Шероз қозисининг ҳузурига келганлар. Қози ҳам бу китобнинг маъносини айтиб бера олмаган. Шундан сўнг қози Шероздан Исфаҳонга кетаётган бу одамдан Шайхга мактуб йўллаган. Қози ўз мактубида Шайхдан мантиқа оид шу асарни шарҳлаб беришни сўрамоқда эди.

Шайх хатни ўқиб чиққач, чуқур ўйга толди. Агар одамлар ўқиб тушуна олмасалар, китоб ёзмоқдан не мурод? Ахир, ҳар бир китоб одамлар уни ўқиб, ундан баҳра ва таълим олиб унда ёзилганларга амал қилинлар, деб ёзилмайдими?

Дастурхон атрофидагилар гангур-гунгур сўзлашиб ўлтиришипти. Қоронғу қуюқлашиб бормоқда. Жузжоний ичкарига кириб шамдонни олиб чиқди. Шамлар ёқилгач, атрофга ёруғлик ёйилди. Шайх ҳамон жим, ўйга гарқ бўлганча ўлтирас эди. Меҳмон кетмоққа изн сўради.

— Шерозли чопар қачон қайтмоқчи,— деб сўради ундан Шайх.

— Эртага.

— Ундан бўлса сизга рухсат.

Абулқосим фотиҳа ўқиб ўрнидан турди ва уйдагилар билан хайрлашиб ташқарига йўл олди. Маҳмуд ва Жузжоний уни кузатиб бирга чиқдилар. Улар қайтгач, Шайх Абу Али қоғоз келтиришни сўради. Жузжоний иш хонасига кириб у ердан қоғоз келтирди. Улар ҳар бири ўн варақдан бўлган беш дастадан иборат эди. Жузжоний қоғозларни Шайхнинг ёнига қўйди.

Шайх шароб келтиришни сўради. Келтирдилар. Абу Алиниң бутун хаёли бир фикрга жамланган. Ўлтирганлар буни фаҳмлаб тин сақладилар. Шайх укаси Маҳмудга ва шогирди Жузжонийга, сизлар шаробдан ичиниб ўз суҳбатингиз билан машғул бўла берингиз, мен

билин ишларингиз бўлмасин, деди. Узи эса қоғозларни олиб тез-тез ёза бошлади. У узоқ ёзди, шиддат билан тўхтовсиз ёзди. Тун яримга яқинлашди. Абу Убайд аҳён-аҳёнда шамларнинг ёниб бўлган пиликларини кесиб қўяр эди. Маҳмуд ва Абу Убайдни ўлтирган жойларида мудроқ босди. Шайх бир маҳал ёзмоқдан озгина тўхтади ва атрофига қаради. У укаси ва шогирдининг уйқусираётгандарини кўриб уларга уйга кириб ухлангиз, деди. Маҳмуд ва Абу Убайд Шайх билан хайрлашиб ўз хоналарига кириб кетдилар. Тиккага келган тўлин ойнинг ёруғи мез устидаги шамларнинг нурини ёруғроқ қиласи эди.

Шайх Абу Али ҳамон ёзмоқ билан банд. У ёзмоқдан сира толиқмас эди. Унинг кўнгли ёзган китобини ўқиб тушунмаганларга нисбатан қарама-қарши туйғулар билан тўла. Шайх кўнглида бундай китобхонга нисбатан қаҳр: ҳам ўша китобхоннинг билмоққа интилганидан мамнунлик. Шу иккала ҳис ўша китобхонга ёрдамлашмоқ истагини кучайтираси эди. Чунки бу ёрдам ҳам кўмак, ҳам ўзига хос бир танбеҳ бўлади. Шу туйғулар қистови остида Шайх Абу Али тонг отгунга қадар тинмай ишлади ва «Мантиқ» китобининг шарҳини бир кечада ёзив тугаллади.

Эрталаб барвақт у Абу Убайдни чақиртирди. Тонг саҳар пайти эди. Шайх саҳар намозини ўқиб бўлган, лекин ҳали жойнамоз устидан турмаган. Абу Убайд устознинг рўбарўсига келиб унга салом берди. Шайх шогирдининг саломига жавоб берди ва унга деди:

— Мана бу ёзилганларни дарҳол Абул Қосим Кирмонийга жўнатингиз. Чопар йўлидан қолмасин деб юборилган саволларга шошилироқ жавоб берди: Шуни ҳам тушунтириб айтингиз.

Саҳар шаббодаси енгил эсади. Кўплар ширин уйқуда. Узоқ-узоқлардан хўроздарнинг қичқирган овозлари эшитилади. Исфаҳоннинг тор кўчаларидан ўтиб Абу Убайд муҳташам бир карвонсаройга етиб келди. Мадраса тахлит қилиб солинган икки қаватли гиштин иморат. Ҳовлиси кенг ва кўркам. Абу Убайд кеча Абулқосимдан сўраб олганига кўра дарвозадан кириб ўнга бурилди ва гиштин пиллалоя орқали иккинчи қаватга кўтарилди. Узун айвондан юриб бориб ўнг томондаги кичик бир ҳужранинг эшиги олдида тўхтади ва уни секин қоғди. Ичкаридан дарҳол овоз эшитилди:

— Марҳамат, ташриф буюрингиз, эшик очиқ.

Абу Убайд эшикни очиб хонага кирди. Шинамгина уйча, кўрпачалар солиғлиқ. Уй эгаси, ювинган, кийинган, сафар тадорикини кўрмоқда. Абулқосим Кирманий ҳам шу ерда эди. Абу Убайд улар билан саломлашди. Фотиҳа ўқилиб бўлгач, Абу Убайд қўлидаги қофозларни Абулқосимга узатиб унга Шайх айтиб юборган гапларни етказди.

— Ажабо,— деди Абулқосим қаттиқ ҳайратланиб,— бундай тез иш битажагини ҳеч ким хаёлига ҳам келтира олмайди. Улуғ устозни озурда этганимиз учун хижолатдамиз. Шунинг билан бирга бундай улуғ зот илтимосимизни шу қадар қисқа фурсатда адо этганлари учун қуллиқлар қилиб бош эгамиз.

Дарҳақиқат, Абулқосим ва унинг шерозлик меҳмони ҳайратдан қотиб қолдилар ва қандай қилиб миннатдорлик билдиримоқдан ожиз эдилар.

— Иш қобилияти ҳар бир кишининг ўзига хос бир хусусиятдир. Шайхурраис Абу Али каби илмга муҳаббат ва меҳнатга лаёқат эгаси бўлган зотлар юз йилларда бир бор дунёга келур,— деди Абу Убайд Жузжоний.

«ДОНИШНОМА» ЁКИ «ҚИТОБИ АЛОИЙ»

Исфаҳон саройидаги сұхбатлардан бирида Амир Алоуддавла бир фикр билдирган эди:

— Фалсафий китоблар, илмий асарлар бари араб тилида ёзилади. Бу — олимлар, илм-фан тили. Аммо кўпчилик ундан боҳабар эмас. Агар бу асарлар кўпчилик тушунадиган тилда ёзилганда ундан баҳра олувчилар кўпроқ бўлур, илм-фанинг эл орасига ёйилмоғи енгиллашган бўлур эди.

Амир кўпчилик деганда, ўзини ҳам кўзда тутмоқда эди. Чунки у араб тилини билса-да, олимларнинг жиддий мулоҳазаларини бу тилда ўқиб, уқиб оладиган даражада билмас эди. У фақат ўз фикрларини ўзига маълум бўлган арабча сўзлар миқёсида баён эта олар эди холос.

Сұхбат ҷоғида айтилган бу мулоҳазани Шайхурраис Абу Али топшириқ сифатида қабул қилди. Чунки олим ўзи ҳам илмнинг кенроқ доирада ёйилишига тарафдор. Унинг учун эса кўпроқ одам тушунадиган тилда ёзмоқ керак.

Кейинчалик Амир Алоуддавла Шайхга ўз фикрини шарҳ этиб берди. У мантиқ, метафизика, физикага оид билимларни кўзда тутмоқда эди.

Шайх Абу Али ана шу маслаҳат асосида ўзининг катта бир фалсафий асарини яратди ва уни амир Алоуддавлага бағишлаб «Китобул-Алоий» деб атади. Бу асар форсий тилда ёзилган. Уни кейинчалик «Донишнома» («Билимлар китоби») деб ҳам атай бошладилар.

«Китоби Алоий» ёки «Донишнома»нинг мундарижаси тўғрисида Шайхурраис бундай деб ёзади: «Унда қадимий ҳикмат фанларидан бештасининг асослари ва масалаларини қисқача қамраб олиш лозим эди. Биринчидан, мантиқ. Бу билимлар тарозусидир; иккинчидан, физика. Бу ҳисга алоқадор ва ҳаракат ҳамда ўзгаришда бўлган нарсаларга оид билим; учинчидан, коинотнинг тузилиши ва жойлашуви тўғрисидағи билим; тўртинчидан, мусиқий билим, товушларнинг оҳангдорлиги - ва ноҳангдорлиги, куйларнинг хусусиятларига оид билим; бешинчидан, табиатдан ташқарида бўлган нарсалар тўғрисидаги билимлар¹.

Мантиқ бўлими. Билим икки турли бўлади: биринчиси: тушунув (форсчада «андар расийдан», арабча «тасаввур»). Масалан, бирор «инсон», «пари» ёки «фаришта» деса, ўша айтилгандан нима кўзда тутилаётганини эшитувчи англай ва кўз олдига келтира олади. Иккинчиси: фикрлов (форсчада гаравийдан», арабчада «тасдиқ»). Унда киши бирор фикрни таъкидлайди. Масалан, «нари бор!», ёки «инсон бўйсунади» каби.

Бу икки тур тушунча икки хил бўлади. Биринчиси бирор нарсага тафаккур (андиша) воситасида эришув. Унга фақат ақлгина эришуви мумкин. Масалан, «Жоннинг моҳияти», ёки «Жоннинг абадий тирикли-

¹ Ибн Сина, «Избранные философское произведения», М., «Наука», 1980. с. 60; Шайх Абу Али Ҳусайн ибн Абдуллоҳ ибн Синонинг бу беш бўлак бўйича ёзганларидан баъзилари унинг тириклик пайтидаёқ йўқолган эди. Олимнинг шогирди Абу Ҳайд Жузжоний ўз кўлидаги Шайхнинг шу иммий соҳаларга оиц «асарларини араб тилидан форс тилига таржима қилиб шу йўқолган ўринларни тиклаган. Шундай қилиб «Китоби Алоий» ёки «Донишнома»нинг бизгача этиб келган нусхаси бунёд бўлган. Бу китобни проф. А. Бозоутдинов форс тилидан рус тилига таржима қилиб 1957 йили Душанбеда нашр этган эди. Бу таржима 1980 й. Москвада яна нашр этилган (Ибн Сина. Избр. философ. произв. М., Наука, 1980).

ти». Иккинчиси эса ақл ёрдамида әмас, балки бирор бошқача усулда эришув. Масалан, «икки нарса биргаликда учинчи нарсага тенг бўлса, улар ўзаро ҳам тенг бўладилар. Ёки ҳис этув орқали эришув. Масалан, «қўёш нур таратади». Ёки улуғ зотлардан эшиштуб орқали, ёки тарбия воситасида эришув. Масалан, «ёлғон гап ёмон», «адолатсизликка йўл қўймаслик керак».

Бирор тушунча ёки фикрни тафаккур орқали қабул қилувдан олдин биз бирор бошқа нарсани билшимиш керак. Уша билим орқали билмаган нарсани ўрганамиз. Масалан, биз инсоннинг ким эканини билмасак ва уни бизга «сўзловчи ҳайвон» деб тушунтирсалар: биз олдин «сўзловчи»нинг моҳиятини билмоғимиз даркор. Фақат шундан кейингина «инсон»нинг кимлигини била оламиз. Демак, биз билмаган нарсаларимизни ўзимизнинг олдинги билганларимиз воситаларидағина била оламиз. Аммо ҳамма билганларимиз ҳам билмаганларимизни ўрганмоққа ёрдамлаша бермайди.

Билгандан билмагани билмоққа олиб ўтадиган йўл бор. Бу мантиқ. Мантиқ ёрдамида билган орқали билмагани билинади. Ҳақиқатнинг нима экани, не нарсанинг ҳақиқатга яқин эканлиги, ниманинг ёлғонлиги, ҳақиқат ва ёлғоннинг қандай хиллари борлиги мантиқ ёрдамида аниқланади.

Мантиқ — тарозу билим. Бошқа билимлар эса фойда ёки заرار тўғрисидадир.

Ана шундай кириш қисмидан сўнг Шайхурраис ўз китобида мантиққа оид билимларнинг барча асосий қоидаларини бирма бир баён этиб чиқади. Улар умумий ва алоҳида сўзлов, аниқлов ва таъриф, фикрлов, қиёслов, исбот ва шулар сингари илми мантиққа хос бошқа масалалардан иборатdir. Мантиқ бўлими «Хатолардан сақловчи ўғитлар» деган боб билан якунланади. Унда олим ўзи ўргатган қоидалардан фойдаланиш йўлларини кўрсатган. Киши даставвал чигал хуносаларни ечмоққа ва уларга аниқлик киритмоққа одатланмоғи керак. Бунинг учун қиёсларни уч иборага бўлиш лозим. Ўртадаги ибора ҳеч ўзгаришсиз ҳар иккала паллада турмоғи керак. Сўзга әмас, унинг маъносига аҳамият бермоқ, ноаниқликлардан эҳтиётланмоқ лозим. Баъзи нарсалар аниқ айтилмаса ақлни чалғитади. Улардан умумлашма қилинса ақл уларни

қабул қилмайди. Масалан: «Душманинг билан дўстлашган киши дўстинг бўлмайди», дейилса буни қабул қилиш мумкин. Лекин бу фикрдан умумлашма қилинса ва «Душманинг билан дўстлашган ҳар бир киши душманингдир», ёки «Душманингнинг бирор дўсти сенга дўст бўлмайди», дейилса, ақл буни қабул қилмайди. Чунки ҳамиша шундай бўла бермайди.

Ўзинг исбот топа олмасанг қаршингга айтилган фикрни рад қила берма: масаланинг ўзи билан уни исботлашга уринма: тахминий ёки ҳис этиш йўли билан бир қарорга келма. Олим ана шундай ўгитлар билан «Қитоби Алоий ёки «Донишнома»нинг «Мантиқ» бўлимини якунлади.

Бу китобнинг иккинчи бўлаги «Метафизика»дир. Ҳар бир билимнинг ўрганадиган ўз предмети бор. Бундай предметлар икки хилдир: Биринчиси шундайки, у бизнинг ҳаракатларимиз туфайли юзага келади. Иккинчиси шундайки, у бизнинг ҳаракатларимиздан келиб чиқмайди. Биринчisinинг мисоли бизнинг ҳаракатларимиз. Иккинчisinинг мисоли эса ер, осмон, ҳайвонот ва ўсимликлардир. Шундан келиб чиқиб фалсафа билимлари ҳам иккига ажralади. Бири бизни ўз ҳаракатларимиздан огоҳ қиласди. Буни «амалий билим» дейилади. У бизни дунёдаги ишларимизни қай йўсинда уюштиromoққа ўргатади. Иккинчиси эса нарсаларнинг мавжудоти тўғрисида хабар беради. Уни «назарий билим» дейилади.

Бу ҳар иккала билимнинг ҳар бири ўз навбатида уч қисмга ажralади.

Биринчиси — халқни бошқариш билими. У халқларнинг ҳамжиҳатлиги, тартибли бўлмоғини таъминлайди. Бу билим ҳам иккига бўлинади: 1) Диний қонунлар; 2) Сиёсат. Булардан биринчиси асос, иккинчиси эса шоҳобча, натижадир.

Иккинчиси — уйни (оилани) бошқариш билими. У эру хотин, ота ва болалар, хўжайин ва хизматкор муносабатларининг тартибли бўлмоғини таъминлайди.

Учинчиси — ўзи тўғрисидаги, яъни инсоннинг қандай бўлмоғи кераклиги тўғрисидаги билим.

Назарий билим ҳам учга бўлинади. Биринчиси бирламчи билим, яъни табиатдан ташқари нарсалар тўғрисидаги билим. Иккинчиси ўрта билим — математика: учинчиси табиат тўғрисидаги билим, ёки қуйи билим. Материя ва ҳаракат билан боғли бўлмаган

(ақл; ҳақиқат), боғли бўлганда ҳам унинг табиатдан келиб чиқмайдиган (сабабиёт) нарсаларнинг характеристини ўрганувчи билим — Метафизика дейилади.

Материя билан боғли, аммо ўзига хос материяси бўлмаган нарсалар (сон, фигура) характеристини ўрганувчи билимга математика дейилади.

Учинчи билим табиатни ўрганади (табииёт).

Ана шундай фикрларни баён этиб бўлгач, Шайхурраис Жавҳар (субстанция), яъни ҳар бир нарсанинг туб моҳияти, мағзига оид мулоҳазаларини, ҳамда жисмларнинг ўзаро муносабатларига оид фикрларини изҳор қиласди. Бу масалаларга бағишланган бобларда материя ва шакл, материянинг шакл туфайли бор эканлиги: умумий ва хусусий, бирлик ва кўплик, оддинги ва кейинги, сабаб ва оқибат, куч ва ҳаракат, зарурий ва ижтимоий ва шуларга ўхшаш бошқа фалсафий категориялар тўғрисида сўз боради. Китобнинг «Метафизика» бўлими яралиш ва бузилиш юз берадиган жойда нуқсонлар ва ёвузликнинг пайдо бўлиш сабаблари тўғрисидаги боб билан якунланади.

Материя бир хил шаклда кўрина бермайди. У турли шаклларга эга бўлмоғи мумкин. Аммо шакллар ҳам материянинг юзага келувида иштирокчи бўладилар.

Демак, материянинг бирлиги бошқа нарсалар билан ҳам боғлиқ. Масалан, қуёш қизитгани туфайли мева пишади. Аммо меванинг пишмоғи учун бошқа омиллар ҳам даркор. Ҳар бир юзага келган жисмнинг моҳияти турлича, шакллари ҳам хилма-хил. Аммо нега уларнинг баъзиси мукаммал, баъзиси нуқсонли? Чунки кўп жузъий сабаблар борки, улар нуқс ва мукаммалликка сабабчи бўладилар. Ҳар бир нарса ўзича, имкониятига яраша мукаммал. Унинг шакли ҳам туғилиш ва кўпайиш орқали ўзини сақлай олади. Пашиба ўзи яралган материядан кўра афзал. Аммо ўша материя пашибадан бошқа нарсани бера олмайди. Барча жисмлар бузиладилар. Бузилиш ёвузлик, касаллик, зарурият туфайли вужудга келади. Бузилишнинг бир кўриниши жисмдаги қарама-қарши кучлар туфайли юзага келади. Масалан, кишидаги ҳавас, газаб, ақлни олайлик. Уларнинг ҳаммаси бир хил қувватга эга эмаслар. Гоҳо улар ичидаги энг ёмони устун чиқади. Аммо бундай ҳол кўп учрамайди. Кўпинча одамларда эзгулик устун ўрин тутади. Масалан, кишилар оғрийдилар, сўнгра эса тузалиб кетадилар. Ҳар

бир одам маълум муддат яшайди. Аммо ҳаёт эса абадийдир. Ёвузликнинг туб асоси йўқлик. Эзгуликнинг йўқлигини сезиш ва англаш жонли нарса учун изтироб келтиради.

Олим шу бўлимнинг охирида эзгуликнинг доимо борлигини тасдиқлади. Эзгуликнинг мавжудлиги эса ёвузликнинг кучини синдиради.

Метафизика бўлими ана шу фикр билан якун топган.

«Қитоби Алойи» ёки «Донишнома»нинг учинчи бўлаги физикадир. Олимнинг тушунтиришига кўра физика деб материядан узмай тасаввур қилинадиган ҳолатларни ўрганувчи билимга айтилади.

Математика ҳам турмушда материядан ажралмайдиган кўринишларни ўрганади. Аммо математиканинг предметини хаёл орқали материядан ажратмоқ мумкин.

Шундан кейин олим ҳаракатнинг маъносини тушунтиради. Ҳар бир нарсанинг ҳолати ва ўзгариши ўз потенциаллиги туфайли ҳаракат дейилади. Масалан, бир нарса секин-аста қорайиб боради ва охри бориб қорайишдан тўхтайди. Шу қорайиш жараённи ҳаракатдир. Демак шу жараён давомида ўша нарса ҳаракатда бўлди. Чунки бу жараён давомида имконият воқеъликка айланиб борди. Бир нарсанинг бир ҳолатдан иккинчи ҳолатга ўтмоғида ҳаракатдан бошқа йўл йўқ. Шайхурраис ҳаракатнинг турли кўринишлари тўғрисида сўзлайди. Чунончи доирадаги ҳаракат, ҳаракат шакллари, кўринишлари, бўшлиқда ҳаракатнинг йўқлиги: фазо, иссиқлик, совуқлик, жисмлар, ҳаво, буғ, тўрт унсур — ҳаво, тупроқ, ўт, сув тўғрисида муфассал маълумотлар беради. Жон, кўриш, ақл, уйқу тўғрисидаги фикрларини баён қиласди.

«Физика» бўлими инсоннинг жони (нафси) унинг абадийлиги ва бу абадийликнинг ҳолати тўғрисидаги мулоҳазаларга бағишиланган.

ИЖОД ОҒУШИДА

Шайхурраис Исфаҳонда унумли ижодий меҳнат билан машғул бўлди. У одати бўйича эрталаб беморларни кўради, сўнгра илмий ишларини ёзади. Ундан кейин саройдаги машғулот билан банд бўлади. У

кўпинча кечалари ҳам илмий асарларини давом этдириш билан машғул.

Исфаҳонда Шайхурраис «Ашшифо» асарини тугаллади.

Узоқ йиллар давомида ёзib келаётган ўзининг тиб соҳасидаги амалий фаолияти мисоллари билан бойинтилган машҳур «Тиб қонунлари» асари ҳам Исфаҳонда тугалланди.

Амир Алоуддавланинг bemалол ижодий иш билан машғул бўлмоқ учун шароит яратиб берганини олим алоҳида миннатдорлик билан қайд этади. Яна баъзи илмий машғулотлар учун Амир Алоуддавла олимга йўл-йўриқлар ҳам кўрсатиб турар эди.

Бир куни амир Алоуддавла Шайхни ўз ҳузурига чақирди. Исфаҳон ёзининг дим кечаларидан бири. Амир боғ ўртасидаги супада ўлтирипти. Сула атрофи гулзор. Ҳовузнинг зилол сувларидан енгил шаббода эсади. Райҳонлар, турли гулларнинг хушбўй ҳидлари ҳарёнга таралади. Ҳовуз юзасида юлдузлар тўла осмоннинг акси ойнадаги сингари жимиллайди.

Амир ва Шайх супага солинган кўрпачаларда ўлтириб сухбат қурмоқдалар. Амир анчадан бери Шайхга бир таклифини айтмоқчи эди, аммо қулай фурсат бўлмай келди. Ҳозир у олимни шу тўғрида сўзлашмоқ учун чақирган. Ойлар ва кунлар ҳисоби анча мураккаб. Исфаҳонда, бошقا шаҳарларда ҳам энг қадимий замонларда ўрнатилган тақвим (календарь) ишлатилиди. Яна туркийлар ва ибрийлар (яҳудийлар)нинг ўзлари учун тузган тақвимлари ҳам бор. Баъзилар бу тақвимлардан ҳам фойдаландилар. Амирнинг фикрича, барча мавжуд тақвимларни қиёслаб чиқиб: юлдузлар, умуман осмоний жисмларнинг ҳаракатларини текшириб, шуларнинг натижаларига асосланни янги бир тақвим тузмоқ керак. Бу тақвим ўзининг тўғрилиги ва соддалиги билан барчага манзур ва матлуб бўлсин.

— Бу ишни амалга ошироқ учун кўп ускуналар лозим бўлар. Бунинг учун эса анча маблағ сарф бўлар.

— Ҳар қанча маблағ кетса ҳам хайрли ва зарур иш амалга ошар.

— Қим бу вазифани бажармоғи лозим бўлар?

— Фақат ўзингиз,— деди амир Шайхурраисга қараб кулимсираб,— бу ишга сиздан бўлак бирор кишининг қўл урмоғи тўғри келмайди.

Шайх Абу Али ўйланиб қолди. У гарчи илми нужум (астрономия) билан шуғулланиб келган бўлсада, тақвимга оид ишлар билан маҳсус машғул бўлган эмас. Бу вазифани адо этмоқ учун анча тайёргарлик зарур бўлади.

Мабодо бу ишнинг ижроси учун маблағгина эмас, балки вақт ҳам даркор бўлса, уч йилгача сабр қилмоғимиз мумкин,— деди амир сал табассум қилиб. Амир Алоуддавла Шайхнинг уч йил муттасил меҳнат қилиб лугатшунос олим Абу Мансурни мот қилганига ишора қилмоқда эди.

Шайхурраис Абу Али амир Алоуддавланинг топширигини қабул қилди. У эртаси куни эрталаб Жузжонийга астрономик кузатишлар учун зарур асбобларни тайёрлаш, бунинг учун эса ўша асбобларни ясайдиган усталарни топишни буюрди. Бу иш осон бўлмайди. Жузжоний Исфаҳондаги асбобсоз усталар билан бир неча бор учрашди.

Керакли асбобларнинг режа ва шаклларини Шайх ва унинг шогирди ўзлари ишлаб чиқдилар. Усталар бундай асбобларни ясаб ўрганган эмас эдилар. Уларга муттасил йўл-йўриқ кўрсатиб турмоққа тўғри келди. Ниҳоят барча асбоб-ускуналар тахт бўлди. Энди иш бошланадиган бўлиб турганда амир Алоуддавла сафарга отланиб қолди. Шайх у билан бирга кетмоғи керак эди. Бирмунча вақт ўтди. Шайх сафардан қайтгач, осмоний жисмларни кузатиш, мавжуд тақвимларнинг ҳаммасини қиёсий таҳлил қилиш бўйича иш бошланиб кетди. Шайхурраис, Жузжоний, уларнинг ёрдамчилари бўлмиш шогирдлар кечасию-кундузи тинимсиз ишлар эдилар. Улар туни бўйи осмон ёритқичлари бўйича кузатиш ишлари олиб борадилар. Улар сайёralарнинг фалак буржларидағи ҳаракатларини бирма-бир кузатиб ҳисоблаб чиқдилар. Ойнинг чиқиши ва ботиш фурсати, кун ва тун нисбатлари, Қуёшли фурсатнинг муҳлатини қайта-қайта текшириб чиқдилар. Олдинда ҳали иш кўп. Суръат ҳам жадал эди. Аммо Шайх муттасил бу илмий тадқиқот билан шуғуллана олмас эди. У кўпинча амир Алоуддавланинг кўпсонли сафарларида иштирок этар, ёки саройга оид юмушлар билан банд бўлар эди. Устоз иштирок этмаган вақтда шогирдлар осмоний жисмлар ҳаракати ва тақвимлар таҳлили бўйича йиғилган маълумотларни жамлар, аммо хулосалар ясашга кўпин-

ча ожиз қолар эдилар. Шайх бўлмаса ишнинг олға босмоғи қийин. Шунинг учун кўп иш қилиниб анча маълумот жамланган бўлса-да, янги тақвим тузмоқ иши амалга ошмай қолди. Аммо бу текширишлар на-тижасида қўлга киритилган маълумотлар Шайх Абу Алиниг астрономияга оид асарларида ўз аксини топди. Чунончи «Ал-арсадул-куллия» («Умумий кузатишлар»), «Маърифати таркибул-афлок» («Фалаклар таркибини билиш») китоблари шулар жумласидан эди.

Юлдузларни кузатишга оид асбобларнинг баъзи-ларини Шайх Абу Али ўзи ихтиро қилган эди. Улар-нинг таърифига оид маҳсус асар ҳам Шайх қаламига мансубдир.

МУЪЖИЗАҚОР ТАБИБ

Қози Абул Ҳасан Мўмин ибн Муҳаммадшоҳнинг хизмат хонаси. Тўрда атлас кўрпачада чордана қуриб деворга тирадан атлас ёстиққа суюниб қози ўтирибди. Унинг чехрасида вужудидаги қабзият акс этади. Қозининг тор кўзлари хом олучадек қизарган, оғир қовоғи солиқ, пешонасида тажанглик ажинлари. Қози қўлидаги қофозга тез-тез кўз югуртириб чиқди-ю, бирдан унинг башарасини қаҳр ва ғазаб булатлари қоплади, сўнг кўзидан яшин чақнаб момоқалдироқ син-гари ўшқириқ эшитилди:

— Ким бу одамни тавсия қилмоқда?!

Қозининг қаршисида кичик бир мез ортида та-возе билан ўлтирган икки мулозими бир ҳўркиб тушдилар. Улардан бири — жиккадан келган паст бўйли ходим қўлида бир тутам қофозларини тутганича қўрққанидан тили гапга келишмай қолди. Иккинчиси юмалоқ юзли ўрта бўйли, қорамтири тусли, қўйкўз йигит қози ҳузурида биринчи бўлиши эди, бу ҳайқи-риқдан вужудини ҳайрат ва қўрқув босганича ҳангуманг бўлиб қолди.

— Ким бу одамни тавсия этмоқда, деяпман,— яна бақирди қози. Азбаройи, ғазаб ва жаҳлдан унинг вужуди титраб, ранги бўзариб кетган, баланд бўйни-ни ғоздек чўзиб у мулозимларига еб қўйгудек шиддат билан қарап эди. Унинг важоҳатидан у ҳозир ўрнидан сакраб туради-ю, ҳар иккала ходимини ҳам теп-килаб қоладигандек. Жиккак ходим қўрққанидан дағ-дағ титраб, ўзини қаёққа яширишни билмай мез ости-

га кириб кетгудай бўлиб писиб олди. Қози эса тамо, мийла ўзини йўқотди. У қўлини пахса қилиб қарши сидагиларга шовқин солар, овозининг борича бақи-рар, оғзидан кўпиклар сочар, кўзидан ўт чақнар эди. Бу дағдаға бир мунча фурсат давом этди. Ниҳоят қози ҳолдан тойга, парқуга ёнбошлади. Унинг тинганини кўрган ҳар иккала ходим ўринларидан секин турдилар-да, таъзим билан аста-секин юриб хонадан чиқиб кетдилар.

Абул Ҳасан Мўмин ибн Муҳаммадшоҳнинг бундай феъли кўпчиликка аён. Аслда тоза кўнгилли, кишиларга кек сақламайдиган, ўз ишини яхши биладиган бу одам арзимаган нарсадан норози бўлса ана шундай тутқаноғи тутиб қолар эди. Бундай пайтда унга ҳеч ким рўбарў келолмас, бирор киши қозининг ҳақ ноҳақ эканини айтишга журъат қилолмас, ҳамма ундан имкон борича нарироқ қочмоққа интилар эдилар. Аммо бу ҳолат ўтиб кетга, қози яна аслига қайтар, худди ҳеч нарса бўлмагандек кишилар билан муомала қиласар эди. Жабрдийдаларнинг кўплари қозининг феълига ўрганиб кетган. Улар яна қозидан кўрқсанларидан ҳеч қачон бўлиб ўтган ишларни унга эслатмас, ўрганмаганлар эса бора-бора қозининг феълига кўнишиб кетар эдилар.

Уша талвасали воқеа содир бўлган куннинг охирида жиккак ходим ўзининг шеригига бир қофозни кўрсатди. У қофозда қозининг серҳашам муҳри босилган эди. Тавсиядан ғоят норози бўлган қаҳру-ғазаб қилган қози ўзига келгач, ўша қофозга муҳр босиб тавсияни маъқуллаган. Жиккак ходимнинг шериги ҳайрон бўлиб бунинг сабабини сўради. Жиккак юзида айёrona ҳийлали табассум боқиб шеригининг қулоғига шивирлади:

— Қози жанобларининг шундай касалликлари бор. Тутқаноғи тутганда у йиртқич ҳайвондан ҳам бадтар бўлиб кетади. Ӯшанда унинг қўлига тушган одамнинг ҳолигавой. Кейин ўзига келгач, иш одатдагидек битаберади.

Абул Ҳасан Мўмин ибн Муҳаммадшоҳ ўзининг бу қасалини билар, табибларга кўп кўринган. Улар турли даволар қилишган бўлса ҳам фойдаси бўлмаган эди.

Бир куни қози уйида жанжал чиқарди. У ваҳший ҳайвон сингари ҳар томонга ўзини ташлар, дуч келган

буюмни чилларчин қиласар эди. Уйдагилар ўзларини қаёққа қўйишни билмайдилар. Тутқаноқ устида бемор тинчгина ухлаб ётган тўрт яшар набирасига чангсолди. Телба ўзини йўлбарс ҳис этар, бу гўдак эса унинг кўзига қуён бўлиб кўринган эди. Дод солиб югуриб келган келин боласини касалнинг қўлидан тортиб олмоққа уринар, аммо телба гўдакнинг оёғига тармашиб қўйиб юбормас эди. Уйдагилар ҳаммалари касалга ёпишдилар. Келин боласини аранг ажратиб олди. Лекин гўдакнинг оёғидаги суяқ чиққан, у бечора чириллаб йиғлар эди. Ниҳоят уйдагилар телбанинг қўл-оёғини боғлаб ётқиздилар. Болага озгина тарёқ бериб тинчтидилар. Бола ухлаб қолди. Қўл-оёғи боғлиқ йиртқичнинг оғзи ҳам боғлаб қўйилган эди. Чунки у ётган жойида ҳайқиришини қўймаганди. Уйда аза бўлаётгандай ҳамма жимиб қолди.

Ичкари уйда келин ухлаб ётган боласининг бошида юм-юм йиғлар, қайноаси уни юпатмоққа беҳуда уринар эди. Шу бўйи кун кеч бўлди. Эртаси эрталаб Абул Ҳасан Мўмин худди ҳеч нарса бўлмагандек уйдагиларнинг таъзими остида хизматга равона бўлди.

Келин ва қайнона оёқ суяги чиққан болани кўтариб табибга жўнашди. Улар тўғри табиб Шайх Абу Алининг уйига келишди. Табиб болани кўрпача устига ётқизиб диққат билан кўриб чиқди. Боланинг тиззаси сўл томонга туртиб чиқиб қолган эди. Табиб ётган боланинг оёқ суягини секин тортабошлади. Гўдак чинқираб йиғлади. Онаси ва бувиси ҳаяжонга тушдилар. Табиб тез ва чақон ҳаракат қиласар эди. У бўғинни чиққан жойига қарши томонга тортиб туриб кейин чиққан жойига қўйди. «Шиқ» этган товуш чиқди. Суяқ ўз ўрнига ўтирган эди. Сўнг табиб ёрдамчисига латтани совутилган мумли суртма билан ҳўллаб суяқ чиққан жойни боғлаб қўйишга буюрди.

Муолижа тугагач, табиб боланинг қандай қилиб бу ҳолга учраганини сўради. Бувиси уҳ тортиб эрининг касали тўғрисида сўйлаб берди. Шайх Абу Али хотинларни юпатди, уларга алам билан боқди. Сўнгра агар Абул Ҳасан Мўминнинг шундай тутқанофи тутиб қолса, дарҳол менга хабар қилингиз, деб тайинлаб уларни кузатиб қўйди.

Табибга бундай хабарни узоқ кутишга тўғри келмади. Орадан бир ҳафта ўтар ўтмас қозининг тутқанофи тутаётган пайтда унинг ўғли Ҳасан ибн Мўмин

табиб ҳузурига югуриб келди ва унга бу хабарни етказди. Табиб ва ёрдамчиси отланиб беморнинг ўғли билан қозининг ҳовлисига етиб боришиди. Овлоқроқ бир хонага олиб кириб қўйилган Абул Ҳасан ўзини йўлбарс деб ҳисоблаб ҳар ёққа ташланар, аммо қўл-оёғи боғлиқ бўлганидан бутун вужуди билан ҳаракатланса-да, лекин ўрнидан жилолмас эди.

Бу мудҳиш ҳолатни кўрган Абу Али дарҳол ёрдамчисига бир нима деди. Ёрдамчиси халтадан бир дорини олди. Бу дори кичкина кулча шаклида, Табиб пиёлага олма шарбати қуиди. Сўнг бир мисқол табошар (бўр)ни шарбатга сепди. Бу дорини қўлга тутиб табиб телбанинг ёнига келди. Беморнинг ўғли ва бир хизматчиси уни ушлаб турдилар. Табиб беморга кулчани егизди, орқасидан ҳалиги шарбатни ичирди. Озгина фурсат ўтди. Телба секин-секин ҳолсизланиб ўйқуга кетди. Беморнинг ўғли Ҳасан табибдан сўради:

— Бу қандай доридир?

— Бу кудчанинг хамири марварид, қаҳрабо ва маржоннинг ҳар биридан бир ярим мисқолдан, хом ипак, қуидирилган дарё қисқичбақасидан бир мисқолдан, говзабондан беш дирҳам, олтин кукундан икки донақ, ёқут талқонидан бир дирҳам, яна турли ўтлар ва уруғлардан аралаштириб қорилган.

— Кўп дорилар олдин ҳам берилган, аммо фойда қилмаган эди.

— Отангизнинг касали мания ва оғир меланхолия дейилади. Ушбу кулчани мен ўзим шу касалликка қарши тайёрлаганман. Беморнинг мижози жуда иссиқ. Шунинг учун мўътадил дори таркибиға майда туйилган анор рангли нафис ёқут ҳам қўшганман. Иншоллоҳ, бу дори фойда еткизар ва бемор умидсизликдан улуғ иқбол томон юзланар.

Табиб Ҳасан ибн Мўминга ҳалиги кулчалардан бир нечасини берди ва ҳар куни олма шарбати билан битта-биттадан беморга егизиб туришни тайинлади.

Орадан бир ойча вақт ўтди. Табиб Абу Алининг муолижаси Абул Ҳасан ибн Мўминга шундай фойда қилдики, у тутқаноқлардан бутунлай қутулди. Қози Абул Ҳасан Мўмин ибн Муҳаммадшоҳнинг оиласида-гилар ҳам, маҳкамасидагилар ҳам бу касаллик туфайли юз берадиган бахтсизликлардан холи бўлдилар. Беморнинг ўзи ҳам, ўзгалар ҳам мўъжизакор табибдан бир умрга миннатдор бўлиб қолдилар.

Шайх Абу Алиниң табиблик тажрибасида бундай ҳодисалар кўп бўлган. Бир умрли табобат тажрибаси ва улардан қилингани илмий холосаларни улуғ табиб ўзининг «Тиб қонунлари» китобида акс эттирган.

ТИБ ҚОНУНЛАРИ

«Тиб қонунлари»нинг биринчи китоби мундарижасини Шайх Абу Али иби Сино ўзи тушиб берган. Китобнинг бошланиш қисмида улуғ табиб бундай деб ёзди: «Дастлаб тибнинг иккала қисмидаги, яъни назарий ва амалий қисмидаги умумий масалалар тўғрисида сўзламоқчиман. Ундан кейин оддий дорилар қувватининг умумий ва хусусий таъсири тўғрисида сўзлайман. Сўнгра ҳар бир аъзода пайдо бўладиган касалликлар ҳақида сўзлаб, аввал ўша аъзонинг ташриҳини (анатомиясини) ва унинг бажарадиган ишини баён қилишга бошлайман. Оддий аъзолар ташриҳини, уларнинг ишларини биринчи умумий китобда баён қилиб ўтаман».

Биринчи китоб тибнинг умумий таърифи билан бошланади. Тиб назарий ва амалий бўлади. Улардан бири тиб қоидаларини, иккинчиси эса амалий ишларнинг қандай бўлишини англатди.

Унсурлар тўртта: олов ҳамда ҳаво енгил унсурлар: сув билан ер оғир унсурлардирлар.

Унсурларнинг ниҳоят даражадаги майда бўлаклари қарама-қарши кайфиятларга эгадирлар. Шуларнинг бир-бирига таъсири туфайли келиб чиқадиган кайфият мижоз деб аталади. Унсурлардаги дастлабки кайфиятлар тўртта: иссиқлик, совуқлик, ҳўллик, қуруқлик. Агар ана шу кайфиятлар мижоз эгасида баравар бўлса мўътадил бўлади.

Гавдадаги энг иссиқ нарса руҳ. Руҳнинг найдо бўлиш ўрни юракдир. Ундан кейинги даражада турувчи қондир. Ундан кейингина жигар, сўнгра ўпка ва гўшт келади. Сўнг мушак, талоқ, буйрак, томирлар келади.

Гавдадаги энг совуқ мижозли нарса балғам: сўнгра чарви, ёғ, соч, суяқ, тоғай, пай, парда, нервлар, мия ва тери келади.

Гавдадаги энг ҳўл нарса балғам, қон, ёғ, мия, сўнг ўпка, жигар, талоқ, буйраклардир.

Гавдадаги энг қуруқ нарса соч, сўнг суяқ.

Абу Али ибн Сино инсон умрини қўйидаги тўрт қисемга тақсимлайди: Усиш ёши (ўсмирлик — ўттиз йил давом этади. Усишдан тўхташ ёки ёшлик даври ўттиз беш — қирқ ёшгача бўлган давр, чўкиш ёши олтмиш ёшгача давом этади. Кучиззлик билан чўкиш ёши умр охиригача боради. Бу кексаликдир.

Биринчи китобнинг тўртинчи таълими хилтларга бағишиланган.

Киши овқат еб бўлгач, ўша овқат ҳўл, оқувчан жисемга айланади. Ана шуни хилт дейдилар. Унинг бир қисми овқатланувчидан тарқаладиган нарсанинг ўрнини қоплади. Бу яхши хилт. Баъзиси ортиқча ва паст сифатли бўлади. У гавдадан чиқарилиб ташланиши керак.

Аъзолар яхши хилтларнинг дастлабки қўшилишларидан пайдо бўладилар. Аъзоларнинг баъзиси оддий, баъзиси мураккаб бўлади.

Оддийларининг барча бўлаклари исм ва таърифда бир хил бўлади. Масалан гўшт, суяк, нерв ва унинг бўлаклари. Мураккаблари эса ҳар бир бўлаги ҳар хил исм ва таърифга эга: қўл, юз. Мураккаб аъзолар иш ва восита органлари дилар.

Абу Али ибн Сино биринчи жумланинг ўттиз фаслида (бобида) суюкларнинг анатомиясини баён қилинган. Улар калла суюгидан бошлаб оёқ панжаларининг анатомиясигача барча суюкларни ўз ичига олади.

Иккинчи жумлада эса ўттиз фасл ва мушакларидан то оёқ бармоқлари мушакларининг анатомияси таърифига бағишиланган.

Учинчи жумлада нервлар, артериялар, веналар, қувватлар тўғрисида сўз боради.

Булар ҳаммаси «Тиб қонунлари» биринчи китобининг биринчи фанидир.

Иккинчи фан касалликлар, уларнинг умумий сабаблари тўғрисида.

Одам гавдасининг аҳволи уч хил: 1) Соғлиқ. Бунда одамнинг гавдаси, мижози, унинг таркиби, ундаги феъллар тўғри ва соғлом бўлади. 2) Қасаллик, яъни юқоридагига тескари ҳол. 3) Соғлиқ ҳам, касаллик ҳам бўлмаган ҳол. Масалан, қарилар, касалликдан тузалиб келаётганлар, болалар.

Содда касалликлар мижоз ва таркиб касалликлари турларидан бир хил касалликлар.

Мураккаб касалликлар деганда икки ва ундан ор-

тиқ касаллик йиғилиб битта қасалликни ташқил қи-
линган ҳолни англамоқ зарур.

Зийнатга оид ҳолатлар ҳам касалликка қўшилиб
саналади. Масалан, соч тўкилиши, тус ўзгариши,
ямоқлар.

Абу Али ибн Сино юқорида айтилган уч ҳол: соғ-
лиқ, касаллик, ва ўртача ҳолларнинг сабабларини баён
этади. Улар олдин келувчи сабаб, ташқи сабаб ва
боғловчи сабабдан иборат. Олдин келувчи ва боғлов-
чи сабаб хилт, мижоз ва ё таркибига оид.

Гавданинг ҳолатига таъсири кўрсатувчи сабаблар-
дан зарурийлари олти жинс бўлади. Улар атрофимиз-
ни ўраган ҳаво, ейиладиган ва ичиладиган нарсалар,
гавданинг ҳаракати ва тинчлиги, нафсоний ҳаракат-
лар, уйқу ва уйғоқлик, бўшалиш ва тўхтаб қолишилик-
дан иборатdir.

Ҳаво роҳатлантиради ва тозалайди. Йил фаслла-
рининг ҳавоси ўзига лозим бўлган хусусиятлари билан
келиши керак. Ёзнинг иссиқ бўлиши, қишининг совуқ
бўлиши каби. Агар бу табиийлик бузилса, ёмон ка-
салларга сабаб бўлади. Фасллари доимо бир турли
кайфиятда бўлган йил ёмон йилdir. Энг соғлом вақт
кузнинг ёмғирлик ва қишининг шу мамлакатга хос ўта
совуқли бўлмасдан мўътадил даражада совуқ бўли-
шидир. Агар баҳор ёмғирли бўлиб, ёз ҳам ёмғирдан
холи бўлмаса, бу энг соғлом фурсат бўлади.

Яхши ҳаво тутун ва буғ каби ёт нарсалар аралаш-
маган ҳаводир. Абу Али ибн Сино фаслларнинг инсон
организмига таъсири турли фаслларда қўзғаладигак
қасалликлар тўғрисида муфассал ҳикоя қиласди,
сўнгра туар жойлар тўғрисида сўзлайди.

Олимнинг ёзишича, иссиқ жойлар қорайтиради,
намликлар кўп буғланиш натижасида ҳаво камайиб
кетса, одамлар тез қарийдилар. Совуқ ерларда яшов-
чилар кучли ва ботир бўладилар. Агар ундан ерлар
намли бўлса, аҳолиси сергўшт ва серёғ бўлади, томир-
лари чуқур жойлашган бўлиб бўғинлари қуруқ, ўз-
лари кўркам ва яшнаган бўладилар.

Намлик ерларда яшовчиларнинг ташқи кўриниш-
лари яхши, терилари юмшоқ бўлади. Баланд ерда
яшовчилар соғлом, кучли ва чидамли бўладилар, узоқ
умр кўрадилар.

Ибн Сино ҳаммомга тушиш, гавдани қўёшда тоб-
лаш, қумга тушиш, ёғларни мўл суртиш, юзга сув

сепиш билан бөгли ҳодисалар тўғрисида муфассал сўзлайди. Ҳаммом ўз ҳавоси билан қиздиради, ўз суви билан ҳўллайди. Ҳаммом ҳавоси баъзан түгма ҳароратни тарқатиб юборади ва танани совитади: баъзан эса түгма ҳўлликни тарқатиб органлар моддасини қуритади. Ҳаммомга тушган киши шошмасдан тинч ва секин-аста чўмилиши керак.

Иссик қуёшда баданин қиздириш, хусусан бу тез юрниш ва чопиш каби кучли ҳаракатлар вақтида бўлса, чиқиндиларни кучли равишда тарқатади, терлатади, қорин кўпчишини йўқотади, нафас олишни яхшилади, мияга фойда қиласди.

Тери атрофидаги намликларни денгиз қумлари қуритади, юқорида айтилган касалликларга фойда қиласди.

Мўътадил бадантарбия, уқалаш, ишқалаш, мўътадил миқдордаги овқат ва ҳаракатлар қиздирувчилардир. Ҳаддан ортиқ ҳаракат ёки ҳаракатсизлик, кўп ейиш, ичиш кабилар совутувчилардир. Ҳар нарсанинг ҳаддан ташқари бўлиши гавдани совутиб юборади.

Ибн Сино оғриқ тўғрисида бундай дейди: оғриқ биронта ёқимесиз нарсани сезишдир. Лаззатланиш ёқимли нарсани сезишдир. Ушлаб кўриб сезиш энг қаттиқ ҳис ва таассуротни узоқ сақлайди. Шунинг учун қўпол табиатли одамлар шу орқали катта лаззат оладилар.

Алоҳида таълим касаллик белгилари ва уларнинг юз беришига бағишлиланган.

Баъзи юз беришлар — иситма, санчувчи оғриқ, нафас қисиши, йўтал «аррасимон» томир уриши каби касалликлар билан бошланиб, бирга тамом бўлади. Баъзилари эса, масалан етилиш, етилмаганик, ҳалолкат ўткир касалликларда учрайди.

Баъзи ташқи аломатлар ички ҳолатни кўрсатади.

Алоҳида жумла пульсларга бағишлиланади. Ундан кейинги жумлада чиқиндилар тўғрисида сўз боради.

Биринчи китобнинг учинчи фани соғлиқни сақлаш тадбирларини баён этади. Агар китобнинг биринчи ва иккинчи фанлари — тиб таърифи ва касалликлар, тибнинг назариясидан иборат бўлган бўлса, бу учинчи фан тибнинг амалиясидир.

Инсон гавдасининг вужудга қелишига сабаб эрлик уруги, аёллик тухуми ва ҳайз қони. Эрлик уру-

ғи негиз, тухум ва ҳайз эса модда вазифасиний бажаради. Қон ва аёл тухуми сувли ва тупроқжинслироқдир. Эр уруғида эса ҳаво ва олов ортиқроқ. Шу билан улар бир-бирига қарама-қарши хусусиятга эга.

Шунинг учун улардан ташкил топган нарсада тупроқлилик ва оловлилик бўлса ҳам уларнинг биринчи қўшилиши ҳўл бўлади. Тупроқлилик ўз қаттиқлиги билан, оловлилик ўз етилтириш кучи билан ёрдамлашиб шу икки жавҳардан туғилган нарсани қотиради ва бир-бирига боғлади.

Ҳўллик секин-аста йўқола боради. Бу гавда учун биринчи офат. Иккинчи офат эса ўша ҳўлликнинг сасиб, бузилиб боришидир. Ана шу икки соғлиқни сақлашда эътиборга олинмоғи керак. Ҳар бир гавда мижози туғма иссиқлиги ва ҳўллиги талаб қиласидиган зарурий қуримоқнинг чегараси бор. Гавда ҳаёти ўша чегарадан ўтмайди. Аммо бაъзи сабабларга кўра ўша чегарага етолмаслиги мумкин.

Соғлиқни сақлашнинг вазифаси гавданинг муносиб нарсаларини сақлаш орқали инсонни ўша чегарагача етказишдан иборат.

Соғлиқни сақлашда асосий нарса умумий ва зарурий сабабларни мўътадиллаштироқдир. Бу сабаблар қуйидагилар: мижозни мўътадил қилиш, ейиладиган ва ичиладиган нарсаларни танлаш; гавдани чиқиндидан тозалаш, тўғри тузилишни сақлаш, бурундан тортиладиган ҳавони етарли ва яхши қилиш, кийимларни яхшилаш, жисмоний ва руҳий ҳаракатларни мўътадил қилиш; уларга уйқу ва уйғоқлик ҳам киради.

Шундан сўнг олим боланинг туғилганидан то оёққа турганигача қилинадиган тадбирлар тўғрисида таълим беради.

Учинчи фанинг биринчи таълими бола тадбири ҳақида. Бунда чақалоқнинг киндигини кесишдан бошлиб, то унинг ўн тўрт ёшга етгунигача қилиниши лозим бўлган ишлар тўғрисида таълим берилади.

Чақалоқнинг юзи қаттиқ ва териси кучли бўлмоғи учун кам тузли намакоб сурилади. Агар бола гавдасида кир ва намлик кўп бўлса иккинчи бор намакоб суртиш керак. Сўнгра илиқ сув билан чўмилтирилади. Чашлоқни йўргаклагандан боланинг аъзоларини мулойимлик билан силамоқ керак.

Чўмилтиromoқ учун қулай фурсат боланинг узоқ вақт ухлагандан кейинги вақтидир.

Бола имкон борича фақат она сути билан эмизилиши керак. Бир кунда икки ёки уч марта эмизиш кифоядир. Бу таълимда эмизувчиларга талаб, болалар касалликларига оид маълумотлар бор.

Ибн Сино соғлиқни сақлашнинг асосий тадбири бадантарбия, сўнгра уйқудир, дейди. Иккинчи таълимда шу тўғрида сўз боради.

Бадантарбия танани ортиқча чиқиндилардан то-залайди, туғма иссиқликни оширади, танага енгиллик бағишлийди.

Бадантарбия турлари: тортишиш, мушт билан туртишиш, ёйдан ўқ отиш, найза отиш, тез юриш, юқоридаги нарсага иргиб осилиш, бир оёқда сакраш, қиличбозлик ва найзабозлик, отда юриш, икки қўлини силкитишиш.

Енгил ва нозик бадантарбия: аргимчоқларда учиш, беланчак учиш, қайиқ ва кемада сайр қилиш. Кучлироқ ҳаракатлар: отга, туяга миниш ва кажава ва араваларда сайр-қилиш. Улуг табиб ҳар бир ҳаракатнинг тўла таърифини беради ва уларнинг фойдасини сўйлади.

Масалан, аравада орқасини араванинг олди томонига ўгириб ўтириш кўзи заиф кишиларга фойдалидир. Қайиқ ва кемаларда соҳилга яқин ерларда сайр қилиш мохов, истисқо, меъда совиши ва кўпчишига фойда қиласди. Кўзни майда буюмларга тикиб туриб вақти-вақти билан юқоридаги нарсага тез кўз югуртириш ҳам фойдалидир.

Алоҳида фасллар овқат, уни ҳазм қилишга, уйқува уйғоқлик таърифига бағишиланган.

Тўртинчи фан даволаш усууллари ҳақида. Даволаш уч турли бўлади: тадбир (режим) ва озиқлантириш; дори истеъмол қилиш; қўл билан бажариладиган ишлар (манипуляция). Табиб ўттиз бир фаслда даволашнинг барча усууларини бирма-бир баён этиб чиқкан.

«ТИБ ҚОНУНЛАРИ»НИНГ ИҚКИНЧИ ҚИТОБИ содда (ёлғиз ҳолда ишлатиладиган) дориларга бағишиланган. Уни табиб икки мақолага бўлган. Биринчи мақола олти фаслдан иборат. Улар содда дориларнинг мижозларини ўрганиш, солиштириш, қувват таъсира, ташқи таъсирлар, дориларни йиғиш ва сақлаш тўрисида сўз боради. Иккинчи мақолада ўн олтита жадвал бор. Уларда дориларнинг хоссалари ва ҳолатла-

ри тўғрисида сўз боради. Шундан кейин барча маълум содда дориларнинг таърифи ва қўлланиши ҳикоя қилинади. Дорилар номи алифбе тартибида берилган. Уларнинг кўпи одамдаги озуқалардир.

Бир-икки мисол келтирамиз:

Басал — пиёз. Моҳияти: Бу маълум нарса. Бунда парчаловчи ўткир маза билан бирга аччиқлик ва буриштириш таъсири бор. Пиёзниг ейиладиган узунроқ хили бўлиб ўткир, мазаси кучлироқдир. Қизили оқига қараганда ўткирроқ бўлади. Қуритилгани ҳўлига ва хоми қовурилганига қараганда ўткирроқ. Табнати: Учинчи даражада иссиқ. Бунда ортиқча ҳўллик ҳам бор. Таъсир ва хоссалари: Пиёз латифлаштирувчи ва парчаловчидир. Бунда буриштириш билан бирликда кетказиш ва кучли очиш таъсири бор. Пиёзда дам қилиш ва қонни ташқарига тортиш хоссаси ҳам бирдир. Демак, у терини қизартувчидир. Бунинг пиширилгани озиқли модда туғдиради. Пиёзли шўрва пиёэсиз шўрвага нисбатан камроқ дам қиласи. Пиширилган пиёзниг озиқ моддаси ғализ хилт пайдо қиласи. Айниқса ейиладиган пиёз турли сувларнинг зарарини қайтаради. (Пиёз суви ҳайз қонини юргизади.) Пиёз турли сасиган сувнинг ҳидини кеткизадиган нарсалардандир. Зийнати: Юзни қизартиради. Уруғи доғни кетказади. Бу «тулка касаллиги»да мўйи тўқилган ерда ишқаланса, жуда кўп фойда қиласи. Уруғи туз билан қўшиб ишлатилса, сўгалларни қўпоради. Суви чиркин яраларга фойда қиласи. Товуқ ёғи билан қўшиб оёқ кийимидан шилинган жойга қўйилса, фойда қиласи. Суви бурунга юборилса бошни тоза қиласи. Бош оғирлашганда, қулоқ шанғиллашида, йиринг ва сув пайдо бўлишида қулоққа томизилади. Пиёз бошни оғритадиган нарсалардандир. Буни кўп ишлатиш уйқу бостиради. Пиёз ёмон хилт туғдиргани учун, ақлга зарар қиладиганлардандир. Бу сўлакни ҳам кўпайтиради. Ейиладиган пиёзниг сиқиб олинган суви кўзга сув тушгани (картаракта)да фойда қиласи. Кўзни равшан қиласи. Кўзниг оқига қарши пиёз уругини асал билан қўйилади. Пиёз суви асал билан бирга ишлатилса, томоқ оғриқда фойда қиласи. Ёввойи пиёз ҳазмни қийинлаштиради. Бунинг бир хили қусишини қўзғатади. Ейиладиган пиёз аччиқлиги сабабли заниф меъданни кучли қилиб иштаҳани очади. Пиёзниг икки марта пиширилгани кўп озиқлидир. Чанқашга сабаб

бўлади. Сариқ касалида фойда қиласди. Бавосирда томирларнинг тиқилмаларини очади. Пиёзниг ҳамма турлари шаҳвоний ҳисни қўзғатади. Пиёз суви ҳайз қонини юргизиб ични юмшатади. Сувини туз ва газак ўти билан бирга қутурган ит тишлаганида қўйилса, фойда қиласди. Ейладиган пиёз гармсел шамолининг заарини қайтаради. Баъзи табиблар, бу меъданда гармселининг заарини синдирадиган кўп миқдорда ҳўл хилт туғдиради, дейилади. (Бу таъсирида пиёз кучлидир).

Сабзи тўғрисида ҳам шундай тафсилий гаплар бор. Туффоҳ — олма тўғрисида Ибн Сино ёзадики, олманинг энг мўътадили Шош (Тошкент) олмасидир. Бемаза олма ёмон бўлиб, унинг фойдаси кам. Хом олма ҳам шундай. Олма заиф меъданни қувватлаштиради, унинг касаллигига фойда қиласди. Яна Тан — анжир, тут, саримсоқ, бодом, буғдой, бақла ва бошқа озуқаларнинг таъсири тўғрисида муфассал маълумотлар бор. Иккинчи китобда жами 810 модда тўғрисида хабар берилади. Улар ичидаги ўсимликлар, ҳайвонот, донлар ва бошқа турли хил моддалар бор.

Ибн Сино келтирган дориларнинг бир қисми халқ тиббиётидаги қўлланган. Демак, «Қонун»нинг иккинчи китоби орқали буюк мутафаккир яшаган даврдаги халқ тиббиётидан ҳам хабардор бўламиз.

Бу китобда келтирилган ўсимликлардан олинувчи дориларнинг кўпи то XX аср гача қўлланилиб келган.

Бу дорилар ўрта аср Европасига Ибн Сино асарлари орқали маълум бўлган. В. М. Карасикнинг аниқлашига кўра «Қонун»нинг иккинчи китобидаги дорилардан 150 га яқини бизнинг мамлакатимизда нашар этилган фармокопея рўйхатларида бор. Бу нашрлар жами 8 та бўлиб биринчи нашри 1866 йилда, саккизинчи нашри эса 1946 йилда амалга оширилган. Шунинг ўзи ҳам «Қонун»нинг доришунослик тарихидан қандай катта ўрин тутганини кўрсатиб туради.

«Тиб қонунлари»нинг учинчи китоби йигирма иккисимдан иборат. Улар бошдан то оёққача барча орғанларнинг касалликлари тўғрисида ҳикоя қиласди.

Мия тўғрисида сўзлаганда Ибн Сино ёзадики, мия нам бўлади, чунки шунда у ҳаракатлар туфайли қурриб қолмайди ва лозим шаклга эга бўлади. У юмшоқ ва ёғли. Жолинус (Клавдий Гален) айтганки, шунда мия яхши шаклга эга бўлади ва фикрлаш ас-

носида ўзгара олади. Ахир юмшоқ нарса ўзгаришга мойилроқ бўлади-ку. Ибн Сино айтадики, миянинг юмшоқлиги унинг ёғли бўлмоғи ва унга туташган нервларни озиқлантири олиши учун қулайлик туғдиради. Мия икки пўстлоғ билан қопланган. Улардан юмшоги мияга, йўғони бош суюгига ёпишиб туради.

Бош тўғрисида сўзлаганда Ибн Сино Жолинуснинг бош мия, эшитиш, сезиш, ҳидлаш таъминлаш учун яратилган эмас, чунки булар бошқа органларда бор, асосан бош кўзларни жойлаштироқ учун яратилган, деган сўзларини тасдиқлаб, кўзнинг бошда ўрнашган жойини қўшиндаги соқчиларнинг баландликда жойлашмоқларига ўхшатади. Ибн Сино бошқа жойлашган органларнинг таърифи, уларнинг касалликлари, бош оғриқлари, уларни даволаш тўғрисида муфассал сўзлайди.

Шундан кейин руҳий касалликлар ҳақидаги боблар келади. Табиб оташин севгини ҳам руҳий нотобликлар қаторида келтиради. Севгучи киши кўзлари чўкиб, қуруқлашиб кетган бўлади, нафаси бўлинниб бўлинниб туради. Кўп-кўп кулиб ё ҳазиллашиб туради, ишқий шеърларни тинглаганда ё кулади, ё қайғуриб йиглайди. Қовоғидан бошқа ҳамма аъзолари озиб кетади. Юриш-туришида тартиб бўлмайди, томир уриши беқарор. Севгилисининг номини эшигандан, ё уни ногоҳ кўриб қолганда томир уриши ўзгаради. Шундан севгучининг кимга кўнгил берганини аниқлаш мумкин. Ибн Сино ўзининг шу йўсинда бир севгучининг севгилисини топганини айтади.

«Конун»да Ибн Сино ўз табиблик тажрибасидан бир мисол келтиради:

Бир йигит бир қизни севган, бу севги ўтида куйиб оғир ва узоқ давом этган касалликларга мубтало бўлган. У ҳаддан ташқари озиб кетган, узоқ иситма ичидага қолган, чунки вужуди оташин севги тифайли жуда заифлашиб кетган эди. Ибн Сино бу йигитнинг дарди севги эканини тушунган. Аммо бемор буни бўйнига олмас эди. Табиб беморнинг томирини ушлаганича кўп номларни айтаберган. Шунда севгилисининг номини айтилганда бирдан томир уришида ўзгариш пайдо бўлган. Буни бир неча бор тақрорлаб текшириб кўргач, севгилисининг номини аниқлаган. Кейин шу тарзда маҳаллалар, кўчалар, уйлар, оиласларни, бир бошдан санай берган. Ана шуларнинг қай бири айтил-

ганды томир уришида ўзгариш содир бўлса, шунга қараб йигит севгилиси яшайдиган маҳалла, ота-онаси кимлиги тўғрисида тасаввур пайдо қилган. Шундай қилиб маҳбубани аниқлагач, табиб, севгучи йигитни ўз севгилисига етиштириш маслаҳатини берган. Ошиқ ўз маҳбубаси билан яқинда бирга бўлажагини билгач, унинг ахволи яхшидан борган, эти ўсиб, анча ўзига келиб қолган. У тез фурсатда тузалиб кетган. Ибн Сино хулоса қилиб ёзадики, табиат ташқи таъсирга бўйсунажаги шундан маълум бўлади.

Севгининг давоси севгилисига етишмоқ ёки севгучини севгидан қайтармоқдир.

Иккинчи бўлим бутунислича нервларга бағишлиган. Унда нерв касалликлари, уларнинг белгилари ва даволаш усуllibар тўғрисида сўз боради. Шундан кейинги бўлимларда кўз, қулоқ, бурун оғиз, тил, тиш, милк ва лаблар, томоқ оғриқлари тўғрисидаги боблар келади.

Ўнинчи бўлим ўпка ва кўкрак касалликларига бағишиланган. Бу ерда нафас олиш, овозга оид ҳолатлар таҳлил этилади. Яна йўташ ва қон тупуриш, кўкрак атрофидаги аъзолардаги шишилар тўғрисида сўз боради ва уларни даволаш усуllibар кўрсатилади. Ўн биринчи қисм юрак тўғрисида ҳикоя қиласи; ўн иккинчи қисм аёллар кўкраги тўғрисида; ўн тўртинчи қисм жигар ва унинг ҳолати тўғрисидадир.

Жигар қон пайдо бўлишини якунловчи аъзодир. Жигар қотган қизил қон рангидаги гўштга ўхшайди. Унда нерв толалари йўқ. У нервларга тўла қобиқقا ўралган. Шундан сўнг Ибн Сино жигарнинг мукаммал таърифини беради, унинг касалликлари, бу касалликларни даволаш усуllibарини баён қиласи. Ундан кейин талоқ, ўт аъзолари, сариқ касали ва уни даволаш тўғрисида сўз боради. Кейинги қисмларда ичаклар, уларнинг касалликлари ва уларни даволаш усуllibар баён этилган. Шундан сўнг буйрак касалликлари, айниқса қанд касаллиги (диабет) ва уни даволаш тўғрисида сўз боради. Кейинги қисмлар эркаклар ва аёлларнинг жинсий аъзолари ва уларнинг касалликларига бағишиланган. Бундан кейин эса ҳомиладорлик, авлод юзага келишига оид масалалар тўғрисидадир.

«Тиб қонунлари»нинг учинчи китоби жами йигир-

ма икки қисмдан иборат бўлиб охирги қисм елка, биқин, тизза ва оёқларда бўладиган касалликлар ва уларни даволашга бағишиланган.

«ҚОНУН»НИНГ ТУРТИНЧИ КИТОБИ етти фандан иборат. Биринчи фанда иситмалар тўғрисида сўз боради. Иккинчи фан буҳрон тўғрисида. Учинчи фан шишлар ва тошмалар, тўртинчи фан суюк синиш, бешинчи фан суюк чиқиши, олтинчи фан заҳарлар, еттинчи фан зийнат тўғрисидадир.

Ибн Сино иситмани юракда алангаланиб артерия ва веналардаги руҳ ва қон орқали баданга ёйилиши ни ёзади. Шу ёйилиш туфайли баданда ҳам алангалини юз беради ва кишининг одатдаги ишларига ҳалол етади. У иситмани бир кунлик ва давомли иситмаларга ажратади. Уларнинг юз бериш сабабларини санаб чиқади, бундай иситмаларга қарши қандай тадбирлар кўриш кераклигини муфассал баён этади.

Буҳрон, Ибн Синонинг ёзишича, «ажрим қилиш» маъноси дадир. Яъни у ё соғайишни, ё касалликка томон дафъатан ўзгаришни билдиради. Бу фикрни табиб адабий усулда тушунтиради: Касаллик бадан учун бирор шаҳарни босган ташқи душман кабидир. Инсоннинг табиати бу шаҳарни мудофаа этувчи сultonondir. Баъзан душман билан мудофаачилар ўртасида енгил, эътибор қилмаса ҳам бўладиган жанглар бўлиб туради. Баъзан эса қаттиқ қонли, шовқин-суронли курашлар юз беради. Кейин қисқа бир фурсат ичida ора ажрим бўлади. Ё шаҳар ҳимоячилари, ё душман ғолиб чиқади. Ё ғалаба тўлиқ бўлиб икки тарафнинг бири енгилади ва шаҳарни ҳоли қолдириб қочади. Ё бутунисича ғалаба қўлга кирмайди ва бир томоннинг енгилиши яна уруш чиқишига монелик қиласи. Яна уруш бошлана беради. Бундай пайтда ажрим охирги жангда маълум бўлади. Мудофаачи сulton ғалаба қозонса, душманни ҳайдайди: ё бутунлай ҳайдаб шаҳар маркази атрофида, шаҳарга туташ жойларда осоишишталик ўрнатади: ёки шаҳардан душманни ҳайдайди-ю, шаҳарга туташ жойлардан чиқариб юборишга кучи етмай тўхтайди. Худди шу айтилганлар сингари яхши буҳрон сабабли баданга етишган қувват юрак ва бошқа бошқарувчи аъзолардан, яъни гавданинг асосий қисмларидан, унга азият бериб турған моддани ҳайдайди. Ёки асосий аъзолардан ҳайдайди-ю, чекка аъзолардан сиқиб чиқара олмайди,

балки ўша зарарли моддаларни четга ҳайдаш билан чекланиб қўя қолади. Бу «модда кўчиши буҳрони» дейилади.

Табибнинг кўрсатишича, гавдадан кетадиган ҳар бир касаллик ё буҳрон йўли билан, ё модданинг тарқалиши билан кетади. Ҳалок этувчи касаллик ҳам ё буҳрон, ёки сўлитиш, яъни қувватни оз-оз тарқатиш билан ҳалок этади. Шундан сўнг Ибн Сино буҳрон белгиларини бирма-бир кўрсатади, буҳроннинг бошлиниш ва кечишини ҳикоя қиласди.

Ибн Сино шиш ва тошмалар тўғрисида сўзлаганда, уларнинг иссиқ ёки иссиқ эмаслигига диққатни жалб этади. Шундан сўнг шишлар, йиринг боғловчи шишлар, турли чиқиқлар ва уларни даволаш тўғрисида сўзлайди. Айрим мақола совуқ шишларга бағишланган.

Алоҳида фан жароҳатлар тўғрисида. Агар, қовуқ, буйрак, мия, ингичка ичаклар, жигарда жароҳат бўлса зарари кучайиб бориб охири ўлдиради. Юракда жароҳат пайдо бўлса соғайишини кутиш мумкин эмас. Шундан сўнг табиб жароҳатларни очиш, тикиш, эт ундириш, дорилар билан даволаш, яралар ва нерв жароҳатлари тўғрисидаги маслаҳатларини беради.

Суяк чиқиши тўғрисида сўз бошлар экан, Ибн Сино дастлаб суяк чиқишини тушунтиради. Бу суякнинг ўз жойидан ва табиий вазиятидан бир томонга бутунлай чиқишидир. Шундан сўнг барча суякларнинг чиққандада ёки синганда даволанишига оид қоидалар ва усуллар баён қилинади.

Заҳарлар тўғрисида эса Ибн Сино ҳар бир заҳарланишга оид ҳодисага алоҳида тўхтайди, уларни даволаш йўлларини бирма-бир кўрсатиб ўтади. Ўз кайфияти билан таъсир қилувчи заҳар «денгиз қуёни» каби ўйиб еб, чиритувчи, ёки фарфилон каби қиздириб алангалантирувчи, ёки афюн каби совитиб увиштирувчи, ёки куйдирилган қўргошин каби бадандаги нафас йўлларини тўсувчи бўлади.

Жавҳари билан таъсир кўрсатувчи заҳар энг ёмонидир. Шундан кейин табиб заҳар ичирилган одамии даволаш усуллари тўғрисида сўйлайди. Да-волаш кечиктирилмаслиги керак. У кишига илиқ сув ёки кунжут ёғи ва зйтун ёғи ичириб қусдирилади. Ичирилаётган нарсага укроп ва буроқ қуввати ўтқазилса яхшироқ бўлади.

Заҳарланган киши мумкин қадар кўп қусгандан кейин сут исча заҳарнинг зарари синади. Заҳарланган кишини ухлатмаслик, ваҳимага солмаслик, унинг ёнида шовқин-сурон қилиб туриш керак.

Кейинги мақолаларда табиб ўсимликлардан, ҳайвон ва ҳашаротлардан заҳарланганларни даволаш усуllibарини баён этган.

Зийнат боби мўй аҳволи таърифидан бошланади.

Тутунсимон буғ тери тешикларида қуюқлашиб туриб қолганда, айниқса бадан рутубати ёпишқоқ ёғсимон бўлиб, сув ва лой сингари бўлмаса, ўша буғдан мўй пайдо бўлади. Бу ёғлик дарахтларнинг барги тўкилмаслигини эслатади. Болалар ва хотинларда ҳўл буғ кўп бўлади, тутунсимон буғ эса кам бўлади. Шунинг учун уларда соқол чиқмайди. Узоққа чўзилган касалликлар, хусусан сил ва ингичка оғриқ касалликлари рутубатни сўриб қурилади. Мўй овқатланадиган модда қолмайди ва сувсаган ўсимлик суғорилмагандан бўладиганидек мўй тушиб кетади. Ибн Сино мўй тўкилиши, оқаришининг олдини олувчи дори-дармонларни айтиб бўлгач, тери рангига оид ҳолатлар баён этади. Кон ва руҳ тери томонга ҳаракат қиласа, тери равшан, тоза ва қизил бўлади. Енгил тозалаш хусусиятига эга бўлган нарсалар терини юпқалаштириб, тери юзасида ўлган нарсаларни латиф равишда шилиб олади. Яна терини иссиқдан, совуқдан, шамоллардан сақлаш керак.

Нўхат, илитилган тухум, гўшт сели, хушбўй шароб, анжир, наҳорга очилган шароб ва сут терига қараб ҳайдаладиган суюқ кон пайдо қиласи. Овқатга мурч, қалампирмунчоқ, тўпалоқ қўшиб ейилса рангни чиройли қиласи. Ибн Сино фаол ҳаракатлар, ҳаяжон, ўйин-кулги, шодлик, мўътадил бадантарбия пок ва хушчақчақ кишилар билан сухбат, мусобақа, пойгалар томошаси рангни қизартиради, деб ёзади.

Шундан кейин терида бўладиган касалликлар саъфа, темирўтки, сепкил, иссиқлик, сўгал шох, ёрилишлар, терида бўладиган сассиқ ҳидлар ва уларни даволаш усуllibари кўрсатилади.

Еттинчи фаннинг охирги тўртинчи мақоласи гавдага, қўл ва оёқларга тегишли ҳолатлар хусусидадир. Улар ориқлик, ҳаддан ташқари семизлик, уларни даволаш: қўл, оёқ тирноқлар парвариши тўғрисидадир.

Ориқликка сабаб овқатда семиртирувчи модда-

нинг йўқлиги, ёки суюлтирувчи овқатни кўп истеъмол қилиш, ёки тоза қон пайдо қилмайдиган овқат билан чекланиб туришдир. Бунга яна ҳазм, қувватининг заифлиги ҳам боис бўлади. Кучли қуюқ қон пайдо қиладиган овқатлар ейиш, овқатдан кейин ҳаммомга тушиш, бадантарбия, сув ва ҳавони алмаштириш ориқликни кетказади. Ҳаддан ташқари семизлик гавда ҳаракатига тўсқинлик қиласи, томирларни қисиб торайтиради, натижада руҳ йўли тўсилиб, руҳ сўлийди. Уларга майин ҳаво етолмайди, натижада руҳнинг мижози бузилади. Тор жойга қоннинг ҳайдалиб бориши хавфи пайдо бўлади. Гоҳо бирор томир ёйилиб ўлимга сабабчи бўлади. Ҳаддан ташқари семиз одамлар руҳ йўлларининг торлиги; мижозларнинг совуқлиги, қоннинг камлиги ва балғамнинг кўллиги туфайли очлик ва ташналикка чидай олмайдилар.

Мўтадил семизлик, айниқса ёшлик вақтида, яхшидир. Ўртанча семизлик, гарчи кишини чарчатиб ҳаракат қилиш учун заифлаштиурса ҳам, рутубатликка далолат қилиши сабабли узоқ яшашдан далолат беради.

«ҚОНУН»НИНГ БЕШИНЧИ КИТОБИ кириш қисмида Ибн Сино мураккаб дориларнинг ишлатилиши қандай вақтларда зарур бўлажагини кўрсатади.

Баъзан касалликни йўқотмоқ учун унга қарши оддий дори топилмай қолади. Мураккаб дорининг баъзи томонларини эса ё кучайтиromoқ, ёки сустлатмоқ зарур бўлиб қолади. Масалан, газак ўтда эритувчи куч ортиқ, боғловчи куч эса кам; демак уни қўллашдан олдин, боғловчи кучни ортдирувчи моддага қўшмоқ керак.

Баъзан бизда қиздириувчи восита тайёр, аслида эса, бизга қиздириш камроқ лозим бўлади. Шунда бу дорига совуқлатувчи нарса қўшилади. Гоҳо эса кўпроқ қиздириш лозим бўлади. Унда дорига қиздириш кучини оширувчи нарса қўшилади ва ҳ. к.

Баъзан дори бир томондан катта фойда қилувчи бўлади, бошқа томондан эса зарар етказади. Шунда унинг заарини йўқ қиладиган моддани дорига аралаштиришга тўғри келади. Ана шундай қилиб мураккаб дорилар келиб чиқади.

Китобнинг биринчи бобида Ибн Сино фармокопеяга кирган мураккаб дёрилар тўғрисида сўзлайди.

Уларнинг биринчиси тарьёки форуқ (**«Ажратувчи тарьёқ»**дир. У жуда мураккаб дори бўлиб, клон, чаён,

қутурган ит заҳарларига қарши ишлатилади. Яна бу дори йирингли ва қора сафро касалликларига ва улар туфайли юз берадиган иситмаларга қарши ишлатилади. Шунингдек, ёмон бод, шол, сакта, юз нервининг шоллиги, қалтироқ, ваҳима, мохов ва шу турдаги касалликларга қарши ишлатилади.

Тарьёки форуқ юракни дадил қиласди, ҳисларни ўткирлаштиради, иштаҳани қўзғатади, меъданни маҳкамлайди, нафас олишини енгиллаштиради, юрак ўйноғини тўхтатади, йўталиб қон тупуришини йўқ қиласди, буйрак ва талоқдаги оғриқларни йўқотади, тошларни майдалаб ташлайди, ичаклардаги яраларда, жигарнинг қотишида фойда қиласди.

Тарьёки форуқнинг таркибидаги бўлаклари пневмани ва табиий иссиқликни кучайтиради, шу билан организмнинг совуқ ва иссиқ таъсирларга қаршилигини оширади.

Тарьёки форуқнинг болалик, ўспиринлик, ёшлиқ ва қариллик пайти бор. Олти ойликдан бир йилгача унинг гўдаклик пайти. Сўнг ўсаборади. Иссиқ мамлакатларда ўн йилгача, совуқ мамлакатларда йигирма йилгача ўсади. Яна ўн, йигирма йил ўзгармай туради. Йигирма ёки қирқ йилдан сўнг кучи сусая боради. Уттиз ёки олтмиш йилдан сўнг у ўз кучини йўқотади.

Бирор заҳарли ҳашарот чаққан одамга янги ва кучли тарьёки берилади. Тарьёкнинг янгилигини синовчи турли усуслар бор. Масалан, бир кишига ични сурувчи дори берилади. У сурабошлагач, тарьёк берилади. Агар ич кетиш тўхтаса, демак тарьёк янги бўлиб чиқади. Яна эркак тустовуқни тутиб уни заҳарли ҳашаротга чақдирадилар. Сўнг бу тустовуқга тарьёк берилади. Агар тустовуқ тирик қолса, демак тарьёк янги бўлиб чиқади.

Шундан сўнг Ибн Сино тарьёкнинг таркибини кўрсатади. Улар уч хил. Тарьёкнинг таркибида денгиз пиёзи, қора муруч ва афюн, гул, ёввойи сабзи ва саримсоқ уруғлари, зира ва ҳ. к. дан иборат. Жами олтмиш тўрт хил дори бор. Табиб ҳар бир доридан қанча қўшилиши ва мураккаб дорининг тайёрланиш жараёнини музассал кўрсатган. Бошқа таърифлар ҳам шундай мукаммалdir.

«Қонун»нинг бешинчи китобида тарьёкдан ташқари ийаражлар, жуваришилар, болаларнинг оғзига солинадиган дорилар, сўриладиган дорилар, суюқ ва

қуюқ шарбатлар түғрисида маълумотлар келтирилади.

Ундан кейинги бобларда бош, кўз, қулоқ, тиш, томоқ касалликлари, тананинг қуий қисмларида юз берадиган турли-туман касалликларда ишлатиладиган мураккаб дорилар түғрисида сўз боради.

АБАДИЙЛИҚ

Исфаҳон мураккаб воқеалар исканжасида қолиб кетди. Амир Алоуддавла тақдир сўқмоқларидан қоқила-қоқила ўтмоқда эди.

Ғазна ҳукмдори Султон Масъуд Ҳамадон ва Исфаҳонни ўз ихтиёрига ўтказмоқ қасдига тушди. Унинг қўшинилари тўкин дастурхонга ташланган оч ўғрилардек йўлларида дуч келган шаҳар ва қишлоқларни талай-талай Исфаҳонга ҳам етиб келдилар.

Бой ва гўзал Исфаҳон бу қароқчи галалар учун ажойиб неъмат эди. Шаҳарларни талаш бир неча кун давом этди. Подага ташланган бўрилар уни тўзитиб кўп қўйларни еганича еб, қолганини бўғиб, сўнг қайтганлари сингари газнавийлар қўшини ҳам шаҳарни талаганича талаб сўнг ҳориб изларига қайтдилар. Амир Алоуддавла Исфаҳонда яна ўз ҳокимиятини тиклади. Шайх Абу Али амир Алоуддавланинг яқин маслаҳатчиси сифатида у билан бирга эди. Аммо Шайхнинг кўнгил гулзори зоғлар хуружи пайтида пайҳон қилинган, чунки газнавийлар Исфаҳонни талаган пайтларида унинг кутубхонаси барбод бўлган. Муфаккирнинг ажойиб ижод маҳсули, охирги асари «Китоб ул-Инсоф» («Инсоф китоби») қўллэзмаси инсофсиз ғоратгарлар томонидан йўқ қилиб ташланган эди. Фақат тафаккур дурдоналари эмас, балки олмосдек кескин ирода эгаси бўлган улуғ олим бу зарбага ҳам бардош берди. Аммо руҳ ва ирода қанчалик кучли бўлмасин, жисм ичидан эзилмоқда. Мана неча фурсатки, табибни қуланж касали кийнайди. У ўзини ўзи даволайди. Кунда бир неча бор ҳуқна қилдиради. Бунинг натижасида ичакларида яллиғланиш кучайиб кетган. Шунга қарамай доно маслаҳатчи амир Алоуддавла ҳузурида бўлиши керак. Чунки Карож дарвозаси олдидағи Тош фаррош билан бўлган урушда амир Алоуддавла қўшинига мағлубият хавфи туғилиб қолган эди. Амир Алоуддавла Изаж шаҳари

сари юриш бошлаганда ҳам Шайх у билан бирга бўлди. Бу ерда Шайхда қуланж касали туфайли тутқа-ноқ юз берди, аҳволи оғирлашди. Уни Исфаҳонга қайтариб олиб келдилар. Бемор ҳатто ўрнидан турмоққа ҳам мажоли қолмаган эди. Аммо у ўзини ўзи даволашни давом этди. Бир оз фурсат ўтгач мунтазам муолижка натижасида Шайхнинг аҳволи анча яхшиланди. У энди бемалол юриб-турадиган бўлиб қолади. Яна Амир Алоуддавла суҳбатларида қатнашиб турди.

Амир Ҳамадонга юриш қилганда Шайх у билан бирга эди. Йўлда чекинган касаллик яна хуруж қилиб қолди. Шайх бутунлай кучдан кетди ва касалини энди даволаб бўлмаслигини англади. У «танамга тадбир қилаётган тадбиркор энди тадбирдан ожиздир, бундан буён муолижка фойда бермайди» дер эди. Мард инсон мардонавор ҳаёт кечириб охири ўлимни ҳам шундай қаҳрамонлик ва чидам билан кутиб олди.

Шайхурраис Абу Али Ҳусайн ибн Абдуллоҳ иби Сино ҳижрий тўрт юз йигирма саккизинчи йили (мелодий бир минг ўттиз еттинчи йил) эллик саккиз ёшида дунёдан ўтди. Унинг оромгоҳи Ҳамадон шаҳарининг ғарбий қисмидир. Шайх Абу Али ҳаёт пайтидаёқ унинг номи ва ишлари эл оғзида достон бўлиб, шоншуҳрати тўрт ёққа кетган эди. Унинг шифокор табиб сифатидаги мўъжизакор қудратига ҳамма ишонар, ҳалқ улуғ табиб ҳар қандай дардга даво топади деб эътиқод қиласар эди. Шунинг учун ѿддий ҳалқ буюк шифокорнинг ўлимига сира кўнигишни истамас, ҳалқ унинг абадияти тўғрисида кўп ривоят ва афсоналар тўқир эди.

Ана шу афсоналардан бири қўйидагичадир: улуғ табиб Шайх Абу Али ўзига ўлим яқинлашаётганини билиб маҳсус бир дори тайёрлаган. Шогирларидан бирига, мен вафот этганимдан сўнг шу доридан оғзимга қирқ томчи қўйгин деб тайинлаган. Шайх вафот этгач, ҳалиги шогирд устозининг айтганини амалга ошириб дорини аста секин марҳум айтгандек томиза бошлаган. Ўттиз тўққизинчи томизимдан сўнг марҳумнинг танаси ҳаракатгà келган ва «қўй!» деб овоз чиқарган. Шогирд қўрқиб кетган ва дори солинган шишани улоқтириб ўзи қочиб кетган. Шиша синиб, қолган дори ерга оқиб тушган. Аммо марҳум «қўй!» дешида давом этган. Ҳозир ҳам ўша жойдати тоғлар

ортидан баъзан «қўй!» деган овоз эшитилиб турар эмниш...

Халқнинг улуг табиб Абу Али Ҳусайн ибн Абдуллоҳ ибн Синонинг тафаккури қудратига ишончи шунчалар баланд эди.

Улуг олим, Шарқнинг буюк мутафаккирининг абадияти ҳам шундадир.

1980—1981
ТОШКЕНТ

АБУ АЛИ ИБН СИНО ҲАЕТИНИНР
СОЛНОМАСӢ

- 980 — Бухоро яқинидаги Афшиона деган жойда Абу Али Ҳусайн ибн Абдуллоҳ дунёга келди.
- 985 — Уларнинг оиласи Афшионадан Бухорога кўчиб ўтди.
- 985—995 — Ҳусайн ибн Абдуллоҳ Бухородаги улуг олимлар Маҳмуд Массоҳ, Исмоил аз Зоҳидий, Абу Абдуллоҳ Нотилий, Ал-Қумрий каби улуг олимларда таълим олади.
- 995—1005 — Абу Али Ҳусайн ибн Абдуллоҳ Бухоронинг улуг олим ва табибларидан бири бўлиб танилди. Бухоро амирининг оғир касалини даволашда иштирок этиб, унинг эвазига амир кутубхонасида мутолаа этмоққа руҳсат олади. Ўзининг дастлабки илмий асарларини яратди. Хоразмлик улуг олим Абу Райхон Беруний (973—1048) билан ёзишишалар олиб боради.
- 1005 — Абу Али ибн Сино Бухородан Хоразм пойтакти Гурганжга келиб бу ердаги олимлар даврасида хизмат қиласди. Асарлар ёзди. «Тиб қонунлари», «Ашишифо» асарларининг дастлабки материалларини ҳам шунда йиға бошлиди.
- 1012—1014 — Абу Али ибн Сино Фазна подшиоҳи Султон Фазнавий таъқибидан қочиб Абу Саҳл Масиҳий билан бирга Хоразмдан чиқиб кетди. Улар Эрон сари жўнадилар. Йўлда

- Масихий вафот этди. Абу Али ибн Сино Нисо, Обивард, Тус, Шиққон, Саманқон, Жожурли деган жойларда тентираб юрди. Сўнг Журжонга келди. Ундан Деҳистонга ўтди. Сўнг яна Журжонга қайтди. Бу ерда унга Абу Убайд ал-Жузжоний келиб учради. Шундан сўнг устоз Абу Али ибн Сино ва шогирд Абу Убайд Жузжоний ҳамиша бирга бўлдилар.**
- 1014** — Абу Али ибн Сино Райд шаҳарига келади. Бу ерда табиблик билан шуғулланади илмий ишларини давом этдиради.
- 1016** — Султон Маҳмуд Газнавийнинг таъқибидан қочиб Абу Али ибн Сино Райдан Казвиин орқали Ҳамадонга ўтади. Бу ерда амир Шамсуддавланинг вазири бўлиб хизмат қиласади. Сўнг ҳарбийларнинг иғоси билан фараҷон қалъасига ҳибс этилади. Бу ерда Абу Али ибн Сино «Алҳидоя» («Багишлов»), «Ҳай ибн Якзон» («Уйгоқнинг ўғли Тирик»), қуланж касали тўгрисидаги «Китоб ул Куланж» асарларини ёзди. «Юрак дорилари» китобини ёза бошлади.
- 1025** — Абу Али ибн Сино Ҳамадондан Исфаҳонга ўтди. Бу ерда умрининг охиригача яшади. «Тиб қонунлари», «Ашиифо» каби шоҳ асарларини тутгаллади. «Китоб ул Алойи» асарини ёзди.
- 1037** — Абу Али ибн Сино Исфаҳон амири Алоуддавла билан Ҳамадон сафарида бирга бўлди. Шу сафар давомида эски касали қўзғаб қолди ва вафот этди. Абу Али ибн Синони Ҳамадон шаҳарининг Гарб томонида қўргон деворининг ёнида дағн этдилар.

АБУ АЛИ ИБН СИНОНИНГ УЗ ТИЛИДАН ЁЗИБ ОЛИНГАН ТАРЖИМАИ ҲОЛИ

«Отам асли балхлик¹ эди. Нуҳ Ибн Мансур² замонида у ердан Бухорога кўчиб келади ва у даврда Бухоро атрофидаги Хурмайсан³ деган қишлоқда маъмурий ишларга бошчилик қилган. (Хурмайсан) Бухоронинг энг йирик қишлоқларидан саналар эди. Унинг яқинида Афшана деган бир қишлоқ ҳам бор. Отам ўша қишлоқдан онамга уйланиб, шу ерда туриб қолади. Мен шу ерда туғилганман, кейин укам⁴ туғилди.

Сўнгра биз Бухорога кўчиб келдик. Мени қуръон ва адаб (илмларини)⁵ ўқитадиган муаллимларга топширидилар. Ёшим ўнга тўлганда мен қуръонни ва адаб (илмларидан) кўпини ўзлаштириб олган эдим, ҳатто одамлар менга ажабланадиган ҳам бўлди. Отам мисрликлар даъватини қабул қилганлардан бўлиб, исмоилийлардан ҳисобланарди ва уларнинг нафс (жон) ва ақл ҳақидаги гапларини ва тушунчаларини эшишиб юрадим, укам ҳам шундай қиласарди. Кўпинча улар бу хусусда ўзаро сұхбатлашиб ўтиришганда мен уларнинг гапларини эшишиб, нима ҳақда гапираётганларини тушуниб юрар эдим, лекин кўнглим буни қабул этмас эди. Улар мени ҳам (ўз таълимотларига) даъват қила бошлидилар. Улар фалсафа, ҳандаса (геометрия) ва ҳинд ҳисоби ҳақида кўп гаплашар эдилар.

(Отам) мени ҳинд ҳисобини биладиган бир резаворфурушга юбора бошлиди, мен ундан (ҳинд ҳисобини) ўргандим. Кейин Бухорога Абу Абдуллоҳ Нотилий келиб қолди, у кишининг файласуфлик даъвоси бор

¹ Б а л х — ҳозирги Афғонистоннинг шимолидаги шаҳар; Термез шаҳаридан 70—80 км нарида.

² Нуҳ ибн Мансур (976—997)—сомонийлар амири. Ибн Сино Мабоҳис нафсония («Нафсоний баҳслари») деган илк фалсафий асарини шу амиррга бағишилаган. Бу асар Ҳадият ар-раис («ар-Раис совғаси») деган ном билан ҳам машҳур бўлган. Амир вафот этган йилга эътибор берилса Ибн Сино бу асарини ёзганида ҳали 17 га тўлмаган бўлиб чиқади.

³ Ҳозирги Рометон.

⁴ Укасининг оти Маҳмуд бўлган.

⁵ Адаб илмлари деганда тил қоидалари, баён, маоний, аруз ва қоғия тушунилади — ред.

эди. Менга таълим беради, деган ўмидда отам у кишини уйимизга кўчириб келди. Унинг келишидан олдин ҳам мен фиқ⁶ билан шуғулланиб, бу хусусда И smoil Зоҳид деган кишининг ҳузурига қатнаб юрар эдим.

Шу билан мен талаб қилиш йўлларини ва жавоб берувчига эътиroz билдириш усулларини, уларда жорий бўлган йўсинда билиб олиб, бу соҳани энг яхши биладиганлардан бўлиб қолган эдим.

Кейин Нотилийдан «Исағужи»⁷ китобини ўргана бошладим. У менга жинснинг таърифи ҳақида гапириб, «Жинс нима?»— деб сўралганда, «турли навлардан иборат кўп нарсаларга жинс деб айтилади», деб жавоб берилади деганида, мен унга шундай таъриф бердимки, ундай гапларни (Нотилий) ҳали эшитмаган экан. У мендан жуда ҳайратга тушди, отамга меним илмдан бошқа нарса билан шуғуллантирмасликни уқтириди.

У менга қайси масала ҳақида гапирмасин, мен бу масалани ундан кўра дурустроқ тасаввур қиласдим. Ниҳоят мен мантиқнинг оддий масалаларини у кишида ўқидим, лекин мантиқнинг нозик томонларидан у бехабар экан.

Шундай қилиб (мантиққа оид) китобларни ўзимча ўқишга киришдим, уларга битилган шарҳларни мутоллаа қила бошладим ва ниҳоят, мантиқ илмини пухта билиб олдим.

Уқлидус⁸ китоби ҳам шундай бўлди; унинг бош қисмидан беш ё олтига теоремаларини унинг олдида ўқидим. Ундан кейин китобнинг қолган қисмидаги (масалаларни) ўзимча ечишга киришдим. Сўнгра «ал-Мажистий»⁹га ўтдим. Унинг муқаддимасини ўқиб бўлиб, ҳандасий шаклларига етганимда Нотилий менга шундай деди:

«Энди уни сен ўзинг ўқиб, ўзингча ечишга ҳаракат қиласвер, кейин менга айтиб берасан, мен сенга тўғри ё нотўрилигини кўрсатаман».

⁶ Фиқҳ — ислом ҳуқуқшунослиги.

⁷ Исағужи — Исагоги — мантиқ фанига кириш; бу ерда Порфирийнинг шу номли асари назарда тутилади.

⁸ Уқлидус — Эвклид — эрамизгача 355—315 йилларда яшаган қадимги юонон математиги.

⁹ Ал-Мажистий — қадимги юонон астрономи Птолемейнинг (II аср) «Алмагест» асари.

У киши бу китобдан дурустроқ хабардор эмас экан. Мен бу китобни ўзимча ўзлаштиришга киришдим. У кишига қанчадан-қанча шаклларни тушунтириб берардим, шунга қадар у буларни билмас экан.

Кейин Нотилий мени қолдириб, Гурганч томонга жўнаб кетди. Мен эса «Фусус»¹⁰ китобини, табиаёт ва илоҳиётга оид шарҳларни ўрганиш билан шуғулландим.

Мен учун илм эшиклари очила бошлади. Кейин тиб илми билан шуғулланишга майл этдим ва унга оид китобларни ўқишга тушдим. Тиб илми қийин илмлардан эмас, шу сабабли қисқа муддат ичиди бу (фанда жуда) илғорлаб кетдим, энди ҳатто билимдон табиблар ҳам келиб, ҳузуримда тиб илмидан дарс оладиган бўлдилар. Беморларни ҳам кўриб туардим ва (шу йўсинда) орттирган тажрибаларим натижасида муолажа эшиклари менга шу қадар (кенг) очилиб кетдик, уни таърифлаб бериш қийин.

Шу билан бирга баъзан фиқҳни ўрганишда ҳам давом этар эдим ва шу хусусдаги мунозараларда иштирок этиб туардим. Бу вақтда мен ўн олти ёшда эдим. Кейин яна бир ярим йил илм ва мутолаага берилдим, мантиқ ва фалсафанинг ҳамма қисмларини қайтадан ўқиб чиқдим. Уша кезларда мен бирор кечанинг ҳам охиригача ухламас, кундузлари ҳам илмдан бошқа нарса билан шуғулланмас эдим. (Мантиққа оид) равшан ва аниқ бир қанча (қоидаларни) жамладим. Ҳар бир ҳужжатни текшираётганимда бир қанча қиёсий муқаддималарни исбот қилиб, уларни шу равшан (қоидалар) нуқтаи назаридан тартибга солардим. Кейин у муқаддималарнинг шартларини назарга олиб, улардан чиқадиган хуносага қарадим. Ниҳоят, бу масалада ҳамма нарсанинг асл моҳияти менга аён бўлиб қоларди.

Агар бирон масаладан бошим қотиб, қиёсда ўртача таърафни топа олмасам, жоме масжидга борардим ва намоз ўқиб, яратувчига ёлборардим, натижада қоронгу нарсалар менга ойдинлашар, мушкуллар осон бўлар эди.

Кечалари эса уйимга қайтиб келардим-да, олдимга

¹⁰ Ал-Фусус — бу ерда файласуф Форобийнинг «Фусус ал-ҳакам» («Фалсафанинг қимматбаҳо тошлари») номли асари ҳақида гап боряпти.

чироқни қўйиб олиб, фақат ўқиши ва ёзиши билан банд бўлардим. Мабодо уйқу босса ёки ўзимни ҳорғин сезсанам, қувватни қайтариш учун бир қадақ шароб ичилб, кейин яна ўқишга тушардим. Агар бир оз уйқуга кетсанам, тушимда ўша ўнгимдаги масалаларни кўрардим ва кўп масалалар тушимда аён бўларди. Ана шу зайлда ҳамма илмларни мустаҳкам эгаллаб олдим ва улардан инсон имконияти даражасида хабардор бўлдим. Уша вақтларда билганларим, ҳозир билганларим-чалик эди: бугунги кунгача (билимимга) бирон нарса қўшилмади.

Шу йўсинда мантиқ, табииёт ва риёзий илмларни пухта ўрганиб олдим, кейин илоҳиётга ўтиб «Ио баъда ат-табиа»¹¹ни ўқишига киришдим. Лекин унда нималар дейилганини тушунолмасдим ва китоб ёзган кишининг мақсади мен учун қоронғу эди. Ҳатто уни қирқ бор қайта ўқидим ва у менга ёд бўлиб кетди, лекин шунда ҳам мен (китобни) ва унинг мақсадларини тушуна олмасдим. Ниҳоят, умидимни узиб, бу тушуниб бўлмайдиган китоб, дедим.

Аммо кунлардан бир кун аср вақтида китобфурушларнинг олдига бориб қолдим. Ўнда бир даллол муқоваланган китобни қўлида тутганича уни мақтарди. Уни менга ҳам кўрсатди. Мен бу илмдан фойда йўқ, деган хаёлда унга қиё боққим ҳам келмай, рад қилдим. Даллол менга: «Бу китобни сотиб ол, нархи арzon — уч дирҳамга бераман, эгаси пулга муҳтож», деди. Мен китобни сотиб олдим. Қарасам, бу Абу Наср Форобийнинг ўша «Мо баъда ат-табиа» китоби мақсадлари ҳақида ёзган асари экан. Уйга қайтиб, тезда уни ўқишига киришдим. Китоб дилимда ёд бўлиб қолгани сабабли унинг мақсадлари менга дарҳол аён бўлди. Бундан жуда курсанд бўлиб кетдим ва тангри таолога шукр айтиб, ўша куннинг эртасига ёқ камбағалларга анча нарса садақа қилдим.

Бу вақтда Бухоронинг подшоҳи Нуқ ибн Мансур эди. Иттифоқо у бир касалликка дучор бўлиб, табиблар у ҳақда бир фикрга келиша олмабдилар. Кўп ўқийдиганлигим туфайли, номим улар ўртасида машҳур бўлиб қолган эди. Подшоҳ қузуррида менинг ҳақимда гапириб, ундан мени чақиришини сўрашибди. Мен

¹¹ Бу ерда Аристотелнинг «Метафизика» китоби назарда тутиляпти.

бориб (табиблар билан) биргаликда (шоҳни) даволашда иштирок этдим ва шу орқали унга танилдим.

Бир куни шоҳдан кутубхонасига киришга ва у ердаги тибга оид китобларни мутолаа қилишга рухсат сўрадим. Шоҳ менга рухсат берди. Мен кўп хоналардан иборат кутубхонага кирдим. Ҳар бир хонада китоб сандиқлари турагар, китоблар эса устма-уст тахлаб қўйилган эди. Хоналарнинг бирида араб китоблари, шеърлари, бошқасида фиқҳга оид (асарлар) турагди. Шу тартибда ҳар бир хонада маълум бир фанга оид китоблар (тўпланган эди). Кейин биздан олдин ўтган олимлар китоблари рўйхатини ўқиб чиқдим ва ундан керакларини талаб қилдим. У ерда шундай китобларни кўрдимки, кўпчилик ҳатто уларнинг номларини ҳам эшиитмаган бўлса керак. Узим ҳам уларни бундан аввал кўрмаган эдим, бундан кейин ҳам учратмадим. Шу билан ҳар бир муаллифнинг илмдаги даражасини билиб олдим.

Ёшим ўн саккизга борганда бу илмларнинг ҳаммасини эгаллаб-бўлган эдим. Уша кезларда илмни кўпроқ ёдда сақлаб қолар эдим, ҳозир эса илмим кўпроқ етилган, аммо билим — битта ва ўшандан бери менда янги бир нарса қўшилгани йўқ.

Абулҳасан ал-Арузий деган бир қўшним бор эди. У мендан бу илмларнинг ҳаммасини ўз ичига оладиган бир китоб ёзиб беришимни сўраган эди. Мен унга «Ал-Мажмуъ» (Тўплам)ни тузиб бердим, китобнинг отини ҳам шундай, «Тўплам» деб қўйдим. Унга риёзиётдан бошқа барча илмларни киритдим. Ўшанда йигирма бир ёшда эдим.

Яна бир Хоразмда туғилган Абу Бакр ал-Барақий деган қўшним ҳам бор эди, у киши табиатан фақиҳ бўлиб, фиқҳ, тафсир ва зоҳидликда ягона ва шу илмларга мойиллиги бор эди. Шу киши мендан китобларга шарҳ ёзиб беришимни сўради. Мен унга йигирма жилдча келадиган «Ал-Ҳосил ва ал-маҳсул» деган китоб ёзиб бердим. Бундан ташқари, унга ахлоққа оид яна бир китоб ёзиб бердим, номини «Китоб ул-бирр ва-л-исм» («Саховат ва жиноят ҳақида китоб») деб қўйдим. Бу икки китоб ундан бошқа ҳеч ҳеч кимда йўқ, чунки у киши улардан нусха кўчириб олиш учун ҳеч кимга бермаган.

Бу орада отам вафот этиб¹², аҳволимда ўзгариш юз берди; султон ҳузуридаги вазифалардан бирини ўз зинмамга олдим.

Кейин зарурат юзасидан Бухорони тарк қилишга, Гурганж¹³ томонга кўчишимга тўғри келди. У ерда илмларни севувчи Абул-Хусайн ас-Саҳлий вазир эди. У ернинг амири ҳузурига бордим, амир Али ибн Маъмун¹⁴ эди. Мен у пайтда эгнимга тайласон¹⁵ ва тахта-улханакли¹⁶ фақиҳлар кийимини кийиб олган эдим. Мен учун менга ўҳшаганларга етадиган миқдорда ойлик тайин қилишди. Ундан кейин зарурат Нисога¹⁷ кўчишимга мажбур қилди. Сўнг ундан Абивардга¹⁸, ундан Тусга, ундан Шиққонга, ундан Саманқонга, ундан Хурросон чегарасидаги Жожурмга¹⁹, ундан Журжонга (кўчдим); мақсадим Амир Қобуснинг²⁰ ҳузурига бориш эди. Шу пайтда Қобусни тутиб, қалъалардан бирига қамаб қўйиши ва у ўша ерда ўлди. Сўнгра Деҳистонга кетдим. У ерда қаттиқ касал бўлиб қолдим. Яна Журжонга қайтиб келдим ва у ерда менга Абу Убайд ал-Жузённий келиб қўшилди. Шу кезларда ўз ҳолимни ифодалайдиган бир қасида ёздим, унда мана шу байт ҳам бор эди:

*Мен улуғ бўлганимда кенг шаҳар ҳам сиғдиrolмай
қолди.
Қимматим ошганида харидорсиз қолдим».*

¹² Ибн Сино отаси 1002 йили вафот этади, бу вактда Абу Али 22 ёшда эди.

¹³ Гурганж — Хоразм ўлқасининг қадимги пойтахти, ҳозирги Кўхна. Урганчдан жануброқда жойлашган эди — ред.

¹⁴ Али ибн Маъмун — 997—1009 йилларда ҳукмдорлик қилган Хоразм шоҳи.

¹⁵ Тайласон — бир учи кифтга, бошқа учи кўкракка ташланиб юриладиган ўрама — ридо, кенг шарф.

¹⁶ Тахтаулханак (сўзма-сўз — энгак ости) — салланинг бир учини энгак-томоқдан ўтказиб ўраш үсули.

¹⁷ Ҳозирги Туркманистондаги қадимий шаҳар номи.

¹⁸ Абивард — баъзан Бивард деб ҳам учрайди, Жанубий Туркманистонда жойлашган шаҳар.

¹⁹ Тус, Шиққон, Саманқон, Жожурм — Хуросондаги шаҳарлар номлари.

²⁰ Шамсулмаолий Қобус иби Вушмагир (баъзи манбаларда Валимгир) Журжон амири (976—1012).

ШАЙХ АР-РАЙСНИНГ ҲАМРОҲИ АБУ УБАЙД АЛ-ЖУЗЖОНИЙ АЙТАДИ:

«Шайхнинг ўз тили билан менга айтганлари мана шулардан иборат. Бундан буёғига унинг аҳволи ҳақида ўз кўзим билан кўрганларимни (келтираман).

Журжонда Абу Муҳаммад аш-Шерозий деган бир киши бор эди. Шу киши ўша илмларни яхши кўрар эди. Шайх учун ёнидан бир уй сотиб олиб, уни ўша ерга жойлаштириди. Мен ҳар куни (устознинг) олдига бориб турардим ва «сал-Мажистий» китобини¹ ўқирдим. Шунда мен у кишидан мантиқни айтиб турсангиз, деган эдим, у киши менга «ал-Мухтасар ал-авсат фи-л-мантиқ» («Ўртacha қисқа мантиқ»²)ни айтиб турди, мен ёзиб олдим. Абу Муҳаммад аш-Шерозийга бўлса «Китоб ал-мабда ва ал-маод» («Нарсаларнинг бошланғич ва аслига қайтиш китоби») ва «Китоб ал-арсад ал-куллия» («Умумий кузатиш китоби»)ни ёзиб берди. Шайх у ерда жуда кўп китоб тасниф этди. «ал-Қонун»нинг биринчи (kitobi), «ал-Мажистийнинг қисқартмаси» ва кўп рисолалар шулар жумласидан. Ундан кейин ал-Жабал элида³ бошқа китобларини ёзди.

Мана бу унинг китоблари рўйхати:

1. Китоб ал-мажмуъ — бир жилд.
2. Ал-Ҳосил ва ал-маҳсул — йигирма жилд.
3. Ал-Ансоф — йигирма жилд.
4. Ал-Бирр ва ал-исм — икки жилд.
5. Аш-Шифо — ўн саккиз жилд.
6. Ал-Қонун — ўн тўрт жилд.
7. Ал-Арсад ал-куллия — бир жилд.
8. Китоб ан-Нажот — уч жилд.
9. Ал-Ҳидоя — бир жилд.
10. Ал-Ишорот — бир жилд⁴.
11. Китоб ал-мухтасар ал-авсат — бир жилд⁵.

¹ Юқоридаги 9-изоҳга қаранг.

² Бу ерда ал-Жузжоний айтаётган китоб Аристотель ментигининг қисқача хulosаси бўлса керак.

³ Жабал — ҳозирги Эроннинг ғарб қисмига жойлашган Ироқ-и Ажам (ёки форс Ироқи) — ред.

⁴ Бу Шайхнинг дозир ҳам мавжуд бўлган «Ал-Ишорот ва ат-танбиҳот» деган асарининг ҳикмат қисми бўлса керак, чунки «Ал-Ишорот»нинг мантиқ қисми қўйида алоҳида келган

⁵ Бу мантиққа оид бўлган «Ўртacha қисқа мантиқ» асари бўлиши керак.

12. Ал-Алоний — бир жил⁶.
13. Ал-Қуланж — бир жилд.
14. Лисон ал-араб — ўн жилд.
15. Ал-Адвият ал-қалбия — бир жилд.
16. Ал-Муъжаз — бир жилд.
17. Баъз ал-ҳикмат ал-машриқия — бир жилд.
18. Баён завот аж-жиҳа — бир жилд.
19. Қитоб ал-маод — бир жилд.
20. Қитоб ал-мабда ва ал-маод — бир жилд.
21. Қитоб ал-мубоҳасот — бир жилд.
- Мана булар Шайхнинг рисолаларидан⁷.
22. Ал-Қазо ва ал-қадар.
23. Ал-Олат ар-расадия.
24. Ғараз қотигуриёс.
25. Ал-Мантиқ би аш-шеър.
26. Ал-Қасоид фи-л-узмат ва-л-ҳикма.
27. Фи ал-ҳуруф.
28. Таақуб ал-маводиъ ал-жадалия.
29. Мухтасар Үқлидус.
30. Мухтасар фи набз би-л-ажамия.
31. Худуд.
32. Ал-Ажром ас-самовия.
33. Ал-Ишорот ила илм ал-мантиқ.
34. Ақсом ал-ҳикма.
35. Фи ан-ниҳоят ва л-ло ниҳоят.
36. Ал-Аҳд («Бурҷ» — буни Шайх ўзи учун ёзган).
37. Ҳайй ибн Яқзон.
38. Фи ан абъод ал-жисм ғайр зотия лаҳу.
39. Ҳутаб.
40. Ал-Қалом фи-л-ҳиндибо.
41. Фи аннаҳу ло яжузу аӯ якуна шайъ воҳид жав-ҳариян ва арадиян.
42. Фи анна илм Зайд ғайр илм Амр.
43. Расоил лаҳу ихвония ва сultonия (Ибн Синонинг ёр-биродарларга ва сultonларга оид бўлган рисолалари).
44. Масоил жарат байнаҳу ва байна баъда ал-ғузало («Ибн Сино билан бошқа фозил кишилар ўртасида ўтган масалалар»).

⁶ Бу Ибн Синонинг ҳозир «Донишнома» номи билан машҳур бўлган ва нашр этилган асариdir.

⁷ Рисолалар одатда кичик бўлганилиги учун ҳажми кўрсатилмаган.

45. Китоб ал-ҳавоши ала ал-қонун.
 46. Китоб ўон ал-ҳикма.
 47. Китоб аш-шабака ва ат-тайр.

Сўнгра (Шайх) Райга кўчди ва Саййида ва унинг ўғли Маждууддавла хизматига кирди. Улар Шайхнинг кимлигини унинг билан бирга етиб келган китоблардан билишди, негаки бу (китоблар) унинг қадр-қимматини кўрсатиб турар эдилар. Бу пайтларда Маждууддавлани савдои касали енгиб қўйган эди. Шайх уни даволаш билан машғул бўлди. Ўша ерда у «Китоб ал-маод»ни ёзди. Шайх у ерда то Шомсаддавланинг ҳузурига боришга отлангунича қолди, бу эса Ҳилол ибн Бадр ибн Ҳасанвайҳ ўлдирилиб, Бағдод аскарлари чекинган вақт эди. Кейин юз берган баъзи бир сабаблар уни Қазвии томонга, у ердан эса Ҳамадон тарафга жўнашга ва Қадбонувайҳ хизматига киришга мажбур этди. Шунда иттифоқо Шайх аҳволидан хабар топган Шамсаддавла уни ўз ҳузурига чақириди, чунки бу пайтда у қуланж⁸ касаллигига гирифтор бўлган эди. Шайх уни тангри таоло шифо бергунга қадар даволади, бунинг эвазига ундан кўпгина яхши совғалар олди ва қирқ кечаю қирқ қундуз унинг ҳузурида бўлиб, уйига қайтди. Шу тариқа Шайх амирнинг яқин кишиларидан бири бўлиб қолди. Сўнгра амир билан Аназ ўртасида уруш бошланиб, амир Қармисинга юриш бошлаганида Шайх уни кузатиб юрди. Амир эса енгилиб, Ҳамадон томон қайтди. Бу орада (Ибн Синодан) вазирликни қабул этишни илтимос қилдилар, у қабул қилди. Кейин унга қарши аскарлар исёни юз берди. Чунки улар (Шайхдан) ҳайикар эдилар. Улар Шайхнинг уйига бостириб кириб, уни қўлга оладилар, мол-мулкини талаб, бор нарсаларини талон-торож қиласидилар ва амидан уни ўлдиришни талаб қиласидилар. Лекин (амир ўлдиришга кўнмай, уни давлат ишларидан четлатишга қарор қиласи, шу билан ҳарбийларнинг талабини қондирмоқчи бўлади⁹.

Шу тариқа Шайх қирқ кун Абу Саъд ибн Даҳдуқнинг уйида яшириниб ётди. Бу орада амир Шамсаддавланинг қуланж касали яна тутиб у Шайхни топиб ке-

⁸ Қуланж — йўғон ичакда бўладиган касаллик, колит — ред.

⁹ Манбаларга қараганда, аскарларга маош тўлаш кечиктирилган. Бунга Ибн Сино айборд деб ўйлашган, аскар бошлиқлари унга қарши исёни кўтаришган. Якубовский А. Ю., Ибн Сина, «Материалы научной сессии», Ташкент, 1959, с. 6.

лишни сўради. Шайх амир ҳузурига келгач, амир ундан кўп узр сўради. Шундан сўнг бу амирни даволашга кириши ва унинг қошида иззат ва ҳурматда яшай бошлади, сўнг вазирлик лавозими унга иккинчи бор қайтиб келди.

Кейин мен Шайхдан Аристотель китобларига шарҳ ёзиб беришни илтимос қилдим. Шунда у: «Бу ишга ҳозирча қўлим тегмайди, вақтим йўқ. Лекин, агар сен рози бўлсанг, шундай қиласман: мен у китобга бу илмлардан нимани тўғри деб ҳисобласам, ўшалардан киритаманда, мухолифлар билан мунозара қилмайман ва уларнинг фикрларини рад ҳам қилиб ўтирумайман».

Мен бунга рози бўлдим, Шайх «аш-Шифо» деб атаган китобнинг табииёт қисмини ёзишга кириши. Бу пайтда у «ал-Қонун»нинг биринчи китобини ёзиб туғатган эди.

Ҳар куни кечаси унинг уйида толиби илмлар йиғилар эдилар. Мен «аш-Шифо»дан ўқир эдим. Мендан бошқаси¹⁰ навбати билан «ал-Қонун»ни ўқир эди. Булардан бўшаганимиздан кейин ҳар хил ашулачи ва созандалар келар ва шароб мажлиси керакли жиҳозлари билан муҳайё қилиниб, биз шулар билан машғул бўлардик. Шайх кундузлари амир хизмати билан банд бўлгани сабабли, дарсни кечалари берарди. Шу тарика бир қанча вақтни ўтказдик.

Кейин Шамсуддавла Торим томонга юриш бошлаб, уларнинг амири билан урушмоқчи бўлди. Лекин у ерга яқин қолганда амирнинг қуланжи яна тутиб қолди, бу гал унинг дарди жуда оғирлашган, касалига бошқа дардлар ҳам қўшилган эди. Чунки амир тартибсиз турмуш кечирар, Шайхнинг айтганларига қулоқ солмас эди. Амирнинг вафотидан қўрқсан ҳарбийлар, уни тахтиравонга солиб, Ҳамадон томон қайтиб кетдилар, лекин амир йўлда, тахтиравонда вафот этди¹¹.

Кейин Шамсуддавланинг ўғлига қасамёд этиш маросими бўлди¹² ва ундан Шайхни вазир қилиб тайинлашни сўрадилар. Лекин (Шайх) бундан бош тортди

¹⁰ Заҳируддин ал-Байҳақија, бу ўринда, ал-Маъсумий бўлса навбати билан «Қонун»ни ўқир эди, Ибн Зайла бўлса навбати билан «ал-Ишорот»ни, Баҳманёр бўлса «ал-Ҳосил ва ал-маҳсул»ни ўқирди (62-бет), дейилган.

¹¹ Шамсаддавла 319—1021 да вафот этган.

¹² Унинг ўғли Самоуддавла 1021—1028 йиллар орасида ҳукм сурган.

ва Алоуддавлага яширинча ҳат ёзиб, унга хизмат қи-
лиш истаги борлигини ва уни ўз яқинларига қўшишия
илтимос қилди. Ушанда Шайх Абу Голиб ал-Аттор
деган кишининг уйида яшириниб ётар эди. Мен ундан
«аш-Шифо» китобини тугатиб беришни сўрадим. (Шайх)
Абу-Голибни чақириб ундан қофоз ва сиёҳ келтиришни
илтимос қилди. У киши сўрганларини келтириб бер-
га, Шайх саккиздан бир табақ (ўлчовли) қофознинг
қарийб йигирма жузвига ўз қўли билан масалалар-
нинг сарлавҳасини ёзиб чиқди. Мана шу ерда у барча
масалаларнинг сарлавҳасини қофозга тушириш билан
икки кунни ўтказди, шунда у бирорта китобга ҳам қа-
рамади, бирорта асл манбага ҳам мурожаат этмади,
балки барчасини ёддан, ўз кўнглидан чиқариб ёзарди.
Кейин Шайх шу (қофоз) жузвларини олдига қўйганча
(сарлавҳалари) ёзиб қўйилган ҳар бир масалага на-
зар ташларди-да, уларга шарҳ ёзишга киришар эди. У
ҳар куни эллик варақ ёзар, шу тариқа «аш-Шифо» ки-
тобининг табииёт ва илоҳиёт ҳақиқидаги қисмларини ба-
тамом ёзиб тугатди, фақат «ал-Ҳайвон» ва «сан-Набот»
қисмларигина қолган эди. Яна («аш-Шифо»нинг) ман-
тиқ қисмини ҳам ёза бошлаган ва унинг бир бўлимини
тугатган ҳам эди.

Шундан сўнг Тожулмулк¹⁸ Шайхни Алоуддавла би-
лан ёзишмада уни ёмонлай бошлади, ҳатто уни қиди-
ришга тушди. (Шайхнинг душманларидан бири) бер-
киниб турган жойини кўрсатиб берди ва уни тутиб
олиб, Фараджон деган қалъага қамадилар. Шу ерда
у бир қасида ёзган эди, унда (мана бундай сатрлар
ҳам бор эди):

Кирмагим бунга аён, ўзинг кўриб турибсан,
Барча шубҳа бу ердан чиқиша.

(Шайх) бу қалъада тўрут ой қолиб кетди. Кейин
Алоуддавла Ҳамадонга юриш қилиб, уни эгаллади. То-
жулмулк эса қочиб, худди ўша қалъага бориб қолди. Бу
орада Алоуддавла Ҳамадондан чиқиб кетган эди, шун-
дан сўнг Тожулмулк ва Шамсуддавланинг ўғли Ҳама-
донга қайтдилар ва Шайхни ҳам бирга олиб келдилар.
Шайх ал-Алавий деган кишининг уйига жойлашди ва
бу ерда «аш-Шифо» китобининг мантиқ қисмини тас-
ниф қилиш билан шуғулланди. Қалъада эса «ал-Ҳидоя»

¹⁸ Амир Самоуддавланинг аъёнларидан — ред.

ва «Ҳайй ибн Яқзон» ва «Қитоб ал-Қуланж» асарини ёзди. «Ал-Адвият ал-қалбия» асарини эса у Ҳамадонга кириб келаётган кезларида ёзган эди.

Шу тариқа бир қанча вақт ўтди ва шу фурсатда Тожулмулк (Шайхга) чиройли ваъдалар бериб турди. Сўнгра Шайх Исфаҳонга кетадиган бўлиб қолди ва яширинча шаҳардан чиқиб кетди. Ушанда мен, Шайхнинг укаси (Маҳмуд) ва икки хизматкор сўфилар кийимида у билан биргаликда эдик. Исфаҳон дарвозаси олдидаги Табаронга йўлдаги кўп қийинчилликлар билан етиб келга, бизни Шайхнинг дўстлари ва Алоуддавла-нинг яқинлари ва маҳсус кишилари кутиб олдилар. Улар Шайхга маҳсус кийим ва уловлар тортиқ қилдилар. Уни Кунигунбаз деган маҳаллада Абдуллоҳ ибн Бобий деган кишининг уйига жойлаштирилар. Бу жойда зарур бўлган барча жиҳозлар ва палослар мавжуд эди. Кейин у Алоуддавла мажлисида иштирок этди ва у мажлисда ўзига муносиб иззат ва икромлар кўрди. Алоуддавла бўйруғига биноан ҳар жума куни кечқурунлари унинг ҳузурида мунозара учун ҳар хил табақадаги олимларнинг йиғилиши одат тусиға кирган эди. Шайх ҳам шулар жумласидан бўлиб, ҳеч қайси олим бирон илмда унга бас келолмасди.

Исфаҳонда Шайх «аш-Шифо» китобини тугатиш билан банд бўлди ва «Мантиқ» билан «ал-Мажистий»ни тামомлади. Бунгача эса Үқлидус (негизлари)нинг қисқартмасини ва арифметика ҳамда мусиқа ҳақидаги қисмини ёзиб тамомлаган эди. Бу ерда у математика (қисми)нинг ҳар бир китобига қўшимчалар киритди, чунки муаллиф бунга жуда катта эҳтиёж сезган эди.

Аммо «ал-Мажистий»га келганда (шуни айтиш керакки), Шайх унга «ал-Мажистийнинг охирида параллакс ҳақида ўнта теорема киритди ва астрономияга оид шундай нарсаларни киритди, буни унгача ҳеч ким амалга ошиrolмаган эди. Үқлидус китоби билан ҳам шундай иш қилди, шу билан бирга, ҳисоб қисмига ҳам чиройли ўзига хос (нарсалар) киритди.

Мусиқа ҳақидаги қисмига эса ўзидан аввалгилар бехабар бўлган кўпгина масалаларни қўшди. Натижада Шайх «аш-Шифо» номи билан танилган китобининг «Қитоб ан-набот» ва «ал-Ҳайвон» қисмидан ташқари барча қисмларни тугаллади.

Бу қисмларини эса Алоуддавла Собурхостга юриш қилган йили йўлда ёзди. Шу билан бирга, «ан-Нажот»

китобини ҳам йўлда ёзиб тугатди. Шайх бу орада Алоуддавланинг ишончли ва хос кишиларидан бўлиб қолди ва бундай аҳвол то Алоуддавла Ҳамадонга юриш қилишга қарор қилиб йўлга отлангунга қадар давом этди. Шайх ҳам у билан бирга йўлга чиқди.

Бир кун кечаси Алоуддавла ҳузурида қадимги даврдаги кузатишлар асосида тузилган тақвим — календарь бўйича иш юритишнинг зарари ҳақида гап айланиб қолади. Амир Шайхга шу юлдузлар устида кузатишлар олиб боришини буюради ва бу иш учун зарур бўладиган маблағ ажратди. Шайх ҳам бу ишга киришиб кетди. Менга эса зарур асбоблар тайёрлаш ва уларни ясадиган кишиларни ёллашни топширди. (Кузатиш вақтида) жуда кўп масалалар аён бўлди. Аммо сафарнинг кўплиги ва шу орқали туғилган тўсиқлар бу ишга зарар етказди.

Шайх Исфаҳонда «Қитоб ал-Алоий» асарини ёзиб тугатди.

Шайхнинг ажойиб хислатларидан бири шу эдики, мен йигирма беш йил у билан бирга юриб ва унинг хизматида бўлиб қўлига тушган биронта ҳам янги китобни бошдан-оёқ қараб (ўқиб) чиққанини кўрган эмасман. Аксинча, у китобнинг қийин жойлари ва мушкул масалаларинигина қарап ва шулар ҳақида китоб муаллифи нима демоқчи бўлганига дикқат қилиб, унинг илмдаги мартабаси ва (масалаларни) тушуниш даражасини билиб олар эди.

Кунлардан бир куни Шайх амир ҳузурида ўлтирас эди, шунда Абу Мансур ал-Жаброн ҳам бор эди. Тилга оид бир масала устида гап кетди ва Шайх бу ҳақда ўз мулоҳазасини айтди. Абу Мансур Шайхга ўғирилиб қарди-да, шундай дейди: «Ҳақиқатан ҳам сен файласуф ва ҳакимсан, лекин тил илмини (чуқур) ўқимагансан, шунинг учун сенинг бу ҳақдаги гапларинг қониқтиарли эмас».

Шайхга бу гап оғир ботди. Уч йил давомида у тилга оид китобларни мутолаа қилди. Хуросондан Абу Мансур ал-Азҳарийнинг¹⁴ таснифларидан бўлмиш «Таҳзиз ал-луға» («Тилни тозалаш») китобини ҳам сўрағтириб олди. Бу ерда Шайх тил билимida шундай юксак дараҷага эришдики, бу камдан-кам одамга муяссар бўлар-

¹⁴ А л-А з ҳ а р и й (895—980) — иирик араб լуғатшуносларидан.

ді. Уша пайтда учта қасида ёзди ва буларда кам ишлатыладиган, нодир сўзларни ишлатди. Кейин яна учта китоб ёзди: буларнинг бирини Ибн ал-Амид¹⁵ усулида, иккинчисини Ас-Собий¹⁶ услубида, учинчисини эса Ас-Соҳиб¹⁷ услубида яратди. Шайх бу китобларни муқовалашни ва жилдига эскирган тус беришви буюрди. Кейин шу тариқа муқоваланган китобни амирга бериб, уни Абу Мансур ал-Жаббонга кўрсатишни ва шундай дейишни илтимос қилди: «Биз бу китобни овга чиққан пайтимизда саҳродан топиб олдик. Буни кўриб ичида нима ёзилганини бизга айтиб бергун».

Абу Мансур (китобни) кўриб чиқди, лекин унда (ёзилганинг) кўпини тушуниш унга мушкул бўлди. Шунда Шайх унга қараб:

«Бу китобдаги сён тушунолмаётган нарсалар лугат китобларнинг фалон жойида айтиб ўтилган», дейди ва Абу Мансурга тилга оид жуда кўп машҳур китобларни эслатдики, ўзи уша қийин сўзларни шу китоблардан эслаб қолган эди. Абу Мансур ўшанда тил борасида унчалик пишиқ бўлмаган гапларни айтиб яхши қилмаган эди.

Энди Абу Мансур бу рисолалар Шайхнинг ўз таснифларидан эканини ва у буларни ўша кунги чеккан хижолатига жавобан ёзганини фаҳмлади. Шундан сўнг у гинани қўйиб, (Шайхдан) узр сўради. Кейин Абу Али тилга оид китоб ёзди ва уни «Лисон ал-араб» (Араб тили) деб атади. Тил ҳақида бундай китоб ёзилмаган эди. Лекин китоб Шайхнинг вафотигача ҳам оққа кўчирilmай қолиб кетди ва бирорта одам жазм қилиб уни тартибга ҳам келтирмади.

Шайх bemорларни даволаш жараёнида кўп тажриба ҳосил қилди. Буларни «ал-Қонун» китобига киритмоқчи бўлди, ҳатто буларни бўлимларга ажратиб ҳам чиқди. Лекин булар «ал-Қонун» китоби ёзиб тугалланишидан олдин йўқолиб кетди. Ушандай тажрибалардан бири мана бу эди:

Кўйлардан бир куни (Шайхнинг) боши оғриб қолди; у эса мόдда мия пардасига тушмоқчи ва натижада

¹⁵ Вафоти 970.

¹⁶ Вафоти 994, ўз даврида стилист сифатида машҳур бўлган пардан.

¹⁷ Вафоти — 995 й. Бувайҳийларнинг Исфаҳон ва Райдаги ҳокимининг вазири, тилшунос.

унда шиш пайдо бўлиши хавфи туғилади деб ўйлади¹⁸
да, кўп муз олиб келишни буюрди. (Музни) майдалаб¹⁹
латтага ўради ва у билан бошини ёпиб қўйди. То оғ-
риган жой қувват топиб ўша моддани қабул қилмай-
диган бўлгунча бу ишни давом эттириди ва натижада
тузалди.

(Тажрибаларидан) яна бири:

Хоразмда сил касали билан оғриган бир аёлга ша-
кардан қилинган гулқанддан бошқа дори тановул
қилмасликни буюрди. Ҳатто у хотин бир неча кун да-
вомида юз мани (гулқанд) тановул қилди ва ниҳоят
шифо топиб тузалиб кетди¹⁸.

Шайх Журжонда «ал-Мухтасар ал-асғарфи-л-ман-
тиқ» («Кичик қисқартирилган мантиқ») асарини ёзган
бўлиб, уни кейинчалик «ан-Нажот»нинг бош қисмига
қўйди. Бу китобнинг бир нусхаси Шерозда пайдо бў-
либ, у ердаги илм аҳллари уни ўқиб чиққан ва ундаги
баъзи масаладар ҳақида уларда шубҳа пайдо бўлган.
Кейин улар (саволларини) бир даста қофозга ёзишган;
Шероз қозиси ҳам шулар жумласидан экан. У қофоз-
лардан мунозара илми билан машғул бўлган Иброҳим
ибн Бобо — ад-Дайламийнинг дўсти Абулқосим ал-
Кирмонийга йўллаган. Унга яна Абулқосимга ёзилган
хатни ҳам қўшган. Бу икки хатни (Исфаҳон томонга)
кетаётган отлиқ қўлига тутқазишиб, уларни Шайх Абу
Алига топширишни ва ундан жавоб ёзиб беришини
еўрашни уқтирган.

Ниҳоят, жазира маассиқ куннинг қуёш оққан пай-
тида Абулқосим Шайх ҳузурига кириб келди ва унга
хат ва (саволлар ёзилган) қофозларни топширди. Шайх
хатни ўқиб Абулқосимга қайтариб берди, (саволлар
ёзилган) қофозларни эса ўз олдига ёйиб қўйди. У ерда
ҳозир бўлганлар ўзаро гаплашар, Шайх эса қофозлар-
га қараб ўлтирас эди. Сўнгра Абулқосим чиқиб кетди,
Шайх менга оқ қофоз келтиришни ва уни бир неча тўп
қилиб, қирқиб қўйишини буюрди. Мен унга беш тўп қо-
фоз тайёрладим, уларнинг ҳар тўпи чорак фиръавний
ҳажмидаги ўн варақдан иборат эди. Биз хуфтон номо-
зини ўқидик. Шам келтирилди, Шайх шароб келтириш-
ни буюрди, мени ва укасини ўтқазди ва шароб ичинг-
лар, деб буюрди. Ўзи бўлса ҳалиги саволларга жавоб

¹⁸ Бу ҳақда Ибн Сино «Қонун»да ҳам гапиради. «Қонун», III ки-
тоб, биринчи жилд, 503-бетига қаранг — ред.

ёзишга кириши. У жавоб ёзар, ора-чора ичар, шу тариқа ярим кечак бўлди. Мен билан укасини уйқу босди ва бизларни кетишга буюрди. Саҳар пайти эшик тақиллади, (чикиб) қарасам Шайхнинг юборган одами экан, мени чақиртириб юборибди. Кириб келсан, Шайх жойнамоз устида ўлтирас, олдида эса беш тўп қофоз туради.

«Мана буларни олгин-да,— деди Шайх — Абулқосим ал-Қирмонийга жўнат. Унга шуни айтиб қўй, чо-пар йўлидан кечикмасин деб, саволларига шошилинч равишда жавоб ёздим».

Мен (жавобини) Абулқосимга олиб борганимда; у ниҳоятда таажжубда қолди, чопарни жўнатиб бу воқеадан уларни хабардор қилди. Бу ҳодиса ҳалқ ўртасида бир тарихий воқеа бўлиб қолди.

Шайх юлдузлар устида кузатиш ишларини олиб боргандан ўз даврига қадар бўлмаган асбоблар ихтиро қилди. Бу тўғрида у бир рисола ҳам ёзди. Мен бўлсан саккиз йил давомида кузатув ишлари билан банд бўлдим, бундан мақсадим Батлимуснинг ўз кузатишларида айтган гапларини аниқлаш эди. Менга бу ма-салаларнинг баъзилари аён бўлди.

Шайх «Қитоб ал-ансоғ» (Инсон-китоби) деган асар ёзди. Султон Масъуд Йесфаҳонга бостириб кирган куни¹⁹ унинг аскарлари Шайхнинг уйини талон-торож қилди, бу китоб ҳам ўша ерда эди ва ундан асар ҳам қолмади.

Шайхнинг барча қувватлари кучли эди, айниқса унинг мужомаат ишида шаҳвоний қуввати энг зўр ва кучли эди. У бунга қаттиқ берилган бўлиб, бу нарса унинг мизожига ҳам таъсир қилган эди. Шайх эса ўз мизожининг кучига қаттиқ ишонган эди. Бу кайфият унда Караж дарвозаси олдида Алоуддавла билан Тош-фаррош ўртасида уруш бўлган йили қуланж касали тутганга қадар давом этди. Шайх тезроқ тузалиш ҳаракатига тушди, чунки (Алоуддавланинг) енгилиш хавфи бўлиб, бундай касал ҳолида ҳаракат қилиши қийин эди. Шунинг учун у кунига саккиз мартараб ўзига ўзи ҳуқна (клизма) қилди. Натижада баъзи ичаклари яраланиб, шилиниб ҳам кетди. (Шайх) Алоуддавла билан бирга ҳаракат қилиб шошилинч равишида Изаж томонга жўнашга мажбур бўлдилар. Бу

¹⁹ Бу воқеа 1029 йили бўлган.

ерда қуланж оқибатида Шайхни тутқаноқ тутиб қодди²⁰. Шунга қарамасдан, у ўзига-ўзи тадбир қилиб, ичак шилиниши ва қуланж қолдиқларига қарши ҳуқна қилишда давом этди. Бир кун ҳуқна қиладиган нарса ичига икки донакдан карафс (селдерей) уруғи аралаштиришни буюрди, бу билан ичидаги елларни ҳайдамоқчи эди. Уни даволаётган табиблардан бири карафс уруғидан беш дирҳам²¹ солиб юборибди. Буни у атайлаб шундай қилдими ё янглишдими, мен билолмадим, чунки мен бу иш устида бўлмаган эдим. Шу уруғнинг ўткирлигидан ичак шилиниши зўрайиб кетди. Тутқалоқ-қа қарши митридат дорисини²² ичар эди. Хизматкорларидан бири (митридатга) кўпроқ афюн қўшиб берган ва Шайх уни ичган. Бунинг сабаби шу эдикি, улар Шайхнинг кўп молига хиёнат қилган бўлиб, ўз қилмишларининг оқибатидан қўрқар ва шунинг учун унинг ўлимини кутган эдилар.

Шайхни шу аҳволда Исфаҳонга олиб келишди, у эса ҳамон ўзига-ўзи тадбир қилар эди. Заифликдан шу даражага етдики, ҳатто ўрнидан туришга ҳам мажоли келмай қолди. Лекин у ўзини-ўзи даволашдан тўхтамади, ҳатто юришга қурби келиб, Алоуддавла мажлисига ҳам қатнаша оладиган бўлиб қолди. Аммо у шундай ҳолатда бўлишига қарамай, ўзини сақламади, мужомаат ишларини кўпайтираверди. У дардан бутунлай тузалиб кетмади, дарди баъзан қайталар ва баъзан аҳволи енгиллашар эди.

Шу вақт Алоуддавла Ҳамадон томонга юриш бошлиди, Шайх у билан бирга сафарга чиқди. Йўлда ҳали Ҳамадонга етиб бормаслариданоқ унинг дарди яна қайталади. Энди у бутунлай кучдан қолганини ва касалликни даф қиломаслигини англади, натижада ўзини-ўзи даволашдан тўхтади. Шунда Шайх «Танамга тадбир қилаётган тадбиркор энди тадбирдан ожиздир, бундан бўён муолажа фойда бермайди», дер эди.

Шайх шу ҳолатда бир неча кунни кечирди, кейин у

²⁰ Қуланж оқибатида баъзан тутқалоқ тутиши ҳақида «Қонун»да ҳам айтилган. III китоб, иккинчи жилд, 202-бет. — ред.

²¹ Донак — 0,5 гр; дирҳам 2,9 гр. — ред.

²² Митрида; — таркибига афюн ва бошقا кўп нарсалар солиб тайёрланадиган мураккаб дори — ред.

ғангри даргоҳига кўчди. У эллик саккиз йил умр кўрди, вафот этган йили тўрт юз йигирма саккизинчи эди²³. Унинг қабри Ҳамадонда, унинг қибла томонидаги девор тагида».

²³ Ибн Аби Усайбиада йиллар янгилиш берилган. Байҳақий ва Ибн ал-Қифтий матнларига қараб тўғриланди.

А бу Убайд ал-Жузжонийнинг Шайх ар-Раис ҳақида айтганларининг охири мана шу.

Илова 1980 йилда «Фан» нашриёти томонидан нашр этилган «Абу Али ибн Сино таржимаси ҳоли» тўпламидан олинди. Арабчадан таржима ва изоҳлар А. Ирисовники.

АБУ РАЙХОН БЕРУНИЙ АСАРЛАРИДАН ОЛИНГАН ҮЙЛАР ВА ҲИҚМАТЛАР

Эй баҳтли ўртот, бу оламга келган ҳар бир кишининг у дунёга кўчмоғи зарурыйдир. Ва лекин ақл ҳукм қиласадики, у масалани билмаган ҳолда жон таслим қилмоғимдан кўра, билиб ўлишим яхшироқдир.

* * *

Донишманд ва олимлар хулқларидан ўрнак олиш яхши хулқни тиргизади, ёмонини йўқ қиласди.

* * *

Одамлар ўргангандан, одатлангандан ваа кўпчиликка маъқул бўлган нарсага (кўр-кўронада) қаршилик кўрсатма.

* * *

Кичик нарсага эътиборсиз қарама, унинг фойдали ўрни бор, катта ишнинг керакли жойи бор.

* * *

Хато содир бўлмаслиги учун донишмандлар қайта-қайта кузатишни ва ҳалал ётиш имкониятидан сақланишни тавсия қилганлар.

* * *

Яхши хулқ яхшилик аломатидир.

* * *

Биринчи галдаёқ ютуқка эга бўлган кишини таҳқир қилиб ўтирма.

* * *

Асоси бўлмаган фандан воз кечса ҳам бўлади.

* * *

Шубҳани аниқ ва номаълумни маълумга қўшиш биз юрган йўлга лойиқ эмас.

* * *

Тенглик қуқм сурган жойда сотқин, алдамчи эктирослар, ғамғусса бўлмайди.

* * *

Ҳар бир илм ва санъатнинг бориб тақаладиган бошланиш жойи бор. Шу бошланиш жойига яқинлашган сари, то ўзига бориб етгунча соддалашиб боради.

* * *

Билим — қайтариш ва такрорлаш мевасидир.

* * *

Эҳсон қилган кишининг миннати эҳсонини йўқка чиқаради.

* * *

Билимсиз кишиларнинг кўнгли хурофотга мойил бўлади.

* * *

Гоҳо мәълум бир ҳалқнинг айрим сўзлари ўз тили билан ўзгара борганини кўрамиз; натижада, ўша тилда фақатина оз киши фаҳмлайдиган бирмунчя бегона сўзлар пайдо бўлади. Бу ўзгариш озгина йиллар ичida ва буни тақозо этадиган нарса ү халқда юз бермай пайдо бўлади. Одамлар билмаган нарсаларига душманлик кўзи билан қарайдилар.

* * *

Ёлғон доим ростдан енгилади, у худди сув юзасидаги кўпикдек йўқ бўлиб кетади.

* * *

Агар (таржималаримизда) ишлатган сўзларимиз одатда ишлатиладиганга тўғри келмаса, маъноларига эътибор берилсин, чунки мақсад маъноларни билдиришдир.

* * *

Билимдонлар ер устининг юмалоқ экванини инкор қилмаганлар, чунки уни тошбақа орқасига ўхшаш деб исботлаганлар.

...Билмаганлигимиз сабабли билган нарсаларимизни айтмай қўйишимиз ҳам яхши эмас.

Доимо бир хил нарсага қарай бериш малоллик ва сабрсизликка олиб келади.

Сукрот ўз ҳалқи оммасининг санамларга ибодат қилишига қаршилик кўрсатиб, тилда бўлса ҳам, сайёralарни худо деб аташдан бош тортди. Шунинг учун Афинанинг ўн иккилик қозисидан ўн биттаси бир овоздан унинг ўлдирилишига фатво бердилар. Сукрот эса ҳақ йўлдан қайтмаганича ўлиб кетди.

Душманлар ҳамиша наслабларга таъна қилиш, номусларни ерга уриш, турли уйдирма гаплар тарқатишга уринадилар. Шунингдек, дўстлар ва хайриҳоҳлик қилувчилар ёмонни яхши қилиб кўрсатишга, ҳалал етадиган йўлни тўсишга, гўзалликни изҳор этишга ва яхшиликларга нисбат беришга тиришадилар. Масалан, мана шу байтни айтган киши у икки гуруҳ сифатини кўрсатган:

Розилик кўзи ҳеч бир айбни кўрмайди,
Лекин норозилик кўзи (барча)

айбларни ошкор қилади...

Бу куннинг тадбири сабабли эртанинг тадбирига эҳтиёжи қолмаган иши ақллидир (яъни у киши эртанинг тадбирини ҳам албатта кўражак).

Оммага нисбатан подшоҳда фақир бўлиб қолиш хавфи камроқ, ҳалокатга яқинлашиш хатари кўпроқ бўлади; албатта, у кам нарса (яъни фақирликдан қўрқиш) кўпаймайди ва у кўп нарса — ҳалокатга яқинлашиш хатари йўқ бўлмайди.

Хоразмликлар буржларни араблардан яхшироқ билганлар, уларнинг буржларга берган номлари уларни тасвирилашга мутасадди бўлган (астрономларнинг) қўйган номларига мувофиқлиги ва

араб (тилига) мос келмаслиги ва уларни мутасаддилар берган сувратлардан бошқа сувратлар билан тасвир этишлари гапимизнинг тўғрилигини сенга кўрсатади.

* * *

Сонлар «бир»дан таркиб топади ва «бир»га бориб тамом бўлади.

* * *

Ҳаракат бирон эҳтиёт ва зарурат учун содир бўлади; чарчаш заруратдан кейин келади, демак, чарчаш ҳаракат натижасидир.

* * *

Етилган экин орасига от билан кириб қолган киши эсини йигиб олгач, бу феълининг ёмонлигини сезиб, экинга зарар келтирмасдан чиқишни хоҳласа, отини орқага қайтармасдан ва кирган йўлидан қайтиб чиқмасдан бошқа чораси йўқ; киргандан қанча экинлар вайрон бўлса, чиққандан ундан кўра кўпроқ вайрон бўлади. Бундан бошқа унинг чораси ҳам йўқ.

* * *

Баъзи бир лафз (сўз)лар борки, у (ни қўллаш) бир дин (халиқ) ва бир тилда бемаъни бўлса ҳам, бошқа бир дин ва бошқа бир тилда бемаъни бўлмайди.

* * *

Ернинг айланиш ҳаракати назарияси астрономия фанига ҳеч бир зарар келтирмайди, балки, ерда юз берадиган ҳодисалар, унинг ҳаракати билан бирга бир текисда давом этаверади. Аммо бошқа жиҳатлардан имкониятсизлик келиб чиқади. Шунинг учун ер ҳаракати масаласи ҳал қилиниши энг қийин масалалардан ҳисобланади, қадимги олимлар ва улардан кейин етишган фозиллар унинг ҳаракат қилиш ва қилмаслиги ҳақида кўп чуқур гапирдилар. Биз «Мифтоҳу илми-л-ҳайъа» («Астрономия калиди») исмли китобда, сўзда эмас, мазмунда улардан кўпроқ гапирдик, деб гумон қиласмиз.

* * *

Одам бўйининг кичиклиги сабабли Ернинг шарлиги сезилмайди, деган сўз тўғри эмас. Чунки одам бўйи баланд тоғ қадар бўлса ҳам бир жойда туриб, ер устига қараса-ю, жойдан жойга кўчиб, ердаги бор турли ҳолатларни бир-бирига солишишириб қарай олмаса, ундан узун бўй ернинг шарлигини билишга ҳам, унинг чегарасини аниқлашга ҳам фойда келтиролмайди.

* * *

Сезувчи ва зарарсиз нарсаларга алам етказишдан паззат олувчи ҳар бир кишидан худо ўч оясин!

* * *

Эронликлар Каюмарсни биринчи инсон деб атайдилар. Унинг лақаби «Гиршоҳ», яъни «тоғ подшоҳи»дир. Баъзилар «Гилшоҳ», яъни «балчиқ подшоҳи» дейишади. Чунки у вақтда (ерда) ҳеч кимса бўлмаган. Бошқаларнинг айтишича, Каюмарснинг маъниси «тирик», «сўзловчи», «ўлчовчи» демакдир.

Каюмарсни гиршоҳ деб аталишига сабаб шуки, «гири пақла-вийча»—«тоғ» демакдир.

Каюмарс тоғларда яшаган, унинг ҳусни шу даражада чиройли бўлган эмишки, кўзи тушган ҳайвонлар унинг ҳуснига маҳлиё бў-либ қолганимиш.

* * *

Тарикшунослардан бирининг ҳикоя қилишича: Бобил ер юзида дастлаб барпо бўлган мамлакат.

* * *

Ҳар бир инсоннинг қадр-қиймати ўз ишини қойил қилиб бажа-ришида.

* * *

Сурайё тўпланиб турган олтита юлдуз бўлиб, узум шингилига жуда ўхшайди. Араблар буни «ҳамал думбаси» деганлар, (аслида) ундей эмас. Чунки бу юлдузлар Саэр, (бўржининг) ўркачи устида ту-ради... Сурайё сўзи «Сарва»нинг кичрайтирилганни бўлиб, аслида «Сарва»дан олинган. «Сарва»—«айғимлоқ» ва «сон кўплиғи» маъ-нолариидадир. Баъзиларнинг фикрича, бу (юлдузларнинг) шундай ном билан аталишига (сабаб) уларнинг ботишида ёмғир ёғиб, «Сар-ва», яъни бойлик ҳосил бўлган. (Бу юлдузлар) «нажм» деб ҳам аталади.

Батлимус (Птоломей) эслатиб (ўтган Сурайё) юлдузлари тўртта юлдуздир, чунки Батлимус кўзга кўринишида оралари тор бўлгани учун тўрттадан бошқасини кузатолмаган. Арабларча у манзилнинг Кўёш нури остида бекиниб туриш муддати қирқ кун бўлиб, энг ёмон кунлар ва йилнинг энг ваболи вақтларидир. Ал-Асадий: «Су-райёнинг чиқиши ва ботиши, албатта, бир қийинчиликсиз бўлмайди,— деган. Араб табибларидан бири: «Сурайёнинг ботишидан то чиқишигача бўлган (муддатда) сиз менга кафил бўлсин, йилнинг қолган ҳамма вақтида мен сизга кафил бўламан», — деган.

* * *

Подшоғ Доро ибн Доро хазинасида (Абисто — Авестонинг) ўн икки минг қорамал терисига тилло билан битилган бир нусха бор эди. Искандар оташхоналарни вайрон қилиб, уларга хизмат этувчиларни ўлдирган вақтида уни куйдириб юборди. Шунинг учун ўша вақтдан бери Абистонинг бешдан учи (яъни ўн саккиз наски) йўқолиб кетди. Абисто ўттиз «наски» эди, мажусийлар кўлида ўн икки наски чамаси қолди. Биз қуръон бўлакларини ҳафтияклар деганимиздек, наск Абисто бўлакларидан ҳар бир бўлакнинг номидир.

* * *

Қутайба ибн Муслим — Баҳилий хоразмликларнинг китобларини ҳалок этиб, билимдонларини ўлдириб, китоб ва дафтэрларини куйдиргани сабабли улар саводсиз қолиб ўз эҳтиёжларида ёдлаш кувватига суюнадиган бўлдилар. Узоқ замон шундай бўлгач, улар ихтилофли нарсаларини унудиб, келишиб олганларини ёдда сақлаб қолдилар.

* * *

Фахрланиш ҳақиқатда яхши хулилар ва олий феълларда олдин кетиш, илму ҳикматни эгаллаш ва имконият борича мавжуд (нокликлардан) тозаланишдир. Кимда шундай (сифатлар) топилса, ҳукм унинг фойдасига ва кимда булар етишмаса, ҳукм унинг зарарига бўлади.

* * *

Танишиш ҳамжинслик билан юзага келади. Ҳатто бу тўғрида «Шакл шаклга тортар, күш ўз шериклари билан тушади», деган гап бор. Кўрмайсанми, соқов назарида барча одамлар ҳам соқовдир. Чунки улар бир-бири билан сўзлашишларида аъзолари ёрдамида имо-ишорат қилиб, ўз истакларини билдирадиган алломатлар ишлатадилар. Агар соқов бирор ўзиға ўхшагани топса, унга шундай бериладики, бутун вужуди билан унга қарайди.

Бу эса худди тилига тушунмайдиган одамлар орасида унинг тилини биладиган битта одамни топган кишига ўхшаб кетади...

Агар бу танишиш ёмонлик хавфидан холи бўлса, у ҳолда, ...ошначилик икки бор ортади, орадан нафрат кетади.

* * *

Киши ўз меҳнат ва машақат чекишилари жараённада, гарчи у инсонларнинг энг ақллиси ва энг зийраги бўлса ҳам, ҳамиша шоду хурсандчиликни орзу қилиб, севинч келтирадиган нарсаларга мойил бўлади ва ёлгон кўриладиган нарсалардан тортинади; шу билан телбаланиб, яхши тушлар кўрса хурсанд бўлади, ҳатто фол ва мунажжимлар гапига ишонади.

* * *

Кўпчилик кишиларнинг табиатини пасткаш қиласидиган ёмон хулқдан, ҳақиқатни кўришга имкон бермайдиган омиллардан ўзни тозалагач, уларнинг исбот учун келтирган сўз ва эътиқодлари бир-бирига солиштириш билан билинади. Ана шу айтиб ўтганим ҳақиқий мақсадга етказувчи энг яхши йўл ва бунга доғ тушурувчи шак-шубҳани юшиб ташлаш учун энг кучли ёрдамчидир. Гарчи қаттиқ уриниб, зўр машаққат чексак ҳам, ўшандан бошқа йўл билан мақсадга эришолмаймиз.

* * *

Инсон ҳаётидаги зарурат, эҳтиёжлар уларнинг илмларга бўлган талабларини келтириб чиқарди. Шу эҳтиёжларга кўра илмлар ҳар кил тармоқларга бўлинди. Илмларнинг фойдаси очкўзлик билан олтин-кумуш тўплаш учун бўлмай, балки у орқали инсон учун зарур нарсаларга эга бўлишдир.

* * *

Улуғ бир қабилага мансуб бир киши Амир Исмоил Сомонийга мурожаат қилиб хат ёзибди. Шунда Исмоил унинг хатига шундай деб жавоб ёзибди:

— Аждодинг шуҳратига суюнма, ўзингга ўзинг шуҳрат топ.

Бу тўғрида бир юнонлик айтган экан: кимда ким қариндошлари сабабли ўзига обрў, яқинлик ахтарса ва ўлган аждодлари билан фахрланса, ўша кишининг ўзи ўлик ва аждодлари эса тирик саналади.

Бу худди бир шоирнинг шу айтганига ўхшайди:

Чириган суюклар ҳеч фаҳр манбаи бўлмас,
Кўтармаса эр киши ўз-ўзини юксакка.

* * *

Оlam бутун борлиғи билан юмалоқ шаклли бир жисм бўлиб, унинг чегаралари бўшлиқ ичидаги ҳаракатсиз нарсага бориб туташди. Ҳаракатсиз навъдан бир бўлак бошқа навъ ўрнинга кўчирилганда у ўша ўрнинг томон тўғри ва кўндаланг ҳаракат қиласиди.

Шу ҳаракатсиз қисмнинг атроф теварагидагилари «ҳақиқатус суфл-ҳақиқий қўйилик» ва «Ер маркази» дейиладиган ўрта жой тевараги бўйлаб фазода айланма ҳаракат қиласидилар. Ана шу мавжуд жисм тўпламига умумий қилиб — олам исми берилади.

МУНДАРИЖА

АБУ РАИХОН БЕРУНИЙ

| | |
|---|----|
| МЕХРИБОНЛИК | 4 |
| ЕР ЯРИМ КУРРАСИННИГ СУВРАТИ | 7 |
| ВИРИНЧИ МУҲОЖИРЛИК | 10 |
| ҲАМКОРЛИК МАКТУБЛАРИ | 11 |
| ГУРГОН ШАҲРИ | 13 |
| УТМИШ ЕДГОРЛИКЛАРИ | 15 |
| НИЗО | 23 |
| ГУРГАНЖ | 25 |
| ҒАЗНА. ЕР ҮЛЧАШГА ОИД АСАР («ГЕОДЕЗИЯ») | 26 |
| РАИХОНА ИЛҲОМИ | 32 |
| ДОНО МАСЛАҲАТ | 38 |
| «ҲИНДИСТОН» | 43 |
| ПОДШОҲ ВА ОЛИМ | 51 |
| СИЁСИИ УЗГАРИШЛАР | 57 |
| «ҚОНУНИ МАСЪУДИЙ» | 60 |
| ШОҲОНА ТУҲФА | 63 |
| МИНЕРАЛЛАР ТҮГРИСИДАГИ КИТОВ | 65 |
| ФОИДАЛИ МАСЛАҲАТЛАР | 69 |
| ОХИРГИ КИТОВ | 76 |
| ИНТИҲО | 83 |
| АБУ РАИХОН БЕРУНИЙ ҲАЕТИНИНГ СОЛНОМАСИ | 86 |

АБУ АЛИ ИБН СИНО

БУХОРО

| | |
|-----------------------------|-----|
| КУТУБХОНА | 89 |
| УСТОЗЛАР | 94 |
| АМИРНИНГ КАСАЛИ | 98 |
| ДАСТЛАВКИ АСАРЛАР | 101 |
| ВИДО | 106 |

ХОРАЗМ

| | |
|----------------------------|-----|
| ГУРГАНЧИ ШАҲРИДА | 109 |
| БОЗОР | 110 |
| СИЛНИ ДАВОЛАШ | 115 |
| САФАР | 117 |

ЖУРЖОН, ЖАБАЛ, РАЙ

| | |
|--|-----|
| ЗАРРИН ГИС ВА ҮНИНГ ДУГОНАЛАРИ | 123 |
| КУТИЛМАГАН УЧРАШУВ | 127 |
| ЖАВОБ | 129 |
| ТҮРМУШ КУНДАЛИКЛАРИ | 131 |
| АДҲАМ ВА ЗУЛФИЯ | 132 |

ҲАМАДОН

| | |
|---------------------------|-----|
| «ОДОБ РИСОЛАСИ» | 138 |
| СУҲБАТ | 142 |
| ЮРАК ДОРИЛАРИ | 144 |

| | |
|----------------------|-----|
| ВАЗИРЛИК | 148 |
| ТАЛАН | 151 |
| КҮРНАМАКЛИК | 155 |
| ХИЗМАТ ВА ТУРМУШ | 158 |
| «АШШИФОНИНГ МАЗМУНИ» | 163 |
| ХИЕНАТ ВА ИРВО | 166 |
| ФАРАЖОН ҚАЛЬСАИ | 169 |

ИСФАҲОН

| | |
|--|-----|
| ИСФАҲОН САФАРИ | 172 |
| ЕЗИШМА | 178 |
| «ДОНИШНОМА» ЕКИ «КИТОВИ АЛОНИ» | 181 |
| ИЖОД ОҒУШИДА | 186 |
| МУЪЖИЗАКОР ТАБИВ | 189 |
| ТИВ ҚОНУНЛАРИ | 193 |
| АВАДИИЛИК | 208 |
| АБУ АЛИ ИБН СИНО ҲАЄТИНИНГ СОЛНОМАСИ | |
| ИЛОВА | 212 |
| АБУ РАЙҲОН БЕРУНИИ АСАРЛАРИДАН ОЛИНГАН ЎИЛАР ВА ҲИҚМАТЛАР | 230 |

Қаюмов А.

Қ 33 Абу Райҳон Беруний. Абу Али ибн Сино.—
Т.: Ёш гвардия, 1987.—240 б. — (Ажойиб
кишилар ҳаёти).

Филология фанлари доктори Азиз Қаюмов ушбу китоби-
ни Ўрта Осиёлик улүғ олимлар Абу Райҳон Беруний
(973—1048) ва Абу Али ибн Сино (980—1038) ҳаёти ва издо-
дига бағишилаган. Китобда мутафаккир олимлар Беруний ва
Ибн Синонинг ҳаёт йўллари ифодали равишда баён этилган,
асосий илмий варсларининг мазмуни ва аҳамияти кўрса-
тилган.

**Қаюмов А. Абу Райҳон Беруни. Абу Али
ибн Сина.**

83.3931

«Жизнь замечательных людей»

На узбекском языке

Азизхон Каюмов

Абу Райхон Беруни. Абу Али ибн Сина

Тақризчи — тарих фанлари кандидати

Н. Норқулов

Тузувчи **С. Аҳмедов**

Редактор **Хуршид Даврон**

Рассом **С. Сайдуллаев**

Расмлар редактори **Р. Зуфаров**

Техн. редактор **В. Демченко**

Корректорлар **Ф. Заиджонова, М. Мирзараҳимовъ**

ИБ № 2181

Теришга берилди 4.03.87. Босишга рухсат этилди 20.07.87. Р 03636. Формати 84×108 $\frac{1}{2}$. № 1 босма юғозга «Литературная» гарнитурада юқори босма усулида босилди. Босма листи 7,5+0,5 вкл. Шартли босма листи 12,60+0,84 вкл. Нашир листи 12,981+0,576 вкл. Шартли кр.-отт. 13,65. Тиражи 60000. Буюртма № 598/120. Баҳоси 1 с. 10 т. Шартнома № 92—86.

Ўзбекистон ЛКСМ Марказий Комитети «Ёш гвардия» нашриёти, Тошкент, 700113, м. Чилонзор, 8-квартал кўчаси, «Правда» газетаси, 60.

Ўзбекистон КП Марказий Комитети нашриётининг Мехнат Кизил Байроқ орденли босмахонасида тайёрланган матрицадан Ўзбекистон ССР Нашриёт, полиграфия ва китоб савдоси ишлари Давлат комитети Тошкент «Матбуоти полиграфия ишлаб чиқариш бирлашмасининг 2-босмахонасида босилди. Янгийўл шаҳри, 702800, Самарқанд кўчаси, 44.